

6

10-D

51



6

28-1

80



Ex Bibliotheca
majori Coll. Rom.
Societ. Jesu

65.4.10.

17
20
C

17
6
D

6-10.F.28

Opus doctum aczue, ac elegans,
sed ab Ecclesia Romana
peculiani decreto damnatum.

Handwritten text, likely a title or heading, written in a cursive script. The text is oriented vertically and appears to be a list or index of items, possibly related to a collection or a specific subject. The handwriting is somewhat faded and difficult to decipher.

Laus

DE
PHILIPPI
MELANCHTHONIS
ORTU, TOTIVS VI-
TAE CVRRICVLO ET
MORTE,
IMPLICATA RERVM MEMO-
RABILIVM TEMPORIS ILLIVS HO-
minumque mentione atque indicio, cum
expositionis serie cohaerentium:

NARRATIO DILIGENS
ET ACCVRATA

Ioachimi Camerarii

FABERPERG.

ΑΙΟΙΣ ΧΑΡΙΣ ΕΙΣ ΑΥΤΟΥΣ ΕΝΔΕΙΞΑΜΕΝΟΙ



ΔΙΕ ΤΗΣ ΜΙΣΙΣΤΗΣ ΕΝ ΤΩ ΑΥΤΩ ΑΙΩΝΙ.



L I P S I A E

CVM PRIVILEGIO.



P R O O E M I V M
ad Illustriss. Principem ac Dom.
D. Philippum Landgrafium
Hassiae, Principem
Cattorum &c.

SÆPE ET MULTUM EGERVNT
mecum amici viuentē adhuc &
bene valente Philippo Melanch-
thone, ut, quæ de illius genere, vita,
studijs, actionibus comperta haberem,
literis mandare inciperem. Mul-
ta autem mihi nota esse arbitran-
tur, quem & celeriter in eius fami-
liaritatem peruenisse, cum ille pri-
mum sese in has regiones contulisset;
& coniunctissime cum ipso vixisse
scirent. Disputabant pertinere, me
narrante potissimum cognosci illa, ad
celebritatem necessitudinis nostræ, &
hunc fructum capere utrunq; constan-
tissimi in vera amicitia usus, hone-
stissi-



stissimum simul atque iucundissimum
 videri. Sæpe literas mihi ab eo non
 aliter quam fratris nomine inscriptas
 legerant. Sæpe viderant quam aman-
 ter ipse me coram complecteretur, &
 de me absente sermones honorifica in-
 primis mentionis audiuerant. Qui-
 bus omnibus moti, & me nostræ ami-
 citiæ hanc operam dare, & aliorum
 cupiditati conciliare istam noticiam
 æquum esse existimabant. Ego vero,
 qui & gauderem opinione de nostra
 coniunctione aliorum singulari, &
 mihi huius copiam gratularer, non
 nolui quidem hanc descriptionem ag-
 gredi & istud opusculum absoluerè,
 Sed nescio quo pacto semper interue-
 nit aliquid quo hic conatus impedire-
 tur, donec æterni Dei voluntate è me
 dio sublatus est, & migravit ex hac
 vita Philippus Melanchthon cum
 ingen-

ingente luctu & maximo dolore bonorum omnium, & occasionem mihi eripuit non modo gratificandi amicis, sed eiusmodi etiam expositionis edenda, quæ ab ipso lecta & plenior & emendatior de eius admonitionibus diuulgari posset. Cum vero post casum mortis illius vehementer urgeremur, ut tandem huius scriptionis laborem susciperemus, iniecit moram, partim animi in recente mœrore perturbatio, partim, ut verum fatear, aliæ complures opt. & doctiss. virorum hoc argumento prolata lucubrationes, inter quas, cum neq; opus esse iam putarem studio in hac parte nostro, & illis legendis sæpe acquiescerem, hebetiores reddita fuerunt cogitationes animi mei, incitatioq; pristina resedit. Itaque annototo vertente res ea fuit dilata. Sed cum & ami

ci subijcerent officij considerationem,
 et me recordatio cōsuetudinis suauissi-
 ma nostra indies quasi interpellaret,
 sensi rursus paulatim instigari me
 & impelli ad hanc operam, si possem,
 nauandam, & tempore neglecto, quo
 ad fruendum nobis communiter ista
 elaborarentur, nunc quasi exequia-
 rum hac & funeris iusta non persol-
 uere amico, ne impietatis crimen sub-
 iret, veritus sum. Itaque & officio
 meo & amicorum voluntati studui
 tandem satisfieri, ut expungatur no-
 men, ne quid debeam, secundum
 Plautum. Neque aliorum iam edi-
 ta praeclara scripta me à proposito de-
 terrere par esse duxi, ac potius veluti
 calcar hoc adhibitum mihi fuit. Quod
 enim illi fecissent ut testarentur af-
 fectionem erga mortuum suam, id
 me non facere indignum indicabam.

Quam-

Quamuis autem eadem à me refer-
 rentur quæ illi commemorauissent,
 non tamen metui ne quis hoc repre-
 henderet, ac potius cum aliud quasi
 filum animaduerneretur, diuersæ
 orationis varietatem delectatione
 non carituram esse speraui. Deniq;
 quæ alij tradidissent, ea meo quasi te-
 stimonio confirmari, & quæ reticuis-
 sent, diligentia nostra explicari neu-
 tiquam alienum visum est. Venit
 autem mihi in mentem, hoc proæ-
 mio tuam, illustrissime Princeps
 Philippe, clementiam compellare, &
 tuæ pietati, virtutiq; & in rerum
 grauissimarum atque difficillima-
 rum tractatione, forti, excelso, ma-
 gno animo veluti dedicare hæc com-
 posita à me de Philippo Melanch-
 thone: Qui & nomen haberes cum
 illo commune, & viuum clamētissimo
 A 4 favore

favore esses complexus, & multorum,
 quæ in isto scripto vel enarrantur vel
 indicantur testis & explicator esse
 posses. Scio etiam illustrissimæ clemen-
 tiæ tuæ iudicio atque sententia sæpe
 commendatum celebratumq; singula-
 rem in modum Philippi studium in
 cognoscenda, & asserenda fortitudi-
 nem, & labores propaganda cœlestis
 veritatis & opt. disciplinarum do-
 ctrina, & tuenda utraq; sollicitæ pro-
 bitatis integritatem, diligentiam, as-
 siduitatem, fidem, & mortuo fami-
 liaris desiderij dolorisq; acerbi tribu-
 tum esse honorem. Statuente illustris-
 sima consideratione tua, non ad suæ
 tantum patriæ utilitatem & decus
 fuisse natum Philippum Melanch-
 thonem, sed ad Germaniæ eximium
 ornamentum productum vniuersæ.
 Memoratur aliorum alijs locis glori-
 osa

osa procreatio, Germania autem nostra, inq³, ea illustrissima domus Palatina vicina terris tuis & coniuncta etiam affinitatis vinculo, Bretta urbs alumno Philippo Melanchthone ad omnium hominum memoriam commendata celebrabitur, & quasi in nitidissimo auro maximarum laudum aliarum, huius veluti gemma pulcherrima species enitebit: fama ortus & incunabulorum ipsius. Sane in hoc etiam genere & isto loco, quo Philippus Melanchthon fuit, illa, quemadmodum Poëta fecit de Empedocle & Sicilia:

Et si magna modis multis miranda videtur
Gentibus humanis regio, visendaq³, fertur
Rebus opima bonis multa munita virum vi:
Nil tamen hoc habuisse viro praeclarius in se
Nec sanctum magis & mirum carumq³, videtur.

Atq³, mihi est persuasum illustrissimam clementiam tuam iudicij sincere

A 5 ri &

ri & sententia incorrupta gravitate,
 conseruare benignitatis constantiſſ. fa-
 uorem erga communem ciuem, neque
 pati vt bona de eo exiſtimatio labefa-
 ctetur, & tueri ſamam abſentis huius,
 quem preſentem abs tua illuſtriſſima
 manſuetudine & maximi fieri, & cla-
 mentiſſ. affectione diligi, eſt multis
 atque clariff. ſignis declaratum. Ac-
 cidit autem huic id quod per paucis, vt
 non quieſceret inuidia, & odium poſt
 mortem ipſius, ac potius vt magis
 tum quam prius illo viuente paſcere-
 tur, carpens atq; arrodens optimi &
 innocentiff. deq; omnibus publice pri-
 uatimq; bene meriti ſanctiſſimum no-
 men, & in hoc lacerando auram popu-
 larem colligens & applauſum vulgi
 querens, nimirum qui tantum & ta-
 lem virum inſectari non dubitaſſent,
 vt ipſi aliquid fuiſſe perhibeantur. In
 medio

medio autem est huius seculi mirifica
 vanitas in affectando scientiæ pro-
 priam quandam & peculiarem fa-
 mam, quam ita demum quidam con-
 secuturos se sperant, si aliorum sim-
 plicem & planam doctrinam de-
 torquendo & inuoluendo peruerte-
 rint. Deprehenditur hoc fieri in
 omnibus ijs, quæ ingenij facultate &
 studij industria exponi solent, usque
 adeo ut nihil iam fere sine contentio-
 ne & iurgijs atque certaminibus di-
 sputetur aut enarretur. Accedit
 summa inhumanitas, vel ut verius
 dicam immanitas, conuiciorum &
 maledictorum, & pertinacium in al-
 tercādo rixarū, quæ nisi usurpentur,
 neq; autoritatem habere quicquā, neq;
 conseruari libertatē pleriq; existimant.
 Quid dicā de impudentia ac sauitia
 insolentia? Quæ leuiss. saepe de rebus
 capi-

capitales inimicitias excercet & pra-
 lia ciēt cruenta, cum pietatis & hu-
 manitatis lenitas atque verecundia
 de veritate quoque & in causis gra-
 uissimis seueritatem illa quidem, ut
 decet, adhibeat, sed remoueat iracun-
 dia atque odij importunitatem. Quae
 intuens non possum non admodum ti-
 mere, ne magna calamitas honestis &
 liberalibus studijs impendeat, euasu-
 ra ad religiosā etiam pietatis detri-
 menta. Nisi fortasse, id quod mul-
 to tristius est, ista quasi murmura
 antecedunt tempestatem extrema bar-
 baria, qua inter verborum sententia-
 rumq; dissidia, excitatis etiam bello-
 rum praelijs, unacum rebus spes quo-
 que bona penitus extinguatur atque
 intereat. Sed de hoc fiat, quod ater-
 no Deo visum fuerit, cuius misericor-
 diam imploremus, ut propitius nobis
 repri-

reprimat ira iustissima impetum, & clementer parcat veniamque det tam stulticia peccatis quam improbitatis delictis. Ad Philippum autem Melanchthonem quod attinet, haud scio an vel imprimis gloriosa sit huic maleuolorum contumeliosa obtrectatio, quæ hoc profecto efficit, ut & persona Phil. Melan. reprehendentium, & res quæ notantur, & tractationis futilitas atque perversitas scurrilisque audacia atque impudentia, eum, quem oppressum cupiunt, altius extollant, & cuius nomen infamare conantur, illius hoc reddant admirabilius atque illustrius. Non aliter quam de noctis tenebris & caligine, dici lucem atque splendorem cernere & magis conspici cernimus. Potuerunt Socratem calumnia accusationis ledere & popularis leuitatis iudicio condemnare,

Any-

Anytus, Melitus & Lycon, sed sapientiae virtutisq, existimationem tantum abest ut diminuerint, ut aucta haec ad accusatorum dedecus & ignominiam redundarit sempiternam. Nihil tale aggressum est ignauum odium & cum formidine coniuncta inuidia, neq, omnino struere machinariq, valuit in Philippum Melanchthonem viuentem. Nunc exultat importuna temeritas & excurrit vanissima iactatio huius & illius, qui, ut Graecorum vulgus Hectoris interfecti corpus fortiter confixerunt, quemadmodum cecinit Homerus, telis suis: Sic mortui Philippi Melanchthonis nomen ignominij & probris appetunt. E quibus unus ceteris ferocior glorioso voto optat adhuc superstitem esse Phil. Melan. ut in eo scilicet vim ingenij & doctrina

*Et rina copiam experiri liceat. At hic
si vultum isti nugatori suum ostendat
reuersus, profecto ipsi & gregalibus
atque socijs ad pedes statim animus
delabatur, et in fuga per aperta citatis*

*Atria, quamuis lata domus arcta ostia fiant,
quemadmodum ait apud eundem
Poëtam adhuc ignotus procis Ulysses.
Alter turbulenta istius & seditiosa
caterua & ipse signifer delicatus scur
ra, tanquam Thersites studio sibi ha
bet laceffere maledictis summos &
maximos viros, Qui nescio quos fu
nestos capiti quidem ille suo cantus
effutire fertur, sic effundens furiosas
verborum spurcorum nugas, ut ali
quos dicatur reperire qui ipsum au
diant, & voce eius etiam permulce
antur, quamuis hoc deterius non
Ille sonet, quo mordetur gallina marito,*

*Tum quidem cum immaturi et absoni
modi*

modi ab intorto gutture eliduntur. Adiunxit se his pietatis & humanitatis omnis manifestus hostis transfuga quidam, qui talia iam scripta edidit, qualia si non dico probare sed omnino ferre possunt promulgari, illi ipsi, quibus impudens os istud turpissime assentatur, sane miror. Hi inter se discordantes, in oppugnando tamen nomine & conuellenda opinione doctrinae Philip. Melan. iam conspirant, & hanc quasi in medio positam palmam habent, ut confidentissime & insolentissime inuehantur in viri, pietate, virtute, sapientia, humanitate, integritate, fide praestantissimi famam, & eius, qui de ipsis non modo optime est meritus, sed sine cuius benignitate atque beneficentia ipsis obscuris & ignotis delitescendum, & famelicis atque nudis esuriendum


endum & algendum fuisset. Verum
 etsi indignitas facinorum istorum
 tanta est, ut à potentia quoque pia at-
 que religiosa & de salute patriæ soli-
 cita, animaduertenda sit, futilitas
 tamen ineptiarum tam friuola est,
 ut, quod quidem ad Philippum Me-
 lanchthonem attinet, istiusmodi *Βαρ-
 λοχίας* contemnenda simpliciter neque
 omnino curanda esse videantur. Nisi
 putamus eruditissimi viri Theophra-
 sti causa moueri aliquem debuisse,
 quod contra illum meretricula qua-
 dam Leontium, ut accepimus, nescio
 quid libri scripsisset & emisisset.
 Nam virus istud maledicentie ne-
 farie non nocet profecto Philippo Me-
 lanchthoni, cum sibi autores huius
 ipsis, non illi, fœdissimas notas inu-
 rant ignominie & infamie, quas nul-
 la unquam dies eluere poterit, quæq;

habeant in ipsorum memoria, si qua-
 forte ad posteritatem propagabi-
 tur, perpetuo. Quos vel debita &
 saluari in pœnitendo perturbationi,
 vel ultatricibus scelerum pœnis relin-
 quentes, ita pergamus & id aga-
 mus quod instituimus, Et tuæ qui-
 dem Illustrissime Princeps Clemen-
 tissimæ pietati & sapientiæ, ut spe-
 ro inprimis, sed & alijs compluri-
 bus gratam acceptamque futuram
 narrationem & quasi historiam ex-
 ponamus, commemorantes ea, quæ
 de Philippi Melanchthonis, pa-
 tria, parentibus, genere, educatio-
 ne, vita, moribus, morte, partim
 ipsi nos præsentem cognouimus, par-
 tim explorauimus, & certo veroque
 indicio comperimus. Quibus si
 quadam aspergerentur cum nego-
 tiorum tum personarum mentiones
 huc

*huc pertinentes, vel non abhorren-
tes certe ab instituto opusculo, neque
hoc reprehensum, ac potius senten-
tia bonorum & non inhumano-
rum omnium probatum
iri, sumus ar-
bitrati.*

B 2 Philip-





PHILIPPVS MELANCHTHON. Natus est in oppido nomine Bretta, qua parte territorium Palatinatus Rheni attingit fines agri Vuirtenbergenſis, ſolem Orientem verſus, ſitq; illac iter à proficiſcentibus ex Italia Galliaq; in loca Germaniæ, quæ quoniam ad oceanum ſita ſunt quaſi decliuiâ, appellari ſolent Inferiora. Non eſt oppidum illud vel ambitu amplum vel extruccionibus magnificum, vel exquisitis operibus munitum, ſed ſitu peramœnum, & pro captu Germanorum ſatis bene atq; ſplendide ædificatum, & tam firmum vt bello Bauarico grauem Ducis Vuirtenbergenſis oppugnationem ſuſtinuerit, & virtute præſidij deſenſum ſit, neque in poteſtatem hoſtium venerit. Quinetiam eo tumultu quo plebs ruſtica atq; vrba-
na aduerſus dominos ſuos arma cœpit, cum ſeditioſi ſcirent, vndiq; multa in oppidum illud deportata conuectaſq; eſſe, potiendi ipſo cupiditate nihil non conati aggreſſiq; ſunt. Sed etiam tunc, tametſi ingens multitudo oppugnantium neque propinqua auxilij ſpes vlla eſſet, cum ſumma incolarum laude & oppidum Principi & bona dominis fuere conſeruata. Ciuium opes ſunt mediocres, & quæ parantur cum agricultura tum rebus negocijsq; inter ſe aut cum vicinis contrahendis, non commercijs externis & ingentibus

tibus lucris quæstibusq; singularibus facien-
dis. Incolæ incredibili humanitate præditi,
& moribus ingenijsq; sunt politis ac bonis.
Migrauerat eo pater Philippi Georgius du-
cta vxore, laudatj & honorati illic viri Io-
hannis Reuteri, qui & præfecturæ oppidi
munere aliquot annis functus est, filia Bar-
bara. Fuit autem Georgij pater Nicolaus,
qui Eytelbergæ sub arce domicilium habuit,
& cuius ad vicinum sacellum ibidem monu-
mentum sepulcri nunc etiam visitur. Ipse
Georgius & probitate, integritate, tacitur-
nitateq; & fide, etiam prudentia atque soler-
tia, & quod admirabili artificio opera armo-
rum elaborare sciret, quibus & defenderen-
tur contra vim aduersariorum in conflictu,
& instruerentur ad hos percellendum ster-
nendumq; qui manum siue in acie cum ho-
stibus, seu in ludis equestribus, cum suis
(quæ exercitationes tum in aulis Principum
studiosissime frequentabantur) conferere
vellent: Harum igitur artium ille peritus,
& ijs virtutibus quas commemorauimus or-
natus, in noticiam peruenit maximorum &
potentissimorum Principum, ijsq; carus fuit,
in quibus nominasse satis sit & Regem opti-
mum & bellatorem Inuictissimum Dium
Maximilianum Imperatoris Friderichi fili-
um, Quem Georgius aliquando cum glori-
oso

oso prouocatore Italo cui nomen Claudio Bataro, certamine singulari congressurum ita instruxit, & sic arma ipsius machinando parauit, vt fortissimo Viro Maximiliano victoria certa facile etiam & celeriter contineretur. Claudius enim non diu repugnans, cum, quanto omnibus rebus esset inferior sentiens ad pedes Maximiliani se abiecisset, ita in potestatem eius se tradidit. Sed paulo post orto pernicioso bello inter Palatinos & Bauaros cognatos Principes, cum Georgius patriæ suæ Principi Philippo operam officiumque quod debebat, fideliter præstaret, in primis machinarum tormentorumque ratione administranda, missus cum quibusdam Monhemium, in morbum incidit insanabilem, Et si Princeps in curando eo summum studium diligentiamque adhibuit, credebaturque puteo, vnde aqua ad cotidianos usus haurienda fuerat, veneno infecto, malum hoc illis accidisse. Sane qui cum eo aduenerant intra vertentem annum omnes mortui fuere, Georgij vita remedijs & exquisita curatione ad annum quartum producta. Decessitque tandem & ille cum ante dies XI. socerum amisisset, & ipse totum quadriennium vixisset perimbecillis. Cæteram autem vitam sine querela omnium, & cum laude plurimorum, in primis religionis amans, & profana omnia

dicta ac facta fugiens, & neque serio neque ioco verbis rebusq; designans quicquam, quod vel minimam impietatis speciem haberet, aut propter leuitatem esset vituperandum, vel etiam à grauitate veritateq; recederet. Ante omnia falsitatem mendaciaq; & fraudes auersatus fuit, multa etiam pietatis studio & amore obseruans, quæ indicanda non putauimus, quod aliquorum opinione superstitiosa videri possent. Tunc Philippus habuit annos XI. quem susceptum ex filia cum fratre vno Georgio minore annis non prorsus quatuor, & sororibus tribus, auus uoluerat tam ipsum quam fratrem apud se educari. Mater vidua mansit annis totis XII. postea cum Philippum duxisse vxorem audisset, non sine quadam offensiuncula nupsit iterum, viro honestissimo ciui Bretano. Fœmina fuit illa valde prudens atque pia, quam & nos vidimus in patriam proficiscentis Philippi comites anno Christi, M. D. XXIIII. & eam, quam diximus, esse perspeximus. Cum in ludum publicum mitterentur pueri illi fratres vna cum auunculo & ipso puero, cepit tum lues fœda passim homines in Germania primum inuadere, & miserum in modum non solum excruciendo sed mutilando & membra depascendo affligere, quam Hispanicam nonnulli, plerique

que Gallicam nominabant. Quo malo cum Magistrum Iudi auus puerorum laborare rescuisset, contagionem metuens, nepotes cum filio domi apud se retinendos duxit, ubi maturatione ætate iuuenis opera primis literarum elementis curauit erudiendos. Nomen illius fuit Iohannes Hungarus quem grauem annis vidimus Phorcæ, & audiuius præclare concionantem de filio Dei Domino nostro Iesu Christo, & puram Euangelij doctrinam explicantem Principibus & populo frequenti, virum optimum atque integerrimum. Eminuit autem statim in Philippo præstantia ingenij, quod & celeriter perciperet atque comprehenderet quæ tradebantur, & fideliter meminisset, & liquido exponere illa sciret. Vtq; sit in generosis animis, in puerilitate etiam ætate admodum quiescere non poterat, sed quærebat ubiq; aliquem cum quo de auditis disputaret. Ea erant nimirum præcepta artis Grammaticæ & initia sermonis latini. Itaque & circuire & vestigare aduenas scholasticos qui tum peregrinari consueuerant, & maxime gaudere si qui adultiores offerrentur, quos sæpe animaduersum fuit cum multorum admiratione & pudore eorum à puero Philippo mirifice exagitari. Itaque omnes de índole tali bonam spem conceperunt, & paulo post mortuo tam auo

6 VITA PHILIPPI
quam patre, paucorum vt diximus dierum
interuallo, matris propinquorumq; consili-
um ac voluntas in studijs pijs & honestis edu-
candi filium institutum aui persecuta est.
Quamquam autem docilitas in Philippo tan-
ta, quanta in nullo altero ostenderetur, & si-
mul acris animi & mentis sagacis præclaris-
sima signa perspicue cernerentur, & vis in-
genij ingens tunc adeo appareret, nihilo ta-
men minus summa elucebat suauitas, qua
omnium facile fauorem sibi ille conciliabat,
& declarabatur futurum, vt vehementior
naturā ipsius non ad austeram neque tristem
seueritatem deferretur, sed ad grauitatem le-
nitate comitateq; cōditam euaderet: id quod
euentus comprobauit. Nam feruentior in-
citatioq; in eo animus immitis aut sæuus nō
fuit, cumq; esset ad iracundiam pronior, ni-
hil tamen fecit vnquam commotus quod in-
signem haberet deformitatem, aut omnino
magnopere culpandum esset. Pronuncia-
tio nonnihil balbutiens non modo tanquam
praua colloquentibus molesta & iniucunda
non fuit, sed puerilem loquacitatem visa et-
iam est decere. Quod vitium tamen proce-
dente ætate attentione & cura sic emendauit,
vt vix tenuissima illius vestigia, verba præ-
sertim eo accurate faciente, apparerent atq;
deprehenderentur. Illis temporibus litera-
rum

rum ludus Phorcensis celebrari præ cæteris, cuius Magister esset Georgius Similerus patria Bimpinensis, qui habebatur & erat, pro illius ætatis captu, doctus & eruditus imprimis. Iam enim plurimis in locis melius quam dudum pueritia institui, & doctrina in scholis vsurpari politior, quod & bonorum autorum scripta in manus sumerentur, & elementa quoque linguæ Græcæ alicubi proponerentur ad discendum, cum seniorum admiratione maxima & ardentissima cupiditate iuniorum, cuius vtriusque tum non tam iudicium quam nouitas causa fuit. Similerus, qui postea ex primario Grammatico eximius Iurisconsultus factus est, initio hanc doctrinam non vulgandam aliquantisper arbitrabatur. Itaque Græcarum literarum scholam explicabat aliquot discipulis suis privatim, quibus dabat hanc operam peculiarem, vt quos summopere diligeret. In omnibus autem Philippus Melanchthon ita proficere & eas facere progressiones, & ita se erga omnes communicatione eorum, quæ ipse percepisset & teneret, gerere, vt nemo non eum & laudaret & amaret. Habebat socios studij fratrem Georgium & Iohannem auunculum, quorum Georgius in hoc cursu non permansit, & in patria præcipuos honores ciuitatis suæ consecutus est & gessit.

Quæ,

Quæ, cum hæc scribere instituissemus, ipsius maxime consilio opeq; nitebatur, fungentis annis multis præfecturæ munere: Iohannes Spirensi collegio ad S. Crucem præfuit, quem ibi & nos aliquando vidimus, virum dignitate & humanitate excellentem. Viuebant hi apud sororem Iohannis Reuchlini, quod quadam cognationis necessitudine familiæ illæ coniungerentur. Eueniebatq; sæpe ut Reuchlinus patriam & suos viseret, qui in gubernatione terræ Vuirtembergensis tum vna cum alijs paucis auctoritatem summam atque grauissimam obtinebat. Solebat igitur in puerorum studia ille inquirere, & de ijs, quæ sciret tradi eis in ludo, percontari. Longe autem Philippo omnibus responsionibus præcellente, Reuchlinus indolem pueri exosculatus, & spe singulari de illo concepta, libellos quosdam ei donauit, inter quos plenior præceptorum Grammaticæ Græcæ tractatus & liber fuit, comprehendens interpretationem Latinam præcipuorum Græcorum vocabulorum, quæ opera Lexica vocantur. Hac copîa instrumenti auctus Philippus, ipse sese indies magis magisque incitare, & vtriusque sermonis Græci latinique vberiore comparare facultatem. neque scribere tantum aliquid soluta oratione, sed tentare etiam versuum compositionem. Et obla-

tis aliquando factis à se quibusdam Reuch-
 lino, per iocum donatus ab hoc fuit pilcolo
 puniceo, quo insigni, vt fert consuetudo,
 Reuchlinus fuerat decoratus, cum titulus ei
 Doctoris decerneretur. Philippus vero le-
 tus dono, & veluti generosus equus ornatu
 gaudens, prioribus semper aliquid adijcere,
 & cognitionem partam cumulare. Tunc &
 æqualibus suis scriptum quoddam ludicrum
 Reuchlini instar Comœdiæ illis diebus edi-
 tum, ediscendum distribuit, & suas cuique
 partes assignauit, vt coram Reuchlino ad se
 reuerso fabula ea ageretur. Quod etiam fa-
 ctum est cum summa ipsius voluptate atque
 læticia. Quando & Philippi nomen, quod
 haberet ille familiæ significans solum nigrum
 germanico sono, in græcum Melanchthonis
 mutauit, sicut ipse à fumo deminutum suum,
 ita ab Hermolao Barbaro aliquando in Ita-
 lia conuersum, Capnionis esse voluerat.
 Hunc conatum mutandi nomina familia-
 rum, memini audire doctos & præstantes di-
 gnitate viros, qui reprehenderent, quod isto
 pacto familiarum noticia quasi obteri vide-
 retur. Sed sunt omnino quædam ita aspera
 & veluti horrida, vt lingua Græca latinaue
 exprimi neque possint neque debeant, Quæ
 si literis quibusdam vel adiectis vel detractis
 quasi dolare, vt leuiora fiant, aliquis velit,
 quem

quemadmodum de barbaris omnibus fere fecerunt veteres, nihilo ille minus appellatorem obscuram & suis ignotam hoc modo redditurus sit, quod à mutatione illa interpretationis nihil iam differet. Sed de his nunc disputare alienum fuerit. Phorcæ (quam latinis verbis contractis Portam Herciniæ esse cruditi volunt) Philippus pene annis duobus mansit. Et inde ad pleniorē ingenij cultum & quasi mercatum doctrinæ vberiorē cura matris ac propinquorum missus est Eytelbergam in patriam auitam, vbi & sedes Principum & celebris Academia esset. In qua doctissimorum virorum in omni genere disciplinarum copia florente, Philippus iam ætate ephebus statim eam de se opinionem commouit, vt alijs quoque docendis idoneus haberetur. Ibiq; tum ille & exercendi stilum scribendiq; rationem suo exemplo suscitare, & studio industriaq; admirabili cum sibi fauorem caritatemq; omnium ordinum atque hominum conciliare, tum animos æqualium ad bonas literas artesq; maiore assiduitate & diligentia colendas impellere. Vixit Philippus Eytelbergæ apud clarissimum illo loco & tempore virum D. Pallantem, cuius sapientiam virtutemq; & excellentem humanitatem atque beneficentiam, cum perquam honorifica mentione eius, quotiescunq; hæc inci-

incidisset, verbose solebat prædicare, & ita
 vt facile appareret, memoria ipsum consue-
 tudinis istius admodum delectari. Huius
 viri prudentissimi consilij aula multis annis
 feliciter vsa, & ope Academia sustentata, or-
 nata, aucta est. Qui obiit mortem Anno
 Christi M. D. XII. XVI. Calend. Sextil. se-
 pultus Eytelbergæ in vrbis primario templo
 cum elogijs epitaphiorum vtriusque linguæ
 versibus perscriptorum, ex quibus latinum
 distichum hoc inferendum putauimus :

Consilio pollens, largus rerum, ore disertus

Doctus erat Pallas, hac tumulatus humo.

Dedit Philippus Melanchthon ibidem illis
 temporibus operam instituendis duobus fi-
 lijs Comitris Ludouici Leonistenij generosæ
 profapiæ & indolis pueris, & familiariter vs-
 sus est Petro Sturmio Argentoratensi Iacobi
 fratre nobilitate generis, virtute & sapientia
 clari religiosæq; pietatis amantissimi, Bim-
 phelingi, quemadmodum accepimus disci-
 pulo. Eytelbergæ etiam Philippus quasi ti-
 rocinium quoddam deposuit scholasticum
 & Bacularius est factus. Quo nomine hono-
 rum in Academijs initia appellantur, natus
 annos ferme XIII. Cum autem animi in
 discendo impetus & honesta ambitio insti-
 garet eum, qui modo excessisset ex Ephebis,
 vt altius honoribus scholasticis ascenden-
 dum

dum putaret, & ad maiorem dignitatis gradum contendendum, petendumq; Magistri titulum, aduersata tum voluntati ipsius sententia fuit præcipuorum quorundam, quod ætati isti tribuendum tantum esse negarent. Quo impedimento cursui cogitato moraq; illata offensus, & quod tentationes febriles crebro sentiret, locum & proposito suo & valetudini aduersum relinquere statuit. Ea tempestate Tubingensis Academia in Vuirtempergenſi regione (quam Charitinarum vetere nomine fuisse coniectura est) fama fieri indies maior atque melior. Quæ optimi & illustrissimi Principis Eberhardi cognomenro probi & Barbatî, paterna cura præclarissime fundata & collectis viris doctrina varia præstantissimis, condita fuerat ante annos triginta sex. De hoc Principe, cum eam rem ageret & Academiam Tubingæ collocare vellet, accepimus id quod & memorabile & non abhorrens ab hac narratione, duximus referendum. Est sane Academia institutio res magna & magnificienda, sed superiorum tamen temporum de his existimatio multo optima & præclarissima fuit. Interrogatus igitur tum à quodam externo Princeps Eberhardus, cuius opera in eo quod perfici volebat vti cogeretur: Quidnam regionis & terræ haberet? quod tanto ornameto

mento dignum esse iudicaret : respondisse fertur : Cætera omnia esse mediocria, vel etiam infra mediocritatem, vno autem com- modo atq; fructu suæ regionis se merito glo- riari, Quod, in quamcunq; partem illius so- lus forte ipse delatus, si acquiescere liberet, tuto & cum omni securitate in cuiusvis ex- suis, qui obuiam factus esset, sinum deponere caput & somnum capere posset. Idem au- diui aliquando eundem dixisse in Principum quodam confessu, cum alius alia suæ terræ bona extolleret narrando. Erant Tubingæ tunc & Theologi, vt illis temporibus, exi- mij. Erant Iurisconsulti quorum nunc etiam nomina illustria & opera laudabilia in ore & manibus sunt eorum, qui hæc studia tractant. Humaniorum autem studiorum & Philosophiæ professores eos semper ha- buisse Tubingam constat, quorum eruditio- nem & scientiam totam Germaniam exco- luisse scimus. Ex quibus tunc, cum eo Phi- lippus venit, viuentes & operam nauantes docendo, Iohannem Stofelerum & Francis- cum Stadianum, quem & coluit & dilexit Philippus inprimis, & Henricum Bebelium, quem mortuum versibus Epitaphijs Græcis Philippus ornauit, Et Iohannem Brasic- anum nominasse in præsentia satis habuimus. Cum autem natura atq; voluntas Philippum

ad commercium cum multis, id est bonis literis & erudita doctrina, incitaret, tanta tamē fuit in eo vis ingenij & ardor discendi, ut nullarum rerum cognitionem non attingendam atq; comprehendendam putaret. Itaque & Theologos & Iurisperitos & Medicos audire, & libros omnium professionum illarum inspicere, & vndiq; quandam scientiæ quasi possessionem occupare, & non tam laudem venari, quam vsum sibi fructumq; cognitionis acquirere. Ad Theologiæ tamen studium maxime propensa esse cupiditas illius, quod religiosæ pietatis amore flagraret, sententia hac confirmata in puero paterna maternaq; educatione atq; disciplina. Theologiæ tum materia non sacræ literæ & scripturæ diuinæ erant, sed quædam obscuræ & spinosæ intricatæq; quæstiones. Quarum nugatoria subtilitate exercebantur & defatigabantur ingenia. Philippus autem Melanchthon factus bonarum artium Magister & primus, declaratis tum simul
XI. renunciatus, cum illo etiam in genere tenui & aspero nulli non modo qui pari ætate esset, sed ex prouectioribus quoq; atq; adeo senescentibus, cederet, veritatem tamen querere & amplecti inprimis, & politiori doctrinæ operam dare. Animaduvertebatur librum habere in manibus in templo & inter
opera.

operationem sacrorum. Cum grandior quibusdam ille videretur ijs, quibus preces descriptæ continentur, quicquid more in templis usurpantur, malcuoli quidam rumusculos sparserunt, legere Philippum nescio quæ scripta tempori & loco illi non conuenientia. At ipse nactus fuerat sacrorum bibliorum codicem, tractabili forma chartis minutoribus paulo ante primum à Iohanne Frobenio Basileæ impressum, quibus legendis quam tunc adeo cœpit, eam constantissime dare operam in tota sua vita persequeretur, & talem librum ad omnes conuentus publicos postea detulit, secumque semper habuit. Cumque ascriberentur ab eo in chartis passim vtilis & præclaræ sententiæ veterum, quæ ei illorum scripta legenti potissimum arrisissent & nonnullis in locis explicationes quædam, quibus contigerat libros istos videre, ab his copia ipsorum maxima cupiditate expectebatur. Itaque cum esset Philippus natura liberalissimus & ad gratificandum cunctis quibus posset rebus procliuus, sæpe ablatos istos suos & donatos aliquibus libros comparatis alijs mutauit. Sed hæc postea acciderunt. Illis temporibus vir prudentia & Iuris publici scientia celebris colligere ceperat historias & exponere tempora rerum memorabilium gestarum ab origine prima mundi, ei

di, ei nomen fecerant Naucleri, quod in familia nomine Germanici nautæ significatio esset, qui sunt vergæ. Librum autem hunc exprimendum susceperat Thomas Anshelmus, qui Typographicam officinam habebat Tubingæ. A quo perfectum fuit, ut & illius scripti & aliorum, quæ à se ederentur, curam respectumque Philippus susciperet, quo prodirent correctiora. Is tunc & in hoc opere Naucleri partim disponendo, partim augendo, partim etiam retexendo id præstitit, ut lectio libri istius à plurimis expeteretur & fructu voluptateque non careret. Iisdem ferme annis, quibus Philip. Melanch. Tubingæ mansit, numero vi. luctatus est Iohannes Capnion cum monachis, à quibus propter sententiam dictam de libris Hebraicis grauiissime vexabatur. Ea erat familia Domini, & Colonienses quidam Theologorum titulo superbientes, qui in Capnionem se plane hostiliter inferebant. Iudicium fiebat Romæ, & Capnio cum causam facile defenderet, aduersariorum tamen opibus & potentia admodum premebatur: tametsi illi neque patroni viri summi deessent, & studia omnium, qui amabant aut saltem videri volebant amare eruditam doctrinam, præstarentur tam prolixè vel effusè etiam, ut alacritate cum ista offensum fuisse constet. Qui ipse
vir

vir optimus, quamuis cuperet innocentiam suam tutam esse, & intelligi quam atrox sibi fieret iniuria, sic tamen optabat vim à se depelli ne læderentur vlli, vtque inimici non vel maxime meritis conuicijs sed veritatis simplice oratione refutarentur. Ingrata etiam erat prudentiæ & grauitati illius senescentis, iuuenilis leuitatis exultatio, & hanc non tam facto quam exemplo nocere posse perspiciebat. Sed nihilominus, qui, cum maxime fauerent & quam optime cuperent Capnioni, multo peius oderant importunitatem eorum, quos Capnionis euersionem prætere animaduertetur, oppressioni nascentis doctrinæ eruditæ vniuersæ (hanc enim quod ipsi penitus ignorarent metuentes existimationi suæ, exoriri & conualescere iniquissimis animis patiebantur & ægerrime ferebant) His igitur infesti illi studiosi politionis doctrinæ, causam Capnionis suam ducere, & illius aduersarios omni genere scriptorum infamare, tam deridentes & eludentes futilitatem quam insectantes & increpantes improbitatem. Inter quos princeps, Ulrichus gente Huttenus, patria Francus, ordine eques, ingenio acerrimo & animo confidentissimo, literis perquam eruditus, & litigantes monachos cum Capnione varie exagitaui, & illam factionem tum quidem ve-

hementissimis scriptis, sed aliquanto post armis quoque expeditis, adortus est. Huius est carmen triumphale victoriae Reuchlini cum pictura etiam in illius conspirationis gregem contumeliosa, ubi unco trahitur quidam, qui cum Iudæus aliquando fuisset, suam operam in Capnione lædendo atque euertendo, conductam illam quidem magna, ut credebatur, pecunia, dedisset. Sed de Capnione extat narratio Philippi Melanchthonis, quam curauit quodam in conuentu scholastico Vuittebergæ, ut solebat, recitandam. Vnde si quis de Capnione plura cognoscere cupit, petere ea poterit. Nam mihi hoc scriptum etsi non alienis, verbosis tamen & longis huiusmodi expositionibus complere non libuit. Capnioni igitur tum rebus & dubijs & valde difficilibus ac molestis, assidue & fideliter præsto fuit Philippus Melanchthon describendo potissimum ea quibus defensio causæ continebatur, & quæ ad iudicium mitenda erant, & quicquid omnino ad Capnionis innocentiam declarandam & conseruandam salutem dignitatemque (quæ perebatur utraq;) pertineret, omnib. modis adiuuando. Neque Philippus ad Capnionem modo Stugardiam, ubi hic habitabat, crebro accedere, sed Capnio quoque ipse sæpe venire Tubingam ad Philippum, & cum eo in scholastico

contu-

contubernio versari atq; pasci, & iucundissime post alios necessarios & ad se pertinentes sermones, de communibus studijs & liberali institutione confabulari. Etli enim Capnio non fuit literis elegantioribus penitus excultus, & doctissimum tamen virum & liberalium disciplinarum cupidissimum fuisse eum constat. Hebraicæ autem linguæ peritissimum. Cuius prorsus senem doctrinam ipsum profiteri neq; puduit neq; piguit. Hæc tempora inuenti & negocia consideranti vis mihi quædam inuicta fatorum ob oculos versata est, id est, Quid eueniat diuini iudicij sententia iam lata, de rebus hominibusq; in hac vita. Tunc enim & illas præcipites ferri, & horum omnes rationes cunctaq; consilia conturbari, & conuertere in contrarium, licet videre. Quo autem progressa fuerit quorundam insolentia atq; importunitas prætendentium sanctitatem atque obseruationem religionis, neminem fugit, cum tamen re iam pridem penitus amissa, species quoque euanesceret, vel etiam mutata ab illa grauitate & seueritate cum maiore indies deformitate & contaminatio appareret. Cum autem deberent ij, quorum tunc res agebatur maxime, & pericula impendentia prouidendo cauere, & causas illorum attendendo auertere, Tanta fuit cæcitas, vt & has

ruendo impellerent, & illa ultro commou-
rent atque accerferent. Non enim ipsi vitia
sua, quæ neq; occulta amplius essent neq; o-
mnino tegi possent, corrigere conati, sed de
his dimicare etiam, & prauitatem turpitudi-
ne cumulare non sunt veriti. Habebant au-
tem persuasum tantas esse vires eamq; poten-
tiam suam, vt euerti aut percelli labefacta-
riq; nulla impressione nulloq; impetu pos-
sent. In quo opinio eos sua adeo est frustra-
ta, vt leuissima aggressione illa tanta moles
statim sic concussa sit, vt postea non magno-
pere alijs machinis ad conuellendum opus
esset, sed ipsa, cum semel ruere cepisset, per
se prolaberetur atque concideret. Quid
enim magis contemptum & nihili haberi, ex-
oriente bonarum literarum & artium studio,
& liberalium ingeniorum facultate? Quam
parum in istis momenti & ponderis plerisq;
visum? Nedum metuerent aliqui ab his de-
trimentum aut damnum confirmatæ barba-
riæ. Neglecta igitur vel potius despecta paru-
a & puerilia hæc, in elatione animorum &
superbia immensa, ruinis, quæ & factæ sunt
& nunc etiam impendent occasionem dede-
runt. Quæ illi, cum & cupide admittere &
libenter excipere, & studiose amplecti oportu-
iisset, repudiarunt insolenter, & abiecerunt
fastidiose, & contumelijs omnibus insectati
fue-

fuerunt. Nunc igitur meritas pœnas dant non stulticiæ sed vesaniæ suæ, & si perrexerint vrgere propositum, exitio suo perniciem Reipub. videntur esse implicaturi. De quibus quem non docent ea, quæ accidisse constat, is non moueretur mea certe disputatione. His igitur omiſſis institutam expositionem proſequemur. Erant tum studia Philosophiæ, qua Theologia inuoluebatur, ſciſſa in duas præcipue partes. Quarum vna veluti Platoniam de Idæis ſeu formis abſtractis ſeparatisq; ab ijs, quorum moles corporum ſenſibus ſubiiceretur, ſententiam tuebatur. Hæc de eo quod generalis cogitatio comprehendit, vt Hominem, Animantem, pulcritudinem, etiam ſpondam atq; menſuram, quia natura & res ſingularis conſtituitur, Reales iſti ſunt nominati. Altera pars Ariſtotelem magis ſequens, ſpeciem iſtam de ijs, quæ ſuam naturam ipſa haberent, vniuerſis colligi docens, & concipi intelligendo notionem hanc ex ſingulis quibuſdam exiſtentem atq; contractam, neque naturas eſſe has per ſe ipſas priores ſingulis, neque re ſed nomine tantum conſiſtere: Nominales appellati fuere & moderni. Habuitq; vtrumq; quali agmen ſuos ductores & auctores quorum ſectam ſequi placuerat. Atq; non ſolum contentiones & iurgia inter diſ-

C 5

ſenti-



sentientes, sed dimicationes etiam ac pugnae commissae fuerunt, interdum concertationibus non tantum pertinacibus verborum, sed manuum quoque violentis. Haec dissidia & Tubingensem Academiam inuascrant, contubernio bonarum artium & Philosophiae studiis destinato, in duo quasi castella diviso, ex quibus de opinione sua factiones illae acerrime praeliantes, inimicitias graves exercebant. Philippus qui certam docendi disserendique rationem probaret, & Aristotelica in hoc genere primas tenere intelligeret, magnificas & splendoras & amplas alteras disputationes non amabat. Quamvis autem in verborum contentionibus suam sententiam ita assereret, ut aduersantes facile refelleret, Id tamen eximia humanitate & parata omnibus, qui uti vellent, opera perfecit, ut sua auctoritate inter sectas illas odia restinguerentur, & quamvis studia discreparent, voluntatum tamen maneret coniunctio. Alijs etiam officijs plurimis contubernium interdum rebus difficilibus fulciuit, & sustentavit consilio opeque sua. Nam curatio in eo, consuetudine Academiae eius quoque fuit, qui & optimarum artium disciplinarumque esset Magister, & publicae doctrinae munus gereret. Postquam annos sex confecit Tubingae discendo & docendo cum magna laude omnium,

um, conuentus fuit ordinum Imperij Romani Augustæ Vindelicorum, quem egit Maximilianus Imperator postremum, Anno Christi M. D. XVIII. Nam proxime secuti anni initio ex hac ille vita migrauit. Ad hunc conuentum venit & Dux Saxonum Friderichus vnus ex Septemuiris, penes quos est delegendi Imperatorem Rom. potestas. Accessit & Martinus Lutherus, qui ineptias & ludibria in doctrina Ecclesiastica cum exitiosa impietate coniuncta notasset & reprehendisset, de quæstu quodam redimendi veniam factorum faciendorumq;, & hanc mortuis quoque conciliandi, quas vocarunt indulgentias. Non enim tolerabile quibusdam videbatur, ausum esse liberam aliquem vocem emittere, & quæ egissent ij, in quorum manu arbitrium esse statuebatur rerum diuinarum & humanarum omnium, improbare. Voluerat autem Dux Friderichus sedem esse Academiæ (sic enim vsitatum est nominari congregationes profitentium doctrinam & studium optimarum disciplinarum atque artium) in oppido ad fluuium Albim sito, cui nomen à colore albo Vuiteberga, etsi non ignoro à Vuittechindo quosdam nomen illud deducere, quod fuit fortissimi & potentissimi Principis in ea gente, & qui diutissime vim & arma Francorum oppugnante Saxonas

Carolo

Carolo Magno, sustinuit. Oppidum hoc caput est regionis eius, quam propriam & peculiarem possidet gerens personam Septemviri in Saxonia creandis Imperatoribus Romanis. Atque fundata Academia confirmataque autoritate ante annos circiter xvi. Princeps Friderichus nullam curam tunc non suscepit, qua auctior ornatiorque illa fieret. Itaque fama Philippi Melanchthonis nomen celebrante ad ipsum quoque delata, agi iussit cum Capnione de conducenda opera doctriinae Philippi & suae Academiae recentis adiungenda. Et de eadem re literas ad Capnionem diligenter scriptas misit, in quibus inter alia honorificam mentionem fecit de patre Melanchthonis tanquam familiariter noto. Fuit igitur Capnio autor Philippo, ut conditione, quae offerebatur, uteretur: Animaduertens hanc prioris loci mutationem, existimationem ipsius meliorem esse reddituram. Extat inter alia, Capnionis epistola de hac ipsa migratione & itinere isto ad Philippum nuper à me edita. Ita igitur ille Tubinga discedens in Saxoniam, multis ibi cum desiderium tum memoriam praeclaram sui reliquit, ex quorum numero Similerus testimonio splendido ornasse cum perhibetur, in quo & hoc esset: Non intelligi neque aestimari ac perpendi quantum Academiae decus

decus & commodum decederet. Transijt
eques eo itinere Norinbergam, vbi cum præ-
stantissimo dignitate & sapientia viro atque
etiam doctrina perculso inprimis Vuilibal-
do Pircamero noticiam amicitiamq; iunxit.
Transijt & Lipsiam ibiq; vidit primum Pe-
trum Mosellanum Richardi Croci docendis
literis Græcis successorem, quorum vterq;
dei de alterum mirifice dilexit & coluit.
Peruenit tum in amicitiam ipsius & Andre-
as Francus Camicianus iuuenis illis tempo-
ribus doctrinæ eruditione celebris, qui di-
gnitatem postea & honores præcipuos est
consecutus. Solebat narrare Philippus quid
accidisset Lipsiæ in conuiuium, quo hospitem
eum Collegium primarium Academiæ illius
honoris causa acceperat. Cum enim cibi
crebro inferrentur, & quoties hi apponeren-
tur, vnus quispiam meditata oratione ad is-
psum verborum aliquid faceret, animaduer-
sa re Philippus, postquam semel atq; iterum
respondisset, tandem, obsecro vos, inquit,
viri Clarissimi patiamini me auditis orati-
onibus cunctis ita deniq; semel respondere.
Nam re improuisa non accessi ad toties di-
cendum necessaria varietate instructus. Atq;
ita aiebat tum pompam eam superuacaneæ
compellationis deinde adhiberi desisse. Cum
Vuitebergam venisset, celeriter consecutus
est

est fauorem & admirationem omnium, & Academiā illa mirabiliter capit tunc celebrari & frequentari. Vera autem ratione & translatione illustri doctrinæ omnibus muneribusungebatur: Et Græcas literas quarum cognitionem paulo ante Ricardus Crocus Lipsiæ profitendo plurimorum studia concitauerat, qui iam reuersus in patriam, hoc opus doctrinæ reliquerat inchoatum: Has igitur Philippus Melanch. cum exquisitius docendo tum certius tradendo, tum etiam scripta veterum autorum huius linguæ vberius enarrando, & singularem expectationem de se concitauit, & vndiq; allexit auditores atq; discipulos, cum haberet annos integros XXI. & ageret XXII. Vfus ego sum Croco præceptore Lipsiæ puer, pene triennio, cique me, si qua facultas mihi harum literarum contigit, tam initium quam progressum referre acceptum debere confiteor. In Grammatica sane doctrina, quod est eruditionis omnis in quocunq; sermone fundamentum, Crocus excellebat. Ad quod autem vitæ genus & quæ studia postea se contulerit non est mihi compertum. Quamuis autem Petrus Mosellanus Lipsiæ & ipse excitaret plurimorum studia & eruditæ doctrinæ fama suum nomen & Lipsicam Academiam illustraret: Fuit tamen Philippi opera multo in docen-

docendo speciosior, qui à prima pueritia naturæ & voluntatis instinctu bonarum literarum & artium studia secutus, nihil tum etiam aliud curaret aut spectaret, quam istius curriculum laudem, in instituti atq; propositi incredibili constantia. Vnde cum non spes maioris dignitatis, non opulentiae cupiditas, non deniq; cuiusdam mediocris saltem, quod plurimis est molestum, existimationis desiderium dimouit, sed in eo spacio quod semel ingressus fuerat, perpetuo sine vlla declinatione perseuerauit. Etsi autem Illustrissimi & vere optimi Principis Friderichi voluntate & iussu, accersiti erant & venerant Vuittenbergam in omni genere doctrinae excellentes viri, nondum tamen neq; ordine neq; elegantia optimarum literarum & artium pulcritudine conspiciebatur, & cogitationum solertiae explicationis officiebat obscuritas, cui quasi caligini ibi lumen à Philippo primum est illatum, & sapientiae quidam horror eruditae doctrinae veluti serenitate depulsus. Hoc omnibus accidit volentibus & lætis. Neque quisquam metuit, vt talibus temporibus plerumq; fit, ne quid de suis vel laudibus vel vtilitatibus decederet alterius gloria atque commodis. Philippus autem cum ætate & dignitate superiores studiosè obseruaret & cole-ret, æqualibus omnia officia in familiaritatis
suauis-

suauissimo vsu præstaret, cæteros varijs beneficijs, docendoq; & multiplice alia opera, subleuandoq; quibus rebus posset, sibi adiungeret, non modo neminem maleuolum aut inuidum, sed amantes & cupidos consuetudinis suæ & admirantes se atque venerantes pro cuiusq; conditione, habuit, expectatusq; est vniuersos. Mirabili tum incremento augescebat fama Martini Lutheri, & fatali conuersione, id est, decreta iustissimo iudicio diuino, mutari incipiebat administratio rei Ecclesiasticæ, quæ vndique iam labasceret & tanquam vctus ruinosumq; ædificium demolitione saltem partium aliquarum instauranda esset. Hoc cum fieri istamq; curam suscipi ab eis quorum propria esset, boni & pij ardentissimis votis optarent, & prudentes, nisi fieret, quid timendum esset prædicerent & monerent: Tantum abfuit vt respectus ad tam necessariam rem excitaretur, & incuria illius excuteretur, vt contra, quasi metueretur ne casus non acceleraret, temeritas arrogantia & audaciæ furor, & despiciens omnes alios superbia quorundam, cæco quodam impetu utcunq; adhuc stantia, dum vitiosa sarcire & regere conantur, partim conuellisse, partim labefactasse & corrupisse videatur, ita vt quid nunc refici emendariq; recte possit non appareat, & quem

quemadmodum fabula de cribro narrat factuum dixisse, constitui nequeat, qua parte res illę obstruantur quaq; relinquantur patentes. Cumulatis enim & exaggeratis doctrinæ erroribus & actionum facinoribus indignis professione salutis & vitæ æternæ & cœlestium rerum studio, & religione sincera confusione superstitionis contaminata, denique & enarratione doctrinæ, & vita atque moribus, omnium pene sententia atq; confessione correctionem postulantibus, non modo neglecta ab ijs, quorum maxime intererat conseruari, illa omnia fuerunt, sed demonstrantes etiam laborantium quasi membrorum medicinam, inhumanissime reiecti, & adiumenta omnia remediorum pertinacissime repudiata. Cum interea plurimi non in ædificando sed destruendo perquam strenue occuparentur. Intueatur enim nunc aliquis res & negotia ista, & æquo animo perspiciat, non propendente iudicio in hanc aut illam partem: Inueniet profecto miseriæ & calamitatis præsentis simul & impendentis, non esse autores eos, qui inclamantur contumeliose à quibusdam, sed illos ipsos, qui istos accusant, eosque se statumq; suum euersum velle, insimulant. Quid enim non modo quasi delitescentem in otio & quiete, religiosæ etiam pietatis sensu timidum Martia-

D

num

num Luterum excitarit, sed postea quoque stimulando instigarit, & iritando prouocauerit, non est profecto ignotum neque dubium. Circumferebat & proponebat quidam audacia ingente & facundia populari præditus, eas merces, quarum mentionis nunc istud venalitiarum genus pudet. Indulgentias appellatas esse supra ostendimus. Pertinebat negotium primum ad maiestatem æterni Dei, & attingebatur impie veritas cœlestis, deinde Reipublicæ detrimenta erant manifesta. Neque apparebat, qui, non tam malitiæ & fraudum, quam rapinarum & prædæ & atrocissimarum iniuriarum finis sperandus esset. Ibi tum Martinus Luterus, qui Theologiam publice doceret Vuittenbergæ, de ijs rebus quærere & quadam ad disputandum proponere. Id studium eaq; consideratio omnium approbatione digna, cum maiorem attentionem & tam ardui negotij animaduersionem commouere deberet, hoc modo effecit, vt aduersario prorsus contempto, non modo absurda & falsa non emendarentur, sed addita noua vanitate & commentis alijs inanioribus redderentur magis euidentia. Philippus autem Melanchthon qui cerneret esse in Martino Lutero naturæ bonitatem, & ingenij excellen

cellentem vim , & virtutem atque sapien-
tiam maiorem quam in vlllo cognouerat,
venerari ipsum atque diligere præ omni-
nibus. Luterus Philippi vicissim pro-
bitatem, doctrinam, eruditionem, fidem,
candorem, animum paratum ad suscipien-
dos ferendosque labores, studium diligen-
tiamq; maximam quærendi cognoscendique
veritatem, & industriam explicandi singu-
larem, eam denique facultatem scientiæ
& eloquentiæ, quæ ætatis illius & no-
stræ gentis rationem & modum longe su-
peraret: Hæc igitur omnia animadu-
ersa in Philippo intuens Martinus Lute-
rus non modo eum vicissim diligebat, sed
dignitate & annis superior non dubita-
bat neque verebatur colere, habere in
numero amicorum, atque etiam ex om-
nibus amicis præcipuum atque inti-
mum, cum eo communicare suas, co-
gnoscere studiose ipsius rationes atque
sententiâs, percontari libenter, & in-
terrogationibus elicere quo ipse fieret do-
ctior. Itaque inter hos talis necessitu-
do & tantus familiaritatis vsus contra-
ctus confirmatusque fuit, quo verio-
rem arctioremque vix reperias. Admodum
autem & scelerate errant, qui in huius
 sæculi deformitatem atque peruersitatem

& præsentēs ærumnas defigentes oculos, de illorum hominum consilijs & actionibus male sentiunt, & eas iudicant vitia & prauitatem consecutasq; calamitates contemplando. Nihil in mente tum vlli erat neque voluntatis alia incitatio, nisi religionis pietas & pura doctrina in omni genere disciplinarum vt restitueretur, vnicusque hic studij ardor, vt certa & vera & recta comprehendere tradique possent. A qua cura operaq; refutari & reprehendi necesse scilicet erat, dubia, falsa, praua, quæ plurima vndique occurrebant in tractatione doctrinæ vniuersæ. Fieri autem omnino nequit, quin monendo & docendo, dum errores notantur, minus etiam clementer dicatur interdum aliquid, vt qui sordida loca expurgant solum inquinatum non possunt non attingere & scalpere verrendo. Accidit autem tum id, quod in fabula, qua narratur, quendam ne in facinore deprehensus manifesto opprimeretur, iussu fuisse sibi prospicere & fuga consulere, demonstratumq; locum, qua euadere concederetur, vbi nimirum in area puteum vidisset, nam ibi maceriam concidisse vt fugæ exitus pateret. At iste cum ad locum venisset & non reperisset puteum, sed ruinas quasdam veteris putei, recurrit & expostulat cum monitoribus, ac negat puteum esse eo loco,

loco, sed ruinas putei. Quid tua? inquit illi, non enim ut biberes sed ut fugeres fuasimus. Reperisti ne autem demonstratam maceriam? Reperi inquit ille, At vos non debuistis putei sed ruinarum veteris putei facere mentionem, Non enim iste iam puteus est, sed aliquando fuit. Tu vero, inquit illi, tibi prospice & maceriae ruinas quaerito, non disputato de putei ruinis, si tibi tua salus curae est. At vos, inquit ille, tamen male monstraſtis. Non nos quidem, inquit hi, male monſtrauimus, sed tu male tibi consulis rixando alieno tempore. Dumq; non desinit iste nugator altercari, adueniunt qui comprehendere eum volebant, & correptum inter litigandum ad supplicium trahunt. Quid mollius dici potuisset, quam contra impudentissimas conciones de Indulgentijs dicebatur? Haec admonitio non modo nihil profuit, sed nouae tum abſurditates prolatae fuerunt. Dumq; vna audacia trudit alteram, eo tandem res euasit ut gloriosus Eccius in arenam istam descenderet, qui primo aduentu, ut de milite Plautino parasitus praedicat, diffaret vno spiritu aduersantes disputationes. Congressui isti atque certamini destinatus fuit locus Lipsia, vbi quasi committerentur duo athletae Carolo Iostadius & Eccius, eodemq; placuit venire

Martinum quoque Luterum, quem est secutus Philippus Melanchthon, & operam subsidiariam in eo praelio nauauit, admirabilem omnibus, Eccio ingratam & nocentem. Sed de his negotijs nunc non est texenda narratio, & sentio me fuisse in hac mentione verbosiores quam esse debuerim, cum huc modo contenderit expositio, ut comitatus ille commemoraretur societatis fidelissimæ, non deferente eo tempore Mart. Luterum Philippo Melanchthone, cum cupiditate ipsius, tum vero inprimis studio veritatis. Hoc tempus occasionem dedit noticiæ nostræ, quæ coniunctione necessitudinis deinde eximiæ aucta amicitiae peperit memorabilis vsum, quem, ut spero, posteritas non ignoratura est. Nam cum fama promulgatæ disputationis Lipsicæ multi excitati eo proficiscerentur, contulit se eodem ex Academia Erphordiana, ubi tunc ego degebam, Adamus Craphthus, quem Cratonem nominabamus. Hic quod inter nos totius vitæ & studiorum omnium esset dulcissima communitas, alijs sermonibus, quos haberet sæpe cum Phil. Mel. in cuius quandam pene familiaritatem iuuenis ille optimarum artium studiosissimus se insinuasset, ultro mei nominis & studij fecerat mentionem, & hortando effecerat, ut aliquid ille ad me scriberet. Attur
litq̃

litq; Adamus mihi compositos exaratosq; à Phil. Melan. in charta parua versus græcos quatuor, quorum vltimo hoc compellabar:

ὦ μέγα γερμανῶν θαῦμα παλαιγενέων.

Reliquorum non memini. Et dum testi-
monio eius, qui in tam præclara esset existi-
matione, mihi placens, ostento chartam istam
omnibus, ita nescio quomodo ibi illa mihi
euolauit, secundum Plautum, vt fuerit amissa.
Siue autem commode vel etiam prolixè
loquendo de me Adamus benevolentiam
mihi tum Philippi Melanchthonis concilia-
uit, seu opinione & spe bona de me, & vt
redderet alacriorem in studiorum liberalium
cursu, seu etiam naturæ quadam inclinatio-
ne ille complexus me talia scripsit: Hoc certe
est effectum, vt Philippus currentem me,
quemadmodum dicitur, incitarit, stimulosq;
admouerit pungentes diu noctuq; animum,
neque sinentes cupiditatem præclarissimi,
quemadmodum arbitrabar, studij optima-
rum disciplinarum & artium languescere. Ex
eo tempore videndi ipsum opportunitatem
semper quæsiui. Quam tandem nactus fui
post triennium metu pestilentiae & motibus
quibusdam temerarijs schola Erphordiana
dissipata, cum venisset ad me Pabepergam
in patriam Georgius Patus Vorchemius
optimus & doctissimus & grauissimus vir

(quem Magistrum & hóspitem mihi delegam Erphordiæ) & inde me secum, probata re meis parentibus, ad visendam Vuitenbergensem Academiam, quæ tanta omnium commendatione celebraretur, abduxisset. Sed de me & coniunctione cum Philippo Melanchthone mea satis, vel etiam, ut aliquis forte dicat, nimium. Reuersus Lipsia non depugnato sed incæpto prælio (fuit enim ista disputatio veluti classicum eius belli quod dudum commotum fieri tunc magis acerbum atque pestiferum cœpit, cuius qui finis tandem futurus sit, nondum liquet) Philippus Melanchthon Vuitenbergam maiore contentione animi in Theologicam disciplinam incubuit, cum tamen nihilominus coleret liberales & ingenuas artes & has omnibus modis augeret & ornaret. Neque diu post desponsa ei virgo fuit honestissima veteris & præcipuæ familiæ in ea vrbe, quam duxit uxorem agens annum XXIIII. cumque ea vixit in matrimonio castissimo annos XXXVII. & vtriusque sexus liberos suscepit quaternos, filios duos & totidem filias. Desijt autem parere illa anno coniugij duodecimo. Fuit fœmina hæc religiosissima & viri amantissima, mater familias assidua atque diligens imprimis, liberalis & benefica in omnes, pauperum ita studiosa, ut & dando
sine

sine discrimine, & deprecando pro illis, & conciliando quibus aliquid posset commodi, non modo suarum rerum facultatumque minus rationem habere, sed interpellatione & compellatione pro his ad alios uti soleret nonnunquam intempestiva. Summa vitae morumque integritate, inque perpetua cura religiosae pietatis honestatisque, & victus & cultus negligens, neque hoc Philippus Melancthon offendebar, qui nullis deliciarum blanditijs caperetur, & voluptatum omnes illecebras fugeret. Non durus ille quidem neque asper aut inhumanus, sed nimis etiam interdum facilis atque indulgens, qui ne sodalitia quidem hilariora vitaret, atque etiam congressuum talium esset autor, quique conuiueret ad suorum familiarium nimiam aliquando laeticiam. Cum quidem ab ipso nihil fieret aut diceretur perperam & prae, sed praesentia & saepe instituto eius cauere, ne leuitas iuuenilium cupiditatum in turpitudinem aliquam erumperet, cum ludis etiam seria miscerentur. Quod fiebat in conuiuijs potissimum, quae more Germanico Rege sodalitijs creato, apparari solent. Tum enim hoc seruabatur ut nunquam considerent ad epulas nisi prius scriptis prolatiis & recitatiis, quae componi oportebat ab illis sodalibus oratione soluta & versibus. Itaque ut vide-

ri possit non nihil seuerioris disciplinæ desideratum esse, id tamen præstabatur, vt veracundia pudorisq; nulli congressus eorum, qui bonos, vel non saltem nihili prorsus & fuitiles perhiberi se vellent, essent expertes. Sed redeat oratio ad domesticam Philippi Melanchthonis vitam. Cum & ipse nullis cogitationibus & curis vacaret, nisi salutariis Reipub. & priuatim tam laudem quam vtilitatem afferentibus, magis quidem alijs quam sibi, & talem haberet huius vitæ sociam, factum est non modo vt augendæ rei familiari nulla opera ab ipsis daretur, sed vt etiam ea copia, quæ satis abundans non tam quærebatur quam affluebat, effunderetur promiscua benignitate, neq; parceretur vel pecuniæ vel penuri, quin petentibus quicquid in manu esset sine recusatione tribueretur. Videres igitur in ædibus illis, perpetuo accedentes & introcuntes & discedentes atque exeuntes aliquos, In quibus turba versaretur omnis ætatis, sexus, conditionis atque adeo gentis. Exportabaturq; & auferebatur non indies sed horis singulis & pene momentis aliquid. Nam ea domus disciplina erat, vt nihil cuiquam negaretur. Veniebant autem ad Philippum Melanchthonem plurimi, qui literas ad aliquos peterent, qui scriptum suum quodpiam vt emendare

daretur orarent, qui testimoniū publici diploma confici vellent. Alij qui aliqua de re sua & oblato negotio consilium, vt sibi daretur rogarent. Alij quod accidisset publice priuatimue respectum ipsius & considerationem & opem requirens narrantes. Alij querelas varias deferentes. Multi etiam stipem plane exigentes, quam veluti deberi sibi ab illius immensa benignitate statuerent. Qua in parte nonnullorum augeri confirmariq; impudentiam, & erant qui tunc ægre ferrent, & Philippi Melanch. facilitatem improbarent. 2
Interea alij ad coniugem, aut liberos deuenire, & sibi suisque quo adiuuarentur & subleuarentur quærere. Quorum nemo non aliquo munere affectus aut tristis abire visus. Ipse Philippus accessiōis ad fortunas qua fieret ditior consilium cœpit nunquam, quin etiam oblata emolumenta aliquoties respuit, & quæ plurimi expetere atque arripere deque quibus digladiari non desincent, ea cum essent in potestate ipsius plane abiicit. Quæ cum ita quemadmodum exposui, administrarentur, non potuisset se & suos ille alere atque sustentare, nisi diuina quasi Virgula necessaria & plura etiam quam absumerentur, ei vndique affatim suppetiuisent. In quibus modice retinendis si paululum attentionis voluisset adhibere, potu-

potuisset locupletioſiorem hæreditatem ſuis reſ-
linquere. Erat autem in familia ipſius vnus,
qui ad eum initio ſtatim venerat Iohannes
Sueuiæ gentis, commendatus à Hieronymo
Pamgertnero, qui illo famulo uſus fuiſſet,
quem, expertus fidem & probitatem eius &
amorem erga dominum mirabilem, Philip-
pus valde carum habuit. Hic curabat domi
ipſius omnia, emendo, condendo, cuſtodi-
endo, promendo, denique res rationeſque
domæſticas tractando vniuerſas: Cuius vi-
gilantia, aſſiduitate, circumſpectione, dili-
gentia non etiam nulla prudentia, & multa
incommoda auertebantur in illa familia, &
quantum poterat, tantum adiuuenti affere-
batur, non modo ad ſuſtentandam eam, vt
quotidianis ſumtibus impendia ſufficerent,
ſed ad copiola aliqua in poſterum munien-
dam. Hic conſenuit apud Philippum mor-
tuus in ædibus ipſius, Anno CHRISTI
M. D. LIII. relicto exemplo famuli & mini-
ſtri eiufmodi, vt nomen eius maiore cum lau-
de memoretur, qui ſeruili conditione fuiſſet,
quam multorum potentia & diuitijs & ho-
noribus excellentum. Quia autem mentio
eſt facta Philippi Melanchthonis, cuiuſdam,
dicendum enim verum eſt, negligentia in
ſuis retinendis & ſeruandis, non putauit re-
ticendum, quod aliquando factum eſt, de
quo

quò & ipsius procliuitas in largiendo, & quorundam in auferendo proteruitas poterit certius cognosci. Donabantur ei multa aurea & argentea nomismata antiqua. Hæc fere auferebat qui primus, ubi ille accepisset, aduenerat, & nobis nonnulla cum daret, solebat dicere, nisi ego sumerem, relicturum me esse alijs. Quodam tamen tempore denarios cōpluscūlos congesserat, qui maxime signis & scriptura & imaginibus placuissent, eos externo cuidam, quem nominare nunc esset inhumanum, cum ostendisset, animaduertit contemplatione eorum ipsum valde delectari. Iubet igitur sumat vnum aut alterum, quos præ cæteris cupiat. At ille, ego vero vniuersos inquit cupio. Non negabat Philippus se impudente postulatione fuisse offensum, sed dedisse nihilominus illos, & satiasse se dicebat cupiditatem inuerecundi spectatoris, eorum, quibus alterum etiam gaudere & capi, par fuisset eum cogitare. Hæc igitur non aliquot annorum sed omnium quibus & celebs & coniunx & viduus vixit, vita hac in parte illius fuit. Mirifica autem erat taciturnitas & dissimulatio beneficiorum in largiendo. Sæpeq; numero pecunia exhausta, pocula sua ipse solus clanculum detulit ad aliquem mercatorem, nihil curans iustumne precium an minus eo persolue-

solueretur. Qua domesticæ vitæ ratione
exposita, quia huic loco conuenire hæc pu-
tauimus, pergamus ordine enarrare reliqua.
Disputatione illa Lipsica finita, cœpit non
ita diu post pestilentiae malum oppido esse
infestum. Itaq; tum dilapsus cœtus schola-
sticorum fuit, cum Mart. Luteri Philippiq;
Melanchthonis nomine plurimi inuitati vt
Vuittenbergam peterent, fecissent, vt ad-
modum frequens Academia illa esset. Inter
quos adolescentes duo fuerunt mei Lipsiæ
condiscipuli ambo, alter etiam contuberna-
lis Sebaldu Munstererus & Caspar Cruci-
ger, quorum vterq; virtute sua & diligentia
studij præcipuos honores in illa Academia
gessit, & interuallo sane multorum annorum
mortuus dolorem amicis & desiderium sui
omnibus maximum reliquit. Secutum est
tempus quo conuentu indicto Berbetomagi
in Vangionibus Carolus Quint. Cæsar fide
publica accersitum causam dicere iussit Mar.
Luterum, qui tanquam impiæ defectionis à
religionis sanctitate & seditiosus à Pontifice
Romano vel illius potius assentatoribus &
affectis, accusabatur. Is cum iter illud in-
gressus esset, Philippus Melanch. ita Vuitten-
bergæ remansit, vt omnem curam laboremq;
rei scholasticæ sustineret. Accidebat au-
tem tum quod similibus temporibus semper
solet,

solet, vt vitij detectis & apparentibus, cum, qui maxime deberent medicinam facere, negligenter atque etiam plurimi iritarent mala, & quemadmodum dicitur, essent vngues in vlceribus, multa susciperentur & fierent cum audacter tum inordinate, nonnulla etiam turbulente. Et Vuittenbergæ variorum generum diuersarumq; nationum iam magna copia confluxerat. Et illa omnino ætate fatalis rerum conuersionis, prouenerant homines qui mouerent & concitarent & nouarent aliquid indies. Quorum procliuitate credibile est, permittente Deo, abusum esse eum spiritum, qui Diabolus appellatur, quia diuinis operibus obrectare & dissipare atque euertere quæ possit, perpetuo conatur, tam vi manifesta quam occultis machinationibus. Non enim audacia & facinora illa quorundam (de quibus dici aliquid neque alienum ab instituto, & cogitari nunc quoq; vtile esse existimo) humanæ malitiæ videntur fuisse. Neque res tamen noua neque inaudita prius ista tunc oblata est. Nam historiæ similia atque eadem plane narrant, quibus alijs temporibus animis hominum in errorem & fraudem inductis, vita perturbata fuerit. Non habeo autem pro certo dicere, vbi locorum & quibus maxime autoribus secta ista furiosa, de qua deinceps dictu

dicturus sum, exorta sit. Sed vnus vagabatur passim, cuius nomen Germanicum habet Ciconiæ significationem. Is ex plebe imperita & simplice plurimos deceptos falsitate opinionis perniciosæ complebat. Erat autem facile & in promptu infectari eos, qui in Ecclesiastica re præsidebant, aut munere quopiam fungebantur, in quos nihil tam contumeliose dici posset, quod non factorum illius generis improbitate confirmaretur. Primum igitur eam congregationem, quæ à talibus gubernaretur & administraretur, Ecclesiam esse Christi negare, & dicere ex illa discedendo hanc institui oportere. Et quibus hoc persuaderetur & placeret, eos denuo baptismo initiandos esse. Vnde Anabaptistarum secta illa nomen inuenit. Sed non insistebatur hoc loco, progrediebaturq; vanitas doctrinæ ad statum Reipub. vniuersæ mutandum. Nihil enim recte & debito modo fieri geriq; vsquam perhibebant, quod summa rerum esset penes malos, & à religiosa pietate studioq; honestatis & virtutis alienos, qui suis cupiditatibus priuatim seruirent non commodis publicis, & omnia ad voluptatem referrent, in dominatione superba ac insolente. Atq; decreuisse Deum extinguere istud genus & sufficere alterum innocentia iusticiaq; & sanctitate præditum. Ad
cuius

cuius exordium atq; incrementa, docebant necessariam esse curam & diligentiam in procreanda sobole. Et ideo neminem ducere uxorem debere, ex qua non sciret se liberos pios & gratos æterno Deo & ad communionem regni cœlestis electos, suscepturum esse. Id autem non aliter quam ipso Deo patefaciente sciri posse. Et iactabatur præcipuum donum Dei in illis cœtibus, prædictionis euentuum futurorum, & arcanorum indicij, cuius eximiæ & salutaris rei in veritate nomen est græcum Prophetia. Compertum autem est multis horum per quietem somni mirabilia visa, & species quasdam vigilantiis etiam aliquibus, sed paucis, oblatas esse. Cognitum etiam est fuisse in cœtu isto fœminas vaticinantes. Ciconia iste se imperitum literarum esse penitus simulabat, vel erat etiam fortasse, prædicans sibi diuinitus scientiam salutarem contingere. Esse tamen studebant hi in numero suo literatos aliquos. Sed & isti ipsi se magistros doctoresue homines habuisse habereue affirmabant nullos, & copiam scientiæ sibi diuinitus conferri vniuersæ. In quibus vnus erat Marcus nomine præcipuus, qui sibi à Deo hoc esse datum tributumq; eximium gloriabatur, vt ipse interpretando & explicando scripta sacrarum literarum excelleret: Hic

E gentis

gentis quæ putatur incolere eam regionem quam veteres Narischorum appellarint, ciuis, aliquando fuerat discipulus scholæ Vuittembergensis. Sed studia deseruerat, siue antea, seu posteaquam in illam societatem peruenisset. Nam & hoc erat in legibus istorum: Ne quis in ocio liberali bonis artibus & literis operam daret: Neu aliunde scientiæ cognitionisq; facultatem quæreret, quam ab æterni Dei benignitate, cui adiumentis humanis nihil esset opus. Nam cur colere aut venerari aliquis vellet Deum? Si non dignaretur eo beneficio quod datum esset patribus & sanctis viris prisco sæculo. Quin etiam par commercium colloquiumq; effic à Deo flagitandum, & vrgentibus tribui. Hæc secta absente in Vangionibus, & postea nescio vbi, Martino Lutero pene anno toto longe lateq; est pervagata. Ciconia interdum venire Vuittembergam, sed ibi minus libere & aperte versari. Cæteri alijs in locis ferere fallaces sermones quibus animi imperitiæ multitudinis peruertebantur. Sed grati hi erant plurimis spem licentiæ rerum omnium & simul cuiusdam regni ostendentes. Quod sibi Ciconiam policeri credebatur, à quo auditum esset, visum se videre aliquando dormientem aduolasse Gabrielem angelum, & postquam astitisset propter

pter se cum alia commemorasse, quæ proferenda nondum putaret, tum hoc dixisse: Tu collocabere in folio meo. Idq; interpretatum Ciconiam, promissum sibi principatum esse regni noui & paulo post exoritur. Hæc initia sunt cladis & calamitatis quæ peruasit Germaniam, serpente malo paulatim & procedendo acquirente vires, nemine ad cohibendum auertendumue veras rationes ineunte, aut capiente salubria consilia; donec tanquam amnes eo pleniores, quo longius à fontibus feruntur, illi conatus & talia incepta in manifestos seditio- num tumultus & perfidam vim confluxerunt, motuum popularium, & ad extremum in occupationem vrbis Monasteriensis, & regni nefarii detestandum nomen. Quæ causæ fuerunt, vt Germania scelere & immanitate rapinarum & cedium fœdissime laceraretur, & passim vastaretur ferro & igni, de quibus & aliorum narrationes extant & hoc loco plura commemoranda non sunt. Ciconia, qui vt dictum est vagaretur, neque vspiam fere diu consisteret, quæ conceperat animo, ea strenue exquebatur. Siue huius autem mandato seu sponte sua Marcus, cuius supra mentio est facta, Vuittembergæ aliquantisper mansit, quem & nos ibi vidimus & cum eo sumus sæpe collocti. Re-

ceperat autem cum ad se Philippus Melanchthon, vel innata sibi bonitate, cum hominis cum misertum esset, vel ut certius cognosceret quid istud genus doceret. Censebat enim neque admittendum neque rejciendum quicquam temere, & quod parum alicui exploratum esset. Itaque hic hospitem quidem habebat Philippum, sed nihilominus ad alios ventitabat, & non paucos in suam sententiam perducebat. Quorum caput fuit Martinus Cellarius, qui istis pertinacissime diu sane adhæsit & causam hanc ægit atque defendit. Cumq; anno xxv. in Prussiam venisset, in liberam custodiam Principis iussu datus, multa scripsit de doctrina illa. Postea animaduertens labascere partes & spem se frustrari, Basileam se contulit, ubi ducta vxore quiete deinceps vixit. Hic Suevicæ gentis cum Philippo Melanchthone Tubingæ vsum quendam habuerat, cumq; & ipse post discessionem illius Vuittembergam tandem venisset, à Philippo Melanchthone humanissime acceptus & tractatus amantissime est. Nondum probabat ille scholasticæ prioris doctrinæ mutatam rationem, deq; ea cum Philippo sæpe disputando pugnabat. Cum autem & ingenio esset minime hebetè, & studij diligentia peracultus, tradidit ei Philippus Melanchthon disci-

discipulos instituendos, habuitque ille scholam priuatam, frequentem & fructuosam. Hunc igitur Marcus amicum & socium & adiutorem & comitem atque etiam ducem nactus, ita tum propemodum semestre substitit Vuittembergæ. Vbi fiebant omnia indies difficiliora, leuitate & petulantia cupiditatis rerum nouarum. Iamque non musstabatur sed fremendo ferebatur palam, non quasi pedetentim ad tollenda vitia quæ in operationes sacrorum irreplissent, progrediendum, sed irruendum & demoliendum statim quicquid perperam introductum vassurpatumque esset. Ac duorum potissimum deligebatur repentina mutatio: Ritus actionis in peragenda Eucharistia, & collocatarum in templis imaginum simulacrorumque amotio. Quæ non modo conuelli exterminarique, sed publice per contumeliam, propter venerationis impietatem, exportari & concidi aut comburi volebant. Neque carebat factio ista patrocínio quorundam auctoritate prædicatorum, in quibus & Andreas Carolostadius nominabatur. Philippus Melanchthon tunc quoque fouebat apud se Marcum, quamuis perspicue cognouisset, inania esse omnia quæ afferret, & dissentanea inter se, & pleraque nugatoria, nonnulla etiam eiusmodi, vt non esse sana neque integra cum men-

te deprehenderetur. Ex quibus vnum hoc duxi exponendum. Quodam tempore scribente nescio quid Philippo, Marcus, qui forte aduersus illum assedisset, in silentio & cogitationibus sensim ibi consopiri, & demittere caput in mensulam, ad quam sedebant, & obdormiscere. Post non multum temporis expectatus erigere se & intueri Philippum & interrogare subito: quænam esset existimatio eius de Iohanne Chrÿstomo, cumq; Philippus commode respondisset, se sentire de illo præclare, quamuis verbositatem ipsius interdum non probaret: Tum Marcus, modo, inquit, vidi illum specie tristi in purgatorio. Ad hæc Philippus primum ridere, mox discedere deplorans perturbationem tantam in illo, qui purgatori faceret mentionem eam, quam ipsorum aliæ disputationes mirifice refellerent. Sed cum Philippus pondere rerum & negotiorum difficultate superaretur, neque ijs quæ sibi imponi indies grauiora sentiebat par esset, & impendentium periculorum magnitudinem perspiceret: crebris suis aliorumq; literis permouit Luterum, vt Vuittembergam rediret. Et ille (qui paulo ante clam paucis diebus ibi fuisset) tunc palam est reuersus, neq; indicata re Principi, neq; quoquam permittente, animo excelso & confidente. Et
nisi

nisi hoc facere maturasset, res Vuittembergensis non modo grauiter afflictâ atq; vexata, sed perdita & funditus diruta fuisset. Reuersio eius incidit in Nonarum Martij dies, Anni Christi M. D. XXII. quibus diebus conciones eo habente omnia conquiescebant, & audientes, cum singularem facultatem explicandi susceptas res, tum dicendi vim, tum etiam virtutem atque fortitudinem admirabantur & reueriebantur auctoritatem. Interrogatus tunc vnus ex Marci familiaribus, ecquid Doctorem esse Luterum egregium iudicaret? Imo inquit angeli non hominis vocem mihi audisse videor. Sed Marcus ijs diebus aberat, cum nescio quo quarumue rerum causa discessisset. Mox tamen hic se Vuittembergam ad suum, quem ibi habebat, gregem recepit. Qui rursus ad ipsum confluere & opiniones haustas inter se confirmare, & Marco ad retinendas & defendendas eas animos hortando addere. Inq; omnibus maxime & ardentissime M. Cellarius cuius paulo ante meminimus. Placuit igitur Martinum Luterum accedi & ei summam doctrinæ exponi. Aegre Luterum hoc concessisse rescui. Sed tandem certo die & hora fecit potestatem Marco ad se veniendi, solo Philippo Melanchthone sibi adhibito, cum Marcus Cellarium & alterum quendam

dam ex suis adduxisset. Audiuit Luterus placide narrantem Marcum sua. Cum dicendi finem fecisset, nihil contra illa adeo absurda & futilia differendum ratus Luterus hoc modo monuit: viderent quid agerent. Nihil eorum quæ commemorassent sacris literis niti, commentaq; esse cogitationum curiosarum, aut etiam fallacis & fraudulentis spiritus deliras & perniciosas subiectiones. Ibi Cellarius & voce & gestibus vesanis, cum & solum pedibus & propositam mensulam manibus feriret, exclamare & indignari, ausum esse Luterum suspicari tale aliquid de diuino homine. At Marcus paulo sedatior, vt scias inquit, Lutere, me spiritum Dei præditum esse, ego, quid in animo tuo conceperis, sum indicaturus, idq; est: Te incipere inclinari ad hæc vt meam doctrinam veram esse credas. Cum Luterus, vt ipse postea dixit, istam dedita opera sententiam cogitando esset complexus: Increpet te Deus Satana. Post hæc plus verborum faciendum Luterus non putauit, & minantes gloriantesq; eos dimisit, Ac nescio quid pollicentes de mirabilibus effectiõibus, quibus probaturi sua essent, cum hoc modo dixisset: Is Deus quem ego veneror & colo facile vestra numina, ne quid tale efficiatur, cohercebit. Eo die oppido illi excefferunt, & Chem-
bergo

bergo distante pass. amplius milib. quinque
 literas plenas maledictis & execrationibus
 ad Luterum miserunt, de quibus longiorem
 esse narrationem hanc meam non decet. De
 Ciconia autem & Marco ipso quid factum
 sit, & quid ipsi amplius conati, quique exitus
 vite eorum fuerint, non habeo compertum,
 deque eis narrata atque prodita scio neque
 temporibus neque personis consentanea. Et
 in exponendis his fui prolixior, quod istis
 rebus & negotiis omnibus Philippi Melan.
 labores, curæ, opera, consilium, fides, im-
 plicarentur. Post hæc res satis tranquillæ
 toto biennio fuerunt. Martino Lutero, quem
 non desinerent aduersarij cum manifesto de-
 decore suo & causæ quam agebant detrimen-
 to, laceßere scriptis leuissimis atque etiam
 ineptissimis, magno animo & summa con-
 sentione asserente sua & aduersariorum scri-
 pta confutante. Scholasticam autem doctri-
 nam publicæ priuatimque assiduo exercebat
 Philippus Melanchthon, optimarum artium
 studia conformando & expoliendo, ordiens
 ab horum quasi pueritia & progrediens ad vi-
 timam veluti ætatem (id quod annis aliquot
 perfecit) vt initium cum fine denique coniun-
 geretur & coiret, & omnis ista tractatio orbe
 vno comprehensa absolueretur, cuius græ-
 cum nomen esse placuit *ἐγκυκλοπαιδείαν*. At-

que idem sacrarum etiam literarum diuersas interpretationes explicationesq; conficiebat & elaborabat. Cum interea ab occupationibus aliorum negotiorum & opera, quæ dabatur omnibus vtî volentibus, nihil ei quicquid aut ocij vel ad corporis valetudinisq; curam, vel aliam vitæ suauitatem & recreandum animum relinqueretur, neque ab ipso vsurparetur, præter vnam voluptatem, quam ex consuetudine & familiaribus colloquijs amicorum percipiebat, qua quoties licebat libenter fruebatur. Quod autem tum facere cepit, vt seruiret voluntati atq; etiam cupiditati quorumuis & obsequium suum in promptu cunctis esse vellet, ab eo omni postea tempore non voluit recedere. De quo quidem & memini diuersa iudicia diuersorum audire, & intelligo in vtramq; partem disputari posse. Idq; indicabo vbi prius de habitu corporis ipsius & valetudine & natura atque ingenio ac moribus, quam hoc loco apte inferi posse existimaui, narrationem absolucro. Fuit statura Philippus breuiore, non tamen breuitate notabili, cum à communi virilium corporum modo illa non procul abesset. Membrorum compositio plane elegans, frons explicata & ardua, insignis vena quadam ampliore in illa eminente, capillus rarior, collum procerum, iugula insigniter concava,

caua, oculi pulcri & acies horum mirabiliter clara, pectus satis amplum, venter & ilia astrictiora. Omnium autem partium corporis & integra atque vera sua figura & congruens erat soliditas. Sensus omnes acres, in corpore nulla mole carniū grauato, & eiusmodi vt facile illud quidem propter subtilitatem afficeretur, sed laboris tamen esset patientissimum, neque facile defatigaretur. Atque narrabat ipse quoties adolescens Tübinga Stuggardiam ad Capnionem venisset, id quod sæpe facere consueuisset, & illa vina bibisset pleniora, artuum dolores se statim cœpisse inuadere, & ideo studuisse citius reuerti Tübingam. Vna fuit ei molesta insomnia. Nam accidebat nonnunquam vt totam noctem vigilaret, quo incommodo cum propter debilitatem quæ consequebatur, tum obstrepentes, vt fit, cogitationes iniurcundas grauissime affligebatur. Sed hoc malum depulit diligentia in victu, præsertim cum ætate procedente vinis vteretur plenioribus & alijs generibus potus, quib. somnus conciliari solet. Ad quem se dabat statim post cœnam, & surgebat mox aut non longo interuallo post mediam noctem. Omnesq; scriptiones & commentationes ceteræq; res vel saltem præcipuæ matutina opera ab eo perficiebantur. Requirebatur autem
ab eo

ab eo quies somni nocturna placida. Quantum igitur poterat, cauere, ne qua re perturbaretur animo iturus cubitum: & eam ob causam literarum vespere allatarum lectionem in posterum diem plerumque differre, earum præsertim quas principes aut ciuitates misissent, quibus rem seriam atque magnam agi suspicaretur. Atque senescens post meridiem interdum, non ille quidem in lecto, sed supra scamnum alicubi recumbens & somnum capiens conspectus est. Cum autem eiusmodi potum, quem diximus, prodesset ei increbuisse, vndique ad ipsum benignitate principum ciuitatumque & amicorum aliorum studio ille mittendus curabatur. Cōstat fuisse admonitum primis statim annis aduentus sui, Philippum ab Illustrissimo Principe Fridericho, subiiciente, vt videtur, hoc optimo & doctissimo humanissimoque viro Georgio Spalatino, quo Princeps peculiari sacerdote utebatur, vt haberet rationem ipse sui in conseruanda valetudine, neu vini vsum intermitteret. Valde autem delectabatur copiola quadam boni & egregij potus, non tam sua ille quidem, quam hospitum, quos & inuitabat humanissime & libentissime accipiebat, & aliorum quoque quibus hunc impertiebat, gratia. Nemini autem omnium in toto oppido cella ipsius clausa

clausa erat, & quicquid ea condebatur id pœ-
 tenti promi in hac domo mos erat. Attens-
 tione igitur ille & diligentia assequebatur, vt
 talis corporis firmitas perpetuis laboribus
 sufficeret & inter continuos illos duraret.
 Cum & à medicinis magnopere abhorreret,
 neque vllam exquisitam curam corporis ad-
 hiberet, ac potius in hac re & parte esset ne-
 gligentissimus, vel is etiam qui proposito
 destinato omitteret atque adeo fugeret om-
 nia, quæ corpori curando apta sunt: Vnde
 factum est, vt tandem balnea etiam prorsus
 vitauerit, quæ aliquando cum amicis ingre-
 di consueuisset. Atque in tali corpore, quale
 est designatione quadam à nobis effectum,
 Animus erat, quem & illud caperet, & qui
 idoneum istud quasi domicilium haberet.
 Humor, quem flauæ bilis nomine appellant,
 abundantior, materiam præbebat affectio-
 nibus animi vehementioribus. Grauius
 ergo commouebatur, eratq; in eo impetus
 hic repentinus, qui tamen sedabatur celeris-
 ter. Reipub. & amicorum negotijs ex ani-
 mo afficiebatur, & hæ curæ interdum sic ex-
 cruciabant animum ipsius, vt morbus con-
 traheretur. Sed naturæ vi, bilis deiciendo
 expellebatur, eoq; allouari ille se sentiebat.
 Ingenio fuit liberali, comi, admodum bene-
 fico & humanissimo, ad gratificandum sem-
 per

per paratus. Etiam minimis in rebus officijsq; præstandis non modo satisfaciebat expectationi omnium, sed hanc superabat quoque. Quinetiam sua interdum merita alijs eum tribuisse & ascripsisse cognitum est. Non ille consulto alterum quemuis vel aperte maledictis lædere, vel oblique infamare, aut nigros sales, vt dicitur, aspergere, notamue & ignominiam vlli inurere. Nullum etiam fere dictum aut factum alicuius tam duriter vnquam accepit, vt ab illius beneuolentia familiaritateq; & vsu refugeret. Nullæ in eo maleuolentiæ aut suspicionum latebræ. Nullæ æmulationis quasi insidiæ. Nihil subdolum, simulatum, tectum, fallax, contraq; sincera, simplicia, aperta, vera omnia, oratio libera, sæpe etiam sine circumspeditione & consideratione coram quibus illa haberetur, Exceptaq; esse quædam dicta ipsius & ad quosdam inuidiose delata notum est. Quod cum ipse sciret, nullam tamen cautionem huic parti adhibebat, ne ab amicis quidem & beneuolis admonitus. Eadem in scribendo libertas erat, Quinetiam libros scriptaq; sua omnia, & literas quæ afferebantur cotidie plurimæ à diuersis & dissimilibus conditione, loco, fortuna, relinquere omnium oculis, & manibus expositas, ex quibus subtractum plurimum esse constat.

stat. Et ipse hoc animaduertens, hortantibus suis etiam, ut custodiret sua, praesertim cum alijs hoc ut facerent assidue praeciperet, neque pericula tantum sed malum praesens saepe demonstrantibus, adduci nunquam potuit ut esse aliter inciperet & sententiam consuetudinemque hac in parte suam mutaret. Voluntati aliorum promptissime inserviebat atque adeo cupiditatibus indulgebat, cum erga se esset durissimus & immitissimus. Quae non fiebant iudicio sed naturae mansuetudine & bonitate. Sed intelligebat ipse hoc agendo 3 peccare, cum sciret & testaretur quam pernicioiosa res esset impunitas & licentia, neque eam coherceri amplius posse saepe deploraret. Pueros paruulos nimio pene amore 4 complectebatur, & naturae affectio haec in ipso insignis & pene intemperata fuit, prudentia in alijs summa & consideratio quid deceret. Nihil rusticum aut agreste, festiua & venusta plurima. Locis delectabatur, vel tempestiuos potius, ut inter epulas & peregrinationes, minime tristis atque horridus natura, non vitabat. Vtebatur autem ijs ridiculis, quae sine contumelia ac probro mordentia laederent neminem, & sales haberent non ineruditos. Ambiguus libenter & suauiter ludere cum pueris maxime & adolescentibus solebat, hoc ipso etiam exercens intelli-

telligentiam illorum ad serias fallacias considerandas & explicandas, ipsq; enarrandis ingenia eorum acuens, & alios consideratione horum fatigari cernens & explicando interdum falli, istam hilaritatis occasionem habebat. Historias quoque & narratiunculas utiles & memorabiles crebro exponerebat. Moribus omnino placidissimis & mansuetissimis fuit. Comitatus in eo & affabilitas prorsus suavis. Si quando etiam vehementius perturbabatur, ut veluti de potestate videretur exire, sedabatur ea cito quasi tempestas, & redire statim ille ad ingenium, ferreque ut antea quaecumque ei imponebantur onera, & exequi quod mandabatur, & efficere quod petebatur. Idque in se vel vitium vel vitij quiddam simile ipse agnoscebat. Ac postquam deferbuerat ardor ille, iocans de se meam referebat interdum narratiunculam & rythmos nostrates, quibus perhiberetur quidam percutere & confodere, & esse tamen vim illam saevitiae lentam atque mitem. Itaque ut iracundiae commotio in eo erat & subita & acris, sic nemo illo cognitus est placabilior, quiq; moderari sibi & temperare affectionibus sciret melius. Animus ipsius in nullos invidia, odio, malevolentia suffusus, ad omnes autem apertus atque simplex admirabilem in modum. Inter docendum
inter

interrogare aliquos fere solebat de ijs quæ tractabantur. Idq̃ faciebat admodum scite & apposite, quod præcepta artium liquido teneret, & meminisset exquisitè. Fuitq̃ in eo valde bona memoria non rerum modo & sententiarum sed verborum quoq̃ & orationis. Quæ igitur legendo comprehenderat, ea hærebant in animo ipsius. Et, si quid forte commentatus perscripserat, paruo negotio idem verbis propemodum eisdem & eadem serie horum sine scripto postea pronuntiabat. Itaq̃ disputando in responsionibus ad obiecta aduersariorum plurimum valebat, & erat illis metuendus. Id quod non semel, institutis de religione doctorum virorum dissentientium partium colloquijs, cognitum est. Si res seria ageretur studio hæbebat hoc in primis ne esset dubia oratio & sententia incerta. Neque pcius quicquam oderat quam in argumentando versutias & fallacias conclusionum, quæ σοφισμα, & quam totam non facultatem, secundum Aristotelem, sed voluntatis incitationem σοφιστικὸν λέγειν appellarunt. Et sermo igitur planus atq̃ purus & id quod volebat intelligi (Intelligi autem volebat concepta animo vera & definita ac certa) significans in studio ipsi erat, & cogitationes contortas argutijs implicantibus irascebatur, ita sæpe grauiter, vt stomachus

mācharetur, & obiurgando ipse peruersitatem callidorum, & veteratorum increparet acerbius. Ea autem erat acrimonia illius ut celeriter deprehenderet talia, neque fere cum quisquam falleret in hoc genere. Usque adeo autem abhorrebat à dubiis & incertis sermonibus, ut ambiguas figuras orationis in rebus seriis quamuis visitatas ferret iniquius. Ac memini aliquando inter epulas cum vinum appositum ipsi valde probaretur, iubere illud ex conuiuiis vnum gustare & dicere quid videretur. Qui cum respondisset consueta *ἀντιφράσις* forma: Esse illud haud malum, pene cum indignatione Philip. Melanch. Bonum, inquit, vinum sic laudari non debet, quod simplicem & propriam commendationem usurpandam censuisset. Hoc etsi vulgarius atque leuius, moris tamen in illo huius indicium illustre non putavi prætermittendum. Usque adeo vero indiserta, confusa, vaga, indefinita, inexpliataque auersabatur, ut quoties cum aliquibus de tempore esset constituendum, semper momentum horæ iuberet nominari. Et ipsi succensebat qui intra aliquas horas duas aut circiter conueniendum agendumue quippiam esse dicerent. Similiter in mandatis dandis exponendisque negotiis maximopere enitebatur, ut de qua re ageretur, ea res plane &

expresse demonstraretur. Itaque non solebat curare iubendum significandumue aliquid, quod ipse coram narrare, indicare, mandare posset, sed hoc munus exequebatur ipse. Cogitandi & omnia diligentissime expendendi in eo cura pene erat infinita. Itaque in sua inquirere ipse semper & retexendo studere fieri meliora. Quod si in vno studiorum genere ei perseverare inque illo ociose versari concessum fuisset, haud scio an ea opera efficere & edere potuisset, quae omnium aliorum elaborationes longe vincerent. Nunc hoc fiebat ut nihil vacui temporis ipsi relinqueretur prorsus, sed & ijs continuo occuparetur quae supra indicaui, & nouo quodam mirifico labore insuper defatigaretur. Coeperant enim plerique ipsius & aliorum celebritate moti expetere, ut manu eorum aliquid in suis libellis perscriberetur, quod ostentare possent. Atque aliqui ad tales scripturas cartas conglutinas & libellos peculiares circumferre, cui rei incredibile est, quantum temporis operaeque tribuerit, cum qualis res esset animaduerteret & negando tamen neminem vellet offendere. Iam quicquid tunc ab alijs Vuittenbergae librorum conficiebatur in omni genere doctrinae, eorum nihil sine hoc quasi Thesoro, ut dicitur, vel non ipso plane magistro & autore elaboraba-

rabatur. Quæ vero in doctrina publica dicebantur, quæ recitanda forte erant solennibus in conuentibus, quæ proponendæ aliquarum rerum significationes, ab hoc vno scribebantur. Atque visæ sunt chartæ cum humidis adhuc literis reliquæ afferri istis, qui iam pronunciare composita ab eo priora cœpissent. Quid dicam de procæmiis? quibus si ab hoc scriberentur, quod commendari omnes & vendibilia fieri opuscula sua scirent, expetebant hæc plurimi, cum interea & externis daretur opera aliqua ipsius, conscribendis istis, quibus illi docendo, concionando, disputando vterentur. Sed hos labores & istas occupationes tantas æquabat vel etiam superabat vnus: Literas quibus aliqui commendarentur & testimonia perscribendi, quæ non modo patiebatur facile absese impetrari, sed dabat etiam perquam liberaliter & prolixè. Nam & facultates ipsis & operæ quibuscunque dari illæ possent, in promptu cunctis, neque suum ei quicquam tam proprium erat, quam communia omnia omnibus. Atque est facilitas ista, & hæc ea res, quam supra notauimus & reprehendi posse sumus confessi. Cum quidem reprehendi interdum audiuerimus. Deque ea quoniam dubium non est venire in mentem vnicuique quid culpantes dixisse & nunc dicere credi-

credibile sit, mihi silendum esse duxi. Sed vituperatione tamen liberare eum, vt opinor, potest, immensa bonitas humanitasq; naturæ & nullum sibi suisq; prospiciendi & consulendi studium, & seruiendi aliorum commodis more etiam confirmatum propositum, & benefaciendi gestiens voluntas: Ac fortasse etiam flagitatores partim molesti improbitate, partim assiduitate acres, quos illum quoquo modo absolvere atque dimittere voluisse, mirandum non est: In quo animus scilicet illis explendus fuit. Itaq; pauci quod optauissent non fuere consecuti. De nullo autem scribebat quicquam non admodum honorifice & exquisitis verbis atq; sententijs. Ac si causa magna esset, cur hoc facere nollet, nihil scribebat potius, scimusq; pecunias saepe cum aliquibus dedisse, vt illi discederent neque instarent literas petere, & ita quasi redemisse ab eis interpellationes. Quæ cuncta quamuis in vitio esse videantur: ita tamen & ipsa fuerunt indicanda. Vt enim in facie formosa næuum, referre expressa illius imago debet: Sic narratio de magnis & præstantibus sapientia atque virtute viris labeculam quoque aliquam, si forte absit, representans non facere hoc perperam existimanda est. Philippum omnino Melancthonem mira afficiebat sollicitudo de euentu

rerum, negotiorumq; quorum ille particeps
esset factus, & tum maxime cum acciderat, vt
aliquid ipse censeret aut suaderet, vsq; adeo
cauendum esse bono viro statuebat, ne cul-
pam admitteret, neue per errorem quoq; aut
imprudentiam causam mali daret. Inq; his
aliquando angoris perturbatio tanta fuit, vt
illi pene succumberet. Cum ceteris rebus
& maxime priuatis atque suis, animum satis
bonum haberet, vel etiam magnum atq; ex-
cellsum, qui & iniurias patienter ferret atque
adeo contemneret, & in periculis adeundis
minime esset timidus. Verecundia in eo tan-
ta fuit ad vltimum vitæ diem, quantam haud
scio, an qui in altero cognouerit, reperiatur
nemo. Sed interea nihil omnino quod inho-
nestum non esset neque turpe, quamuis par-
uum atque humile, facere eum pudere aut
pigere. Itaq; ea ipsum tractare, agere, exe-
qui multi viderunt, quæ infimi etiam famuli
inuiti & grauate administrare cernuntur.
Valetudo cum initio esset minus bona viuen-
tis sub alieno cœlo & inusitata ratione cibi
& potus vtentis, & corpus valde attenuare-
tur, & peruigilationibus debilitaretur, quem
admodum diximus, temperantia tamen mo-
deratoq; simul & accurato victu illam cor-
roborauit, vt stabili & firma vteretur, neque
morbos haberet vllos infestos, præterquam
calcu-

caleulorum à stillicidio vesicæ, quemadmodum Plinius locutus est (hæc græcis est λιβία & λιβίασις νεφελική) quorum sæpe acerrimos sensit cruciatus. Non multis annis ante mortem etiam oculorum epiphoris atque lippitudine conflictatus est, & cum spirandi viæ semper patuissent, nescio qua de causâ nares tandem obstructæ fuerunt. id quod gravissimè molestissimeque tulit. Humoris etiam ad lumbos vapores & flatus (qui gravius interdum ægritudinis causam dant tam corpori quam animo, (πάθη hæc ὑποχονδρία καὶ vocarunt) tentabant eum nonnunquam, vnde doloris nonnihil capiebat. Potus ei necessarius erat, gratus & bonus. Esca quælibet sine fastidio vescebatur. Sed cibos preciosos & opipare conditos & delicias epularum prorsus oderat. Pisciculos minutos probabat in cibo maxime, & olera atque pulcillas omnis generis expetebat, carnes non item. Et adolescens in contubernio Tubingæ (ubi perpetua consuetudine hordei iuscula cibum communiter capientibus apponuntur) sæpe cum iusculo alterius suas carnes commutavit, ut ipse iusculum duplex alter carnes duplices haberet. A piscibus omnino non abhorrebat vescebaturque libenter ovis. Sed hæc recentia illos feruentes afferri censebat oportere. Itaque in au-

lis vtrumq; esse cibum ingratum solebat dicere, quod neq; recentia oua, & pisces fere tepidi apponerentur, quos iocans neque frigidos neque calidos edi debere aiebat. Magnificos apparatus conuiuiorum detestabatur, neque dubitabat libere reprehendere & obiurgare eos qui instruxissent. Ac recorder cum me præsentem aliquando quodam in conuiuium omnium rerum copia abundante, cum hospes, quemadmodum mos est nostrorum hominum, hortaretur eos qui aderant & Philippum imprimis, vt quæ potuissent acquiri, ijs contenti esse & vesci hilari-ter vellent, se quidem pro suis facultatibus operam dedisse vt quam optime acciperentur, sed videre se & fateri parum effecisse, quia nihil quod magnopere bellum esset, apponeretur, & quæ huiusmodi alia tunc commemorari solent vsitata dissimulatione: Ibi igitur recorder non sine indignatione cum sermonem Philippum interpellasse & gra- uiter monuisse re manifesta tali oratione non esse vtendum, atque adeo metuendum ne ea ipsa ab æterno Deo animaduerneretur, cui potius gratiæ agendæ essent, cum suppedi- tante largiter tam multa, tum benigne con- cedente non modo vsum verum etiam abu- sum illorum. Sed pergamus ad reliqua. Ve- stitus cum retinebat modum quo initio fue-
rat

rat vsus. Tunicam semper gestabat, tam domi quam prodiens foras, vt tectum vndiq; corpus esset. Interior vestis consuetudine horum temporum linea duplex fere induebatur, & super eam lanea altera. Quam vestem exeuntes in publicum nunc variam gestant, eius honestam speciem demissæ ad pedes cum manicis nunquam mutauit. Neq; passus est persuaderi sibi vt externis vllis sericis aut similibus vteretur. Pelles tamen non respuit aquilonares illas, quod essent ad calefaciendum corpus efficaciores. De balba voce Philippi dictum iam est aliquid, cuiusmodi & Aristotelis fuisse accepimus, quam tamen Philippi ingrauescens paululum ætas ita emendauerat, vt nihil audiretur quod offenderet quenquam. Sed & iuuenis incedens aliquando alterum humerum detorquere nonnihil solebat. Horum vtrumque qui imitari vellent reperiiebantur, quemadmodum & alios gestus, vt manuum, quas inter loquendum mouebat, & superciliorum quæ sustollebat. Sed imitati tamen complures sunt meliora atque potiora. His expositis de studijs ipsius & quæ huc pertinent nunc etiam quædam addamus. Cum in omnium liberalium studiorum genere flagrantissima esset cupiditas Philippi Melancthonis: nihil tamen habuit prius aut anti-

quius pietate religiosa , quam sanctissime
semper coluit, & cui omnes quasi nervos in-
genij sui intentos esse voluit. Itaq; in eis
potissimum omnibus viribus elaboravit,
quibus doctrina Ecclesiæ Iesu Christi expli-
cari, constitui, illustrari, amplificari posset.
Inq; eam partem quam operam dederit, &
quid incumbendo effecerit, cum sit evidens
neque quisquam fere nesciat, nostra expo-
sitione non est opus, præsertim quam lon-
gius excurrere necesse esset, quam instituti
scripti ratio & modus pati ferreq; videatur.
Et procedens tamen narratio sua illam serie
attinget & assumet. Cum autem requiri ad
eam doctrinam Hebraicæ imprimis linguæ
cognitionem constaret, quam adolescens
discere non negligenter inceperat, hoc con-
secutus est continuatione studij illius, vt sci-
entiam huius adipisceretur haud vulgarem,
ac potius nullorum facultate, qui hac ex-
cellere putarentur, admodum inferiorem.
multumq; & sæpe collocutus est de eius lin-
guæ difficili & obscura tractatione atque
noticia, cum Bernhardo Ziglero, qui La-
terensis à nobis nominabatur, & ad eam do-
cendam Lipsiam tandem fuit accersitus, &
apud se cum Crucigero, quos ambos de na-
tura & veritate illius diligentissime cogitare
& rectissime iudicare perspexerat. Ama-
bat

bat autem & magnificiebat Ziglerum non tantum propter istam cognitionem & doctrinam, sed quod de omnibus rebus consideratio illius esset accurata & sagax, Ingenium autem perquam liberale &, ut ita dicam, candidum, & constantia summa atque fides certa. Cætera studia & constituebat atque ordinabat, & ipse sine intermissione exercebat. Cumque Vuittenbergæ exercitationes scribendi dicendique diu sane iam essent pene nullæ, hoc autore coeptæ sunt materiæ rerum utilium scribi & publice declamari. Cum ipse suo exemplo præiret cæteris. Nam tum pronunciauit orationem de legibus, quæ postea edita fuit. Non cessabat autem vrgere & sua & aliorum opera, assiduitatem doctrinæ publicæ, Et crebro veniebat ipse in ea loca & ad illas horas, quibus aliqui docebant, & apud discipulos assidens audiebat profitentes. Quo fiebat ut & hi magis attentī, & existimatio ipsorum melior esset & discipulorum retineretur frequentia. Quia vero sciebat omnem humanæ scientiæ veritatem mathematicis disciplinis contineri, neque sine his aut doctrinam certam, aut stabilem cognitionem esse ullam, quibuscunque modis poterat ad has colendas studia iuventutis inuitabat & alliciebat. In quo non parum negotij ei exhibebat.

bebatur, propter studiorum istius tractatus minus elegantes & quasi blandos: Cum ita adhuc traderentur omnia, ut qui non quasi aptus & natus ad hæc per se esset ipse, horrore illo explicationis deterreretur, nedum audiendo professores artium illarum, aut edita scripta legendo magnopere proficeret. Ut igitur sidera spectantibus nota fierent, & tota ista doctrina clarior esset & quasi venustior, instituit ut Plinij liber secundus enarraretur, & ad illud scriptum applicarentur ea, quæ astronomicam scientiam perficiunt. Quæ esse nemo fere nescit, primum cœli vel potius mundi quandam distinctam descriptionem, deinde omnium orbium & stellarum conuersiones & motus demonstrantem rationem. Quo nomine, & quia integerrimum & optimum hunc virum cognouerat, valde dilexit Casparem Bornerum, cumque eo celeriter necessitudine, postquam in has regiones venerat, coniunctus fuit. Nemo autem Bornero ante illa tempora exquisitius aut industria maiore situs, loca, figuras, ortus obitusque siderum signorumque cœlestium obseruauerat, neque huius contemplationis iter planius ostenderat. Fuit hic omnino vir egregius & multis magnis verisque virtutibus ornatus, qui pijs & ingenuis studijs fundandis tuendisque fortunas vitamque suam

am impendit. De Philippo autem Melan-
thone, quod hæc mentio requirat, fortasse
reliquum sit vt indicetur facultas orationis
& quo in genere cruditiæ doctrinæ præstitis-
se cæteris ille videatur. Sed hoc cum mani-
festum perspicuumq; sit, quod eius scripta &
extent & sint in manibus omnium, me dis-
serere esset superuacaneum. Apparet de-
fuisse illi non quidem ingenium, non copi-
am & vim sapientiæ & doctrinæ, non litera-
rum singularem eruditionem, sed inchoata
perficiendi atq; elimandi tempus atque oci-
um. Etsi natura à quadam granditate ab-
horrens, iudicium voluntatemq; ipsius con-
uertit ad curam potius versandi in quodam
castigato & puro atque sano genere oratio-
nis, quam in sublimi & vehemente & cuius
compositio operosa esset, elaborandi. Oma-
nino autem subtilis & arguta concinnitas
& proprie diserteq; eloquendi omnia studi-
um conueniebat disputationibus doctrinæ
& scholasticæ veluti umbræ. Non ille in-
nibus verbis quasi perstreperere. Non à re
proposita sermonem abducere, non aliena
intexere. Sed veluti intra suas ripas flumen
orationis coercere. Hæc est in exponen-
do perspicua, in narrando & ornata satis &
copiosa, in argumentando acuta, neque ta-
men mollis aut eneruata, verumetiam non
decla-

declamatoria quidem illa abundantia, sed
luculenta breuitate fortis & animosa, eosque
aculeos defigens, qui penetrando vulnèrent
non pungant tantum perstringendo. Nihil
autem est in hac fucatum, nihil inæquale, ni-
hil ineptum, nullum aucupium varietatis
quasi in pictura colorum, nullus tumor, de-
nique simplicia sunt & recta omnia. Vt si
de horum temporum & nostrorum homi-
num puerili adhuc veteris præstantiæ imi-
tatione tam gloriose loqui liceat, non dubi-
tem, Atticum perhibere Philippum Me-
lanchthonem. Id quod esset euidentius &
clarius, si mediocre saltem ocium ad suorum
illi limam & expolitionem concessum fuis-
set, quæ pleraque omnia non edita sed effusa,
non composita sed festinanter in cartas con-
iecta, non emissa sed expulsa sunt, non pro-
dierunt sed euolarunt, urgente scilicet ne-
cessitate & re postulante. Verum ne sic
quidem languent aut dissoluta, ieiuna, tri-
ta, vulgaria sunt, sed cum astricta aptis con-
uersionibus, tum membris integris conti-
nuata. Utque fortasse splendor tanquam
solis aut auri in illis non eluceat, nitor ta-
men profecto ostendit se tanquam sideris
aut gemmæ. Et ut non quasi aurea corona
conspiciantur hæc redimita, pulcerrimos
tamen in eis elegantia & munditia floscu-
los

los licet cernere. Vnum est in scriptis Philippi admirabile, quo haud scio an nostra ætate alius illi iure conferri possit nemo: Sententiæ in oratione non modo crebræ & exquisitæ, sed adeo opportunæ, & apte suo quæq; loco collocatæ. In ijs autem quæ ex veteribus assumi & quibus expositio plenior & ornatio & illustrior reddi solet, quas Græci ἀπὸ τοῦ διδασκαλίου vocant, vicit non modo Philippus studium & industriam aliorum, sed hac solertia cæteram facultatem suam ipse superauit. Quid dicam de exemplis commemoratis & enarratis, & adhuc ijs de quibus ageretur accommodatis? In quo genere plurima sunt in medio opera atque monumenta studij & industriæ ipsius. Quid de exquisitis & subiectis rationibus atque causis? In quibus quod est considerationis & omnino felicitatis cuiusdam singularis, hoc præstabat, vt afferrentur & pertinentia ad propositum atque rem de qua agebatur, & illustrantia explicando doctrinam institutam. Cum studium istud, dum colligit sæpe vndiq; omnia, non solum corripere superuacua, sed aliena quoque attexere soleat, adeo vt aliquando plane ineptum deprehendatur. Hoc autem prudentiæ erat, ne quid admisceret abhorrens aut etiam absurdum aut certe superfluens, in quo aberraret & va-

& vagaretur expositio, nedum contrarium aut dissentaneum aliquid irrepere pateretur. In quo vel indiligentia vel fiducia & erga se favore, reperiuntur eruditorum quoque aliorum scripta iustae reprehensionis crimen non effugere. In originibus nominum scrutandis, inque capiendis coniecturis obscurorum & incertorum, non modo mirifice solers & gnauus, sed etiam felix fortunatusque erat. Neque vetustis nominibus interpretandis & ad ea quae his significarentur attribuendis, cuiusquam opera nostro saeculo cognita est praeclearior atque melior. Quo studio ad certam rerum & firmam cognitionem atque scientiam vix aliud esse possit efficacius. Vel sine illo haec potius fluctuat semper & labascit. In ijs de quibus consultaretur, aut etiam deliberatis scribendo explicandis & componendis, nemo attentam cautionem illius & dilucidam expositionem vincere immo assequi potuit. Quam autem res operaque ista difficilis & magni momenti sit, norunt illi qui in manibus eam habuerunt & sunt experti. Vidi cognouique ego eum in talibus operibus non modo sententiarum pondera examinantem, sed verba singula quasi aurificis statera perpendentem. Cum vero natura esset Philippus Melanchthon is, qui vestigando scrutandoque aliquid non facile
falle =

falleretur, tum eius animum præfagiſſe multa & prædicta ab eo quæ euenerunt ſcimus, & viſa ſomniorum euidentia atque certa plerumq; per quietem illi oblata (quod genus hominum Ariſtoteles *ευδυνεῖπας* vocat) neque fere diuinando hac in parte eſſe deceptum. Tentabant idem imitando, ſicut cætera, alij quoque, & audires paſſim percontantes de ſomnijs & hæc recitantes atque conijcientes & ubiq; ſomniantes plurimos, neque perſonis neque rebus ſimilibus. Sed hæc apponi poterunt ad ſuperiorem mentionem imitationis præpoſteræ, cum certe exemplum illius multi cum laude & fructu ſint ſecuti. Quod autem hic vniuerſæ rerum naturæ conſideratione & inquiſitione cauſarum, quibus illæ continentur, exerceri iuuentutis ſtudia ad religioſæ pietatis & cuiuſcunq; muneris adminiſtrationem functionemq; valde prodeſſe ſciret: primum tractando Phyſicæ erudite, voluntates commouit & animos excitauit diſcipulorum, & multis illa iucunda vt eſſent perfecit, deducendo cogitationes ad Medicinæ artis eam partem, quæ ſtirpes tractat, & cæteras res, quarum explorata noticia in faciendō artem, non modo voluptatem ſed vtilitatem affert præcipuam, vel etiam ad ſpem laudabilem operum in curando, neceſſitatem habet.

bet. Deinde ad eam quæ est Ptolemæo pars Astronomiæ seu Astrologiæ, præuidens futura & occulta aperiens, de cœli quadam inspecta facie & animaduerso habitu (nunc Astrologiam proprie plerique vocant) Ad hanc igitur siue experientiæ seu artis rationem plurimos commendatione sua perduxit. Non enim ignorabat fore, vt liberali quadam curiositate animi adolescentum facile caperentur, & ita ab alijs occupationibus abstracti in spacio studiorum utilium & bonorum retinerentur. Quinetiam per iocum solebat manus aduersas aliquorum intueri, & de lineis ibi apparentibus indicare id, quod à quibusque expecti, aut quo delectari illos sciret. Neque ideo tamen Chiromantices superstitiosam diuinationem confirmabat, aut leuitati ineptijsque istis dabat operam, vel alijs eas commendabat, cum constet acerrimum fuisse eum inimicum, omnium quibus falsitatis nugarumue aliquid implicaretur, vel quorum omnino fundamenta non niterentur euidente veritate & certis rationibus stabilirentur. Diligenter autem & accurate rem distinguebat, neq; patiebatur hominum stulticiam & vanitatem cum vera intelligentia, & recto vsu confundi. Quamobrem cum naturæ consideratione & peruestigatione coniuncta à
præsti-

præstigijs & falsitate superstitiosa vaticinationum longissime separabat. Et quemadmodum illorum studium collaudabat, ita hanc impiam optimæ & præclarissimæ rei corruptelam vehementer detestabatur. Atque requirebat in veteribus quibusdam & prudentiam & moderationem, qui temere ac intemperanter cum Astrologiâ insectati essent, tum vniuersas mathematicas disciplinas reddidissent inuisas. De quo quamuis cum sæpe multumque verba grauiter faceret, tum scriberet luculente, & existebant tunc tamen aliqui, qui illi tanquam auctori approbatori que superstitiosi studij obtrecentarent, totamque occupationem huius disciplinæ malam ac perniciosam esse assererent: & nunc etiam liberius à quibusdam hoc nomine mortuo maledicuntur. Sed cum manifesta sit falsitas criminis istius, & maleuolorum euidens improbitas, nostram defensionem attexi nihil attinet. Refellit enim hos non modo res ipsa, sed ipsorum etiam odij immanis scelerata acerbitas. Ipse sane Philippus, qui de his, quemadmodum paulo ante indicauimus, dixisset scripsissetque, quibus hoc studium & factum eius ad omnes bonos vel non saltem insignite malos, facile defenderetur, nunquam voluit cum vlllo contendere neque dimicare. Id quod etiam fecit in alijs omnibus.

Contentus veritate doctrinae suae, & non ignorans rixando & litigando non explicari quicquam, sed omnia magis dubia & incerta fieri. Itaque non ille reprehendentibus & interdum accusantibus saepe etiam insolenter calumniando insectantibus, respondere, non de suis, quae notarentur, apologias edere, non etiam pro sua fama propugnare, sed iniuria accepta tacere & patientia frangere vim aduersariorum. Interea tamen sua attente considerare & inspicere & limando reddere meliora. Quae opera & utilior Reipub. & ipsi honestior fuit, quam si digladiando certamina auxisset, & quibusdam materiam hanc celebritatis expetentibus, in eam nanciscenda adiutor fuisset. Itaque & Philippi Melanchthonis scripta in quae plane hostiles impressiones aliqui fecerunt, & nunc in manibus & posthac futura sunt, cum pleraque haec oppugnantium iam euanuerint, & si quid adhuc in huius saeculi leuitate quasi innatat, id breui interitum sit vna cum auctorum nominibus, demersum in caliginem & tenebras sempiternas. Neque rerum isto statu, & conditione tali temporum, & his ingenij studiisque hominum, & adeo confusis, perturbatis, difficilibus negotiis (quod haud fere cerneret quaeri veritatem, sed dimicare de suis plerosque opinionibus tanta pertinacia,

cia, vt in aduersantes non aliter quam feræ
 bestię vefano impetu inueherentur) facien-
 dum sibi Philippus Melanchthon putauit, vt
 decertando & contendendo eas horas ab-
 sumeret, quæ forte salutarium actionum &
 præclaræ doctrinæ occupationibus, quibus
 nihil prius ei neque potius erat, superfuissent,
 cum præsertim nihil proficeretur hoc labore
 ad eos qui non disputare, argumentari, dis-
 serere nouissent, neque omnino vellent aut
 possent pati sese reprehendi aut admoneri,
 sed maledictis & contumelijs præstantes vte-
 rentur, & ita refutarent contra suas rationes
 adducta, quibus aduersari idem esset ac
 caluum nutando frontem, secundum pro-
 uerbum Græcorum, inferre aietati, & via-
 torem scrutari vesparum cauernas. Qua-
 propter sinebat vociferari impune quoslibet,
 & ipse quiescere & tacere, & dicere sibi quo-
 que in ea parte decretum esse facere, quod
 filiola aliquando sua se facturam esse dixis-
 set. Cum enim hæc abfuisset quondam do-
 mo diutius, & ipse eam interrogasset; quid
 matri respondere vellet, quæ esset gra-
 uiter increpatura moram illam: Tum me-
 morasse hanc simplice pueriliq; sententia aie-
 bat, velle se respondere Nihil. Atq; ipse
 insectantum se iniurias silentio perferre, sibi
 quoq; videri optimum censebat, siue de odio

maleuolentiæq; eorum propria illæ existerent, seu aliorum arbitrio ac voluntati inferuissent. Quæ ipse quidem ad dijudicandum relinquens Deo æterno, cuius oculis paterent omnia, non desinebat & voce sua in schola præsentēs, & scriptis absentes docere & salutari cognitione instruere. Impendebatq; his quasi sumtus laborum & defatigationum & infinitarum molestiarum, neque valetudinem adeo suam neq; vitam ipsam maiori curæ habebat, quam publicam vtilitatem & priuata plurimorum commoda. Quemadmodum enim quidam scripsit: Luscinia suauissimos cantus magna homines voluptate afficere, ipsi auiculæ nihil prodesse, ita labores, vigiliæ, occupationes, opera huius viri, ad aliorum vsum commoditatemq; pertinebant, ipsi nihil afferebant emolumentī, neq; fructus quicquam ex ijs ille capiebat, præter studiij industriæq; honestissimam voluptatem. Cumq; audiret interdum aliquos cupidos certaminum vsurpare prætendendo voluntati incitatæ ad rixas sententiam iactatam in scholis etiam Iurisconsultorum: Crudelem esse eum qui negligeret famam suam, ridens quærere solebat: Quemnam conueniret existimari eum qui ipse læderet? Non enim certe isto pacto defendi illam, ad eos saltem qui veritatis aman-

amantes essent, & sapientia virtuteq; præditi. Quia autem de Philippi Melanchthonis scriptis mentio facta est, non fuit fortasse alienum monere, nonnihil horum & vi-
uente eo, cum magis non prohiberet, quam iuberet aut permitteret, cumq; etiam ple-
rumq; ignoraret, & post mortem ipsius, quæ-
dam prodixisse neq; specie illustria neque re
eximia, edita nimirum non tam ad nominis
ipsius famam, quam puerilis institutionis
vsum, & fortasse alijs quoque de causis. In
his sunt explicationes quædam & interpre-
tationes scriptorum veterum, accommoda-
tæ ad captum auditorum & ex tempore mul-
ta non tam dictata quam effusa & quomo-
docunq; excepta, cum præsertim varijs &
diuerforum negotiorum necessarijs tracta-
tionibus occupato ocij temporisq; tantum
nunquam concederetur, quantum require-
retur non ad elaborandum modo, sed cogi-
tandum quoque, vt eiusmodi quippiam ef-
ficeretur, quod perfectionis insignem lau-
dem haberet. Quapropter de talibus libel-
lis non ab ipso, sed ab alijs diuulgatis, de in-
genio, doctrina, eruditione, facultate Phi-
lippi Melanchthonis iudicium neutiquam
fieri conuenit. Sed de ijs qui etiam dicta &
sermones cotidianos atque familiares ipsius
collegerunt, & ausi sunt cum suis commen-

tationibus diuulgare quid dicam? Iſti vero neque ſtudio neque iudicio neque omnino conſideratione aliqua congerentes, quæ ne audiſſent ipſi quidem, ſed ex alijs fortuito cognouiſſent, ſtolida ſua temeritate ſeſe quidem infamarunt inprimis, ſed & Philippi Melanchthonis nomini maculæ aliquid aſperſerunt, & multorum honorum viro-
rum futilem atque nugatoriam, vel indecoram quoque & indignam mentionem inculcantes, indignationem illa offenſione concitauerunt. Verum in huius ſæculi impudente licentiâ, hoc ſcilicet ad alia innumerabilia mala apponendum, & dandum eſt inſulſæ hominum vanitati, & exiſtimationis ſeu lu-
celli quoque aucupio, cum permittantur fi-
antq; impune alia cum flagitioſiora tum ſce-
leratiora. Sed diximus ſcilicet de his plura quam neceſſe fuiſſe videatur. Quod reſtat igitur ad id exequendum procedat narratio. Exponemus autem reliqua annorum ſerie quos viuendo confecit Philippus Melanchthon, & quid memorabile ei in ſingulis acci-
derit, & quibus præcipuis magnarum rerum tractationibus adhibitus, denique quod cur-
riculum vitæ ipſius fuerit vniuerſum. Quibus ſi quid forte admiſcebitur quod exilius & leuius alicui videatur, venia dabitur mihi, qui fieri poteſt, vt propter mirificum ſummi
amo-

amoris sensum erga Philippum Melanchthonem, quædam æstimem carius quam mereantur. Quod si inter aliquos nostris temporibus veræ amicitiae confrans atque firma fuit coniunctio, & inter nos eam fuisse spero plurimis esse notum vel certe persuasum. Diligere ille me cœpit antequam vidisset. Conspectum tanta amoris affectione est complexus, ut excitari benevolentia illa diuinitus videretur. Neque enim à me quicquam quod eius fauorem mereretur profectum, neque mei ille indigens, neque utilitatis expectatio ulla fuit. Nisi fortasse ex similitudine studiorum voluntatumque exardescere potuit amor iste, qui familiaritatis & cotidiane consuetudinis usu crescens, ad perfectionem veræ amicitiae progressus est, vel certe imaginem quandam atque simulacrum expressit. Accessit par propemodum ætas quod triennio tantum integro me esset ille maior. Ut caritas benevolentiaque nostra spacium ferme æquale ad decurrendum ingredi videretur. Et Philippus Melanchthon, quamquam nuper & Reipub. & suis & mihi ereptus est, non tamen memoria sanctissimæ necessitudinis simul etiam sublata est, neque hæc reliquo vitæ meæ tempore extinguetur, & viuet etiam in posteritate grata semper. Pietas enim illius & humanitas, virtus, sapien-

tia, liberalitas, constantia, fides, doctrina, amoris causa fuit. Quæ tantæ laudes mortuæ profecto non sunt neq; morientur vnquam: Neq; solum mihi in oculis sunt, qui & certius intuendo & fruendo vberius, penitus eas perspexi, sed ab alijs quoque compluribus & nunc cum admiratione perpenduntur, & posteris notæ celebresq; sunt futura. Ex quibus, qui recto consilio & spe honesta & laudabili voluntate suscipere agrediq; in studijs præsertim maiora voluerit, erit nemo, qui non ipsius cupide & adiumentis operum vti, & exemplum ad sequendum proponere sibi velit. Mea quidem nulla dulcior est cogitatio, ea, qua familiaritatis consuetudo & necessitudinis nostræ vsus reminiscendo quasi repræsentatur, cumq; hoc bono non inuenio alterum quod debeat comparare, in quo mihi de maximis rebus consensio, inq; eodem consilium auxiliumq; difficili tempore rerum priuatarum, & consolatio saepe doloris, gratissimaq; interdum & plena oblectationis quies fuit. Nemo vnquam sensit cum esse à me offensum, cum laboris & molestiæ causas ei aliquando me dedisse, ipse nunc quoq; ægre feram. Ab eo nihil vnquam contrarium mihi, aut quo vel minima tristitia afficerer, dictum factumue est. Neq; est in hac fortuna conditioneq;
nostra

nostra alijs de rebus dicendum, sed domi
tamen & foris sic vna fuimus, vt consilio-
rum rerumq; omnium inter nos esset socie-
tas. Studia certe eadem communiaq; pror-
sus fuisse & lator, & gloriari non verear, &
in dolore non possum non iucundissime re-
cordari. Quæ cum omnia in animo mihi
sint & versentur ante oculos non nihil lenitur
desiderium amissi tanti amici, præsertim cum
ille suo omnino tempore decesserit. Cumq;
de eo narratio instituta sit, si nihil quod co-
gnitionem meam non effugisset, silentio præ-
tereundum arbitrer, vel ignosci studio meo
posse, vel diligentia etiam gratiam haberi
oportere existimo. Et vt aliquid mihi me-
morabile alteri paruum & contemnendum
esse videatur, excusare me, quemadmodum
opinor, poterit omnibus insitus error de ijs,
quæ singulari quadam & eximia cupiditate
adamauerunt. Et si autem luctuosa & acer-
ba mors Philippi Melanchthonis omnibus
fuit non suis modo sed etiam extraneis, bo-
nis saltem aut non certe improbis, in ea ta-
men tempora easq; res hæc incidit, vt ei non
tam longiorem vitam ademisse æternus De-
us, quam maturum finem largitus esse videa-
tur. Superauit annum LXIII quem modo
perpauci attingunt. Distracta omnis vita
illius fuit ingentibus laboribus & curis per-
petuis,

petuis, & grauissimis Reipub. priuatisq; negotijs & expertibus omnis remissionis solatijs. Obijt mortem placide & omnino feliciter, suauissime acquiescens obdormiscendo in eius veneratione, quem semper religiosissime coluerat, filij Dei Domini nostri Iesu Christi, & spe immortalitatis & vitæ æternæ: Et hoc ipso exitu ē vita beatus, & quod declinans præsentem miseriam impendentia non modo pericula sed mala migrando hinc vitauit. Non cognoscit iam in terris indices orientes nouas perniciosarum rixarum turbas, & inexplicabilium quæstionum controuersias, & maiorum dissidiorum causas, non ambitione animos plurimorum & inuidiæ odijq; flammis incensos, non scelera audaciæ ruentis atque præcipitis ad interitum. Non videt præsens ea suscipi & geri, quorum exitus anxie sollicitum animum ipsius sæpissime habuissent. Non audit aut legit indicia & significationes consiliorum actionumq; vel absurdarum atque peruersarum, vel etiam exitialium ac pestilentium. Non spectator est eius furoris, cuius impetum ipse semper valde metuit, vt animorum acerbitate palam erumpente, etiam coniuncti antea studijs atque doctrina dissilirent, & se mutuo gladijs suis pene in oculis aduersariorum conciderent. Atque abitu omnino
suo

ſuo hoc conſecutus eſt, vt non amplius, hu-
ius aut illius nomen tanquam Pelopidarum,
neqꝫ rumores nefariorum conatum & au-
daciæ infinitæ exaudiat. Non adhibitus
eſt ad illa, quæ cum non poſſet ſimplicis ve-
ritatis aſſertione defendere, varias multipli-
cesqꝫ aliorum excogitationes, quibus inter-
polarentur, & tortuoſa quædam veluti em-
blemata ferrè & admittere fuiſſet ei inſtar
mortis. Deniqꝫ effugit alias aliorum cri-
minationes, vt ab his nimium facilis aut le-
nis aut timidus, ab illis plus æquo pertinax,
durus, cõfidens perhiberetur. Quin etiam
iam aliqui, quòd ille proſecto inprimis do-
lenter tuliſſet, veteratorem eum & alijs hor-
ribilis ignominia nominibus impudentiſſi-
me mentientes, non dubitarunt appellare.
Nemo iam obſtrepit auribus ipſius expo-
brando dicta ſcriptaue partim inſidioſe ex-
cepta, partim deprauata atque palam cor-
rupta, neque ſuſpicionum malicia præſen-
tem onerat. Atqꝫ hæc omnia opportunita-
te ipſi optatæ mortis ille effugit, vt ſtatuen-
dum hoc ſit, non aliter quam propitiꝝ Dei
benigniſſimo conſilio ortus fuerit & his tem-
poribus nobiſqꝫ donatus Philippus Melanch-
thon, eſſe eundem bonitate & fauore erga
ipſum diuino ſublatus, & ademptum ei vnâ
eum vita ſenſum metumqꝫ calamitatum ea-
rum;

rum, quæ statim mortuo illo affligere religiosæ pietatis optimarumq; disciplinarum & artium studia atque doctrinam grauius atq; turbulentius ceperunt. De qua quid deinceps futurum sit vel ominis causa, vel ne seniles desperationes inculcasse & materiam cuiusdam quasi declamationis videar quæsiuisse, plura non dicam commendans nostræ ætatis salutem & prosperitatem custodi generis humani Filio Dei, Deo æterno & ei permittens cætera. Atq; ita vt me facturum iam dixi, vitæ cursum, quem in terris confecit Philippus Melancthon serie annorum persequar enarrando. Anno Christi Iesu M. D. XXIIII. proficisci illi in patriam placuit. In quo tamen ipso etiam non tam suæ cupiditati quam arbitrio amicorum morem gessit. Comitem habuit eo itinere Vilhelmum Nescum, cuius familiaritate iucundissime utebatur, & quem propter ingenij bonitatem, prudentiam in iudicando, doctrinam, multarum rerum cognitionem atque experientiam & magni faciebat & valde diligebat. Sequebantur Philippum duo adolescentes Franciscus Burcardus Vinarieus & Iohannes Silberbornerus Berbetomagensis, quorum vterque postea dignitate & honoribus longissime processit. Burcardus enim Illustrissimis Principibus patriæ suæ

suæ gratissimas & præclarissimas operas de-
 dit, & rebus difficilibus atque duris præsti-
 tit fidem & nauauit studium. Silberborne-
 rus cum Iurisconsulti personam egregie tue-
 retur, aduersa valetudine quasi apud se est
 detentus, qui si corpore valuisset, honorum
 laudisq; tantum assequi potuisset quantum
 collibuisse animo suo. Sed artuum crucia-
 tus, quibus crebro affligebatur, longius eum
 progredi passi non sunt. His & ipse me
 tunc adiunxi, sumusq; vecti equis omnes, co-
 quisq; quem potuit nancisci. Et venimus Lip-
 siam, Quo die obiit mortem Petrus Mosella-
 nus, qui corpore fuerat perimbecillo & par-
 uo, cum ingenio & eruditione doctrinæ ex-
 celleret. Ad eum morientem accessimus Phi-
 lippus & ego, & hoc luctu tristi acerboq; fir-
 mus affecti, ille amico eximio, ego carissi-
 mo præceptore deinceps cariturus. Erat
 Nesseno veniendum certis de causis Francofor-
 tum ad Menum. Illuc igitur primum sumus
 profecti, & accepti tractatq; publice priua-
 timq; officiose & benigne. Cum autem
 hoc itinere placuisset transire regionem eam,
 cui nomen fagi Buchononiam fecerunt, man-
 simus vnam noctem Fuldæ, vbi tum Crotus
 Rubianus & Adamus Crato degebant. Qui
 aduentu nostro affecti magno gaudio omnia
 humanitatis & hospitalitatis officia prolixè
 nobis

nobis præstiterunt. Ibi etiam certi aliquid primum cognouimus de morte Vlrichi Hutteni, quem vt viuum magnificere & admirari propter doctrinæ eruditionem & præstantiam ingenij, sic ab illius natura vehemente & excelsso animo & voluntate ad nouas res propensa, quam consuetudo etiam quorundam immoderationum incitabat, nonnihil timere Pilippum Melanchthonem licuit animaduertere. Intercesserat Huttено cum Croto Rubiano singularis vsus à prima adulescentia, quo autore vel certe adiutore reliquit ille contubernium Fuldanum, in quod pene puer magis disciplinæ quam religionis causa datus esset, & Coloniam Agrippinam ad optimarum artium & literarum studia percolenda profectus est. Postea venit in Italiam vnde eum reuertentem in patria mea primum vidi anno Christi, vt meminisse videor, M. D. XVII. Celebrabat autem fama non eruditionem modo illius, sed fortitudinem quoque, gloriosi facinoris prædicatione: Quod Gallicæ gentis quatuor Viterbij, quo forte tunc Roma ille excurrisset (cum eodem diuertisset à Rege Gallorum legatus quidam ad Pontificem Leonem contendens) orta rixa ac certamine, profligasset dimicando, vulneratus quidem & ipse desertusq; à socio itineris illius, quemadmodum eum audiui

diui Fulde narrantem anno Christi M. D. XIX. secutus conferentem se Erphordia in patriam Adamum Cratonem summum nostrum. Vbi iterum tunc Huttenum vidi & cum eo aliquot dies familiariter sum versatus, decedente ex aula Moguntina in qua circiter biennium manserat. Adiunxit deinde se Francisco Sickingensi, cum quidem & antea implicatus fuisset motui bellico, quem fecerat in agro Vuirtenbergenſi Huttenica gens interfecto populari ibi quodam suo, & rei militaris studium præ se ferret, & repræſentante se imagine armata maxime delectaretur. Tandem hic postremo grauis querelæ scripto contra D. Erasmus Roterodamum edito, quod ille parum sanè molli spongia abs tergere studuit, non procul ab vrbe Tigurina morbis confectus, quibus frequentibus & acribus laborauerat, mortem obiit, annos natus xxxvi. Fuit nobilitate & laude generis antiqui inprimis clarus, doctrinæ eruditæ princeps, impatientissimus iniuriarum, libertatis immodicæ cupidus, non prorsus alienus à sauitia, quæ etiam vultus acerbitate & minus clemente interdum oratione indicabatur. Sed neque opum abundantia neque corporis, in quo admodum pusillo atq; debili inerat animus ingens ac ferox, viribus pollens: vt de eo mihi sæpe in mentem vene-

rit versuum quibus perhibetur : si respondissent vires atque potentia Demosthenis proposito & solertia, nunquam fuisse futurum, ut in Græcia summa rerum potiretur Macedo. Nam si consilia & conatus Hutteni non defecissent quasi nervi copiarum atque potentia, iam tum mutatio omnium rerum extitisset, & quasi orbis status publici fuisset conuersus. Et dolore autem tum Philippi Melanchthonis ac nostro & deploratione quoque Croti quasi iusta facta sunt Hutteno. Deoque eo in itinere versus à nobis compositi, & refutati quidam mortuum lacerantes. In quibus cum Luscinus quispiam nominaretur, vulturem hunc potius esse Epigrammate quodam Melanchthonis dicebatur. Venimus autem Fulda die tertio Francofurtum, ubi reperimus Ludouicum Carinum, cuius tum suauitate Philippum Melanchthonem admodum delectari animaduerti potuit. Postquam in patriam venit unaque nos omnes, eas aedes petiuimus, quas incolebat vetricus ipsius. Ibi quoque diuertimus apud matrem Philippi. Sed ego comitibus adolescentibus duobus, quos supra nominaui, incensus cupiditate videndi Erasmus Roterodamum, perrexi Basileam. Et inde reuersus cum discedente Philippo Melanchthone (cuius aduentus quemadmodum suis fuerat lætiss.

& iu-

& iucundissima consuetudo, ita abscessio
triste desiderium reliquit, matri præsertim
& fratri Georgio) eo itinere Eytelpergam
veni. Vbi Hermannum Buschium vidi-
mus, qui Philippum iuuenem senex aman-
tissime cum quadam reuerentia complexus,
nobis adolescentibus se ita quoque dedit, ut
facile intelligi posset, affectionem beneuo-
lentiae & amoris erga nos ipsius esse singula-
rem. Academia etiam Eytelpergensis stu-
dium erga Philippum Melanchthonem su-
um officiosissime & benignissime declara-
uit. Reuertentibus nobis non longe Fran-
cofurto obuiam factus est Illustriss. Princeps
Hessorum Philippus, admodum adhuc iuue-
nis, proficiscens ad ludos indictos Eytelper-
ge, ubi Principes Germaniae conuenturos esse
aiebant XIII. & affuturum quoque vel potius
iam adesse Cardinalem Campegium. Is quen-
dam ex suis, qui nomen sibi Nauseae impo-
suerat, Germanico significationis illius in la-
tinum mutato (patriam enim habuit hic in
montana regione Pabepergensi ad Menum)
Eum igitur ille ad Philippum Melanchtho-
nem miserat, ut cum ipso, quasi sua sponte
accessisset, de controuersijs ortis colloqueretur,
& sententiam voluntatemque ipsius ex-
ploraret. Utque etiam policeretur prolixè: Si
Philippus desertis partibus ad se transire vel-

let. Eum Philippus cum simplice & breui responso dimiserat: Ea quæ statueret & sciret esse vera, nullius mortalis respectu aut gratia neq; spe emolumentı aut ambitione amplecti se & defendere, neq; ab ijs qui illa docendo protulissent & nunc asserendo confirmarent, vnquam separaturum suas rationes. Quod autem adhuc fecisset, vt doctrinam puram & sinceram diligentia studij sui præstaret sine obtrectionibus & pugnis, in eo se esse perseveraturum. Hortari omnes qui in hoc genere communi tranquillitati & salutı consultum vellent, vt ad sananda vulnera, quæ amplius tegi non possent, consilia atq; operas conferrent, & quorundam furiosam audaciam coherceri studerent, qui exulcerata veluti infestis vnguib; lacerare non desisterent. Hoc nisi facerent, & ruere si mallent, videndum eis ne prolabendo ipsi primi præcipitarentur. Itaq; tum Nausica dissimulatis omnibus abierat. Sed Princeps Hessorum cum in Philippum Melanchthonem, vt dixi, incidisset, de aliquorum fortasse indicio, qui scirent eum in patria fuisse, suspicatus illac eum reuerti, & animaduertens equitatum nostrum esse minime equestrem, idq; quod res erat arbitratus, ad Philippum Melanchthonem aduchitur, & nunquid ipse sit Melanchthon, interrogat: Ille se esse

se esse respondit, & honoris causa de equo descensurus iubetur à Principe in equo permanere, & conuerso itinere secum pernoctare, cupere enim se de quibusdam cum colloqui, habere autem bonum animum neque quicquam metuere. Philippus & à Principe nihil sibi se timere, respondit, & cum esse, de quo quid fiat, non multum referre videatur. At enim, inquit, arridens, si tamen te adducam & tradam Campegio, haud illi ingratum me facturum crediderim. Ita Philippus tum propter Principem pergens ad quædam fortuita interrogata, respondit & breuiter neque explicate. Non enim aliter tum poterat. Principis etiam animus nondum magnopere res illas curare, atq; esse alijs cogitationibus intentus videbatur. Sed cum Philippus enixe peteret, vt sibi suum iter exequi cum bona Principis gratia concederetur, impetrauit tandem ne abducere-
tur longius, eaq; conditione Princeps illum dimisit, vt de quæstionibus quas audiisset moueri, reuersus domum aliquid diligenter conscriptum curaret quamprimum ad se perferendum. Perconctatus etiam est de com-
meatu, & iussit iter fieri per loca suæ potestati subiecta, & mandata dedit de vsitata deductione in suo territorio. Ex quo postea per iocum nescio qua sententia Princeps ille di-

scipulus Philippi fuit à quibusdam appellatus. Reuerso Vuittenbergam Philippo Melanchthone nobisq; cum ipso, iniustus est acerbissimus dolor, ex tristissimo casu mortis Vilhelmi Nefeni, qui lintre piscatoria traiecturus Albim, id quod sæpe ab eo recreandi animum gratia factum fuerat, cum impigisset illam latenti sub aquis arboris trunco, de improviso vacillante inflexaq; in latus lintre, excidit & in amne est suffocatus, cum quidem eo die post prandium paululum concopitus, talem speciem per somnum oblatam vidisset, offendentis lintris & fluctuantis & prolabentis sui ipsius in fluuium. Id ipse, aduentanti tum Philippo, qui crebro accedere eum soleret, narrauit, deridens cum iocis somniorum vanitatem. Recordati & nos fuimus, quid in itinere accidisset. Est oppidum Heforum Træsa, ubi cum pernoctassemus, mane exeuntes petiuimus præterfluentem amnem aquationis causa. Dumq; ibi Philippus Nefenusq; & ego, cæteris prouectis donec equi biberent moramur, conspicit Nefenus tres coruos in proximo colle & ore & alis sonos gestusq; edentes singulares, quasiq; tripudia facientes. Quærit igitur ex Philippo, Quid portendi augurio illo existimet? Quid enim, inquit Philippus, aliud, quam vni ex tribus nobis propinquam mortem.

mortem. Hoc dicto sensu grauius percuti
 animum meum & me vehementer perturba-
 ri, cum Nescius iocose eludens illud, ita hi-
 larispergeret. Atq; tum quidem veritus fui
 interrogare Philippum, quid in mentem ve-
 nisset ei vt de oscinibus istud interpretare-
 tur. Sed postea narrauit se existimasse, qui
 tam imbecilli esset corpore & valetudine ma-
 la, non posse esse vitam suam diuturnam. Et
 eo sane itinere interdum non modo grauius
 sed periculose etiam insomnia & peruigila-
 tionibus fuerat conflictatus. Neque hæc eo
 commemorantur, quasi aut obseruationi su-
 perstitiosæ volatus gestusq; auium aliquid à
 me tribuatur, aut Philip. Melanchthon ta-
 les diuinationes vnquam curarit, sed vt in-
 telligatur mirabiliter interdum quædam ac-
 cidere, quæ neque deridenda sint, & post
 euentum varias cogitationes commouere so-
 leant. Scripsit de morte Nescii Epicedium
 optimus & doctissimus vir Iacobus Micyl-
 lus, & extant cum nostra tum aliorum Epi-
 taphia. Auxit tristitiam hanc nuncius cru-
 deliss. hoc anno interfecti viri grauis atque
 constantis, & doctrina egregie instructi, ma-
 gnanimi quoque, sed & sapientis & perquam
 modesti Henrici Supphanienensis, qui in Diet-
 maria (quo accersitus venerat ad cœlestem
 veritatem demonstrandam populo illi & con-

cionandum de Euangelio Iesu Christi) inopinato compræhensus & excruciatuſ immaniter horribili ſupplicio necatuſ eſſet. De cuiuſ mortis autoribuſ & architectiſ hoc reperiébatur, vt fraude & malitiâ vicini ſacerdotij eam oblatam eſſe optimo & ſanctiſſimo viro dubitaret nemo. Valde hunc Philippuſ Melanchthon dilexerat & fuerat aliquando Vuittenbergæ caruſ vniuerſiſ, & celebrauit eundem Philippuſ mentionibuſ honorificiſ, quâſ inſeruit ſcriptiſ ſuiſ. Poſt Neſeni hunc caſum placuit mihi pauliſper ſecedere, & tunc ad Clariſſimuſ viruſ Georgiuſ Sturciadem ſummum amicum me contuli, qui in patria forte erat Annæbergæ. Et Vuittenbergam reuerſuſ non diu illic manſi, reuocatuſ in meam patriam. Quo profectuſ ſum circiter iduſ Octobriſ. Interea Andreas Caroluſtadiuſ nonniſi vel ipſe dedit turbaruſ, vel non cauſ certe neque prouidit ne quid daretur. Et tum quidem Vuittenbergam reliquit, ita vt ſimulatam cum Vuittenbergenſibuſ ſibi eſſe fateretur, & non dubitaret aliqua notare & repræhendere, quæ ibi docerentur. Deq; ijs etiã edita ſcripta quãdam fuere. Præ ſe ferebat tamen ſtuduſ de illiſ ipſiſ cum Lutero & alijs diſſerendi, & ſuæ quãdam rationeſ ſi explicarentur & adimerentur dubitationeſ, ſe libenter

ter in ipsorum sententiam concessurum, & denuo cum eis coniuncturum esse. Sed hæc dum mouentur, & incipiuntur actiones, & obtinetur vt tuto Caroloſtadio quos velit conuenire liceat, interuenit calamitas ſediti-
onis plebeia. Poſt quam tamen & ipſam im-
petratum fuit ab Illuſtriſſimo Principe Io-
hanne, qui fratri Fridericho ſucceſſerat, vt
in Saxoniciſ regionibus domicilium habere
Caroloſtadio liceret. Qui aliquantiſper an-
tequam in Heluctiam abiret, priuatus vixit
Chembergii. Ita iam progrediens expoſitio
noſtra ad annum Chriſti M. D. XXV. perue-
nit, qui quaſi inundatione quadam ſeditio-
num fatalis fuit toti Germania, cum quidem
de ſiderum ſuperioris anni congreſſu, astro-
logi plerique eluuiæ aquarum prædixiſſent.
Sed hæc fuerunt ſanguinis, & horribilium fa-
cinorum, de quibus modo ſcribendum non
eſt. Harum rerum ſclerata conſilia & acti-
ones nefariæ quibus angoribus confecerint
animum Philippi, qua affecerint ſolicitudi-
ne, quantopere excruciendo afflixerint, ver-
bis exprimi nequit, & de literis ipſius ad
amicos miſſis & alijs ſcriptis perſpici poteſt.
Euenit autem vix ſedatis illis tam turbulen-
tis & periculofis motibus, vt Martinus Lu-
terus vxorem duceret, paulo etiam ante
mortuo Fridericho Principe Septemuירו

creandis Imperatoribus Romanis. Ex quo facto maximum dolorem cœpit Philippus, non quod illud damnaret, sed quod occasionem dari cerneret inimicis & maleuolis, quos habebat Luterus & numero complures, & opibus potentiaq; præstantes, acerbius insectandi & liberius maledicendi ipsi, cum præsertim, quicumq; hoc facere voluissent, adiuvuari atq; instrui tempore animadverteret, in quo plurimum ad omnium rerum momenta situm esse constat. Verum cum & Luterum ipsum iisdem cogitationibus nonnihil consturbari intellexisset, non modo suum est dolorem moderatus, sed illum quoq; consolando erexit, & tristitiam molestiasq; eius hilaritate colloquiorum leuavit, & ad pristinam eum alacritatem reduxit. Eo anno proficiscens cum nobilitate generis, pietate, virtute, sapientia præstantiss. viro Iacobo Fuxio ordinis equestris in Franconia, cui Prusiam videre placuerat, quod post oppressos seditiosos magna esset vbiq; confusio rerum, & quorundam ferox insolentia, & nihil vspiam amantem patriæ & studiosum veritatis & alienum ab inhumanitate oblectare posset: Tunc igitur Vuitenbergam veni, & reuerentes cognouimus interea allatas literas fuisse scriptas ad Philip. Melanchthonem à senatu vrbis Noricæ, quibus accersebatur ad delibe-

deliberationem de ludo literarum apud se instituyendo. Norimbergæ tum Principes senatus erant Caspar Nucelius & Hieronymus Ebnerus, & Lassarus Spengelerus nomine quidem scriba senatorius, sed reuera confiliorum omnium fere autor ac gubernator. In Nucelio vigebat animus altus atq; magnus, & ita prudens, vt neminem audiuerim, cum sermonibus interfuerim de eo plurimorum, qui in isto genere ciuilis rationis ac facultatis quenquam præstantiorem illo cognouisse diceret. Quæ secum ipse deliberando è Re. pub. esse statuisset, ab ijs nullius odio aut amore abduci se patiebatur. Non obtineret aliquid & vinceretur aduersantum numero, at ipse dissimulare studium & propositum suum, & facere quod omnes cuiuscunque artis non vulgariter periti seruant, vt permanente eadem de sui operis absolutione sententia, non facile mutant efficiendi illud institutum modum, neq; desistant ab experiendi conatu. Itaq; cum iam Nucelius aliquid abieciisse aut reliquisse existimaretur, compeseri alio tempore occasionem cum nactum ex improviso de eodem referendo perfecisse, vt approbaretur decernendo. In Ebnero ingenij maior erat mansuetudo & placidior quietiorq; mentis habitus. Innocentiæ cura summa & bonæ conscientiæ custodia. Vt
horum

horum duum quasi copulationem ciuitati illi ad felicem statum Deus largitus esse videri possit; temperamento quodam optimarum quidem naturarum, sed quarum tamen vtraque aliquid haberet alterius dissimile & suum, administrationem Reipub. fortunans. Spengelerus autem & vsu rerum, & quadam etiam inchoata doctrina excelebat, explorataque & perspecta multis difficilibus & arduis negotijs fide atque industria, cum inextincto ardore asserendi defendendique vera & recta tam ad Deum quam homines. Itaque nihil erat ei antiquius religionis sinceræ & puræ instauratione. Quod autem intelligeret & perpenderet animo suo, quantum esset situm ad spem omnis prosperitatis rerum diuinarum & humanarum & salutarium in hac vita actionum, in puerili institutione, hortator & instigator fuit senatui, ut peritos alios quos bonarum artium & literarum reperirent, qui operam darent suam ciuitati in pueritia erudienda, quibusque congregatis eximius quidam apud se ludus aperiretur. Cumque illi duo quorum virtutem & sapientiam veluti adumbrando paulo ante indicauimus, sentirent idem, non magno negotio effectum fuit, ut Philippo Melanchthoni publice scriberetur, & de eius sententia atque iudicio totam rem constituendi causa, ad

aduentus ipsius peteretur. Qui cum recu-
sandum iter istud non putaret, & potesta-
tem faciendi impetrasset à suo Principe, ita
est illud huius anni autumnò ingressus, &
nos sumus vna profecti, eoq; itinere Pabe-
pergæ apud meum patrem habui hospitem
Philippum Melanchthonem cum in illo co-
mitatu esset egregius generosæ stirpis & men-
tis iuuenis Melchior Fronspergius. Norim-
bergæ autem hoc actum est, vt proximo an-
no rediret illuc Philippus Melanchthon &
adduceret Eobanum Hessum, cum iam con-
uenisset vt Micaelus Rotingus & ego ibi-
dem illo tempore adessemus. Fuitq; anno
Christi M. D. XXVI. nobis magistris inchoa-
ta publica doctrina bonarum literarum atq;
artium in ea vrbe, adiunctusq; mox nobis
Iohannes Schonerus Mathematicus. Labo-
rabat Philippus vt socium haberemus ope-
rarum scholasticarum doctissimum virum
Sigemundum Gelenium gente Bohemum,
Qui ante annos aliquot ex Italia, vbi patri-
monij totius pecuniam in necessarios studio-
rum sumtus impendisset, reuersus aliquan-
tisper vixerat apud Philippum gratissimus
huic hospes & nobis sodalis iucundissimus.
Sed nescio quæ res illum Basileæ, quo tunc
ad Frobenianos se contulerat, detinuerit,
vbi & ad senectutem vxore ducta peruenit,
& in

& in literis bonis operam nauauit, vir honesto loco natus, & vtriusque linguæ peritissimus, & valde ingeniosus & mirabiliter diligens. Hoc ipso anno & curarum nonnihil & molestiæ aliquid ex me percepit Philippus Melanchthon, cuius sollicitudines de amicis essent ingentes, præsertim ijs in rebus quarum vel minima ex parte autor ipse extitisset. Fuerat decreta legatio ad Carolum v. Imp. Rom. Qui in Hispania illo tempore coniugio operam dabat, cum duxisset Lusitanæ Regis Emanueli filiam. Ad hanc legationem obeundam quatuor delegcrant, inter quos præcipuus erat Generosus & Nobilis Comes Albertus Mansfeldensis, apud quem cum facta aliquando de me à Philippo mentio fuisset, & ille secum aliquem esse vellet, qui loquendi scribendiq; latine vsum quendam haberet, conditio mihi vna proficiscendi ita lata fuit. Quam cum iuuenis ætate & animo mores externorum cognoscendi cupido minime repudiandam putarem, obstitere mihi quædam ad quæ expedienda consilio opeque illius indigebam. Itaque nonnihil laboris mea causa tunc Philippus suscepit, & procedente, vt credebatur, itinere sollicitudine de me affectus fuit maxima. Sed cum ventum fuisset Eslingam, vbi procures Imperij congregati dare mandata &

& absoluere legationem debebant, conuersa res fuit, & visum illo itinere ad id destinatis supersedendum, neq; Cæsarem tunc missis legatis interpellandum, & quæ significari placuisset, literis exponenda esse. Reuersi igitur Norimbergam sub huius anni exitum nonnihil, quemadmodum existimabatur, periculi vitauimus, & anxietate sua Philippus est liberatus. Sed sequens propter nostras ærumnas grauius illum afflixit, præsertim gaudentem indicio literarum, quibus certiore cum feceram de consilijs actionibusq; coniugij mei. Hanc enim læticiam tristissimus casus calamitatis à fratre meo acceptæ contaminauit. De quo, rebus illis iamdudum compositis, & quia renouare ingentem dolorem & sæuissima vulnera quasi refricare non lubet, plura dicenda non sunt. De Philippo Melanchthone hoc prædicare debeo, neq; laboris vllius defatigatione retardatum, neq; formidine vllorum deterritum, neq; metuentem flagitationum offensiones, & hos illosq; appellando, & itineribus sese defatigando, & consulendo, & deprecando, facile declarasse quanti nos faceret, & quid in amicitia fieri oporteret suo exemplo demonstrasse. Sed & hæc omittantur, ne exequi & texere narrationes de me non de illo videar. Non diu ante finem huius anni patrem

trem ego amisi meum, Annos natus LXXXI. magis aduersorum mole quam morbo oppressum, qui luctus Philippo Melanchthoni mecum communis fuit. Estq; ille me tunc consolatus amantissime scripta epistola. Quæ, si videbitur, & res feret, vna cum alijs aliquando proferetur in lucem. Annus Christi M. D. XXVIII. pene obruit Philippum consultationibus & curis de maximis negotijs & rebus difficilimis atq; grauissimis & præsentē discrimine plenissimis. Quæ tempestas vt subito extiterat, sic statim abiit. Sparsa enim fama & delato indicio conspirationis cuiusdam ad eos vel coercendos, vel in ordinem redigendos, qui ausi fuissent ritus pristinos religionis nostræ immutando veluti secessionem quandam facere, Principum quorundam animi iracundia & dolore exarserunt. Sed Illustrissimus atq; Præstantissimus pietate, virtute, sapientia, & optimus Princeps Iohannes Ernesti Filius, Friderichi frater, Iohannis Friderichi Pater (quæ ex hac domo præclarissima nomina nostra ætate pulcerrimis laudibus & summo splendore effloruerunt) Dux Saxonum, vnus ex Septemuiris Imperij Romani, clementia atq; mansuetudine operaq; & studio suo iam exorientis belli exitiale incendium restinxit, & Germaniam periculo, omnes metu

metu liberauit, cum se cum præberet cuius virtutem & integritatem & abſtinentiam inimici quoq; admirarentur & laudarent. Sed iſta à nobis enarranda hoc loco non ſunt. Eodem anno & laborioſæ & inuidioſæ res occupatum tenuerunt Philippum Melanchthonem. Quod enim multa inordinate & perperam in adminiſtratione rei Eccleſiaſtica fierent, inſpici iuſſit Illuſtriſs. Princeps Dux Saxonie Iohannes ſtatum Eccleſiarum ditionis ſuæ. Huic negotio & ex nobilitate quidam primarij, & cum alijs Philippus Melanchthon præfectus fuit. Plurima ibi comperita ſunt, ad quæ reſpectu maturo opus, multa depræhenſa vitia, quorum emendatio neceſſaria eſſet. Neq; breuiter dici poteſt, quantum boni illa inſpectionis opera diligentiaq; effectum fuerit, cum & peccata aliquot annorum corrigerentur & fulcirentur ruinae multis in locis labefactatarum Eccleſiarum, & proſpiceretur in poſterum incolumitati illarum. Complexus tunc eſt Philippus doctrinae ſummam perſpicua breuitate, & compendio memorabili, vt certo ſciant docentes in Eccleſijs regionum illarum, quid ſequi deberent, Neu diuerſa & diſſentanea traderentur. Qui libellus maxime & vtilis per ſe, & tempore neceſſarius, non caruit obtreſcatoribus varijs, quorum aliqui

I requi-

requirerent neruos & vim contentionum, alij dicerent prodi causam, rursumq; libertatem eripi & adduci in seruitutem homines. Nam autore & monitore Philippo aliquid tunc de disciplina & vita nonnihil dissoluta constitutum, & eo libello cum fidelissimis præceptionibus & salutari doctrina perscriptum fuerat. In quo si aduersarij tantum errassent ferripoterat, sed coniunctos in causa, non tam iniquos certe iudices, neq; censores immites esse oportuit. Verum leuitas plerorumq; talibus temporibus perspicitur, cognosciturq; quam in paucis & studiū veritatis vigeat, & sententia certa sit atq; firma. Philippum quidem labascere, qui eadem placide exponeret, quæ ab alijs vehementius disputarentur, rati aduersarij ægerunt cum eo vt ad se transiret, & conditiones tulerunt defectionis, vt putarunt, haud respuendas, cum interea apud quosdam suorum quoq; ipse oneraretur suspitionibus & inuidia odioq; premeretur, & hanc mercedem acciperet studij, diligentiae, laborum, fidei suæ. Annus proximus Christi, M. D. XXIIX. quo matrem quoq; amisit migrantem ex hac vita, & ipse mirifice exercuit Philippum Melanchthonem propter actiones conuentus Spirensis, quo cum Illustribus. Principe Duce Saxonum Iohanne ille venerat.

rat. Erant res multiplicibus & varijs modis exulceratæ & vndiq; magis impendebant malorum incrementa, quam subleuationis aut prosperitatis spes ostendebatur. Et tantis in miserijs Reipub. controuersijsq; ortis ijs, quæ capitalia odia ordinum cum iam excitauissent tum adhuc alerent, non tam hoc alienatis inimicisq; animis dissidentes agere videbantur, vt explicatis dubijs & quasi decidendo occasione discordiarum remota, ita diuulsæ separatæq; partes benigna pacificaq; compositione rursus iungerentur, quam veluti dedita opera iritare sese mutuo, & odio quietis dissidia vetera confirmare, & his alia addere, suamq; vrgere perniciem, perinde ac si impendens exitium auerti nolent. Cum autem his similia alijs etiam fatalibus temporibus, orbisq; terrarum locis acciderint, fortasse liceat consolatione hac, quamuis infirma & misera vtî: Haud tibi soli, & ferenda sint illa patienter. Vtinam præteritis omisis, quamuis graua & intolerabilia ea quibusdam esse videantur, non pudeat aduersis doceri, & libeat cauere prouidereq; ne priores difficultates, vt lenissime dicam, nouis alijs cumulentur. Quod adiuvante Filio Dei pacis sinceræ largitore, esset in procliui, si illius voluntati seruirent studia hominum, & non indulgeret quisq; ani-

8

mo suo. Neq; me fugit, à nonnullis Philippi Melanchthonis anxias sollicitæ mentis curas sæpe esse repræhensas & plane vituperatas, tanquam nimias & immodicas & timiditate quadam desperata neq; Deo æterno gratas & hominibus odiosas ac contrarias, quæq; susceptis interdum rebus vtilibus officerent. At ille neq; ignauo metu, neq; desperatione culpanda quorundam vehementiam non probabat, sed ipse erat attentior atq; circumspectior veramq; considerationem adhibebat, & ne temeritatis iustum crimen vlllo incepto subiretur, præstandum esse iudicabat. Neq; negabat se intuentem præterita & contemplantem præsentia, non parum interdum vereri quid deniq; futurum esset, & ea cura solitudineq; angere animum suum fatebatur. Quod quibus vsu non veniret, eos non tam fortes quam nimis audaces vel nullo sensu etiam humanitatis præditos videri posse arbitrabatur. Vt autem fabula narrat quendam qui cæcus esset per ponticulum angustum sine trepidatione transiisse, cum alij videntes & periculum intelligentes idem facere non possent, sic profecto prudentis animi cogitatio semper in cautione timida est, cum nimia fiducia alij quamplurimi admodum sæpe insolentes ferocesq; esse videantur. Ac memini me aliquando perturbatum Melanch-

lanchthonem hortari, ut illas curas deponeret, & reijceret, secundum præceptum Davidicum, in Deum æternum. At ille si, inquit, nihil curarem, nunquam implorarem Deum. Cum autem curas finiat religiosa pietas precibus, nimirum expers esse earum penitus illa nequit. Et curis igitur ad preces impellor, & precibus curas depello. Diligentia sane & circumscriptio, cura, attentio Philippi Melanchthonis non probabatur æque omnibus, cum reperirentur qui ad voluntatem sensumq; aliorum iudicia sermonesq; suos perfacile inclinarent, & ideo grati acceptiq; essent ijs, quibus assentiebantur vel etiam assentabantur. Philippus vero qui in cupiditate benefaciendi quamplurimis & commodis aliorum serviendi, ad res suscipiendas promptus paratusq; esset, consulendo autem agendoq; cum perquam sollicitus tum propter summam fidelitatem nimis etiam anxius de euentu, nonnunquam liber quoq; tam monendo quam reprehendendo, cauere non poterat quin aliquos offenderet, non etiam nullos à se plane alienaret. Non debui hoc loco omittere, quod compertum haberem, qui & ipse tum salutandi Philippum Melanchthon. gratia Spiram venissem, accidisse optimo & elegantissimo atq; doctissimo viro Simoni Grynæo. Tametsi me non

fugiat & ab ipso Melanchthone esse eam narrationem insertam libro cuidam ipsius, & sciam de hac re quosdam ita locutos vt ficta, quosdam vt nugatoria. Mihi quidem minime superstitioso, & ei tamen, qui nunc etiam numinis diuini vim & efficacitatem in terris aliquando cerni non dubitem, haud videtur illa extenuanda nedum deridenda. Quæ sese ad hunc modum habet. Eytelpergæ Grynæus tunc, vbi ducta vxore conseruerat, opt. disciplinarum & artium doctrinam profitebatur, cum autem cæteris in partibus philosophiæ non facile ei parem reperires, tum mathematicarum scientiarum erat peritissimus. Visum fuerat huic quoq; Spiram vicinam venire, vt cum Philippo Melanchthone paulisper versaretur. Ibidem aderat & Faber Constantiensis qui magna vehementia resistebat puriori Ecclesiasticæ doctrinæ & in hac vitiorum emendationi. Erat quædam Grynæo cum hoc necessitudo antiqua, qua fretus accedit hominem & cum eo primum alijs de rebus familiariter colloquitur, deinde & sermones infert de ijs quæ erant in manibus. Monet hortaturq; ne veritatis hostis esse pergat, neu sese non modo cum eam oppugnantibus coniungat sed his etiam autorem ducemq; præbeat. Disputat cum ipso libere, confidentius quoq; aliquid dicit.

dicat. Faber qui valde offenderetur oratione tali, dissimulare tamen omnia, & iubere reuerti ad se Grynæum, vt accuratius de tanto negotio disputarent. Narrat amicis hoc Grynæus, qui dissuadent reditum ad Fabrum & rem periculo non carere ostendunt. Erat Philippus vna cum suo grege collocatus in hospitio domunculæ sacerdotis cuiusdam senis, nequaquam mali hominis. Ibi Grynæus & ipse fere semper esse consueuerat. Venit eodem forte Gryneo absente quidam eo habitu specieq; eiusmodi, quæ dignitatem præ se ferret singularem, quærîtq; ex Philippo ubi Grynæus sit. Modo, inquit Philippus, ille abiit. Vellem adesset, inquit hic, & scire se indicat parari ipsi insidiâs, in quas incidere nollit virum bonum & doctum, sic enim prædicari. Ita ille, quisquis fuit, nam cognosci id non potuit, discessit. Reuertitur paulo post Grynæus, Quem Philippus iubet redire Eytelpergam statim neq; diutius Spiræ commorari, ac miranti quæ esset festinationis tantæ causa, narrat omnia in viâ, cum deduceret ipse eum ad Rhenum, quo loco Illustriss. Princeps Elector Ludouicus Palatinus peculiarem traiectum instituerat. Et non diu post affuit armata quædam manus ad comprehendendum Grynæum missa. Neq; quiquam aliter

ſupicari potuit quam à Fabro ortum id & tantum periculum Grynæo creatum fuiſſe. Natus hic in iugis montium vicinis Vuittenbergico agro, Viennæ ad Danubium bonarum artium ſtudijs operam dederat. Cumq; Eytelpergæ annis aliquot ſubſtituiſſet contulit ſe poſtea Baſileam, ibiq; multis egregiæ doctrinæ operibus editis, mortuus eſt anno Ieſu Chriſti M. D. XLI. Commigrationis autem illius non minima cauſa fuerat, cupiditas vtendi conſuetudine Iohannis Oecolampadij, Quem doctrina excellentem cœleſtis & æternæ veritatis, id eſt, ſacrarum literarum ſtudioſiſſimum, ſimulq; integritate vitæ atq; morum honeſtate & ſuauiſſime ingenij venerandum ac amabilem cognouiſſet. Sed redeat ab hac digreſſiuncula ad inſtitutum narratio noſtra. Dum illi qui debuerant rebus laborantibus ſuccurrere potiſſimum & remedia adhibere, vel omnino facere medicinam negligunt, vel ita facere aggrediuntur, vt malum indies redderetur inſanabilius & aſperius, Non modo non ſedata fuerunt iam commota, ſed indies quaſi tentationes nouorum morborum acceſſerunt. Et metu iniuriarum atque violentiæ inceperunt tunc ſibi aliquanto diligentius proſpicere illi, qui vt deſertores veteris religionis accuſabantur & damnabantur. Itaq; capita, vt aiunt, illi

con-

conferre & de coniunctione ac fœderibus ad necessariam defensionem colloqui. Feruebant in Heluetia ea tempestate contentiones, & ciuitas Argentoratensis, ritus quosdam iudicio & persuasione sua impios, abrogauerat, frementibus ijs, quibus mutatio illa detrimento futura esset. Atque Spirenſi conuentu cum vrgerentur decreta priora valde dura & leniora antiquarentur, coniuncti Principes quidam refragari manifesto non dubitarunt, testantes publice talibus decretis quæ fraudi esse possent progressionibus doctrinæ veritatis cœlestis, se non assentiri neq; ijs teneri velle. Horum primus fuit opt. & excellentiss. pietateq; Illustriss. Princeps Iohannes Dux Saxonum. Adhæseruntq; eis ciuitates potissimum duæ Norimberga atq; Reutlinga. Et fuit ista origo atq; causa nominis & cœtus eorum qui sunt appellati protestantes. Solenni autem Iuris publici obseruatione res illa acta & scripto exposita, & postea missis ad Imperatorem Rom. Carolum v. legatis, subiectissimâ significatione indicata est. Qui legati illum in Italia conuenerunt perægeruntq; apud ipsum mandata, aduentantem ad Imperatoris titulum coronationis augusto ritu adipiscendum & obtinendum à Pontifice Romano. Sane rediens mecum in memoriâ earum re-

rum quæ illis temporibus gesta fuerunt, non possum non vehementer succensere quibusdam, qui ignari omnium quædam tunc dicta atque etiam scripta Philippi Melanchthonis nunc contra ipsum colligunt atque profecerunt. Quo tamen nihil fere aliud consequuntur, quam ut inhumani vel potius impij odij sui nefariam acerbiteratem patefaciant. Ut in mari procellis ventorum commoto fluctus multiplicantur, sic inceptions inuicatorum augescebant. Et de dogmatibus disputationes quorundam erant alicubi horridiores, & consilia animosa atq; festinata actionesq; præcipites. Neque quod Medici præcipiunt, cauebatur, ne indigesta adhuc atque cruda agitentur impellendo. Quæ animaduertens & perpendens Philippus Melanchthon non poterat non pietatis prudentis attentione metuere, quorsum illa euasura essent. Itaque si quid suscipi moueriq; cognouisset turbulente aut saltem audacter, valde perturbabatur, autoribusq; irasci & aduersari illis solébat. Non rem interdum improbens, sed intempestiuam aut præposteram rationem reprehendens, eorum præsertim qui alacritate quadam nimia delinquerent, & exultando laberentur, & viam nondum tritam ingrediendo nonnusquam aberrarent. Cum ipse non modo veritatis sed simplicis huius
& pu-

& puræ esset amator, & quicquid abhorreret à doctrinæ directâ & plana veluti via, recederetq; à proprietate disertæ & perspicuæ tam expositionis quam explicationis, id magnopere fugeret. Fontem autem doctrinæ integræ & sinceræ in Ecclesia, vnde ea hauriretur vniuersa, præter sacras literas nullum aperiendum admittendumq; cum & sciret & imprimis defenderet, Doctrinam nihilominus quasi deduci, vt liquido flumine & sine ambagibus manaret, per consentientem antiquitatis piæ atq; religiosæ explanationem tanquam alueum debere statuebat. Cum igitur intempestiuæ vel etiam importunæ nouitatis quasi eruptiones, quæ nouorum quoque certaminum & distractionum maiorum causæ essent, neutrquam illi placerent, tum fœderibus deuinctas coniunctiones & armorum communitatem implicari in negotium religionis & specie mirificum, & reipsa periculosum esse intelligens, curis grauissimis & maxima sollicitudine afficiebatur de talium consiliorum atq; actionum euentu. Non autem temporibus, personis, occasionibus, ipsisq; adeo negotiis atque rebus perspectis, distinctis, exploratis, omnia quæ dicuntur confusa atque obscura esse necesse est. Qualia sunt partim obtreçantia bonis & maledica, partim scurrilia atq; nugatoria,
partim

partim etiam calumniosa & mendacijs refer-
ta scripta quorundam, quæ his temporibus
euolant tanquam monedulæ aut sturni &
magno numero & stridore ingrato, &, si
quid adhuc reliquum est boni, illud carpen-
do perimunt, & omnem spem fructuosorum
tractatum præcidunt. Qui nisi repriman-
tur aut fugentur, quid futurum tandem esse
existimandum sit, non libet dicere, itaq; hoc
ipsum relinquo vnicuiq; cogitandum, & ad
pertexendam narrationem redeo. Hoc et-
iam anno Illustriss. Princeps Philippus Land-
grafius Hassiæ pio consilio & studio lauda-
bili perfecit, vt Marpurgi conuenirent pri-
marij doctores Ecclesiarum Saxonicarum &
Helueticarum & suarum. In quorum nume-
ro Philippus quoq; Melanchthon fuit. Et est
in illo congressu de capitibus præcipuis do-
ctrinæ Ecclesiasticæ tractatum, ac de plæ-
risq; quidem plane consensus, de nullo au-
tem tunc sane iracunde litigatum, aut in con-
trouersia alienatis odio animis discessum.
Celebrauit nominatim compellendo eos qui
tunc conuenerunt elegante epigrammate
Euricius Cordus postea inter alia edito.
Erant autem omnino ante oculos & inter ma-
nus multæ & magnæ difficultates illo tem-
pore, & ærumnosa Respub. & Ecclesia af-
flicta. Nam & bellorum vndiq; furor in-
flammas

flammas, & de Religione crescebant discordiæ, & multa loca fame pestilentiaque erant infesta. Quæ de aliorum narrationibus poterunt ab ijs, qui per ætatem non meminere, cognosci. Cum autem Turcicus exercitus, qui ad oppugnationem usque urbis Austriacæ Viennæ processerat, virtute præsidij, cui præfectus esset Illustrissimus & fortissimus Princeps Philippus Ruperti F. Philippi nepos, Palatinus, de conatu & spe potiendæ urbis depulsus, in qua capiendâ omnes vires opesque suas fuerat expertus: Hic igitur cum fœde vastata Pannonia discessisset, ut nihil amplius eo quidem tempore esset Germaniæ ab illo periculi: Et iam antea tentatis omnibus & fortuna vndique aduersante, Franciscus Rex Gallorum quamvis duris conditionibus pacem cum Imperatore Carolo fecisset & inter hos potentissimos Christiani nominis Principes reconciliata gratia videretur: Ita igitur tandem primum in Italiam ad Pontificem Romanum veniendum & inde in Germaniam progrediendum Carolus statuit, si quo modo præsens quod operæ precium esset efficere, & laboranti Reipublicæ conturbataque Ecclesiæ opem ferre posset. In qua parte & consilia ipsius recta & veras rationes fuisse multa vel plurima potius sunt argumento.

Sed

Sed obstitit nimirum Caroli egregio proposito & eximiae voluntati, impediuitq; progressionem ad salutem & dignitatem Reip. in fatalis mutationis articulo, cum hominum pertinacia & effrenata saeculi licentia, tum tantae iampridem factae labes, & res usque adeo vel conuulsae vel certe inclinatae, ut tanquam ruinosum aedificium farciendo tegendoq; instaurari non possent, sed siue neglectas concidere illas, seu demoliendo & extruendo denuo restitui in pristinum locum oporteret. In quo quidem quanto mora fit diuturnior, tanto vel grauior & horribilior ruina, vel demolitio & reaedificatio laboriosior atque molestior est futura. Verum illa tum spe eoq; animo in Germaniam venire voluisse Carolum Imp. cur dubitare aliquis velit, causam non reperio. Inductus igitur conuentus fuit qui ageretur Augustae Vindelicorum anno Christi M.D.XXX. Quo tandem Carolus accessit Idib. Iunij, cum illic ordines Imperij iamdudum praesto essent, inq; ijs primus Illustriss. & opt. Princeps Iohannes Dux Saxonum & Septemuir, qui & ante & modo honoris causa nominatus, similiter ut deinceps nominetur, narrationis series & res feret. In huius comitatu inter Theologos fuit Philippus Melancthon. Acta res sic est, ut plerique suspicarentur,

rentur, promissa quædam Pontifici Romano ut fierent, operam dari. Itaque vehementer obiurgatis illis, qui tanquam desertores veteris religionis pene seditionis insimulabantur, & varia aggressione eorum animis tentatis, Quod inter hos etiam ipsos quædam adhuc controuersa essent, iussi sunt omnes scriptis sententiam suam demonstrare. Tum informata quædam summa fuit doctrinæ vniuersæ quam profitebantur & sequebantur Ecclesiæ Saxonicæ & cum his concordantes. De qua post diligentissimam considerationem compositum est scriptum comprehendens capitibus aliquot expositam & explicatam doctrinam illam vniuersam, opera studioque & cura atque immenso labore Philippi Melanchthonis. Quo scripto contentionibus disputationum agitatur quæstiones variæ, cum ordine dispositæ tum assertionem simplice & aperta illustratæ definitæque sunt. Ut ab hoc tempore certa & explicata ratio doctrinæ cœlestis veritatis vno scripto exposita cœperit extare. Quia autem de hac consentientibus Principibus & illorum consortibus suo nomine commemorari placuerat, quid & verum esse persuasum haberent, & in quibus tuendis defendendisque perseverandum esse statuerent, Confessionis titulo scriptum illud Carolo Imperatori fuit obla-

oblatum. Maluerat hoc Philippus non Principum & eis adiunctorum nomine edi, sed docentium, qui Theologi vocantur. Nam & magis decere istos talia differere, & autoritatem illam potentiae quasi liberam referuari, vtilius esse iudicabat. Sed obtineri id non potuit, quod actionem illam splendidiorum fore subscriptis istis nominibus existimaretur, & alijs quoque de causis, vt hoc fieret, videretur melius. Propositae autem fuerant complures descriptiones, quaedam etiam admodum verbosae. Nam qui in causa hac coniungebantur, ij iusserant suos quique Theologos aliquid conscribere. Quae legenda cognoscendaque erant Philippo. Qui non ille quidem de eorum, quae asseriebantur, veritate ambigebat, neque incerta multoque minus falsa defendi putabat: Sed quanquam & sacrarum literarum autoritate & consensu religiosae pietatis ab initio ea niti sciret, ne agendo tamen optima causa in tanta rerum perturbatione & hominum tam insolentia quam ferocia atque etiam arrogantia, laederetur, neu qua in parte negligentia aut confidentia peccaretur, sollicitè & anxie metuebat. Cumque onus totum ipsi impositum esset & ab eo sustineretur, cura laudatissima afficiebatur, ne quid committeretur, quo & sua ad Deum conscientia vulnerari, & bona
ad ho-

ad homines violari existimatio, & Reipublicæ perniciēs incitari videretur. Ipse ego inter tales cogitationes non modo suspirantem sed profundentem lacrimas conspexi, & pietatis atque prudentiæ cum iustissimas querelas, tum gravissimos sapientissimosq; sermones illius audiui. Hæc quibusdam securioribus displicebant, & Martino Lutero indicata inflatus, quandam epistolam expresserunt, qua increpari timiditatem Philippi, uti acrius, ille non dubitaret. Eamq; ad invidiam ipsius circumtulērunt, cum magis laudationem illa quam vituperationem Philippi contineat. Sed nescio quo pacto huius viri dicta & facta omnia perpetuo, quasi signum quoddam, proposita fuerunt, ad quod dirigeret veluti sagittas calumniarum & obrectationum leuitatis improbitas. In arduis autem & non carentibus præsentē discrimine negotiis circumspectionem atque etiam timorem, qui culpat, Ei nimirum improbatur præceptum veteris poetæ Græci censentis: deliberationes sæpe esse repetendas, Iubentisq; consultare bis & ter perpenses ea, quæ in mentem ipsis venerint, subiecta memorabilis sententiæ verissima ratione: Quod damnorum esse maximorum auctores soleant præcipites, & qui impetu quodam vehementiæ efferantur. De quo nos

K

quidem

quidem quasi dimicare disputando non volumus. Atque utinam festinatione proteruitatis nostra quoque ætate non confirmata aliquoties esset præcepti illius contemti aut refutati admonitio, vel non saltem deinceps accepto detrimento, quam præclara hæc & salutaris sit, intelligatur. Non grauabatur Philippus quoscunque accedere & de rebus illis tantis quid sentirent cognoscere. Non etiam verebatur cum aduersarijs colloqui. Quæ, cum fierent ab eo optimo animo, neque nocerent causæ ac potius valde prodes-
sent, non tamen effugerunt criminationes etiam amicorum, parum recte de his existiman-
tium, vel ardore quodam cupiditatum sua-
rum, vel minus perspectæ rei indiligente con-
sideratione. Quinetiam si qua ad aliquos Philippus Melanchthon scripsisset liberius minusque acerbe & accusatorie de ijs negotijs, quæ tum disceptabantur, ea conquiri atque proferri ad inuidiam illius. Ac fuere cir-
cumlatæ literæ ad Legatum Venetum scrip-
tæ, quæ in Senatu Venetijs nec non Romæ recitatae fuisse dicerentur. Sed omnia ista fortiter contempsit Philippus Melanchthon acquiescens in recta bonaque conscientia, & nequaquam inflectens consilia actionesque suas ad aliorum sententiam ac voluntatem, sed ad veritatem solam constantissime dirigens.

Vnum

• • Vnum erat quod pene omnibus reclamantibus ille non intermittebat suadere; non modo astipulatore sed etiam autore ipso Lutero. Nimirum Episcopi si concederent libertatem & usum puræ doctrinæ cœlestis veritatis, secundum expositionem confessionis editæ, ne recusaretur atque denegaretur restitutio ordinariæ potestatis seu administrationis suæ quibusq; diœcesis. Quod quidem quale esset, cum cæco, ut dicitur, apparere deberet, tamen variè & mirabiliter exagitatum fuit. Audiui ipse quosdam aliquando, quos & morte sublato, & tali in mentione non putavi nominandos, sed eos audiui cum me illi non prouidissent, de hoc ipso capite potissimum accusantes Philippum inhumanissime, cum vnus ex illis diceret: si esset ingente pecunia conductus à Romanensi factione, ut ipsorum statum tueretur, se non videre qua meliore alia ipsiq; utiliore ratione causam, quam ista, agere posset. Neque Philippum suæ partis sed aduersariorum patronum habendum esse, & quidem præcipuum atque singularem. His sine verecundia proferebantur etiam & atrociora & magis contumeliosa quædam, quorum magnopere postea pœnituit & puduit plerosque. Philippus autem Melanchthon & coram interdum hac de lenitate remissioneq;
K 2 appel-

appellari, & quid de eo homines loquerentur certior fieri literis. Verum nihilominus permanere in sententia, & tenere cursum bene institutum, neque mutare curationis modum, tanquam medicus peritus, dum constaret ratio illius, quamuis non efficeretur statim quod aliqui optarent & cuperent. Neque ipse laborare de nugis quibusdam, neque seruire voluntati sibi aliquid quærentium aut etiam assentari ad arbitriumque eorum sese & nutum accommodare. Sed vrgeri necessaria & ea, quibus æterni Dei veneratio instauraretur, ad salutem omnium mortalium, & relinquere cuncta quibus turbarum aut belli causa dari videretur. Atque ipsis aduersariorum capitibus eum tunc confessionem extorsisse constat: Veram esse sententiam, quod est fundamentum doctrinæ Christianorum vniuersæ: Quod nullo alio humano opere, nullo merito, nullo denique pacto acquiratur & contingat reconciliatio gratiæ cum Deo alienatis & spes certa salutis ac vitæ æternæ, nisi fide tantum quæ habeatur filio Dei patris æterni *λέγω σωαΐδιω*, & qua credentes freti sint atque nitantur. Exortus est paulo post ex turba illa quæ vel per contumaciam nollet, vel propter obscuritatem caliginis errorum non posset aspiceret lucem eminentem clarissimæ veritatis, qui-

quidam qui se nominaret Cochlaeum, de patriæ appellatione, in qua est Cochleæ significatio quales graduum in ædificijs sunt. Vi-
cus autem ille est in arenis Noricis. Qui quod cuperet videri eruditus, actiones, vt ipse scilicet existimauit, accusationis grauis & rei capitalis instituit atq; perscripsit ad Imperatorem Carolum, quibus ridicule Philippicarum titulum fecit. Eas & malitia improbitatis & ineptiarum leuitate refertas, non puto ab alijs negotijs tantum vacui temporis Imperatori, vel etiam in ocio quoque eam voluntatem fuisse, vt legeret & nugis istis operam daret, quæ sane iam inter tales delirationes plurimas prorsus euanuerunt, neque vsquam fere comparent. Sed in his tamen cum alia atrociter obijciuntur Philippo 11
tanquam auctori Confessionis, tum ad Pontificis Romani Legatum accessio & sermones cum eo habiti humiles & abiecti. Atq; 12
nuper adeo alter quidam, qui nescio cuius linguæ formæq; nomine Staphylum se vocat, Græcum enim illud esse non vult, Et à Philippo Melanchthone imprimis adiutus, ad honoresq; & commoda productus, vt alij complures, qui parem gratiam meritis ipsius retulerunt, cum in Prussia quo à Philippo Melanchthone commendatus Illustris. Principi Alberto venerat, tantam dignitatem

13 tantasq; opes non adipisceretur, quantas il-
luc contendens spe sibi desponderat, Prin-
cipem simul cum reliquit, simul à caussa de-
sciuit, cum Philippo Melan. quoque simul-
tatem quandam exercens offensionis private,
quam nunc indicare non est visum. Hic
igitur, vt ab autore confessionis illius Phi-
lippo Melanch. tanquam fonte, multos &
varios riuos manasse sectarum perniciosarum
in Ecclesia perhibet mirifico quodam
& ioculatorio illo quidem scripto, sed ita
impuro ac potius spurco, itaque calumnijs
& mendacijs conflato, vt quamuis neque do-
lere contra se istiusmodi, neque pro se edi
gaudere quisquam debeat aut possit, rabies
tamen ista animaduersione seuera digna esse
videatur. Quod quidem totum tale est, vt
non pertineat prorsus ad Philippum Melan.
21 Nam subscriptio confessionis huius nunc
etiam in medio est eorum, qui autores ipsius
dici haberiq; voluerunt. Eorumq; aliqui
ipsi adhuc superstites, & cæterorum succes-
sores atque posteritas, illius autoritatis per-
scriptionem agnoscunt & tuentur. Itaq; ipsi
tantum in componendo studium industri-
amq; & exarando operam ac manum Phi-
lippi Melanchthonis adhibuerunt & vsur-
parunt, Rem ipsam & negotium proprium
esse & suo ipsorum periculo suscipi geriq;
volue-

voluerunt. Qui profecto accusantur, non Philippus Melanchthon, repræhensione & insectatione scriptum istud culpantium. Et hi fortasse aliquando temeritatem petulantiae istius refutari cohercerique studebunt. De ijs vero quæ vel minus caute vel parum fortiter ægisse Philippus Melanchthon à suis & aduersarijs dictus est, concedatur sane errasse eum. Fuit enim certe homo. Hominem autem natum labi atque peccare, naturæ ipsius necessitate contineri demonstratur. Neque mihi propositum est laudationem hoc libello Philippi Melanchthonis, & tanquam Encomium pertexere, neque ego illum cuius pietatem, virtutem, doctrinam eruditionem suspicio, facio tamen, ut de adolescente Comicus seruulus ait, Deum. Sint sane & hoc in genere quædam peccata ipsius: Et ut promiscua gratificatione & meritis erga dignos atque indignos & facilitate, lenitate, mansuetudine, humanitate sua deliquerit, sic nimia quoque fuerit & infinita consideratio, sollicitudo, circumspectio, metus illius: Minus tamen hæc omnia Reipublicæ damni dedisse, immo plus utilitatis attulisse depræhenderetur, quam aliorum audacem confidentiam & animi vehementis subitos impetus & orationis libertatem. Ut taceam copiam effusam atque profluentem

tam temere cogitatorum, quam male & indecore cum plurimorum exitiosa offensione pronunciatorum, vel etiam effutiendo prolatorum. De his igitur satis. Philippi Melanchthonis illo tempore studium diligentiaq; & fides, scrupit & tributa est explicationi disertæ & simplici ac planæ æternæ celestisq; veritatis. Et quoniam non sunt illa commenta noua turbulentæ vanitatis, sed relata in expositionem ordinatam atque distinctam & præsentibus temporibus ac rebus accommodatam, prophetarum apostolorumq;, & qui illorum vestigia secuti sunt docendo in Ecclesia Christi, oracula atque consentientis perpetuo sanæ & integræ doctrinæ testimonia: Manebit profecto huius scripti diuinum opus, donec in terris colligetur cœtus Christianus, quod vsq; ad extremum diem mundi futurum esse religiosa pietas nouit. Prolatum fuit & recitatum coram Imp. Carolo responsum quoddam, quo refelleretur assertio confessionis illius. Cuius exemplum vt communicaretur ijs, quorum sententiam confutare conaretur, quantumuis supplice Ducis ipsius Saxonum Iohannis Princ. Elect. & consentientum petitione, impetrari non potuit. Attentione tamen quorundam diligentum, præcipuis tam capitibus quam argumentis exceptis ac
notatis,

notatis, confessionis postea Apologiam Philippus ipse scripsit, cum explicans quædam copiosius, tum aduersarios pertinaciter insolentes vehementius vrgens. Quæ cum deinde ederentur frequentius, operam dedit Philippus vt alicubi expositio esset dilucidior & plenior. Nam præclare dicitur: Multa diem monere, & posterioribus cogitationibus priores fieri meliores. Nihil tamen aliter factum, neque vllum mutatum dogma, neque momenta rerum conuersa sunt. De quo ne deesset materia scilicet ferendi rixas, quidam quæ ipsis non tam in mentem, qua deficerentur, quam animum, qui quiescere non posset, & buccam, vt dicitur, venter, ausi fuerunt efferre atq; euomere. Quorum futilitas & quasi sordes, tantæ sunt, vt præterire eas auersando & vitare declinando omnes puræ doctrinæ amantes debeant. Sed reducatur narratio paululum ad superiora, quo certius cognoscatur quid illo tempore actum sit, cuius nunc quoq; temporis mentio sæpe fieri solet, & quo negotium religionis crebro tractatum nititur fere vniuersum, & quia Philippi Melanchthonis diligentia, studio, operæ, quam tunc rebus communibus nauauit, à nonnullis per calumnias malitiose est obrectatum. Placuerat quemadmodum ostensum est, cognosci præsentem Carolo Im-

perat. controuersiam de Religione. Librum igitur obtulerunt, qui protestantes nominabantur, comprahendentem summam doctrinæ Ecclesiasticæ apud sese, de quo supra diximus. Huic aduersarij responderunt verbo scripto. Eius cum frustra peteretur editio, & nullo modo obtineri posset exemplum, res eo vergere videbatur, vt infectis omnibus discederetur vtrinq̃. Quod quia & turpe & non expers periculi creditum, consilium captum est deliberationis de toto negotio per paucos. Tunc igitur ex vtraque parte lecti fuere septem viri, eisq̃ illa est consultatio commissa. Postquam inchoata consideratio fuit eorum, quæ protestantes assererent, satis bene res initio procedere. Nihil aduersarij quoque tanquam à capitibus Christianæ fidei abhorrens notare. Fidei efficacitatem Iusticiæ tribui: Remissionis, peccatorum & vitæ æternæ nullum esse meritum humanorum operum: Implorationem sanctorum hominum, qui mortem in terris obiissent, seu Inuocationem, scripturæ sacræ neq̃ præceptum habere neque testimonium: Quæ Missa vocatur eam non perhibendam esse sacrificium pro viuis & mortuis: Itemq̃ alia quædam his similia nequaquam damnare. Progrediente autem consideratione, septem capita potissimum descripta propositaq̃ sunt,

sunt, de quibus si fieri posset, partes concor-
darent. Hæc fuere ea quæ ipsi verbis, quibus
proposita esse cognouimus putauimus recensenda.
1. De vtraque specie. 2. De Missa. 3.
De coniugio sacerdotum. 4. De votis
Monachorum. 5. De potestate & Iu-
risdictione Ecclesiastica siue Episcoporum.
6. De bonis Monasteriorum. 7. De
Confessione. In his aqua, ut dicitur, hæsit.
Cumque nulla spes consensionis ostenderetur,
quamuis conditiones ferret, ut sua opinio
erat, commodas, pars vtraque, Tentatis om-
nibus, tandem, quod inter paucos citius re-
ctiusque conueniri posse crederetur, numerum
deliberantium placuit minui, Et pro septem
tres in consilium illud adhiberi. In quo cæ-
teris suorum remotis Philippus Melanch-
thon remansit. Insidiosè hoc institutum ab
aduersarijs suspicabantur multi, Quibus cu-
piditas pacis in Philippo, & animus placidus
à contentionibusque alienus non esset igno-
tus. Itaque callide ipsi solum Philippum retineri
studuisse existimabantur, quo facilius reti-
nerentur ea, quæ volebant amittere. Sane
tum Philippus Melanchthon in tam magno
periculosoque negotio solus relictus, de omni-
bus non modo cogitare accuratius, sed quæ-
rere etiam disputareque liberior, nec non argu-
menta afferre, cur hoc aut illud aduersarijs
flagi-

flagitantibus concedi deberet, quo magis
discerendo veritas & eluceret & confirmaretur.
Hoc est interpretatione maleuolorum
in eam partem detortum, vt de Philippo Me-
lanchthone cum opinio conciperetur, tum
spargeretur fama ea, quam paulo ante indi-
cauimus, innocentissimo illo prorsus, id
quod exitus declarauit. Sed cum nullis ma-
chinis effici posset vt res componeretur, ita
tandem fuit discessum vt potuit, non vt fuit
expetitum. Atq; hæc fuerunt istius fere ani-
mi negotia & res quibus interfuit & præfuit
Philippus Melanchthon. Annus autem
Christi M. D. XXXI. cuidam de Rege Ferdi-
nando, quem designari Cæsarem Imperator
Carolus voluerat, controuersiae, consilia
actionesq; adiunxit federum, inter eos, qui
propter dissidium in doctrina Ecclesiastica
aduersarios multos se habere cernerent, &
tam ab insidijs quam violentia oppressionem
formidare cogerentur. De quibus relatum
quidem fuit ad Theologos quoq;: Sed præ-
cipua occupatio in his Philippi Melanchthonis
nulla. Cuius omne studium omnisq; cu-
ra tribueretur doctrinae laboribus. Quod
tamen & ipse de istis rebus vel cognosceret
vel etiam interrogaretur ab aliquibus, fiebat
vt magnis & grauibus interdum curis per-
turbaretur, præsertim cum edito decreto
Augu-

Augustano & verbis asperiore & sententijs pene minace, suspensi multorum animi essent, & expectatio, spes, cupiditas, metus miscerentur. Accidit autem vt quasi pacificatoriam quandam personam quidam suam interponerent, & in hoc solícite incumbere, vt reperiretur via vel ad certam pacem vel saltem ad firmas aliquas inducias, vt in Germania quantulocunq; sane tempore esset tranquillitas. Ad quas actiones animus voluntasq; Imperatoris Caroli ideo erat propensior, Quod compertum ille habebat expedita esse arma Turcica & magnos exercitus contractos, qui pergentes iam Pannoniæ appropinquarent, ipso gentis illius Imperatore, quem Magnum Turcam vocant, copias adducente. Accedebant motus in Heluetia qui & ipsi quorsum euasuri essent omnes de Repub. solícitos magnopere vereri cogeant. In quibus Philippi Melanchthonis anxietas, dicendum enim verum est, maxima erat & cognoscebatur. Sed & turbæ in Heluetia celeriter post vnum aut alterum conflictum, sedatæ fuerunt. Et induciæ anno Christi M. D. xxxii. præclaræ factæ in vrbe Norimberga, & auxilijs communibus Imperator Carolus adiutus, apparatus magnitudine & fama nominis sui potentissimum hostem auertit. Quem recipi-

entem

entem se Imperator non modo fortis & qui nullo terrore commoueretur, sed prouidus etiam atq; sapiens persequendum, eo præsertim anni tempore non putauit. Magnam etiam tristitiam attulit Philippo & animum ipsius vehementer afflixit Illustrissimi atque Optimi & Præstantissimi Principis Iohannis Ducis Saxoniae mors, quam ille anno hoc obiit senex, placide & omnino feliciter, mirans ex hac calamitosa atque caduca vita in æternam ac beatam, Idibus Augusti. Sed hunc luctum nouæ etiam curæ auxerunt. Cum enim Imperator Carolus, inducias de quibus diximus, fieri passus esset, ad id vsque tempus quo Oecumenica Synodus congregaretur, quod Semestre fore ostenderant, profectus in Italiam ea de re cum Clemente Pontifice Romano ita studiose & seuerè quoque egerat, ut Pontifex quamuis putaretur nullo modo rem procedere velle, mitteret tamen legatos declarantes suam de synodo sententiam & promptam voluntatem. Quorum vnus ad Illustrissimum Principem Iohannem Friderichum qui patri Iohanni successerat, Vinariam sedem domus illius in Düringia, venit. Susceptæ deinde fuerunt deliberationes & Theologorum quoque exquisita sententia. Philippus sane Melancthon simulari à Pontificijs omnia, & hoc agi,
vt

vt conditionibus intolerabilibus ferendis deterrerent à voluntate veniendi ad Synodum ordines illos autores scripti Augustani, non habebat exploratum neq; persuasum. Itaq; simplice animo & vera consideratione id censuit, quo illis plus pene concedebatur quam peterent. Nam neque indicii à Pontifice Romano Synodi conuentum improbabat, neq; cum in illa præsidem recusabat. Quod vero postulabatur: Vt iam tum se stare decretis Synodi velle promitterent vniuersi, id nullo modo admittebat. Quod & accusationes & defensiones & sententias liberas oportere esse diceret. De euentu autem antequam disceptatio & cognitio inciperetur, pacisci, præposterum esse, neque fieri hoc oportere. Neque omnino formam eam iudicii esse, obligatis iam partibus ad probandum id, quod qualé futurum esset ignoraretur. Neq; à sponfionibus forensibus & ciuilibus compromissis exemplum sine euidente, & pernicioso errore transferri ad has dijudicationes. In qua sententiâ semper permansit. Cum essent qui neque vt indiceret Pontifex Synodum, neq; vt in ea præsideret concedendum esse arbitrarentur. Nam & iudicandi iure concesso, potentiam principatus illius, quæ tantopere oppugnaretur stabiliri, & præsidendi dignitate prærogari auctoritatem

toritati illius. Sed neq; hæc Philippum Melanchthonem fugiebant, & res si ad legitimam cognitionem & incorruptum iudicium, vel qualemcunq; etiam non simulatam atq; fictam disceptationem deduceretur, prospiciebat, necesse esse, vt antequam vllæ actiones inciperentur, nedum sententia lis dirimeretur, talia explicarentur atq; definirentur. Sed res de Synodo tum facilis fuit, Quamcogi Pontifex nollet, Imperator Carolus non posset cogere. Itaq; iste quoque annus inter consultationes non nimis contentiosas abiit. His etiam tribus annis continuus conspecti Cometæ fuerunt. De quibus multa ad amicos Philippus scripsit, suas cum eis rationes communicans & explorans sententias ipsorum. Cum autem anno Christi M. D. XXXI. Cometes ex eorum genere, qui Pogoniæ vocantur, apparuisset in plaga solis occidentis, conspectus est vel idem vel alter similis ei proximo anno mane in orientis solis parte, Et anno XXXIII. tota nocte vnus fulsit ad stellas propinquas Septentrionibus. Quo loco cerni desijt. Hic annus pestilens fuit vrbi Norimbergæ, et eodem, quod Eobanus Hessus Erphordiam se recepisset, schola Norica, quam v^t suum opus labefactari nollet, nonnihil exercuit animum Philippi Melanchthonis. Et si magis nos sollicitum

citum eum habebamus, quibus illuc se conferendi ipse autor & suasor fuisset. Excercuerunt & aliæ quædam curæ mistæ iustis. indignatione: Quod literæ nescio quæ prolatae sparsæq; dicerentur, quibus turbas excitatum iri ingentes & perniciosas intelligebat. Neque ille tam autoribus earum irascebatur, quam diuulgantibus talia temere & incaute. Negotia etiam Britanica considerationes ipsius tunc cœperunt commouere. Rex enim Insulæ illius, cum quo nupta esset Caroli Imperatoris matertera, de altero coniugio consilia inibat, siue tunc consuetudinis istius satietas fieri cœpit, seu aliæ eum causæ ad diuortium hoc impulerunt. Quod inuito & refragante Pontifice Romano factum cum damnaretur, vsque adeo irritauit animum Regis, vt statim Romani Pontificis quasi iugum, sub quo ad id vsque tempus fuerat Britania singularem in modum pressa, repelleret & penitus excuteret. Hocq; ipso ad coniunctionem vel respectum saltem adigebatur eorum, qui Pontificis Romani potentiam dominationemq; oppugnabant, quamuis aliquando se illis opposuisset, edito libro præferente nomen suum. Quod factum adeo gratum acceptumq; Pontifici fuerat, vt Regi titulus nouus decerneretur, Defensoris fidei. Mittebantur igitur & legati & literæ,

& Philippo negotia illa significabātur, quem minime fugiebat fore vt ipse inprimis consuleretur, & magnitudinem rei periculaq̃ contemplans animo, magnopere tum adeo sollicitabatur. Accedebant rumores, qui spargebantur de conatibus Landgrafij Philippi restituendi in ditionem terræ suæ V Ulrichum Ducem Vuirtepergenssem creptam ei ante annos xv. Sed hanc proxime sequens annus tunc inchoatam molitionem absoluit, Reductusq̃ Dux Vuirtepergensis & postea de recuperatione illa belloq̃ toto transactum fuit, & ipse Philippus benigne inuitatus vt Tubingam veniret. Sed negotia eiusmodi in manibus habebantur illo tempore impenderetq̃ videbantur, vt Illustriss. Princeps, cui opera fidesq̃ Philippi addicta erat, eum dimittendum nullo modo putaret. Accessit tamen illuc deinde cum ego iam ibi studia bonarum artium docendo excolerem, & in Academia ordinanda, quæ sic satis perturbata erat, adiumento nobis fuit, hospes noster vno pene mense. Hoc etiam tempore Landgrafius qui animaduerneret atq̃ perperderet quantum mali detrimentiq̃ daretur doctrinæ veritatis dissidio Helueticarum & Saxonicarum Ecclesiarum, & litem illam cernens fieri indies maiorem, multaq̃ à quibusdam admodum horride & insolenter, à
qui

quibusdam vehementer & immoderata quadam libertate cum dici tum scribi, operam studij pietate & fide pleni dedit, vt apud se conuenirent vtrinque vnus, & breuiter atque diserte compræhensam suæ partis sententiam exponerent. Idque negotium Philippo à suis datum fuit, qui ipsorum sententiæ ad Landgrafium esset nuncius. Neque quicquam tunc præterea actum est. Interea de coniugio ducta iam altera vxore & priore repudiata, sollicitus Rex Britanniae vndique colligebat suffragia, quibus illud contra sententiam damnantium, inprimis Romani Pontificis, approbaretur. Et quia sperabatur hoc facturos facile & libenter Saxonicos dominationis pontificiæ inimicos, remittebatur indies aliquid de seuitia, quam ad illud usque tempus pariter cum Gallia, crudeliter excercuerant in eos, qui Saxonicarum Ecclesiarum exemplo, non assentirentur Pontificiæ doctrinæ. Et Philippus Melanchthon litteris nuntiisque fiebat certior, aduentum suum in Britanniam magnopere expeti, & futurum vt ab ipso Rege accerseretur. Orabantque amici, ne recusaret, neue grauaretur illud iter suscipere. A quo sane animus ipsius neutiquam abhorrebat. Rex autem Britanniae, vt matrimonium nouum legitimo modo & iure bono videretur contractum, nihil non experiri, &

refragantes omnes odisse, & hanc maxime ob causam ad eos, quos ante fuerat infectatus, inclinare credebatur. Cuius voluntati repugnans inter alios Thomas Morus vir doctrina atq; dignitate præstans, & qui præsentis status mutationem fieri nollet, & cui nouitas coniugij displiceret, supplicio vltimo affectus est. Rex autem Gallia, qui in Italia bellum gerere & occupare Mediolanum cuperet, societatem Principum Germanorum expetebat. Cumq; conuenissent fœderis faciendi iterum gratia aliquot, eodem Legatus Gallicus accessit. Non autem potuit verecunde peti coniunctio sine excusatione crudelitatis suppliciorum, quibus plurimi in Gallia per summos cruciatus fuerant necati: Itaque tunc & in seditiosos quosdam suæ gentis animaduertisse Regem dictum est, & petatum vt de Religione diligenter re deliberata sic consentiretur, ne afferendis defendendisq; non necessarijs aut etiam superuacaneis dubijsue, Respub. & Ecclesia amplius turbaretur. Petatum etiam fuit vt mitterentur ex Germania aliqui viri docti & boni, qui de dogmatibus sententiam suæ partis exponerent. Fuerat autem quorundam studio effectum, vt Rex non alienus à Philippo Melanchthone videretur, cui & accurata explicatio rerum, quas tractandas ille suscepisset,

set, & ab aduersarijs sine acerbitate dissensio,
valde placeret. Itaq; non modo amici insti-
tere literis suis, vt in Galliam ad Regem pro-
ficisceretur, sed hoc etiam obtinuerunt vt
ipse Rex missis literis ad Philippum clemen-
tissime cum inuitaret ad congressum suum.
Eo anno pestilentiaē metu Vuittenbergen-
sis schola dissipata fuerat, & Philippus Me-
lanchthon cum plerisque Magistris doctri-
naē concesserat in oppidum Duringiaē Ihe-
nam. In Gallia autem Regis animus per-
turbatus ira indignationeq; nullum modum
seruare neque facere finem suppliciorum. Et
arrepti primum indicati conuictiq; tanquam
conatum seditiosorum, quod vno tempore
passim libelli quidam Parisijs clanculum
propositi & ad Regij quoque conclauis ia-
nuam affixi fuissent: Huius igitur facinoris
conscij statim complures compræhensi &
subiectis ignibus torrendo excruciatī ita de-
mum viui combusti sunt. Sed indicibus præ-
mio proposito & concessa deferendi accu-
sandi q; licentia quibuslibet, plurimi etiam il-
lius audaciæ nequaquam participes, rei facti
& crimine defectionis ab Ecclesia, quod Lu-
teranismi nomine inferebatur, damnati &
cremati fuerunt. Erant & pietate & do-
ctrinaē literarumq; cruditione in illo Regno,
dignitate etiam & honoribus præstantes qui

dam viri, quibus crudelitas ista immanis admodum displicebat & ingentem afferebat dolorem. Ethī Germanos celebres eruditionis nomine in Gallia, benēuolentia fauoreq; complectentes tuebantur atq; protegebant, neq; patiebantur eos ab ista violentiē feritate attingi. Inter quos excellebat benignitatis & omnino virtutis sapientiæq; fama domus Langæa & in hac Princeps Vilhelmus Belaius, qui Galliam suæ sapientiæ, fortitudinis, integritatis, fidei ope moriens destituit grauissimē laborantem & in sæuissimō bello & asperrima fortuna illius, Anno Christi M.D.XLIII. Germanorum autem, de quibus egregia ingenij, doctrinæ, virtutis, sapientiæ, pietatis esset existimatio, princeps habebatur Iohannes Sturmius. Per occasionem igitur illis de negotijs inter ipsos verba fieri, & consilia rationesq; iniri ac quæri, quibus tam grauiter laborantibus rebus subueniri posset. Perfectumq; est diligentia & studio horum, vt apud ipsum Regem mentio fieret doctrinæ Saxonice, & Philippi quædam scripta coram eo legerentur, quorum dilucida expositione & disputationibus placidis Regis voluntas ad clementiam conuersa ferebatur, considerantis, & quousque esset superstitio progressa & quibus in tenebris iacuisset obscurata veritas cœlestis, & quam
tetri

tetri errores doctrinam disciplinamq; Ecclesiæ occupassent. Verentis etiam fortasse, ne animaduersionis iracundia insontes cum fontibus corripere. Hoc cum Philippo Melanchthoni esset significatum, amicis suadentibus atque hortantibus literas scriptas mittit ad Episcopum Parisiensem Iohannem Bellaium. Quibus monet & orat: Animos Principum in Galliæ regno mitigari studeat, autorq; sit, ut ratio ineatur, qua sanari Ecclesia possit, quam indies magis magisque lacerari appareat. Abusus quosdam esse reprehensibiles, & nunc multos pios atque doctos veritatem quærere & doctrinæ genus purum, non praua cupiditate aliqua sed studio religionis. Atque esse ortas controuersias de maximis rebus quæ nulla armorum vi aut suppliciorum metu opprimi posse videantur. Non patrocinari se turbulentis & seditiosis, neque ijs qui improbitate & malitia veritatem simplicis doctrinæ corrumpant, quos fanaticos solebat vocare. Verum horum etiã furori sic maxime resisti posse, si extet certum doctrinæ genus, quo ambigentium animi confirmati nitantur. Ostendit quantum momenti sit in Galliæ florentissimo regno, ad omnium bonorum animos tam erigendos quam deijciendos. In eo si exemplum istud statuatur, ut non modo fanatici

& seditiosi coherceantur, sed nulla prorsus admittatur emendatio Ecclesiasticæ doctrinæ & errorum correctio, siq; præsentia Ecclesiæ vitia summa vi defendantur, futurum esse vt ubiq; gentium magna de spe boni p̃ijq; decidant. Addit: Esse eas preces & vota ista, vt in periculo communi succurratur Ecclesiæ simul atque Reipublicæ non vnus nationis ac gentis, sed omnium in toto orbe terrarum religiosæ pietatis & tranquillitatis publicæ cupidorum. Multum profuisse constat has literas, & lenitam esse Regis iram, & de suppliciorum seuitia nonnihil remissum. Inculcatum autem fuerat Regi in Germania turbarum, motuum, seditionum cædium, vastitatis, denique malorum omnium causam fuisse mutationem doctrinæ Ecclesiasticæ, & falso pleraque coram eo narrata. Quamuis igitur minime ignoraret ac potius perspicue videret, quid in doctrina & ritibus vsitatis non modo vitiorum sed omnino scelerum hæreret, Tamen à nouitate similia incommoda vel parem potius infelicitatem metuere existimabatur, & eosdem euentus, quos persuasum hætenus habuisset de innouata doctrina Ecclesiastica extitisse. Sed siue hoc seu aliud fuit, quo Rex Galliæ tunc ad clementiam se inclinauit, & eo adduci passus est, vt de rebus tantis cogitandum

tandum diligentius certiusq; cognoscendum arbitraretur, Primum in Germaniam missus alijs etiam de causis Barnabas quidam Voræus, amicorum literas scriptas Philippo attulit, & cum eo locutus est de profectione ad Regem, pollicitusq; non modo literas regias quibus accerferetur, sed cum obsides etiam, qui darentur, dum abesset, tum præsidia quibus deduceretur & reduceretur, ut vndiq; periculi metus esset amotus. Urgebant rem amici, qui persuadere conarentur, in congressu colloquioq; cum Rege Melanchthonis, non Galliæ solum sed pene orbis terrarum fortunam esse positam. Si illum præsentem vidissent, simul salutem suam cum aliorum omnium coniunctam affirmare se conspecturos. Si in illis fluctibus & seuisissimis tempestatibus audissent aduentantem, iam portum & tutissimam stationem sibi ostensum iri. Quod si negligeret aut etiam contemneret postulata Regis, fore ut omnis spes, qua sustentati in maximis periculis & præsentis discrimine fuissent, debilitata infringeretur, & simul ægre aliquantulum sopiti ignes rursus suscitarentur, & suppliciorum immanitas recrudesceret. Atque eum cogitare, æquum esse censebant, non iam à se tantum rogari, sed ab omnibus hominibus, Non ab ijs, qui gravissima sup-

plicia perpessi sint, neque qui eadem pertimescant præsentiam eius exoptari, sed aduocari ipsum Dei Christiꝫ Iesu vocc. Remoueret igitur ex oculis Cæsarea & regia nomina. Non respiceret populorum coniunctionem aut alienationem, funestas flammæ inueneretur & fumantes rogos, in quibus innocentissimorum hominum corpora conflagrassent, & se plurimorum periculis quibus immineret idem exitus, moueri sineret. Hæc & his similia cum Philippo & scriberentur & nunciarentur, & multiplice ille cura & varia consideratione afficiebatur atque perturbabatur. Difficile enim erat constituerre, quid in tanta ac tali re fieri oporteret. Vel ea potius quæ offerebantur inexplicabiles habebant quæstiones & disputationes infinitas. Non cum respectus ad se aut suos, non longinquitas loci, non periculorum metus morabatur, quamuis hæc ab ipsius amantissimis præsentia demonstrarentur, ex quibus quidam insidias vitæ eius strui suspicabantur, & eum literis grauissime scriptis, vt caueret admoncbant. Verum cum nihil esset prius illi neque antiquius gloria Filij Dei Domini nostri Iesu Christi, tot piorum bonorumq; salute & incolumitate, tranquillitate Ecclesiæ tantis procellis infestæ, hac vna cura excruciabatur & in eo adhærebant cogita-

gitationes vniuersæ, Quod dubitaret de consilio suscepti negotij, & quæ actiones futuræ huius essent, non posset decernere, & de exitu felice plane desperaret. Neque ille quid sibi conduceret omnino laborabat, sed ne quid in tanta re imprudenter factum, turbarum mala asperiora redderet prouidens, mirifice sollicitabatur animo suo. Veniebat ei in mentem varias esse opiniones diuersorum in Gallia, & ea erat expertus, quæ causam darent circumspeditionis atque formidinis. Audiebat tanquam seditiosos esse eos damnatos de quibus tam crudeliter supplicia sumsisent, Præterea cum intellexisset Gallos hoc agere ut quædam discrepantium capitum in Ecclesiastica doctrina controuersia tollerentur, hoc maxime timebat, ne minuta aliqua & quæ sua sponte iam è manibus elaberentur, concedentes, retinere vellent ea, in quibus potissimum falsitas impietatis resideret. Quod videbat neque fieri debere, & si tentaretur, plus secuturum mali quam boni. Cumque esset de Regis voluntate existimatio ipsius præclara, tam multis tantopere illam prædicantibus, Quid ipse tamen Rex, ut maxime vellet atque cuperet, posset efficere non sine causa dubitabat. Itaque rescribens amicis hortabatur eos, darent operam ut Rex curaret maturandam Synodum & per quos-

quoscumque liceret ad hoc impelli studerent animum ipsius. Tum enim communiter incundæ rationis occasionem omnes habituros, qua Ecclesiæ afflictæ ferretur auxilium. Cætera consilia sibi significabat videri inutilia, quæ periculosa essent omnia. Hæc ad amicos perscribens ipsis ut in re præsentē deliberationem totam permittebat. Quod non tergiuersandi ista causa commemorarentur, sed ut ipsi statuerent quibus nota Gallia esset, quid expediret. Cum in omnem euentum fauorem atque gratiam Potentissimi Regis, causæ conciliari posse optaret. Quod sperabat fore, veris & commodis sermonibus. Non enim ignorabat quanto odio ubiq; hæc laboraret, excitato aduersariorum fictis criminibus, Itaque si ipsi in eo perseverarent, ut existimarent suum aduentum profuturum & Galliæ & Ecclesiæ vniuersæ, policebatur se paratum promptumq; fore ad suscipiendum iter istud, relatis quidem prius omnibus ad Illustrissimum Principem, qui haberet conductam operam suam. Itaq; omnia fidei prudentiæq; ipsorum committere. Cum autem Voræus & studiosius de Philippo ad Regem reuersus loqui, Et prolixius promittere, & si accerseretur policeri aduentum ipsius non dubitasset, ita à Rege literæ sunt missæ, Quibus collaudato

dato studio ipsius, quod Rex ab eo adhiberi intellexisset in sedandis altercationibus inuectis in Ecclesiasticam doctrinam, quoniam ipse se laborem itineris non grauatim susce-
pturum esse ostendisset, quo ad Regem se conferret, coramq; illo de concordia doctrinarum cum selectis aliquot Gallicæ nationis viris doctis differeret: ita petebatur vt literis regijs tanquam fidei publicæ obsidibus fretus, quamprimum adueniret, neque se abduci vllius persuasione sineret, à tam pio sanctoq; instituto. Nullam enim rem vnquam maiore Regem cura, studio, sollicitudine animi complectendam duxisse, quam vt laceratæ dissensionibus Ecclesiæ detrimenta sarcirentur, & pulcerrima politia illius instauraretur. Deniq; affirmabatur modis omnibus aduentum Philippi futurum esse Regi gratissimum. His literis acceptis omnino erat animus Philippo in Galliam proficisci, neque expectationem & spem de se conceptam amicorum frustrari. Neque operam suam quæ nauari posse crederetur, subtrahere afflictæ Ecclesiæ. Sed vt veniam hanc ei Ill. Princeps ipsius daret, & potestatem cum bona gratia in Galliam se, illo tempore, conferendi faceret, impetrari non potuit. Cum alia autem obstare visa sunt tum non minimo impedimento fuit, bellum quod
Rex

Rex Galliae aduersus Imperatorem Carolum non meditari aut moliri, sed iam mouere & gerere ferebatur. Cognitum quoque est maleuolorum quorundam obtreptione Opt. & Præstantiss. Principis animum ad quandam hæitationem fuisse perductum, vt nonnihil Philippo diffideret. Itaq; denegans & plane præcidens petenti Philippo copiam sibi clementiss. fieri in Galliam veniendi, literas misit ad eum verbose & seuerè scriptas. In quibus hoc potissimum mouit Philippum & à consilio itineris Gallici deterruit, quod ostendebatur verendum esse, ne ista profectiōe non modo nihil fructuose perficeretur, sed ne detrimenta maiora acciperentur, & causæ darentur, quibus de causis publica Germaniæ quies turbaretur, Neue adeo ipsius Principis quædam negotia redderentur difficiliora. Hoc omnino periculum in se recipere ille noluit. Itaq; cum magno dolore multorum non etiam nullorum repræhensione cum Voræo, quemadmodum Rex voluerat, non est profectus. Et ei literas dedit abeunti, Quibus inprimis Regi gratulabatur cupiditatem sanandæ Ecclesiæ, non violentis remedijs sed vera ratione & Rege Christianissimo, quo ipse titulo ornaretur, digna. Qui in dissensionibus illis ita studeret vtriusque partis impetus moderari vt explicata

cata doctrina Christiana atq; perpurgata, simul gloriæ Christi, & dignitati Ecclesiastici ordinis & tranquillitati publicæ consulere-
tur. Orabatq; vt non desisteret Rex in hanc curam cogitationemq; incumbere, neq; aspe-
rioribus scriptis aut iudicijs quorundam si-
neret se adduci, vt etiam res bonas & Eccle-
siæ viles deleri pateretur. Se quidem literis
Regijs acceptis quantum potuisset conatum
esse atq; contendisse, vt statim ad Regem ac-
curreret. Quod sibi nihil esset optatius, quam
vt pro sua tenuitate aliquid opis afferre pos-
set Ecclesiæ, quodq; in optimam spem venis-
set, Postquam cognouisset eam esse pietatem
ac moderationem Regis vt in commune glo-
riæ Christi consultum cuperet. Nullo vero
se modo potuisse tunc iter ingredi, propter
maximas difficultates, quibus adhuc esset
implicatus. Quas posset Rex cognoscere
ex Voræo cui essent notæ. Quamuis autem
moram quandam illæ afferrent, tamen non
esse animum suum ab illa prosecutione auer-
sum. Quod & ipsum planius & copiosius
expositurum Voræum esse consideret. Atque
ita Voræus dimissus Regem inuenit in belli
Italici apparatu, cui postea ista res curæ non
fuit. Estq; deinde etiam atrocius supplicio-
rum sæuitia vexatum regnum Galliæ. Itaq;
vt sit, alij de tota re aliter sentire & loqui.

Qui.

Quidam credere si Philippus aduenisset, Multa Regi indicari demonstrariq; potuisse, quorum ignorantia causam daret, vt & ipse iuberet iratus abhorrentia ab ingenij ipsius naturæq; bonitate, & ad ea quæ gererentur inhumanius, conuiueret: Plurimum habituram momenti existimationem de Philippo singularem, futuram liberam de magnis & paruis disputationem: Neque offensuram Regem in asserenda veritate libertatem orationis, ac constantiam potius eum magnopere delectaturam fuisse: Qui iam inciperet intelligere aliquid. Nisi enim ita esset, neglecturum fuisse, vt antea rem totam, & iracundiæ suæ indulgentem vindicaturum offensiones. Plurimum situm in eo vt audiatur interrogatio, & responsio statim subiiciatur. Valde autem cauendum fuisse, ne Rex cui propemodum certo promissus esset aduentus Philippi ex illa frustratione, vel opinionem conciperet leuitatis, vel suspicionem hauriret diffidentiae, atque ita de integro & à causa alienior, & in aduersantes sententiae suæ asperior immitiorq; redderetur. Alij incerto dubioq; euentu in tam magna grauiq; re periculum faciendum fuisse in Rege illo causæ conciliando, & secretum à cæteris cum ipso colloquium instituendum nullo modo censebant. Erant etiam qui Philippo soli,

solī, committendam talem actionem potuisse tuto negarent. Experiebaturq; iniquitatem ille fortunæ fatalem, ut minus recte iudicaretur à nonnullis de consilio hoc ipsius. Necq; decrant qui omnia in partem deteriorem interpretarentur. In qua veluti palæstra miseriæ totam vitam illius luctatam esse scimus. Sed prudentes & callidi aliud actum quæsitumq; existimabant, cum in ipso belli quod aduersum Cæsarem Carolum gereretur apparatu maximo, susceptas institutasq; tales tractationes cernerent, & pleriq; inuidiam in Principem cui seruiret Philippi opera, deriuare vel minima ex parte oportere non putabant. Sic igitur illa profectio tunc repressa postea euauit, & sunt in Republica & Ecclesia ea secuta, quæ, nisi quatenus ad Phil. Melanch. aut temporum negotiorumq; quæ hac narratione continuanda putauimus, seriem proprie pertinent, à me iam non exponentur. Sane Philippus Melanch. inuitus retentus est. Et aliquantisper remanendi in Saxonia animum habuit hæsitantem. Amicq; eius non sine cura fuere, ne quid ei tristius accideret. Verum ista quasi vulnera clementissima humanitate Illustriss. & Opt. Principis ipsius & celeriter & facile fuerunt sanata. Non duxi silentio prætereundum, quo horum negotiorum & difficultatem &

M

fortasse

fortasse pericula significata esse credi posse videatur. Nam quo tempore propter pestilentiae contagionem Vuittenberga plerique scholastici tam Magistri quam discipuli urbem relinquere decreuerant, paucis ante horum discessum diebus flamma de cœlo cecidit ante ædes Philippi Melancthonis & templi tectum visa est lambere. Cum quidem alias etiam significationes notasse eum constet, quibus ab earum rerum quæ secutæ fuerunt, molestia curisq; & periculis quoq; præmonitum se fuisse intellexerit & recordando sæpe commemorarit. Atq; istæ fere de Gallico itinere curæ molestiæq; tunc exhibitæ Philippo fuere. Nihilo autem minus ambire visus est deinde Rex Galliarum societatem Saxonorum, & cum ipsius quoque legatis de capitibus controuersis Ecclesiasticæ doctrinæ est disputatum. Sed Britanici magis assidui fuerunt in hac parte & cum Philippo imprimis libere colloqui. Inter quos Nicolai Heti & eruditio & humanitas ab ipso laudabatur. Ab his etiam est vel commoditate verborum persuasum Philippo, vel precando expressum, ut Regi Britanniarum quasi dicatum epistola præposita librum ex suis vnum peculiari compellatione mitteret. Redierunt mox anno Christi M. D. XXXVI. Vuittenbergam Magistri doctrinæ publicæ
& di-

& discipuli, quos discessisse metu pestilentiae diximus. Et Philippus hypochondriacis doloribus est conflictatus, quos usu herbae chamaeleontis mitigauit, & scimus efficacitatem illius remedij eum praedicasse. Dum autem cum Britanicis legatis acriter de capitibus doctrinae Ecclesiasticae disputatur, & eo res deducitur vt de plarisque conueniat, deq; diuortio tantum dissensio reliqua est, id accidit de coniuge altera à Rege ducta, quod omnium animos valde perturbauit, & legati circiter mensem Iunium Vuittenberga discesserunt, & solitudine Britanici itineris Philippum liberarunt. Nam haec illis flagitantibus vna cum alijs fuerat ei destinata. Sunt tamen aliae tunc deliberationes actionesq; institutae atque susceptae Theologicorum colloquiorum, quorum euentus cum sollicitum habuisset inprimis Philippum, ipsius moderatione & diligentia effectum est, vt ille satis esset felix. Atq; ita quod diu conceptum animo iter habuerat tandem est ingressus, vt & in patriam & Tubingam ad nos veniret. Vbi, quemadmodum dictum est, habuimus eum aliquantisper gratissimum & iucundissimum hospitem, & auctorem consiliorum ordinandi res scholasticas & doctrinam publicam constituendi in illa Academia. Estq; eum Illustriss. Princeps

Vlrichus clementissime complexus. Deq;
eius sententia accersendum curauit Iohan-
nem Brentium è salinis Sueuicis, cuius an-
nua opera Ecclesia & schola saluari & bona
vsa est. Habuit comitem eo itinere Clarissi-
mum virum Philosophiæ & inprimis Medi-
cinæ artis professione Iacobum Milichium,
cuius ingenium rectum, sincerum iudicium,
in consilijs prudentiam ac fidem, animum
firmum, voluntatem perpetuam atq; constan-
tem in optimarum artium disciplinarumq;
studijs colendis, & tuendis amicitijs, perspe-
ctam maximi faciebat, vt par erat, Philippus
Melanchthon, & Milichium diligebat inpri-
mis. Hic Friburgum Brisgoicum patriam
habuit, natus loco perquam honesto. Cumq;
confedisset Vuittenbergæ, quemadmodum
& alij externi complures, post multorum an-
norum actam ibi vitam summa cum laude &
præcipua plurimorum utilitate, anno Chri-
sti M. D. LIX. maximo omnium luctu mortu-
us est, agens annum ætatis LIX. Hæc excu-
sio, cuius & valetudo & cupiditas videndi
amicos caussa fuisset, varios rumusculos
commouit, vel à maleuolentia inuidiæ &
odij, vel temeraria leuitate vanitatis ortos.
16 Aliqui literis dissipauerant, ita discessisse
Philippum Vuittenbergæ, vt dissidentem à
Lutero & reliquis, neque reuersurum illuc.

Alij

Alij quamuis rediret, coniunctionem firmam non fore augurabantur, quod nimis philosophica esset doctrina Philippi de actionibus virtutis & officijs. Hæc ventilabantur ab imperitis bonarum artium, & quibusdam qui in sola vehementia & abhorrente ab humanitate ac moderatione genere tam docendi quam viuendi spem existimationis alii cuius collocabant. Sed Philippus Melancthon cursum tanquam nauigij directum tenuit, vt studia optimarum disciplinarum & artium excoleret quibuscunque modis & rationibus posset, vtq; veritatis cœlestis doctrinam simplicem docendo traderet, & eam spinosis superiorum temporum disputationibus expurgatam, propria & pura oratione explicaret. Quod agentem & huius generis pulcerrima & præclarissima opera elaborantem, cum religiosæ pietatis & honestatis amantes omnes, tum Luterus ipse, non modo diligere sed suspicere etiam ac colere. Neque sine eius consilio quicquam instituere quod momenti aliquid haberet & ad cuncta informanda, componenda, explicanda opera ipsius vti. Qua se non posse carere ingenue fatebantur, & gratis animis agnoscebant maxima merita ipsius, neque inhumaniſſimo & pernicioso isto, qui paulo post frequentari cœpit, more, in quo viribus ipsi

deficerentur, eo excellere alios ægre ferebant, neq; metuebant ne alterius splendor existimationem eorum deminueret. Quorum iudicio & sua ante omnia conscientia contentus Philippus, vsque adeo nihil curabat cæterorum maledicos sermones, vt penitus contemneret, in quo & constantissime perseuerauit. Eo anno orbis solis & lunæ obscuratus fuit, & de scalis lapsus Philippus eam partem dorsi, quæ nominatur os sacrum, grauiter afflixit, & aliquot diebus pertulit magnos cruciatus. Sed nihil postea sensit ex eo casu incommodi aut mali. Hoc eodem Christi anno obiit mortem D. Erasmus Roterodamus ætatis suæ LXX. Basileæ, quo se Friburgo receperat. Hunc toto vitæ suæ tempore coluit atque veneratus est Philippus Melanchthon, neque de eo prædicari à me quicquam vel necesse est vel etiam decet, omnibus vbicq; locorum atque gentium noto ac celebri, & cuius scriptorum monumenta passim extant habenturq; in manibus, cuiusque totum curriculum in spacio doctrinæ liberalis & piorum studiorum desudauit & elaborauit ad vtilitatem publicam omnium, quibus doctrinæ & veritas & eruditio cordi est. His temporibus Academia Tubingensi nonnihil difficultatis allatum est cuiusdam offensione, cuius esset munus, Romani Pontifi-

Pontificis autoritate faciendi collegijs profi-
tentium facultatem optimarum artium &
disciplinarum, potestatem, vt meritis con-
ferrent honores & decernerent titulos digni-
tatum scholasticarum. Hoc enim facere ille
pertinaciter recusabat, & oppido excesserat,
neque patiebatur se mitigari, quamuis ad
eum præcipui ex Academia missi & egissent
negotium cum reuerentia personæ ipsius de-
bita humanissime, & nihil proficientes testa-
ti de Iure Academiæ ita discessissent. Præ-
tendebatur autem in negando mutatio sta-
tus Ecclesiastici & scholastici, quem, nisi
Romani Pontificis permissione & venia,
approbare adiuuareq; sibi nequaquam lice-
ret. Habet nomen munus istud cancellarij,
& est Tubingæ mandatum præposito admi-
nistrationi illo in oppido Ecclesiæ, benigni-
tate Pontificis Romani singulari. In consul-
tationem igitur res venire & non responde-
re idem cuncti, placuitq; tunc sententiã ac
consilium Philippi Melanchthonis exquire-
re, Ad quem literæ publicæ datæ fuerunt.
Is cum aliorum quoque iudicia explorasset,
suum plane & perspicue explicuit scripto ad
Academiã, cum aliorum etiam literis mis-
so. Cuius scripti summam si demonstra-
sem, neque ab instituta hoc narratione ab-
horrens visum iri, neque cognitionem infru-

etuosam habiturum esse duxi. Affirmatur autem illo tanquam minime dubium: Ecclesiam Dei habentem scholas & conuentus seu collegia docentium & discantium, posse & debere testimonia dare auditoribus. Testari id consuetudinem litterarum publicarum, quas Formatas vocarent, & aliquas Synodos decreuisse, ne sine his reciperentur ulli sacerdotes. Deum autem ipsum velle frequentioribus Ecclesijs adiunctas esse scholas literarum & doctrinæ, quæ Ecclesiæ necessaria est, sicut fuerint olim scholæ Alexandriæ, Antiochiæ, Cæsareæ, vnde mitterentur huc & illuc doctores cum testimonijs. Quapropter posse nunc quoque Ecclesiam habentem adiunctam piam scholam dare testimonia, hoc est renunciare Doctores Theologiæ. Hæc, inquit, sententia de Theologis non dubia, Neque hic disputandum est, de priuilegijs aut iure annulorum aureorum. Nam hi cum mittantur ad Euangelij præconium, scire debent sibi crucem & ærumnas perpetuandas, non opes & voluptates quærendas esse. Et promotiones tales Theologicæ fuerunt Patrum, Prophetarum & Apostolorum temporibus, & postea florentibus Ecclesijs Alexandriæ, Antiochiæ, Cæsareæ, longe antequam Romani Imperatores aut Pontifices aliquid sanxerunt de Academicis. De reliquis
tribus

tribus ordinibus profitentium aliarum artium facultatem, responsio ipsius hæc fere complectebatur: scire se quæ essent nunc opiniones vsitatae, nec esse eum qui cuperet mutari præsentēs politias, nec cum ijs, qui istam politiæ formam defenderent, rixari velle. Consuetudinem esse annorum fortasse trecentorum, confirmari statum scholarum publicarum autoritate pontificia & imperialia, & ferri priuilegia. Fauere se moribus præsentibus honestis, sed arbitrari ne Parisiensem quidem Academiam initio Pontificum Imperatorumq; Rom. decretis fundatam esse, & quæri posse hac in parte & de Bononiensi & de Pisana. Atque se esse ea in sententia & ita statuere: Vnamquamq; Rempub. & cum penes quem summa rerum est, posse constituere collegium docentium & discientium vtilia ac bona. Immo hoc facere eos debere, quorum fortunæ & opes magnæ sunt. Et hoc, inquit, collegium optimo iure potest dare testimonium auditoribus. Neque sunt gradus dignitatis scholasticæ aliud, nisi ista testimonia: Quod si forte disputetur de lege generali, cam iam ait latam esse: Vt approbati à suis collegijs excerceant artes. Quemadmodum Imperatoris Valentiniani pulcerrima lex testetur, codice de Professoribus. Sed ex Iuriscons. & Me-

dicis fortasse hac communi collegij autoritate contenti esse aliqui non volent. Neque ego cum his rixari, inquit, velim: in Philosophicis tamen cæteris studijs conservari possent gradus decernendis titulis, si tamen adessent omnium artium professores & Magistri. Ridiculum enim fortasse sit, ibi creare Magistros artium liberalium, ubi ne tradantur quidem præcipuæ artes. Certe scholam Atticam constat dedisse testimonia diu quoque ante quam ab Imperatoribus fanciendo hoc confirmaretur. His ingenue & libere, more suo, addidit. Caussam quoque considerari oportere, qua de causa iam tales confirmationes denegentur. Non velle enim aliquos propagari veram atque puram Evangelij Christi Iesu doctrinam, quæ necessaria sit Ecclesiæ, & ideo certis personis & congregationibus illos esse inimicos. Qui istam tamen doctrinam amplexi sunt, Principes viri & ciuitates, facere debent officium suum & constituere collegia honesta docentium discipulorumq; bonas literas & artes. Posse autem collegia testimonia dare, iam ostensum est, & dari ipsa par est, vel ut cruditi & docti emineant, vel ne imperiti per audaciam alij imponant, & ita cum adolescentia perperam instituendo corrumpatur, tum dogmata falsa serantur, & tam Ecclesiæ quam

Recip.

Reip. quies & tranquillitas turbetur. Cum Iulianus, inquit, edicto prohiberet admitti Christianorum liberos in scholas publicas, Christiani proprias scholas & peculiares discipulorum cœtus habere instituerant. Nec est dicendum, non licuisse tunc Christianis dare testimonia auditoribus suis. Immo crescentibus tunc scholis & studiis Christianorum plures homines doctrinam Euangelij admitterunt inuitati honestis studiis & disciplina Christianorum. Estq; credibile libentius misisse multos in scholas Christianorum liberos suos, ubi esse mores honestiores & integriorem vitam cernerent. Hæc fere sunt, quæ Philippus Melanchthon à Tubingensibus consultus tunc respondit. Sed res ista, quædam veluti Iuris via expedita fuit, ut Cancellario, qui ad præstandum officium & fungendum munere suo legitime requisitus, in defugiendo & recusando perseveraret, aliis auctoritate ordinaria sufficeretur, ne diutius huius quasi principatus curatione Academia destitueretur. Annus Christi M. D. XXXVII. deliberationes de Synodo renouauit & attulit curas maximas Philippo. Placuerat enim Principibus conuenire ad audiendum Legatum Imperatoris Caroli, qui dicebatur habere mandata de Synodo potissimum, in oppido sito in finibus Duriæ & Hafsie, quam

quam Chalcidem & Vulcaniam Philippus
solebat appellare, propter crebras officinas
aëris & ferri. Euocati sunt aliunde quoque
Theologi & adducti Vuittenberga Marti-
nus Luterus & Philippus Melanchthon.
Graues causæ perhibebantur fuisse, vt The-
ologi conuocarentur. Nam & de doctrinæ
capitibus accuratius sententias conferri, &
manifestius consentiri tandem oportere exi-
stimabatur. Decerni etiam & statui debe-
re, si res ad Synodi cognitionem deducere-
tur, Quæ capita doctrinæ Ecclesiasticæ ita
retinenda defendendaq; essent, vt assertio il-
lorum omnibus rebus humanis, tranquilli-
tatiq; Reipub. & fortunis ac vitæ in terris
præponeretur. Itemq; si vera ratione & via
in Synodo procederetur, Quid ad instaura-
randam in Ecclesia concordiam, & pacis
communis causa, Pontifici Romano & Ec-
clesiasticæ potentiæ videretur esse conceden-
dum. Sæpe autem boni & quibus cordi erat
religio, & amantes patriæ, quæsti haud ob-
scure fuerant: tantas illas res, non tam soli-
cite & diligenter agi quam magnitudo ear-
um postulare. Sed ista tunc consilio optimo
& maxime laudabili suscepta, partim inter
agendum adhæserunt, partim admodum
lentas habuerunt progressiones. Neque enim
Pontifici de Synodo quicquam concedere,
neq;

neque de doctrina, exquisite differere consultum plurimis visum. Et non parum impeditæ tractationes illæ fuerunt, graui periculosoq; morbo Luteri, de cuius vita cum pene desperaretur, improbantibus & aduersantibus plerisque omnibus, iussit se illinc auchi Luterus. Quod Clarissimus vir Georgius Sturciades Erphordia accersitus, vt ipse mihi postea narrauit, cum non omnino improbaret, se illi itineris comitem adiunxit. Et nocte quæ discessus diem est secuta, melius habere Luterus cœpit. Itaq; illo conuentu neque accurate de doctrina disputatum est, Et Legato Imperatoris responsum datum, quo talis Synodus, tali ratione indicta recusabatur. Iussi autem Theologi sunt aliquid componere de Pontificis Romani potestate. Quod à Philippo perscriptum fuit. Simul etiam recognosci placuit capita Augustanæ Confessionis, & explorari de illis sententias omnium & audiri: Num quis quid requireret, aut aliquid improbens dissentiret. Cum præclara esset consensio de vniuersis, ita ille est conuentus solutus. Petitum tunc fuit à senatu vrbs Augustæ vt Philippus ad se accederet, sed hoc multis grauibusq; de causis est denegatum. Dum autem bellis occupantur Reges, interea à consultationibus Synodicis nonnihil ocij

hil ocij fuit, Philippum vero calumniarum
& obtreccionum improbitas non desine-
bat exagitare. Quæ etiam Principis contra
eum indignationem pene commotam fuisse
accepimus, instigantibus eum quibusdam &
indoctis & leuibus hominibus, quibus sem-
per patuerunt magis fores & aures poten-
tum quam grauius & bene institutis. Quod
& antiquitas animaduertit ita se habere,
Quæ veteribus heroibus Ioue genitis libero
& Herculi, in numerum etiam superstitione
sua relatis Deorum, adiunxit comitatum
ridiculum, Silenorum & Satyrorum Dio-
nysiacam turbam, & Cercopum sodalitatem
17 Herculanam. Neque quicquam repræhen-
sioni in Philippo aut culpæ expositum erat,
quam fuga altercationum & rixarum, stu-
diumq; & cura tranquillitatis & quietis. Qui
nisi de necessarijs non putaret contenden-
dum, Posse autem arbitraretur conuiui ad
nonnulla, multa ferri debere. Cum interea
non cessaret operam dare & anniti, vt do-
ctrina esset perspicua, & ambigua explica-
rentur, & confusa disponerentur, & mira-
bilia quædam ad communem intelligentiam
proprietae expositionis simplicis ac planæ
reuocarentur. Id quibus displicebat, ij mo-
do hoc modo illud, quod notarent arripere,
& inuidiose deferre ad alios, vt sæpe Philip-
pus,

pus, priusquam animaduertisset, odio oneraretur, & interdum vocaretur in periculum quoq;. Inter alia & hoc crimen sustinendum ei fuit, Quod literæ ad ipsum ex Italia mitterentur ab ijs quos causæ esse inimicos constaret. Quod suspiciosum esse isti volebant & causam afferre dubitandi de voluntate & fide Philippi. Miserat autem paulo ante literas ei Iacobus Sadoletus, cui post Petrum Bembum tribuebatur sapientiæ & eruditionis laus præcipua. Hæc epistola scripta eleganter & forma sermonis latini exquisita, à Philippo ostendebatur omnibus, tantum aberat, vt occulte aliquid & astute ab ipso fieret. Atque cogitabat respondere diligenter & accurate, & eadem, vt dicitur, mensura aliquid illi vicissim emetiri. Sed occupatus negotijs & curis oppressus infinitis facere hoc intermisit. Atque haud scio an etiam penitus omiserit. Verum criminationes illæ accusatorum & futilitate & manifesta prauitate, facile euanuerunt, adeo vt qui illas admiserant, eos mox puderet procliuitatis istius. Epistolæ Iacobi Sadoleti, cuius mentio facta est, putaui hoc loco exemplum inserendum. Quod & verbis eleganter & sententijs præclare esse illa scripta mihi videtur. Atque isto studui quasi emblemate nostram narrationem reddi spectatiorem, cum alijs

alijs aliorum scriptis, quibus plenior & or-
natio fieri hæc potuisset, certo consilio ua-
riandam eam esse non duxerim. Epistolæ
autem isti inscriptæ nominatim Philippo
Melanch. ascripta erant hæc: Amantissimus
tui Iacobus Sadoletus Cardinalis Carpentor-
actensis. CARpentoracti cum essem, quo
in loco statutum habere me credens domici-
lium perpetuum vitæ fortunarumq; mearum
omnium, repente tamen inde decedere, &
Romam redire iussu Pontificis Maximi sum
coactus: Sed cum ibi essem, accidebat mihi
ferme quotidie, vt aliquid nanciscerer de
scriptis tuis, quæ ego & propter excellens
ingenium tuum, & propter elegantiam
stili atq; orationis libentissime legere sole-
bam. Id cum sæpius facerem magnaq; in le-
gendo delectatione afficerer, sensi paulatim
mihi incendi animum ad quandam beneuo-
lentiam nominis tui, vsque eo quidem, vt
miro quodam studio tecum incundæ amici-
tiæ tenerer. Etsi enim nonnulla erat inter
nos opinionum dissensio, ea tamen animo-
rum dissidium apud ingenue eruditos mini-
me faciebat. Iamq; erat mihi deliberatum
scribere ad te, primasq; aperire amicitiae fo-
res, cum subito vt dicere cæperam, ad vr-
bem accersitus, & per causam appropinquan-
tis concilij, earumq; rerum tractandarum &
consul-

consultandarum, quas mox in consilio agi
oporteret, ē mea Ecclesia, vbi decennio man-
seram, euocatus, Pontificis huius optimi &
prudētissimi iudicio tacito, inscius atq; im-
prudens in amplissimum ordinem S. R. E.
Cardinalium cooptatus sum. Hæc res effe-
cit, vt meæ voluntati in dandis ad te literis
obsequeretur tardius. Non enim dici potest,
vt ex illa pristina, pacata atque felice vita, in
hanc tumultuosam & plenam strepitus tra-
ductus sum, quæ sollicitudines, quam multæ
& graues curæ, eademq; permolestæ me ex-
ceperint. Quod quidem mihi necesse fuit
accidere. Hanc enim ego vitam & prius
iudicio fugeram & alteram illam item iudi-
cio fueram persecutus. Quarum nunc vtraq;
cum mihi contra animi sententiam ceciderit,
nec lætari possum habere me quod noluis-
sem, & necessario doleo amisisse quod dili-
gebam. Sed quoniam Deo parendum est de
nobis sic statuenti, dabimus nos operam,
quantum per eius auxilium opemq; licebit,
vt honorem hunc recte integreq; administre-
mus. Quod autem nostræ institutæ est scri-
ptionis, non est passus meus, mi Philippe,
in te animus diutius hoc à me officium dif-
ferri, quin vt primum ē turba & molestiis
animus emergere cœperat, literas ad te da-
rem, & pignus meæ propensæ in te volunta-

N

tis &

tis & inuitamentum in me tuæ. Si id quod ego in te amando meæ existimationi de tuis eximijs virtutibus tribuo, tu humanitati tuæ, vt me pari beneuolentia complectaris; esse dandum duxeris. Quod quidem te rogo vti facias, neque me sitientem familiaritatis tuæ deseras. Non enim ego is sum, qui vt quisq; à nobis opinione dissentit, statim cum odio habeam. Arrogantis est hoc & elati animi, non mansueti & comis, quas me potius ad partes natura mea vocat. Sed faueo ingenijs, virtutes hominum colo, studia literarum diligo. In quibus tu vt doctrinæ & ingenij, sic amoris mei non mediocres partes possides, Nec dubito quin tu eadem mente & voluntate sis præditus. Isto enim animo, qui tam liberaliter artibus ingenuis expoliatus sit, nihil agreste neque asperum inesse potest. Quo etiam maiorem mihi spem virtus tua facit, meas hoc apud te ponderis literas habituras, vt qui locorum spatijs disiuncti sumus, animis tamen & beneuolentia coniungamur. Quod ego maxime aueo expectoq; tibiq; prorsus persuasum cupio, in numero eorum, qui te diligunt & florentem cupiunt, quorum magna est profectio, pro tui nominis celebritate, multitudo, me principem locum appetere, nihilq; vehementius cupere, quam dari mihi locum probandi tibi reip̃

bi reipsa & declarandi amoris erga te mei.
In quo tu si ansam mihi aliquam occasio-
nemue meæ explendæ huiusce cupiditatis
præbueris, magno me abs te beneficio affe-
ctum arbitrabor. Omnia quidem quæ tibi
grata esse sensero, tanto studio ac diligentia
exequar, vt nec fide quisquam exequi ma-
iore nec beneuolentia possit. Sicut & mea
natura officij inprimis cõlens, & susceptus
iam erga te amor, & perpetuum meum erga
doctos viros studium postulat. Vale mi
Doctissime Melanchthon, & nos tui aman-
tissimos dilige. Romæ xv. Calend. Iulij,
M. D. xxxvii. Vixit Sadoletus annis totis
Lxx. Post hanc missam epistolam x. Fuerat
autem is, qui vna cum Petro Bembo primus
considerauerat attentius & accuratius vsur-
parat non modo elegantis & speciosæ, sed
disertæ atque dilucidæ & illustris orationis
rationem & compositionem. Quæ non so-
lum cuiusq; linguæ proprijs & significanti-
bus verbis apta, sed sententijs quoq; non
vulgaribus neque leuibus concinna esse de-
bet, simul vt prudenter cogitata, quæ expo-
nuntur, simul vt eorum qui audiunt aut le-
gunt, intelligentiæ, & ad penetrandum in
animos ipsorum operam datam, esse appare-
at. Ad quæ cum singulorum verborum cle-
ctio, tum iunctorum compræhensio requiri-

tur talis, vt & conceptorum animo quasi membra eloquendo distinguantur, & totum veluti corpus illorum conueniente ambitu exprimatur. Atque hoc studio multorum passim animi ad imitationem & similes conatus excitati inuitatiq;, & bonarum literarum atq; artium excercitationes frequentari magna assiduitate ceptæ sunt. Cumq; & Philippo Melanchthone idem probaretur, & esse præclara res ista percolendaq; modis omnibus videretur, essetq; ipse minime duro aut rustico agrestiq; ingenio, ab eruditis & doctis & humanitate præditis beneuolentia & fauore eum esse compræhensum, non est mirandum, cum momenti plurimum ad amicitias coniugandas afferre nemo fere ignoret voluntatum studiorumq; similitudinem. Sed à suspicionum prauitate tuta esse, calumniarumq; morsus vitare integritas atq; innocentia nunquam potuit. Vt tunc acciderit Philippo Melanchthoni, quod antea alijs, quos arrodere non dubitauit odij inuidiaq; maleuolentia atq; improbitas, & post hac quoque bonis & quietis placidisq; hominibus idem periculum eademq; est fortuna subeunda. De quo satis vel nimio etiam plus, quam argumentum postularet, non alieno tamen, vt opinor, loco neque intempestiue cum disputatum sit, redeamus ad rem. Inter illa igitur quæ

quæ commemorauimus & de istis literis, cum alij rumores dissipati fuerunt, tum fama sparsa non bene cum suis Philippo conuenire, Principesq; quidam pertrahere cum in suas Academias studiose conati sunt. Sed ipse à proposito publicæ vtilitati consulendi & feruendi aliorum non suis commodis sese nihil omnium deducere passus est. Conspectus est & hoc anno cometes in plâga aquilonari, de quo eruditas epistolas Philippus ad amicos, quos sciebat studio philosophico delectari, misit. Eodem anno in Britanniam quidam Saxonici profecti fuerunt, Qui de capitibus doctrinæ Ecclesiasticæ exponerent doctis Britaniæ sententiam suam & alias etiam fortasse res agerent. Cumq; disputationes essent initio commodæ, postea digressis Saxonicis, contraria decreta proposita sunt, cum tamen duceret Rex desponsam sibi sororem Ducis Cliuensis, quam paulo post repudiauit. Ferebatur autem rursus expeti aduentus Philippi à Britanis, & significabant quidam, nulla alia re ad moderationem & æquitatem flecti posse animum Regis, nisi si legatio mitteretur, quæ non mediocrem haberet splendorem, & Philippus vna adueniret. Sed ista in vnum aut alterum annum excurrerunt, Quibus commota negotia diuersa tam sacra quam prophana exagitarunt

vehementer Philippum Melanchthonem. Romanenses nescio quid, quasi emendationis & correctionis vitiorum in statu suo meditentur, conscribere. Quod etsi nequaquam diuulgari placuerat, & in manus tamen multorum peruenit, & sermonibus scriptisque atque adeo picturarum contumelijs est vexatum: Cum & notarentur in illo scripto ea, quæ manifestam haberent turpitudinem (ut non tam, si remouerentur, laus speranda, quam, esse tam longo tempore lata impune atque licenter usurpata, nefarii sceleris crimen sustinendum videretur) & nugatoria quædam inculcarentur, quale erat de quodam scholastico libello Erasmi Roterodami excutiendo de puerorum manibus. Principum autem quorundam conuentus de Republica agebatur in vrbe Saxonica Bruno-
suiga, in quo non temere à nonnullis metuebatur, ne quorundam priuatis cupiditatibus & emolumentis prætenderetur publicarum commoditatum & utilitatum respectus. In Gallia autem animaduersionum sæuitia non desinebat corripere eos, qui vel transuersum, ut dicitur, vnguem à pristinis qualibuscumque obseruationibus discedere, & in doctrinam Ecclesiæ quamuis optimo & pietatis religiosæ cupidis. animo inquirere audent, Carolus etiam Imperator & Gallo-
rum

rum Rex Franciscus pacificatoriam personam agente Papa Paulo, plane in gratiam secum rediisse credebantur. Neque cessabat Pontifex Romanus Synodicum congressum indicendo urgere. Iam & belli Turcici sparsa fama, plurimorum animis timorem iniecerat. In Saxonia autem & causae dabantur indices nouae perniciosarum turbarum, Et odia vetera aliqui non patiebantur sedari, qui iidem quietis & omnes inimici haud scio quo consilio quauis sententia atque spe, armis decertando quam disceptando verbis dirimi controuersias malebant. Inter quae doctrinae Ecclesiasticae labes quoque inferri coepit, quorundam vel curiosis vel ambiosis disputationibus, qui in illa praeeptiones & iussa legum proponi atque explicari, non solum non necessarium, sed plane superuacuum atque alienum esse contenderent. Suspiciabantur nonnulli, in Philippum Melanchthonem ista potissimum strui & intorqueri. Sed eadem ut veritatem coelestis doctrinae conuellentia, Martinus Lutherus & oratione & scriptis reprehendendo vehementissime oppugnauit, & grauissime confutauit, & autores eo adagit, ut incepti valde eos poeniteret, utque errorem confitendo, ipsi priorem sententiam suam sine dissimulatione improbarent. Quo tempore, ut alijs

omnibus, non tam priuatim aduersando re-
fragandoue vlli, quam publice vera ac recta
atq; certa asserendo, Et facere officium su-
um Philippus Melanchthon, neque de curri-
culo suo vsquam deflectere. Anno autem
Iesu Christi M. D. XXXVIII. Quo governa-
tio Academiae, semestri aestiuo, vt mos con-
suetudoq; fert, commissa fuit Philippo, qui-
dam libellum edidit Vuittenbergæ epigram-
matum. In quibus quod putarentur esse qui-
bus fama aliquorum læderetur, iritati præ-
cipui quidam censuerunt autorem compræ-
hendendum. Sed is fuga salutem quæsiuit.
Tunc igitur rursus facti inuidia in Philip-
pum detorqueri. Aliqui ab ipso admonitum,
Aliqui ope necessariorum Philippi adiutum
eualisse aiebant. Hæc omnia alijs quibus-
dam criminibus cumulabantur, quorum erat
caput, quod non arbitrio alieno certos quos-
dam homines odisset, & aspergeret conui-
cijs, vel etiam à suis ornari pateretur. Sane
illa, de quibus tumultuatum adeo fuit, epi-
grammata ad nullius manifestam contume-
liam, vel certe atrocem iniuriam incorrupte
& simpliciter iudicantibus visa sunt pertine-
re. Et quæ notabantur ea carebant tam sce-
lerum quam flagitiorum turpitudine. Autor
tamen elapsus impudentissime mentiendo
tam fœda atque impura postea scripta emi-
sit,

lit, vt neque priorum veniam dandam ei, & quicquid accidisset, id lenius, quam nefaria ipsius vesania mereretur, omnes boni statuerent. Eodem hoc anno & mea cupiditate impulsus & alijs quoq; de causis, quæ indicandæ modo non sunt, profectus ego fui Vuittenbergam, vt Philippum Melanchthonem potissimum conuenirem. Quo in itinere accidit, vt pedis malum, quod mihi iamdiu non solum molestum sed infestum quoque fuisset, & tunc videretur satis bene esse situm, cum veneratione irritatum, tum errore quodam curæ recrudesceret, vt metu maiorum cruciatuum, festinantius Vuittenberga discedere cogerer, quam statueram ac volebam. Sum tamen paucis illis diebus, quibus ibi mansi, Philippi Melanchthonis & suauissima consuetudine vsus, & ipsius varijs de rebus accurata oratione cum delectatus tum instructus. Reuertens ad meos habui comitem Philippo Melanchthoni carissimum Iuuenem Mattheum Friderichum, gente Francum patria Vurcepurgensem, quem Irenæum nos appellabamus. Atq; is paulo post Tubingam ad nos venit, & Lipsiæ deinde nobiscum familiariter est versatus, cum Iuris publici & Legum cognitioni operam dandam & ciuilem prudentiam persequendam statuisset. Non videor vidisse

quenquam parī ætate vel ingenio acriore illustrioreq; præditum, vel studio flagrantiori deditum, vel in quo maior esset industria cogitandis, elaborandis, agendis ijs rebus, quibus animum intendisset. Memoria autem ea erat, quæ admirabili facilitate comprehendere & summa fide retineret quiduis. Cum mentis autem tanta vi coniungebatur voluntas recta, & animus auersans falsa fucataq; omnia & vera atq; simplicia adamans. Vt hoc erepto, non patria modo terra, sed exteræ quoque nationes non leue damnum fecisse videantur. Mortem autem obiit Anno Christi Iesu M. D. LI. improuisa atq; subita ruina Spiræ (quo excercendi artificij sui gratia se contulerat, quod ibi tum solennis confessus esset Imperatorij iudicij) cum clamoribus quibusdam excitatus trepide ad fenestram proiectam, quales sunt veteres in illius vrbis ædificijs, accurrisset, & prospiciendo cupidius & inconsideratius, pondere suo antiqua tabulata quædam depressoisset. Cum his enim illo præcipitato, ita grauiter afflictum caput fuit, vt sine facultate loquendi post paucos dies vitam amitteret, omnium, quibus notus fuerat, incredibili dolore; deplorantium & eius vicem, & factam talis amici, necessarij, sodalis iacturam. Atq; ita fere decurrit iste annus.

Se

Sequens vero M. D. XXXIV. rursus deliberationes perquam sollicitas, & valde arduas attulit de Repub. Cumq; placuisset, ut ordines coniuncti in confessione ea, quæ supra qualis esset ostendimus, religionis convenirent Francofurti ad Menum, eodem proficiscentem Principem suum iussus est sequi & Philippus Melanchthon, idq; iter ingressus est pridie Calend. Februarij. Quod autem incertum omnino esset, quid de pace impetrari obtineriq; posset, & multi timerent conatus violentiæ & iniustæ oppressionis, iussus tum fuit Philippus, de legitima & concessa neq; contraria voluntati diuinæ defensione, scriptum componere. Cuius ille in tres partes diuisi, siluulam, ut ipse appellabat, tunc instituit. De compositione sollicitum fuit studium Philippi. Animaduertens tamen quorundam non solum callida sed fraudulenta esse consilia, cum illis certare verbis destitit. Atq; fuit tum quidem res in summo discrimine. Quo tempore in morbum inopinatum Princeps Hassiæ incidit. Sed post longas difficilesq; & odiosas contentiones, inducias & pacem fecerunt. Reuersum domum Philippum curæ laboresq; alia exceperunt, Quod Illustrissimo Principe Georgio Saxoniae Duce mortuo, & totius regionis gubernatione ad fratrem ipsius Henrichum deuo-

deuoluto, De constituendis Ecclesijs & Academia ad Martinum Luterum & Philippum referretur, & priorem statum Dux Henrichus mutari quamprimum cuperet. Successio ista inexpectata aliquando & prorsus insperata, à quodam tamen vaticinante ante multos annos prædicta fuit. Qui in Phrysia bellum gerentibus fratribus Georgio & Henricho, Henrichum vniuersæ regionum Misnicarum ditionis futurum Dominum esse affirmarat, non sine indignatione Henrichi, quem iniquo animo illam prædictionem tulisse constat. Grauißimum etiam vulnus inflictum est eo tempore Philippo, cum se absente & in vicinam Marchiam profecto, mortuus esset vna cum coniuge vxoris Philippi sorore, Optimus & Clarissimus vir Sebaldus Munstererus Iuriscons. malo à pueris Noricis præcipuæ familiæ ipsi commendatis, illato in ædes eius, cum incautius foris illi versantes contagione pestilentie infecti domum rediissent. Hunc Sebaldum, cuius antea quoq; mentio facta est, habui in pueritia condiscipulum ego Lipsiæ, & postea constantiss. & fideliss. amicum. In quo præter doctrinam probitas & religiosa pietas fuit admirabilis. Et ipsa mors quæ eripuit affines, orbosq; liberos horum illi curandos reliquit, & genus mortis miserabile, ingentem dolo-

dolorem attulit Philippo Melanch. Inq̃ hoc veterum etiam ærumnarum suscitata memoria nouorum cruciatuum quibus laceraretur animus eius, caussa fuit. Itaq̃ tum & tristitia & solitudine & varijs magnisq̃ laboribus sic afflictus est, vt de vita quoq̃ nonnihil esset periculi. Consilia de Academia Lipsica occasionem obtulerunt Philippo, vt cogitationem susciperet, ne illuc, vbi puer discipulus fuisset opt. literarum atq̃ artium, ad docendum eas reducendi, cum ex eo tempore quo alter alteri notus esse cœpit, expetere consuetudinis nostræ vsum nunquam destitisset. Sed pestilentia quæ hoc anno Lipsiæ fuit, rem distulit. Itaq̃ anno demum XLI. denuo accersitus ab Illustrissimo Principe Mauricio, qui patri Henricho successerat, Lipsiam me contuli, & ita deinde propter vicinitatem iucundior velutiq̃ vberior fructus à nobis percipi mutux necessitudinis. Decretum fuerat vt Hagenoæ ad Rhenum conuenirent Theologi, deq̃ controversis capitibus Ecclesiasticæ doctrinæ placide & amanter colloquerentur. Eo proficiscens Philippus quoq̃ Melanchthon in grauißimum morbum incidit, remansitq̃ Vinarix, vbi clementissima Principis benignitate & diligentia amicorum, euocato etiam Erphordia Georgio Sturciade medico, quem ille

ille diligebat & magnificiebat, id in curando studium & ea industria adhibita est, ut vita illius Dei æterni propitio fauore conseruaretur. Accurrit tunc ad illum Martinus Luterus, & decumbenti omne officium præstitit, eumque iacentem in grauissimis perturbationibus crexit cum consolando tum admonendo, tum etiam interdum leniter obiurgando. Morsus autem erat ille doloris, cuius cruciatus ita eum prostrauerat. Qui in ijs solis, quibus culpam aliquam suam inesse credebat, sustinere tenerrimæ conscientie quamuis paruas labeculas non posset, cum esset cæteris casibus animo patientissimo atque fortissimo. De quibus negotijs & rebus narratio copiosa alienior videri posset. In quibus tamen si quod peccatum fuit, peccatum illud vel ignorantis uel melius sperantis Philippi fuisse certum est. Recuperata valetudine in Vangionas ad aliquoties iam dilatatum colloquium venit. Hoc anno post natum Christum M. D. XL. incendium ortum Tubingæ fœdam stragem dedit. Ea enim subita vi flammarum inter procellas ventorum plures quam LXXII. domus celeriter conflagrarunt. Ac quamuis vndique accurreretur ad opem ferendam, & in restringendo opera strenua daretur, vix tamen ignis sæuitia potuit opprimi. Neque potuisset omnino,
nisi

nisi ventus ex improviso sese in contrariam partem ad ea quæ iam deflagrauerant, conuertisset. Suspiciones erant, non fortuita negligentia illud excitatum fuisse, quod alijs compluribus in locis damna tunc similia data à conductis pecunia, nunciarentur. Sed certo depræhensum est, in quodam stabulo lumine relicto stramenta ignem concepisse, & inde nocte profunda in vicinas hunc ædes satis lente quasi procedentem ita creuisse, vt serum esset auxilium. Hic casus animum Philippi in recordatione vitæ iuuenilis Turingæ in studijs actæ cum omnium beneuolentia atq; amore, & ipse maximo dolore affecit. Colloquium autem illud tergiuersantibus aduersarijs in annum **XLI.** est extructum. Affuit ibidem Legatus Romani Pontificis. Hic cum oratione habita ad tempus & rem præsentem accommodata, actiones illas esset exorsus, Philippus respondere ei cupiens, à Granuelano, qui Imperatoris Caroli loco præsidebat, prohibitus fuit hoc facere, metuente ne vehementius aliquid initio ille diceret, quod impedimento esset progressionibus, de quibus bona spes adhuc erat. Cumq; Philippus hoc animaduerso, se moderate responsurum esse dixisset, postulauit Granuelanus ab eo perquam benigne, vt eorum labore supersederet. Et scio, inquit, te posse

posse tibi moderari, quando vis. Ita breue & minus elaboratum ab altero quodam responsum datum, in eruditorum quorundam dicta incurrit. Etsi autem aderat Eccius, qui fulcire quasi sedem Pontificiam putabatur, & causæ tamen bonitas, & rerum de quibus agebatur veritas, & Philippi etiam Melanchthonis doctrina, facile tutata est partem illam, & aduersarij tum non parum perculsi, colloquium institutum non illi quidem recusare, id quod honeste facere non poterant, sed clanculum impedire, & disputationes defugere. Et modo moram quærere congressibus, modo nouas condiciones ferre: Tandemq; eo deuenire, vt conscripta à se capita postularent publice recitari, & omnes vt ea approbarent illisq; subscriberent autoritate præsidis adduci. Non poterant his assentiri Saxonici. Atq; ab alijs quoq; compluribus simplex & euidentis disertaq; præcipuarum controuersiarum explicatio, præferebatur tortuosis & obscura varietate implicatis istorum formulis. Quo offensis nonnullis nouæ artes tentatæ fuerunt, & institutum vt singuli accerferentur & audirentur coram ijs, quibus gubernatio colloquijs illius commissa fuerat. Estq; actum primum cum Henricho Theologo Illustriss. Princip. Friderichi Palatini, sene illo quidem neq; eximiæ doctrinæ

ctrinæ laude celebri, sed viro opt. & in veritatis exploratæ atq; certæ professione defensioneq; acerrimo & constantissimo. Post hunc existimabantur audituri Alexandrum Alesium Theologum Illustriss. Principis Ioachimi Marchionis. Qui quidem & paratus erat & cupidus conflictus. Sed huic obstitit iussu præsidis, qui & Alesium ad pugnam instructum sciret, & talem administrationem rei viciosam esse animaduerneret. Nam Saxonicis cumq; his coniunctis, cernentes quæri suorum distractionem, & concipi ab adversarijs spem fore eos separatos timidiores, epistolam à Philippo compositam illis & in consilium aduocatis miserant. Ea testati se ex animo piam concordiam expetere, & bono studio profiteri id doctrinæ genus in quo versarentur, (quem iudicaret esse consensum catholicæ Ecclesiæ Christi, cumq; illustrari & patefieri oportere) significarunt non aliqua se cupiditate, non petulantia, non morositate, dissidia alere, qui tanta pericula tot ærumnas, tam dira odia sustinerent: Et orare se cum reuerentia, scripsere, vt se illi interpellari boni consulerent, ab ijs qui propter communem Ecclesiæ Christi necessitatem aduenissent. Post hæc ostenderunt, audire ideo differri colloquium, vt noua capita excudantur ipsis deinde proponenda, quibus

bus cogantur assentiri. Et hac ratione ad concordiam rem adduci posse, fortasse aliquos arbitrari. Quos & falli certum sit, & discrepare hæc à Decreto Haganoensi. Se aduenisse vt doctrinam placide conferrent cum aduersarijs, non vt acciperent leges capitum flexiloquorum & insidiosè scriptorum, quibus non tollerentur sed magis inflāmarentur dissidia. Eo accedere & illud, quod iniquum sit, non audita vtraq; parte ire in suffragia. Fortasse argumentis auditis atq; perspectis, ex vtraq; aliquos parte mutatos sententias, quas adhuc retinerent. Itaq; graue esse præiudicium suffragia præripere. Recusasse se synodum Pontificiam, quod iniquum sit aduersarios & hostes esse iudices. At in synodo minus fuisse periculi futurum, quam si iam aduersarij velint necessitatem imponere assentiendi capitibus suis. Conuentum enim synodi habiturum plures doctos & moderatos, & externarum nationum homines, minusq; indulgentes affectibus animorum suorum, fortasse & hoc tum futurum fuisse, vt & attente audirentur ipsi, & res erudite disputarentur. Atq; perhiberi à quibusdam sapientibus dici, ne esse quidem opus disputatione, quod illæ sint non rerum sed verborum controuersie, quas profit obruere potius quam agitando excitare. Cumq;
res sit

res sit eadem, horridiora quædam verba leniri posse, Quo iudicio vtramque partem grauius ledi. Si enim verborum tantum sint diffidia, interrogarunt illa in epistola Saxonici & socij ipsorum, cur suæ doctrinæ assentientes interficerentur? cur tot mortales, totasque adeo gentes deletas aliqui vellent? Perinde esse hoc, ac si Sarmata vellet interficere Germanum, propterea quod lingua alia sit. Nimis se graues pœnas dare inscitia, si idco plectantur, quod non satis facundi aduersarij videantur. Se etiam sceleratos habendos, si Ecclesiæ & Reipublicæ tranquillitatem turbent, non necessarij rixis verborum. Sane si quando exarserunt ciuiles dissensiones, in ea quoque parte, quæ iustam causam tuctur, minus interdum moderate certari. Ideo non esse fortasse nullas in vtriusque partis disputationibus rixas verborum. Sed eas facile posse tolli. Et vbiunque res conuenit, non repræhendere se verba, quibus & ipsi sæpe iisdem sine cauillatione vtantur, quamuis sentiant proprietatem sermonis in doctrina Ecclesiastica seruandam esse. Non igitur litem de genere sermonis, sed rerum magnas esse controuersias: De vero Dei cultu & veneratione. De vera Inuocatione. Eas non esse eludendas hac specie, quod sint verborum certamina. Nisi aliqui fortasse omni-

um religionum dissidia verborum esse certamina putent, à qua philosophia Christianos prorsus abhorreere deceat. Se vnam veram Religionem esse statuere, quæ certo verbo Dei tradita consensus sit Catholica Ecclesiæ Christi, in qua regnet Filius Dei, & implorantes se audiat & impertiat salutem atq; vitam æternam. Quapropter orare se, ne capitum nouorum præiudicijs onerentur, neue rebus nondum disceptatis suffragia præripiantur, sed vt instituatur secundum decretum Haganoënsæ collocutio. In ea se operam datuos, vt omnes honesti viri intelligant, quod non abhorreant à moderatis consilijs. Vere enim posse affirmari, sic esse se affectos, vt morte etiam sua piam Ecclesiæ concordiam redimere cupiant. Vtrum vero aduersarij hanc quærant, an potius prauarum superstitionum confirmationem, iudicandum se relinquere bonis & veritatis amantibus. Neque fucosas compositiones restituturas esse tranquillitatem. Quod si de rebus ipsis integre planeq; disputari placeat, cur non secum potius agere uelint quam cum alijs? Nam se sperare suas explanationes pijs mentibus satisfacturas esse, & omnino existimare, Inuictissimi Imperatoris Caroli eam esse virtutem, vt veritatem patefieri, & consuli saluti Reipub. velit rationibus opti-

optimis. Ideo orare se, vt petitio illa sua in bonam partem accipiatur, eamq; proficisci non ab impudentia sed pio studio iudicetur. Quod si pergant aduersarij præripere suffragia, quale sit futurum iudicium bonorum vbiq; de conuentu illo, non esse obscurum. Quorum spem & expectationem falli non debere, neque sibi imponi necessitatem iustarum querelarum. Seq; confidere futurum vt autoritate præsidum interposita, ad veritatem patefaciendam studia conuertantur, & aliquando vno pectore & vna voce omnes Ecclesiastici cœtus Deum celebrent. His literis redditis ab incepto illo audiendi adoriendiq; singulos, auctores suasoresq; eius destiterunt, rursusq; polliceri facultatem congressuum publicorum, cum prius contendissent vt pauci quidam vtrinq; deligerentur, & rationem quærerent qua inueniretur aliqua controuersiarum moderatio. A quo consilio Saxoniorum cumq; eis coniunctorum quibusdam non abhorrentibus, vel quia timore quodam afficiebantur, vel quia præsidii obsequendum esse statuebant, Philippus, qui publicæ quietis gratia nihil non quod recta conscientia posset, faciendum tolerandumq; duceret, quid periculi tamen illa in re esset, libere demonstravit. Seq; existimare ostendit, ideo proponi angustius illud colloqui-

O 3

um, vt

um, vt dubiæ aliquæ & fucosæ confirmatio-
nes sententiarum inueniantur. Cumq; iam
eum talium actionum magnopere esset per-
tesum, & ludibrijs aduersariorum prouoca-
retur, vehementius tum etiam locutus est.
Negauitq; se talium actionum participem,
multo minus administrum esse velle: Non
dicere sententiam, non scribere quicquam in
hoc genere, non etiam si quid constitueretur
approbare. Non, si exercitus hostium, qui
ad portas esset, metu terreretur. Doctri-
nam necessariam in Ecclesia illustrem & cla-
ram esse debere, eius luci vt caligo prestigia-
rum offundatur, se autorem adiutoremq;
nunquam futurum. Ita ad congressum pub-
licæ disputationis res est reducta. Ibiq; tum
rursum postulatum, ne dissentientes suas ra-
tiones pronuntiando explicarent, sed vt tra-
derent perscriptas. Hanc occasionem aliqui
abrumpendi colloquij censebant non esse
amittendam. Quorum in Philippum absen-
tem (is enim è consilio discesserat hortatus,
vt quid optimum esset diligenter considera-
rent) minus etiam clementem orationem fu-
isse cognouimus. Sed pluribus visum est, hac
etiam in parte præsidiis esse gratificandum.
Conuenit igitur vt scripta offerrentur. Idq;
cum faciendum esset, mutare rursum autores
huius consilij sententiam suam, & moram
inijs

inijcere, & tandem ad disputationem verborum relabi. Itaq; ea statim has quasi velitationes secuta est. Certatum fuit de naturæ vitio & prauitate & Eccio suo more iactata iampridem enarranti, non sine maledictis contumeliosis in eos, qui ista aliter differebant, cum tamen aliter cum priuatim de questione illa locutum esse constaret, Philippus Melanchthon postero die respondit, & suæ partis sententiam veram exposuit plane & diserte, & à conuicijs quidem abstinuit, non nihil tamen salis in Eccianis ineptijs deridendis aspersit. Post paucas congressiones, rursus dissuadente Philippo, obtinuerunt vt duo ad Præsidentem accederent, qui de capite disputatione agitato, formulam congruentem perscriberent. Protulit tum Eccius quandam suam. Sed postea auocatus Granuelanus ab Imperatore Carolo, qui venerat illis diebus Spiram, tota res ita relicta & ad conuentum, qui Ratisbonæ mox ageretur, reiecta est. Hoc quasi præludium magna sollicitudine affecit Philippum, neq; passum est bene sperare de vllis talibus congressibus. Neque ille aduersariorum doctrinam, non potentum vim metuebat, minimeq; omnium causæ diffidebat: Sed astutiæ fraudes & laqueos in concinnandis & colorandis discrepantibus sententijs, & fallitate quasi illumi-

nanda infuscandaq; veritate pertimescebat. In istis autem actionibus quantumuis parua & leues offensiones mirifice excruciare animum ipsius solebant. Neq; praesagia ista fuerunt inania. Nam proximus annus non modo fucata & tenebricosa illa negotia retulit, sed eorundem priores difficultates auxit, nouis inuolucris & integumentis additis. De quibus aliquid suo à nobis loco dicetur. Atque Granuelanus tum ita discessit, vt & bona existimatio eius de Philippo Melanchthoni videretur esse, & ipse praese ferret voluntatem atq; studium, quibuscunq; modis posset perficiendi, vt Germania pacem haberet, policens se ad mansuetudinem flectere Imperatorem velle, & hortari ad conseruandam tranquillitatem, & iudicii publici nimiam seueritatem coercendam, Deniq; pia & salutaria sua consilia omnia futura esse professus est. Anno Christi M. D. XLI. agit conuentum Imperator Carolus Ratibonae ad Danubium, quae Regenoburga à fluuio vicino appellatur, atq; Ptolemæo esse existimatur Artobriga, colonia Tiberij. Ad quem cum actiones de doctrina Ecclesiastica superioris temporis essent prorogatae, ita eo etiam iussus est proficisci Philippus Melanchthon. Qui illo itinere in finibus territorij Palatinorum, cum vectoris culpa essedum quo ipse

ipse & alij uehebantur, euersum fuisset, manum dextram ita afflixit, ut nunquam integer usus illius restitutus sit. Vel laxata, vel certe quassatis ossiculis detorta fuerat commistura cum cubito. Itaque & curationis tum & postea debilitatis ea parte incommoda molestiasque perferre est coactus. Protulerunt ibi librum, nescio quorum opera conflatum, de quo persuasum Imperatori fuerat, eo ipso utriusque partis errores quos dissidentibus altercationes attulissent, posse corrigi. Postulabatur igitur ut ille probatus reciperetur. Id quod neutra pars facere uoluit, cum Saxonici illum quidem non penitus reijcerent, sed censerent emendari oportere, inque eo operam suam policerentur: Aduersarij autem horum, totum librum repudiarent & damnarent. Ut infelice admodum sidere natum hunc librum existimari debeat: Qui recens veluti in pueritia sua omnibus inuisus & clanculum educatus postea adultior causa maximarum calamitatum fuerit, quando Interim dum Synodus cogeretur, eodem ferme, sed accuratius vestito, ut ferebatur prolato, quid fieri seruarique placeret, definitum fuit. Atque erat Rationensis expositio talis, quae nisi disceptando & concertando diffidentiae alienationesque animorum corroboratae essent, ferri admit-

tiq; recte posse plurimis videbatur. Sed acutiores multa notabant, partim occulta falsitate inserta, partim callide & insidiosè perscripta. De quibus pacis & tranquillitatis amantissimum Philippum curæ angebant die noctuq; , vt somnia etiam quædam, quorum visis per quietem territus esset, diuulgaret. Sed tunc quidem magis aduersarijs quam Saxoniciis reclamantibus de libro multiplicibus & varijs notis interpolato nihil constitutum fuit, & dimissus conuentus sat bonis conditionibus, Imperatore Carolo ad calamitosi exitus bellum Africanum festinante. Multorum etiam summorum virorum nunciata, interq; eos præcipuorum amicorum funera, maximum luctum & grauissimos dolores attulerunt Philippo Melanchthoni in primis Simonis Grynæi & Eobani Hefsi, quorum ille Basileæ vt supra dictum est, hic de quo nostra extat peculiaris narratio, Marpurgi mortem obiit, seuitia pestilentie continua annis pene tribus vastante regiones ad Rhenum & Harciniam. Quibus & Argentina cum alios præstantes pietate & doctrina viros tum Bolgangum Capitonem & Iacobum Bederotum amisit. Fuisse eo tempore cognouimus Philippi Melanchthonis anum iterum inuitatione Gallica tentatum, cumq; eo actum, vt intermissam aliquando profectus

profectionem tunc susciperet atq; perficeret, sed negotium istud neq; tractando accurate gestum est, & inter initia statim euanuit. In Britania autem Rex diuortijs coniugijsq; ludere, & pro arbitrio suo edere decreta, & quoscunq; ea improbantes crudeliter tollere e medio, siue Pontificis Romani, seu Saxonicae Ecclesiae doctrinam amplecterentur. Id enim modo obtineri omnium assensione studebat, quod ipse in animum induxisset, & sibi passus fuisset arridere. Quae & ipsa cum eorum respectu, qui atrocibus supplicijs interimebantur, tum priorum actionum memoria, animum Philippi vehementer, & dolore & interdum indignatione commouentia affligebant. Sunt autem deinceps ea negotia secuta, quae perpaucis animaduertentibus, cum à plerisque parua & futilia ducerentur, à multis nihil prorsus curarentur, causas vel dederunt vel cumularunt atrocium barbarum & calamitosorum euentuum. De quibus si Philippi Melanchthonis sermones periculum prauidentis, & ea consilia quae capiebantur quorsum euasura essent metuentis, iam recenserem, vereor ne non deessent, qui fingi ista suspicarentur, id quod impune facere liceret, & esset in procliu rebus gestis & confectis. Ne igitur in his moram faciamus, perstringentur ea & breuiter indica-

indicabuntur, quibus ipse partim non repugnans implicatus est, partim volens interfuit, partim etiam cum magna utilitate & fructu praefuit. Hoc autem vere commemorare possum, Nihil postea accidisse, quod ille non timuerit & praedixerit, cum quaedam suscipi & tali ratione administrari minime probaret. Fucrat Rei Nauburgensis in Düringia & cura Ecclesiasticae eo loci gubernationis commissa Illustrissimae familiae Palatinorum Principi Ernesto Philippi F. Is mortuus est hoc anno, in quem narratio nostra iam excurrit, Iesu Christi M. D. XLII. Et suffragijs collegij illius surrogatus ipsi, Iulius gente Pflugius, quæ est Misnicæ nobilitatis primaria. Hoc esse factum non consulto neque assentiente se, Iohannes Fridericus Princeps Elector gravissime queri, neque actionem eam ratam esse pati. Causas etiam exponere quasdam, cur antistitem Nauburgi praesidere Iulium, sibi tolerabile non videretur. Atque mirabantur nonnulli, Iulium ingenio eccellente doctrinaque literarum instructum & percultum opt. disciplinarum artiumque studiis, ijs etiam ab adolescentia rebus gerendis exercitatum, ut non vulgarem prudentiam adeptus esse crederetur: Hunc igitur talem virum & tam dubijs rebus difficilibusque & turbulentis negotijs cupisse

cupijſſe implicari, ne temporibus quidem
conſideratis, quibus parendum eſſe ſapientes
præcipere & neceſſitatis vim tribuere
non ignoraret, erant quibus mirum videba-
tur, quiq; non poſſent quid rei eſſet, decer-
nere. Sed ipſe & ſcripto quodam edito con-
ſilij ſui rationes reddi ſtuduĩt, & alij, vt fit,
tunc alia cum ſuſpicari, tum affirmare, pro
eo atq; factum iſtud probabant aut improba-
bant, Et de Iulio bene aut male exiſtima-
bant. Atq; tunc Iulius ſolij Nauburgenſis
poſſeſſionem adipiſci non potuit, cum ius
ſuum nihilominus proprietatemq; eſſe doce-
re conaretur & dignitatem nominis retine-
ret. Poſtea tamen & illo, rerum ſtatu in
his regionibus alio, poſt infelicis belli exi-
tum, eſt potitus. Poſtquam autem Princeps
Electör decreuit ſe non eſſe paſſurum illo
loco præſidere Iulium, & rei Nauburgenſi
iuſſit alterum præfici, voluit Philippum Me-
lanchthonem adeſſe eo tempore, quo in ſe-
dem Nauburgenſem ab Electöre Principe
designatus ſolenni collocatione imponere-
tur. Intercedebat Philippo cum Iulio ſingu-
laris uſus, & literæ utriuſque ſcriptaq; edita
Philippi, quanti uterq; alterum faceret, te-
ſtabantur, & conſtabat ſumma benignitate
à Iulio Philippum compræhendi. Neq; con-
tra dignitatem & amplitudinem Iulij quic-
quam

quam à Philippo est factum, Qui ideo sine recusatione suscepit iter illud, ut Ecclesiasticæ ac Scholasticæ administrationis diligentius constituendæ vel autor vel adiutor esset. Neque enim de cæteris quæ ad gubernationem terrarum aut bellorum motus, aut ordinandi statum Reipublicæ spectarent, ad hunc magnopere iam solebat referri. Itaque eo erat non quidem sollicitudo de euentis illius leuior, sed dolor, si quid forte accidisset grauius, minus acerbis, Quod se culpa omni carere, & istiusmodi neque consiliorum neque actionum socium esse sciret. Etsi interdum mandabantur ei operæ quædam scriptorum, ut eo bello quod hoc anno inter apparatus armorum, quæ contra Turcicam in Pannonia vim expedirentur, aduersus Henrichum Brunosuiensem Ducem susceptum gestumque est. Quam sic dedit, ut & vera imprimis & ad spem tranquillitatis ac quietis accommodata perscriberentur. Sed horum narratio à proposito nostro aliena est. Ut autem explorata turpitudine & manifestum dedecus neque adiumentis ullis quasi fulciendum, neque ope consilioque tuendum est, sic quæ prudentes esse interdum eiusmodi, ut omnium repræhensionem non possint effugere, & aliqua ex parte labascere vident, ea non dubitant studio industriaque sua sustentare,

tare, ne grauiiores ruinae atque labes fiant. Non illi quidem committentes quod malum sit & inhonestum spe euentus laudabilis ac boni, sed hac ipsa moderatione & effugientes vitium & in praesentia rebus afflictis consulentes. Nam qui rebus dubijs & perturbatis nimis fortes sunt, ij interdum laborantibus ea remedia adhibent, in quibus medicina plus nocet quam prodest, curantes, contra pro uerbum, malum malo. Hac negotia exceperunt alia quibus Philippus Melancthon & excercitus & defatigatus fuit. Nam quae sollicitudo & anxietas de Repub. animi ipsius tunc excruciarit Imperatore Carolo ad bellum in Germaniae regione Cluensi excitatum aduentante, de eo nunc nihil dicam, & ad communes curas in talibus propter amorem erga patriam sane mollis & teneri, & in consideratione diligente futurorumque prouidentia fluctuantis animi ipsius referendo apponam. Proprie autem oblata ei & ab ipso suscepta ut antea, deinceps persequar. Gubernabat ea tempestate rem Colonensem & commissam habebat Ecclesiae illius custodiam Archiepiscopus Hermannus Septemuir creandis Imperatoribus Romanis, annis grauis, amans veritatis, & cupidus rem Ecclesiasticam in meliorem formam redigendi, quam non modo ipse in-

telli

telligeret ita esse deprauatam atq; corrup-
tam, vt sine emendatione diutius stare non
posset, sed videret eos quoq; , qui neq; Dei
metu neq; hominum respectu magnopere tan-
gerentur, non audere tamen negare, pluri-
mis & maximis vicijis laborare cum deformati-
tate foeda & minime occulta. Atq; erat ille
hoc iam pridem facere conatus, & aliquid in
eo genere inchoarat, sed præclarum & salu-
tare opus absolutum non fuit. Habebat ini-
tiũ & suasorem & adiutorem præcipuum ex
collegio sacerdotum vnum Gropperum no-
mine, à quo postea non modo perfide deser-
tus, sed hostiliter etiam oppugnatus est. Hic
optimus & Religiosissimus Princeps ab Il-
lustrissimo Principe Iohanne Fridericho Sa-
xonum Duce impetrauerat, vt Philippum
Melanchthonem ad se proficisci pateretur.
Nam præclariss. & maxime utili illius opera
se vsurum in ijs quæ parabat, arbitrabatur.
Quæ eum opinio vt non sefellit, sic conce-
pta spes aliquantulum frustrata est. Quod
non accidit vel negligentia ipsius vel Philip-
pi Melanchthonis culpa, sed importunitate
& odio quorundam oppugnantum noui ope-
ris veluti structuram. A quibus diuina &
humana commota fuerunt, & effectum vt
non modo Pontifex Romanus sua sponte
procliuis ad irruendum in Coloniensem san-
ctissimum

tissimum Episcopum, incitatus vibraret quæ
 si fulmen execrationis vſitata, ſed Impera-
 tor quoq; Carolus vt diu multumq; vrgendo
 impuſus, contra Principem, in quem more
 maiorum & Iure publico, ſine ſolennis iudi-
 cij legitima cognitione vindicari nullo pacto
 liceret, iracundiæ & ſeuitiæ ſententiã tan-
 dem pronunciaret. Verum hæc aliquanto
 poſt acta, neq; mea narratione exponenda
 ſunt. Sed Philippus Melanchthon anno
 Chriſti M. D. XLIII. deducẽte pietate &
 virtute atq; eruditione doctrinæ præſtante
 viro Petro Medmano mandato Archiepiſco-
 pi Menſe Aprilis iter ingreſſus, ad Principem
 venit Bonnam, vbi ille tum commorans iſtã
 rem agebat, & redijt ad ſuos menſe Augu-
 ſto maximæq; lætitiæ aduentus ipſius fuit
 vniuerſis, ſed ſcholasticis potiſſimum, qui
 obuĩam illi proceſſere ſecuti præceptores ple-
 roſq; & Magiſtros ſuos. Quid autem &
 conſuluerit & ægerit apud Principem Phi-
 lippus Melanchthon de eo & ipſius & alio-
 rum ſcripta extant, quæ eius teſtantur dili-
 gentiam & ſolertiam & fidem, in cunctis
 quibus tractandis adhibitus fuit. Vt minus
 clementiusq; tunc repugnatum fuiſſe, iam
 nonnullos optare, exiſtimari poſſe videatur.
 Ab Archiepiſcopo accerſitus fuerat Argen-
 torato Bucerus, cuius nomen erat inuiſum

inprimis, cum neq̃ in illius vita vllæ turpitudinis maculæ hæerent, neq̃ in doctrina errorum vitia depræhenderentur, & ipse neq̃ pericula neq̃ molestiam laboremq̃ ferre, qui pro tranquillitate Deo æterno grata, & hominum societati profutura susciperetur, recusaret. Annus proximus fecundus fuit causis malorum & magnum mœrorem attulit Philippo Melanchthoni nunciata mors patriæ ipsius Illustriss. & fortiss. Principis Ludouici Palatini. Quo viuente, nemo admodum timuit, ne erumperent in publicam cladem & perniciem bellorum, multorum animis odia simultatesq̃ inclusæ, quæ veluti antecedentia tempestates sæuas & horribiles murmura iamdudum exaudiebantur. Non diu admodum ante huius Principis mortem mihi scribens Philippus Melanchthon se per quietem visum esse significabat videre, ab illo se accersi, idq̃ in eam partem interpretabatur, quod tum & curis conficeretur, neq̃ firma valetudine vteretur, se ab illo Principe mortuo ex hac vita euocari. Verum præsagium hoc obitus Ludouici fuit, qui est altero anno subsecutus. Philippus autem viuit non sibi sed alijs benignitate Dei diutius. Alterum grauissimum vulnus animo Philippi inflixit acerbissimus casus Hieronymi Pamgertneri Norimbergensis, viri sapientia, virtute,

virtute, doctrina literarum, eruditione, humanitate excellentis, & maximi religionis puræ & pietatis amatoris. Quem & adolescens ipse adolescentem cognouerat, cumq; eo familiarissime in communibus studijs Vuittenbergæ vixerat, & progressum ad amplissimos honores in patria ipsius colere perseverarat, cum quidem ab ipso cum reuerentia Præceptorî debita diligeretur. Optimum hunc & integerrimum atq; summum virum in itinere reuertentem domum à conuentu Spirensi, quo missus à sua ciuitate fuerat, quidam tunc, qui se hostes reliquijs fœderis Sueuici profitebantur, compræhensum, inq; diuersis latebris, vt necesse fuit, abditum & diu vexatum tandem pecuniâ accepta dimiserunt. Atq; existimabatur alteri istas fuisse insidias positas, sed rebus instructis ac paratis, cum Pamgertnerus in illas incidisset, præda oblata arripienda fuit. Declarauit Philippus Melanchthon dolorem quem ex amici fortuna aduersa capiebat, non modo sermonibus & literis suis, sed studio quoq; & opera, cum perficiendo vt familia Pamgertneri consolationibus eorum subleuaretur, quorum autoritate eam moueri, & vnde bonam spem ostendi sciebat, tum quærendo occasiones etiam quasdam liberandi captiuum & ijs à quibus detinebatur placandis, Principi-

pum quorundam fauore clementiaq; & cura
adhibita, & notorum ex equeſtri ordine ho-
minum adiuncto ſtudio. Sed liberatio illa mi-
rabiler impedita & res dilata fuit, Nonnul-
laq; capto laudabilia atq; glorioſa ipſi nocu-
erunt, de quibus narratio verbosa neq; huic
argumento congruit, neq; à me eſt perſequen-
da. Cum diuturno tamen dolore & inge-
te triſticia ſuorum grauifs. afflictuſ non ſine
vitæ propter morbos periculo, patriæ reſti-
tutus eſt & redijt domum Pamgertnerus, læ-
ticia omnibus bonis exultantibus, & ad con-
ſpectum reuertentis effuſa ciuitate vniuerſa.
Furor quidem iſte Martius & vis graſſato-
rum, quin crimen ſubeat ſcleris & impieta-
tis, vereor vt defendi nequeat, ſed & uſure-
patur tamen ille more, & in hoc mundo ſu-
um ſcilicet malum cuiq; æquo animo eſt fe-
rendum. Philippus autem alijs etiam tunc
aduerſis, & malis familiaribus atrociter ve-
xatus eſt. Quorum commemorationi etſi
multa obſtabant animo meo, prorsus tamen
de his reticendum eſſe non duxi. Filiam ma-
ximam natu Annam amantiſſimam ſui in-
credibili caritate diligebat. Erant autem
vehementes admodum incitationes huius in
illo viro affectionis, adeo vt aliquibus hæ
immoderata & cum indulgentia nimia con-
iuncta viderentur. Sed in filia omnino na-
tura

tura optima & præclarum ingenium, pietatisq; & omnis honestatis decus, non immerito illam patri magnopere commendabant, matris præsertim partu difficili in lucem editam, & in quam amoris paterni vis se primum quasi effuderat, accedente etiam fortasse aliqua occultiore naturæ conciliatione. Erat puer gentis Marchicæ, qui tum certis de causis clanculum Vittenbergæ in studiis literarum educabatur, inq; ædibus Philippi Melanchthonis degebat, patria Brandeburgensis, Georgius nomine. Hic discendi ardore flagrabat, & in eo impetus quidam diuinus manifesto apparebat, efferens se ad sapientiæ virtutisq; præstantiam, qualis in omnibus qui vlla in parte & quocunq; genere virtutis singularem laudem & egregiam famam consecuti sunt, fuisse animaduertitur & esse consuevit. Hinc enim existit immensa cupiditas impellens atq; instigans animum ad ea suscipienda & agenda, quibus, quæ aliquis appetiuit, ea se esse adepturum sperat. Inter quos conatus neque labor fugitur, neque cura alia admittitur, neq; cogitationi actioniue alteri locus relinquitur. Inq; hoc modo opera datur, vt in quod incumbendum sibi aliquis duxit, in eo laude excellentes ipse non modo assequatur verum etiam antecedit. Itaq; dies noctesq; summa con-

tentione enititur, vt ad partam studio diligentiæ suæ facultatem, maiorem aliquam copiam addere & acquisita bona augere possit. Vidi ego hunc Georgium, qui postea Sabini nomine celebris fuit, valde tenera adhuc ætate, lacrimas profundentem ad lectionem boni & elegantis carminis. Audiui tristes querelas eius, deplorantis suam infelicitatem in scribendo, cum non solum per ætatem nihil quod perfectum esset ipse elaborare, sed ne intelligere quidem rationem perficiendi elaborandiq; adhuc valeret. Huic sane iuueni puellam filiam suam desponderat Philippus, duxitq; eam ille anno Chr. M. D. XXXVI. Cumq; non modo scientia literarum bonarumq; artium excellere, sed dignitate quoq; præstare cuperet, & difficultatis & molestiæ in isto cursu nonnihil ei fuit exhibitum. Atq; de cæteris prætermitti recte potest narratio. Hoc autem anno, in quo expositio nostra occupatur, ostensa spe melioris & splendidioris conditionis in Prussia, haud scio quo pacto inter socerum ac generum non quidem odium aut simulas, sed alienatio tamen quædam & prope dissidium ortum fuit. Narrationem autem talium ideo nequaquam omitendam duco, non modo ne quid prætereatur quod expositionis fides requirere videatur, sed vt huiusmodi quasi vulneribus inspectis,

ctis, quam misera interdum vita sit magnorum virorum intelligatur, cum ad onera Reipublicæ pondus etiam domestici doloris adijcitur. Fons autem erat omnium, quod Sabinus focero nimia cupiditate illustris fortunæ videbatur ardere. Ille autem non tantum adiuuari & quasi promoueri se ab ipso, quantum optabat & posse arbitrabatur, ægre ferebat. Scholasticæ vitæ genus amabat Philippus, & illa humilitate delectabatur. At Sabinus eminere & conspici volebat amplitudine etiam honorum, & opulentia. Itaque magna ille spectare, neque nominis celebritate, quam rectis studiis sibi comparauerat esse contentus, Hoc agere ut vulgi oculi in se conuerterentur, & ipse in Repub. quoque luce versaretur. Ex eo fiebat ut voluntates horum aliquantulum disiungerentur. Quod ubi accidit, quamuis non inimicitia etiam suscipiantur, amicitiam tamen debilitari varijs suspicionum offensionumque causis necesse est. Etsi autem Philippo Melanchthoni nemo inueniebatur ad eleuanda ferendaque ea, quibus interdum grauissime lædebatur, fortior atque patientior, tantum aberat ut ab ipso vilius veluti secessionis occasio daretur, tamen in hac quasi velitatione multa vehementer pupugerunt animum ipsius, præsertim cum nonnihil tristitiæ vel etiam acerbis

tatis ad filiam pertineret, quam, ut diximus, maximo amore complectebatur, Quamque tam procul deinceps abfuturam, & cum marito iritato discessuram esse, valde dolenter ferebat. Aliqui etiam huic aut illi assentando pene effecerant, ut distractio ad iurgia ac contumelias euaderet. Sed ista tamen veluti tempestas sic abiit, ut moderatione tolerantiaque & obsequio Philippi facile leniretur Sabinus, & coniunctio benevolentiae mutuae inter ipsos conseruaretur, & in coniugij usu nihil insuauae sequeretur, praesertim cum & rei atque dignitatis accessione augeretur Sabinus. Apud quem Philippi filia postea, nulla re dirumpente iucundae consuetudinis amorisque mutui vincula, annis quatuor in Prussia vixit. Decessit enim anno Ch. M.D.XLVII. apud montem Regium Prussiae IIII. Cal. Martij, qua nocte per quietem patri species mortuae filiae oblata est, eoque somnio significatum esse casum istum & ipse existimauit, & euentus facit, ut credibile sit, Eiusque mortem nunciatam magis molliter tulit pater amantiss. illius, quam plerique esse laturum crediderant, vel ratione quasi in girum exultantes animi motus reducete, vel diuturnitate temporis ad toleranda omnia factus robustior. Priuata haec incommoda solitudine Reipub. cumulabantur. Nam & bellum

bellum periculofum inter Imperator. Carolū, Regemq; Galliae Francifcum vtriuſq; ſumma contentione impendebat ac mouebatur, & actiones de Brunſuicenfibus negotijs inſtituebantur eiufmodi, vt his ſemina certaminum tumultuumq; nouorum iaci viderentur. Verum & res tandem, Carolo in Gallicum agrum progreſſo longius, compoſita eſt, & pax inter Reges facta, & contentio illa Principum intra verborum maledicta & criminationes tunc quidem conſtitit. Sed Philippus Melanchthon alijs quaſi in portu, id eſt apud ſuos, procellis iactatus ita fuit vt pene euerteretur, vel oppreſſus vel pulſus iniquitate & odio nonnullorum, qui contra ipſum Martini Luteri animum incitauerant atrocitate accuſationum, quarum ca- 20 put erat moderatio & lenitas, quibus ab illo aduerſarios ſubleuari dicebatur. Atq; alijs temporibus concedendo & molliendo quaedam, cauſae eum nocuiſſe praedicabatur, Tunc autem renouabantur, cum quadam non modo vehementia ſed plane ſeuitia, diſputationes de ſacraſſima in Eccleſia Chriſti actione coenae myſticae, quae eſt communicatio corporis & ſanguinis Domini noſtri Ieſu Chriſti. De ea quorundam qui Martino Lutero ita ſe dabant, vt doctrinam illius vniuerſam non modo cupide amplecterentur.

tur, sed eam etiam exaggerare non necessaria interdum amplificatione studerent, horum igitur nonnulla insulsa & propemodum profana tam dicta quam scripta, illi nonnullisq; alijs pijs & attente rem considerantibus non probabantur. Sed hæc quasi nubecula celeriter eo quidem tempore depulsa, turbæq; istæ facile sedatæ fuerunt, & temere incitæ tam iracundiam quibusdam reprimantibus, & Philippo Melanchthone solitam moderationem patientiamq; constantissime usurpante. Graviter etiam percussus tunc ille est nunciata morte Valerij Cordi, qui patrem habuerat Euricium, virum ingenio doctrinaque excellentem. Qui me cum Erphordiam studiorum causa venissem humanissime complexus notumq; habuit admodum familiariter, suorumq; Epigrammatum luculentis versibus studiose ornauit. Eumq; ego vicissim observans colui, & quibus potui officijs illa ætate conditioneq; mea adiuui. Neque erat minus in filio præclara natura, & tempora magis opportuna ad illam percolendam optimarum literarum artiumq; copia, & occasiones habuerat patre meliores. Hic iam omnibus ad spem expectationemq; de eo admirabilem erectis, cum spectatæ eruditionis atque scientiæ opera edidisset, in Italiam augendæ liberalis & utilis cognitionis

nis gratia profectus, Romæ febre laborans moritur. Morbus autem contractus putabatur, nimia defatigatione in locis calidioribus, quod ipse qui in artis medicinæ studium incubuisset, non prout modo ac campos, sed montes vallesq; ubiq; perreptare herbas, radices stirpesq; explorans non cessaret. Aegrotavit eodem tempore ibidem Cornelius Sittardus Colonienſis, qui tum quidem periculum euasit, sed postea Norimbergæ cum maxima laude & plurimorum salute artem Medicinæ facitans tabifico morbo consumtus interiit anno Christi M. D. L. Valerium autem ut notum carumq; luxit Philippus, sed magis deplorauit mortem ipsius propter erepta Reipublicæ commoda & interceptos fructus, qui potuisse ab illo, si contigisset vita diuturnior, percipi viderentur. Sequens annus Christi M. D. XLV. vidit crudelissima supplicia & seuitiam immanem in Gallia regno, non tantum singulos aliquos corripientem, sed in oppida populosq; totos grassantem, iugulando omnis ætatis, sexus, conditionis mortales & inflammando oppida atque vicos regionesque vastando, quod aliqui in studio veritatis & errorum manifestorum declinatione, tanquam hostes nominis Christiani & desertores catholicæ Ecclesiæ accusarentur & condemnarentur. Vidit
& con-

& conuentum indictum in Vangionibus, Qui fuit vltimus (nam euasit hic in annum proximum deductus Ratibonam) in quo verbis & colloquijs de controuersis doctrinae capitibus disceptari placuit. Nam siue insidiosae & callide, seu fatali quadam progressione, ita res actae, eaq; tum cogitata, deliberata susceptaq; fuerunt, vnde tandem varij multiplicesq; conatus belli Germanici eo euaserunt, quo iamdudum cupiditates plurimorum impulerant. Affuit ibi Cardinalis Farnesius. Principes Germaniae non affuerunt. Itaq; cum colloquijs de religionis rebus mentione, conuentus alter rursus indictus, qui ageretur ad Danubium Ratibonae. Interea ad recuperandum principatum suum exul Brunsvicensis tentare moliriq; quicquid poterat & collecto tandem exercitu in suo quondam territorio tunc victus captusq; fuit, ductante copias foederis aduersarij Philippo Landgrafio Hessorum. Hoc anno mortuus est optimus & integerrimus sapientiaq; & virtute inprimis pietate eximia praeditus Georgius Heltus patria Vorhemensis, quod est oppidum ditionis Pabergicae, meus praceptor sic de me meritus vt non minus gratiae ei quam parentibus debeatur. Qui neq; me aliter quam filij loco toto quinquennio, quo discipulus ipsius fui habuit,

habuit, & retinens illam caritatis affectionem dilexit omni tempore vitæ suæ. Vtebatur hoc Reuerendissimus & genere, sanctitate omniq; ad Deum & homines laude Illustrissimus Princeps Georgius Anhaltinus, quæ antiquissima & præclarissima Germanicæ nobilitatis familia Ascania est: Eiusq; autoritate atq; fide non facile quicquam aut prius aut potius ducebat. Fuerat autem cum Fratre Illustrissimo Principe Ioachimo in disciplinam ei adolescens traditus. Quo nomine & erga me illorum Principum clementissimum fauorem expertus sum, qui me etiam condiscipuli appellatione dignarent. Sed tantum tribuebat Helatus Philippo Melanchthoni à quo & ipse singularem in modum diligebatur & magnificabat, vt sæpe impetraret copiam aliquantisper Vuittenbergæ degendi. Vbi illum cerneret cum libellis & chartis ad loca doctrinæ publicæ itare, non minus assidue & relictis omnibus quam infimæ fortis alterum quencquam. Tantus durabat in sene etiam ardor discendi. Nonnunquam de grauibus & difficilibus rebus quærendi consilijq; petendi ille caussa à Principe eo mittebatur, In quo valde liberaliter potestate facta vti solebat. Atq; is tum Dessauix mortuus & Illustriss. Principibus & Philippo Melanchthoni ingens

gens desiderium sui reliquit. Luxeruntq; eum illi ut parentem, hic non secus atq; fratrem, & monumentorum operibus ac scriptis studuerunt celebrari. Cunctas ille facultates suas libris coëmendis impenderat, habuitq; Bibliothecam omnis generis librorum refertam. Cuius æstimatæ precium munificæ Príncipes persoluerunt secundum voluntatem & sententiam testamenti ipsius. Non possum silentio hoc loco præterire quod memorabile videtur. Cum Helius à primæ pueritiæ annis castissime celebs vixisset, considerans tamen in quam ætatem incidisset, & cuiusmodi vita moresq; essent sæculi huius, certæ pecuniæ summæ fructum annum honestæ & pauperi alicui virgini dotis nomine, quo facilius in matrimonium collocari posset, de suis bonis destinavit. Quod matrimonia conciliari ad conscientie puræ conservationem, & turpitudinis multorumq; malorum fugam plurimum prodesse iudicaret. Mei quoq; ego mœroris & luctus domesticici socium eo anno Philippum Melanch. habui, cum in patria amissem cariss. fratrem de tribus vna mecum adhuc reliquum Hieronymum. Quem Philippus quod cognovisset esse ingenio bono & acri, & morum gravitate, & probitate vitæ, multisq; præcipuis laudibus eminere, non mea tantum

tum caussa, sed ipsius etiam admiratione adductus, carum habuerat, & mortuum veræ beneuolentiæ lacrimis deplorabat; cum meos quidem gemitus consolatione amantissima literarum suarum sedare conaretur. Id quod & ante asperis temporibus nostris ille studiosiss. fecerat, quæ curæ ei fuere maiori, quam si propria essent atq; sua. Miserat ad eum non diu ante quam moreretur epistolam accurate scriptam, de filia, cui ille, quod minus considerate & ignorante se consilium de coniugio cœpisset, valde irascebatur. Quæ leuitas quantopere parentes honestos & sequentes laudem integritatis offendere sole-
ret, intelligebat quidem Philippus, sed malum istud sanari ignoscendo ducebat esse melius. Quæ & ipsa epistola, vna cum alijs ipsius, si videbitur & res tempusq; feret, aliquando edetur. Et ista, nostrarum enim rerum esset expositio, inculcanda non sunt, cum quidem varietatem habuerit tantam vita fratris mei, & ea in vtramq; partem illi vsu venerint, vt narrare indignum non esse videatur. Qui & diuinitus ex periculis maximis ereptus, neq; secundis rebus insolens, neq; aduersis mollis fuit. Veritatis amans, integritatis & fidei spectata. De quo prostrato etiam melior existimatio bonorum fuit, quam de ijs quorum odio & inuidia con-
cide-



ciderat. Verum de his satis. Rediens igitur ad propositum oratio ea quæ restant persequatur, Et isti quasi Emblematis ignoscatur à legentibus, mentioniq; tali impetret veniam fraterni amoris affectio, & desiderium amissi huius, & consanguineæ necessitudinis recordatio. Hoc anno commissæ administrationis rei Merspurgenſis Illustris. Principi Augusto Henrichi F. Duci Saxonum, adiungi ad gubernationem ipsius placuit Illustrissimum Principem Georgium Anhaltinum, cui respectus & cura Ecclesiæ regendæ imponeretur. eoq; ille munere est functus diligentia & fide maxima, ad id usq; tempus, quo administrationis istius onus Princ. Augustus deposuit. Cum enim inde functionem muneris sui pendere vniuersam non ignoraret, hanc prouinciã non magis habente Principe Augusto, suam quoq; curationem sibi adimi & simul extinguï intelligebat. Paulo post, quorumcunq; sane opera atq; studio, nam mihi ista scrutari non est visum, effectum fuit vt collegium Merspurgenſe omiſſa antistitis more maiorum ex suo corpore electione, postulandum ab externo statuerent vt antistes Ecclesiæ illius esse vellet, cum qua iam gubernandi regionem illam principatus rursus cohærebat. Is fuit ex eorum genere qui antistitum aliorum suffraganei

ganei vocantur, vicarij quidam certis operationibus sacrorum exequendis. Quos & ipsos, quod antistitum nomine censerì oportere existimaretur, certarum vrbium titulis ornari, earumq; ritu solenni antistites renunciari, tum est coeptum, cum Christianæ religionis veritas superstitionum varia specie commutata fuit, siue errore seu dolo. Atq; ille qui tum Merspurgum accitus ad hoc fastigium dignitatis & opum peruenit, Sidonius appellabatur, natus in terra Feringensi humili loco, & educatus in studijs Tubingę, ibiq; & Magistri liberalium artium honorem consecutus, cum vixisset aliquantisper in contubernio fundato ad alendos pauperes scholasticos, quibus certo numero & de domicilio & victu & doctrina prospectum est, Inde ad ludos literarum aperiendos discessit, venitq; Moguntiacum ad Rhenum. Ex magistro ludi deinde, quod doctior quam alij & facundus esset inprimis, factus sacerdos est concionumq; in templis habendarum munus ei datum. Et his gradibus ascendens ex illo quo diximus. Vicariorum genere, ad principatum Merspurgensem processit. Postulationi isti Illustriss. Princeps Georgius, cuius in eo collegio spacij temporis longi prærogatiua esset, in quod ipse ante cæteros omnes cooptatus fuerat, assentiri magnis &

Q

grauibus

grauibus de causis noluit. Non quod ipse sibi aliquid commodi quæreret, sed ne temere committeretur summa rerum ignoto, & de cuius actionibus atq; scriptis editis suspicio esset, doctrinam Ecclesiasticam perpurgatam & probatam sibi, illum non amplecti. Nam quod ad terræ illius dominatum attineret, testabatur Imperatoris Maiestati se subiectissima voluntate parere, neq; recusare, ne, quem huic præesse Imperator voluisset, potestas ista contingeret. In qua sententia optimus Princeps constantissime perseuerauit. Sed neq; de his rebus quæ opinio quiq; sermones hominum fuerint, neq; omnino temporum illorum quasi cursum enarrare, & eo, vnde digressa est expositio, reuocare illam, libet. Princeps Georgius & sapientia & animi magnitudine excellebat, sed religiosæ pietatis & veritatis cœlestis amor atq; studium erat in eo eximium & admirabile. Cum igitur ab ipso peteretur hoc adiuumentum, & vt in Ecclesia Merspurgenſi antistitis loco præsideret, non prius potuit obtineri assensio, quam consultis ijs, qui in Saxoniacis regionibus præstare cognitione & scientia veritatis cœlestis, & viri optimi integerrimiq; videbantur. In quibus primas facile tenebant Martinus Luterus & Philippus Melancthon. Quorum non modo cohortatio

ne mo

ne motus, sed sententia atq; iudicio impulsus, ferri sibi illam curationem & honorem mandari passus est, vt rem Ecclesiasticam Merspurgi gerendam susceperet, minime tunc quidem constitutam atq; ordinatam, ac potius admodum confusam & distortam. Quam illius vigilans pietas & religiosa industria, in eam formam redegit & tali ratione composuit, quæ firmissimo fundamento nitens, non modo dum ipse præfuit stetit, sed neq; postea labefactata est, vel non audentibus ullis conuellere pulcerrimi quasi ædificij structuram, vel non reperientibus quid melius rectiusue elaboraretur. Norat Princeps Georgius non solum sacrarum literarum exquisitam doctrinam, sed consuetudinem etiam & ritus Ecclesiæ, tam definitos & expressos in illis, quam secundum has consensione fidei introductos. Nam à prima adolescentiâ in his studijs versatus fuerat. Eratq; ei exploratum quatenus à sincera & pura sacrarum literarum intelligentiâ, doctrina Ecclesiastica alicubi recessisset, & quibus in partibus antiquitatis religiosa observatio deprauata, mosq; maiorum corruptus esset. At ille in omnibus bonam esse conscientiam & se culpa vacare cupiebat, inq; eo maxime sollicita erat circumspectio ipsius & diligens consideratio. Itaq; non, nisi suffragijs in vi-

cinia Ecclesijs præpositorum designatio illa approbaretur, & solenni conuentu iudicium hoc fieret, & sententia ipsorum cum religiosis ad æternum Deum precibus publice cognosceretur, vel nominis honorem admittere, vel vsurpare dignitatem, vel omnino quicquam rei gerendæ capessere voluit. Fuerunt ea tum acta, quæ illa quidem, tunc ab ijs, qui Romanæ horum temporum Ecclesiæ præscriptionem vt mendosam neq; amplius ad veritatis normam quadrantem, sequi se, scientes & intelligentes vitia, sine impietatis scelere posse non arbitrantur, mutata in vera & recta (vt ipsi affirmant atq; demonstrant) non esse legitima perhibentur ab omnia morâdicus tenentibus, quibus Romani Pontificis nomen & autoritas prætenditur. Sed omnes profecto qui adessent aut spectarent non aut profani aut dementes, cum reipsa actiones illas religiosissimas tum specie esse præclarissimas, si quod sentirent vellent dicere, fieri cogerentur. Atq; putauî inferendum hoc loco scriptum à Philippo Melanchthone de his compositum omnium in Ecclesijs vicinis præsidentium, qui accersiti fuerant, nomine, cui & illi, vt fieri solet atq; debet subscribere. Gratias agimus Deo æterno patri Domini nostri Iesu Christi, quod immensa bonitate & instituit inde vsq; à condi-
tione

tione & restitutione generis humani, & seruat omnibus sæculis vsq; ad resurrectionem mortuorum, ministerium Euangelij, & excitat subinde idoneos Doctores, ac mandata dedit Ecclesiæ suæ, vt vocet idoneos ministros, & promittit se per eorum vocem daturum Remissionem peccatorum, Spiritum sanctum, vitam & iusticiam æternam, & oramus eum, vt lucem Euangelij sui non sinat extinguī, sed nunc quoq; excitet puræ & salutaris doctrinæ Euangelij propugnatores & fideles custodes, & colligat sibi etiam nunc in his regionibus Ecclesiam, à qua in omni æternitate celebretur. Cum autem ad hoc ministerium Euangelij Reuerendiss. & Illustriss. Princeps Dominus Georgius Princeps in Anhalt, Comes Ascaniæ & Dominus in Bernburg, Præpositus Ecclesiæ Magdeburgensis, rite & pie vocatus fuisset ad functionem muneris Ecclesiastici adiuuandam in Episcopatu Merseburgensi, accersiti sunt vetere primarum Ecclesiarum more, viri docti & graues, qui vicinas Ecclesias gubernant, quorum nomina infra ascripta sunt, vt in ipsa Ecclesia Merseburgensi, ad hanc vocationem adderetur publicum testimonium ordinationis. Nos igitur conuocati, quia certo sciebamus hunc Illustrissimum Principem Georgium recte intelligere

& constanter amplecti puram Euangelij doctrinam, quam Ecclesiæ harum regionum vna voce & vno spiritu cum catholica Ecclesia Dei profitentur, & eximiam eius esse virtutem & sanctitatem, testimonium nostrum de eo, ritu apostolico impositione manuum, declarauimus, & ei ministerium docendi Euangelij & administrandi sacramenta commendauimus. Cumq; Paulus Tito præceperit, vt presbyteros ad docendas & gubernandas Ecclesias passim constitueret, sciat hic ordinatus voce Apostolica sibi præcipi in hac functione, vt sacerdotes ad docendas & regendas Ecclesias ordinet, & eorum doctrinam & mores inspiciat, & meminerit sibi quoq; præcipi à Filio Dei: Et tu conuersus confirma fratres tuos. Et cum filius Dei sedeat ad dextram æterni Patris, vt sit efficax per hoc ministerium, precamur vt in tota gubernatione regat & adiuuet hunc ordinatum, sicut promisit, inquiens: Si quis diligit me sermones meos seruabit, & pater meus diliget eum, & veniemus ad eum & mansionem apud eum faciemus. Et vt hac se consolatione sustentet ordinatus ipse hortamur. Etsi enim multa & magna sunt in gubernatione pericula, nec vlla est sapientia humana par tanto oneri, Tamen sciat Deum vere adesse, & in Ecclesia habitare

tare ubi vox Euangelij sonat, eamq; defendi & seruaria Deo. Hac fiducia suscipiendi & perferendi sunt tanti ministerij labores. Data die tertia Augusti Anno M D. XLV. in oppido Merspurg. His sua quiq; nomina qui tum acciti praesentes erant, subscripsere, & est res peracta religiosa cum pietate & specie praelara. Qua indicata, ea pergamus narrando persequi quibus postea quoq; Philippi Melanchthonis implicatas considerationes, curas, operas, studium, industriam fuisse comperimus. Conuenerat ut Ratibonæ aliqui de ijs negotijs atque rebus colloquerentur, quæ ad religionis sanctitatem instaurandam pertinerent: Huic actioni interesse, qui huiusmodi alias prius moderatus fuisset, Philippum Melanchthonem initio placuerat, literaq; ad ipsum ea de re missæ, paratum esse instructumq; iusserant, ut iter statim ubi nuncium illius accepisset, ingrederetur. Scripserant amici quoq; alij aliud admonendo subiicientes. In quibus leuiaplæraq; erant, de vestibibus, de comœatu, & similia. Quæ cum illi curæ cordiq; non admodum essent, aliquantulum indignabatur, in tanto discrimine, sollicitari animos respectu ad tam parua, cum praesertim maiora minus attente considerari viderentur. Itaque constat tunc responsiones ipsius ad quosdam

fuisse stomachosiores. Sed consilium istud de Philippo Melanchthone legando præter opinionem omnium subito mutatum fuit. Ipso quidem haud ægre ferente, multi tamen neq̃ tunc probare, cum maximum periculum impenderet, remoueri Philippum Melanchthonem, & postea euentui infeliciori causæ aliquid hoc dedisse arbitrari. Itaq̃ qui delecti fuerant cum Lipsiam transirent, officij gratia Philippus Melanchthon eo usq̃ proficiscentes est secutus. Iam de Synodo indicta, cuius locus Tridentum designatus esset, varij rumores spargebantur, & nonnihil consultabatur. Friderichus etiam Palatinus, qui Ludouico fratri successerat, Quod indies magis intelligeret, quo res Ecclesiasticæ prolapsæ essent, neque post longam expectationem opem tam misere afflictis non modo errore sed scelere & improbitate dominationis iniustæ, ferri cerneret, cessantibus ijs, quorum officium erat morbis illis mederi, ipse subuenire rebus laborantibus in suæ ditioni subiectis terris statuit. De quo cum ad Philippum Melanchthonem imprimis referretur, cumq̃ non modo absentis consilium peteretur, sed literæ etiam mitterentur, quibus ille accersebatur, scriptæ clementissima & benignitate & humanitate, fiebat vt ad cogitationes graues de Synodo,
non

non leues istæ accederent. Atq; Synodum illam magis specie quam reuera indictam & inceptam, aliudq; simulatum aliud cogitatum fuisse, cum alijs signis depræhensum, tum administratione negotij declaratum est. Reginaldus quidem Polus stirpis Regiæ Britanicus exul, in eorum numerum relatus, quos Cardinales vocant, magna cura consilioq; graui & ex animo, vt videtur, perscriptit, quid fieri seruariq; in talibus cœtibus oporteret, isq; liber nuper adeo est editus, ea quæ iamdudum non modo nutant sed plane ruunt substernens atque statuens perinde à certa & firma. Consultabatur tamen, vt dixi, ab ijs, qui insimulabantur seditionis in Ecclesia, tanquam Pontificia Maiestate læsa & turbata Repub. quid à se, vt tali in re agerent, officium videretur postulare. Verum tunc quidem non admodum laboriosæ deliberationes istæ fuere, & alijs ad Danubium missis Philippus Melanchthon in sua quasi statione remanere cogeatur, neq; concedi illi peregrinatio nedum migratio. Quibus cunq; tamen modis potuit institutum laudatissimum Illustriss. Principis patriæ suæ adiuuit, cum quædam conscribendo de forma doctrinæ, tum mittendo, qui illi, excercendo administrandoq; consentaneas actiones, præessent.

HOC loco interposita de sequen-
tibus præfatione quadam, diui-
dere & quasi interpolare continua-
tæ narrationis seriem visum est. Ut,
siquis forte hac cognoscenda putasset,
& attentius legendo superiora se sen-
sisset defatigari, tanquam in longio-
re itinere sisteret hic gradum, &
paulisper acquiesceret. Cum præser-
tim ea quæ restarent, magis quam
priora, veluti in salebris alicubi hæ-
rendi necessitatem expositioni impo-
situra essent. Ut mihi ipsi quoque oc-
casio querenda fuerit, qua, sicut co-
mici seruuli quasi respirarem & re-
ciperem anhelitum, quo expeditius re-
liqua enarrarentur. Peruenit enim
iam expositionis contextus ad demon-
strationem rerum magnarum & mi-
rabilium, itemque grauium & ha-
bentium multiplicem mæsticiam: quæ
statim

statim, postquam Martinus Luterus ex hac vita excessit, mota susceptaque & gesta sunt, turbasque eas dederunt & facinora ediderunt, quibus diuina & humana, cum perniciē maxima, labefactata & conquassata esse constat. Atque audiui ego ante mortem Martini Luteri annis aliquot, cum sermones haberentur de dissidijs ob doctrinam & ritus ecclesiasticos factis, viros prudentes & autoritate singulari pręditos sic loquentes, ut ostenderent se, viuente Martino Lutero, nullam spem consensionis atque pacis concipere posse. Et comperi, nunciata morte ipsius, quendam Britanicę gentis dignitate & honoribus pręstantem dixisse: Arbitrari sese illo tempore maxime opportuno ad reconcinnandum diuulsa & dissipata componendum, propiti
tij Dei

tij Dei benignitate, è medio abijsse eum, qui impedimento reconciliandæ inter alienatos gratiæ futurus fuisset. Quanta autem sit humanarum mentium cæcitas cum contemplandis perspicendisq; præsentibus, tum impendentibus & futuris prævidendis atque considerandis, hoc etiam casu cognitum fuit. Quem enim non pauci primarij viri obstare tranquillitati ac quieti solum opinati fuerant, eo ipso remoto, maxima demum tempestates, & eluuiæ tanquam aggeribus ruptis fœdæ extiterunt. Quamquam autem ista tempestas Germaniæ potissimum oblata est, & hanc inprimis illa calamitas peruasit, non diu tamen post incitata ingentium malorum vi alia quoque loca correpta fuisse scimus, & an non ad aliquos miseriæ etiam deinde maiores perti-

pertinere possint, haud scio an exploratum sit nemini. Ut non debeat pro nihilo duci eorum notatio atque coniectura, qui suspicati fuere: Quod illo die, quo Martinus Luterus mortem obiit, in fastis ascriberetur concordiae nomen, eo omen tendere, ut concordiam interiisse significari videretur. De quo sane statuat quisque quod volet. Quæ quidem ijs temporibus, in quæ incidit Martini Luteri ex hac vita migratio, tractata & mox designata sint, qui animo cogitationeq; percurreret ac comprehenderet, is deprehenderet atque comperiet, maiores difficultates & inhumaniores inimicitias, & iras vehementiores, & acerbiora odia deinde cum prodixisse, tum pergendo in sacris profanisq; rebus strages edidisse eiusmodi, quarum & nunc detrimenta deplorantur

rentur, & quas secutura etiam infelicitates animis perturbatissimis metuantur. Cum sint autem liberae de dubijs existimationes, ut alij aliud arbitrari concessum est, sic liceat, nisi fallor, putare: Superstite adhuc Martino Lutero neque suscepta fuisse neque gesta ea, quorum cum sensu doloris nequaquam levis meminimus, & indicia magis quam enarrationes à nobis deinceps referentur. Hecque ipsa, habeo persuasum, recordanti, Inclyte Princeps Philippe, vel de mea descriptionis subiectione, vel alia quacumq; occasione, illustriss. virtuti sapientiaq; tua excitatura esse sensus cogitationesque & animi motus varios atque diuersos: Cui negotia actionesq; omnes nota, & cuius in ijsdem opera occupata, & excercitatus labor, & pericula versata sunt. Etsi
autem

autem interea & iracundia indignatio, & doloris quoque morsus, repetendo & veluti refricando nonnulla, haud abesse poterit: ut tamen praesentibus duris atque asperis rebus, secundum Euripidem,

Iucunda tristium ac malorum obliuio,

Sic profecto eodem autore,

Suauis est laborum praeceptorum memoria.

Atque abiere sic pleraque, ut cum magna quidem iactura tum naufragia misera facta, sed recollecta tamen res atque recepta, & rursum Reipub. quasi nauigium instauratum sit. Cum quidem neque vexatio interim prorsus intermissa cessauerit, neque procella ventorum vehementiorum penitus siluerint. Nunc vero id scilicet agendum est & illustrissima tua excelsitati & ceteris non modo in causa coniunctis, sed quibus patrie

patriæ omnino & Reipub. vniuersæ
salus & incolumitas cura est: Ut re-
cuperata tanquam ex desperato pene
morbo sanitati et retentæ vitæ tuende
detur opera, et caueatur, ne denuo in-
cidatur in eundem. Sunt autem
agrotationes magis & periculosa &
molesta, in quas leuatus semel ali-
quis iterum delabitur. Me sane de
ea ratione disputare, qua quasi bona
valetudo Reipublica sustentetur, non
debet. Facere tamen quin moneam
nequeo, quamuis audacter vel teme-
re etiam factum forte videatur:
Post cultum quidem religiosæ pietatis
& venerationem Dei æterni &
doctrinæ veritatisq; cælestis studium,
nihil magis neque certius non solum
tentationem prohibiturum, sed me-
tum quoque malorum adempturum
esse omnium, quam consentientium
animo-

animorum illustris ordinis vestri sinceræque amicitiae necessitudinem, & mutuae voluntatis officia, in procuranda communi utilitate, & caritate patriæ præponenda coniunctioni, propinquitati societatique humane uniuersæ. Hac affectio & istud propositum atque studium non poterit non simul vera propriaq; commoda singulorum complecti. Unde etiam optima spes excitabitur, futurum ut scelerata audacia violentæ aggressionis, & dissolutæ vitæ turpitudine coherceatur, & ad gravitatem disciplinæ veteris mores reuocentur. Perquam diligentiam in genus humanum clementia, sicut per contrariam prauitatem ira Dei æterni solet proferri atque incitari. Atque hæc iterum quasi prolocuti hæctenus, ita deinceps reli-
R. quum

quum in terris curriculum Philippi Melanchthonis veluti per vitæ ipsius spacium deducendo persequamur.

HIS igitur temporibus quæ inchoarent
 annum Iesu Christi M. D. XLVI. Philippus Melanchthon comes fuit Martini Luteri in suam patriam ad Dominos illius iter facientis. Vnde reuersis ipsis & prospera fortuna vſis, cum iterum sine Philippo Melanchthone profectus eodem esset Luterus, mortem illic XII. Cal. Martij obiit, sibi quidem felicem, nam religiosa cum pietate & animo magno ac firmo placide decessit, plurimis tamen & potissimum Philippo Melanchthoni perquam luctuosam. Non potuit enim non mœrere eo amisso, cum quo annis XXVIII. coniunctissime vixerat, & quem ob virtutes eximias colens dilexerat, cuique in perpurganda & illustranda doctrina Ecclesiæ fidelis socius & adiutor fuerat. Facta autem est supra mentio singularis & eximiæ amicitiae inter hos duos. In qua vterque scilicet vitia alterius cum nosset, ita tolerauit, ut quamuis & tempora ad distractiones procliuia, & hominum leuitas dissidiorum cupida esset

da esset, caueretur tamen ne similtas existeret, ex qua alienatio animorum nasceretur, & diuelleretur vsus consuetudinis ac familiaritatis. Qui autem viros magnos & magna laude præstantes, si quid in eis viciosum notetur, culpari putat, is nimis splendide de humana conditione sentit. Solius enim Dei est proprium, vt careat culpa, Hominum vero natura hoc non fert. Erat Martini Luteri ingenium acre & sagax, Erat animus ingens & excelsus. Nunquam enim in timiditate & socordia, vel etiam fortitudine & solertia mediocri, ea, quæ ægit, susciperentur. Excellentes autem homines sicubi incurunt, non fieri id sine quasi fragore quodam potest. Sane lubricum esse hoc loco veluti iter expositionis video. Nam apud quosdam Martini Luteri nomen adeo odiosum est, vt auditum execrentur, contra nonnulli in illius dictis aut factis aliquid argui omnino pati nequeunt, & si quis hoc facere audeat, eum statim impietatis reum declamitando peragunt. Ego, quæ comperi & vera esse scio, ea commemoranda duxi, neq; inuidiam veritus neq; gratiam aucupatus. Qui quidem Martini Luteri autoritatem & nomen ita celebrant, vt supra conditionem & modum generis humani non dubitent extollere, ijs videndum, ne præstantissimi atque

summi viri bonam existimationem tribuendo nimium diminueret, & suæ audaciæ ab illa excellentia præsidium quærere videantur. At isti insectatores, qui non modo omnia scripta illius damnant ut impia & turbulenta, sed nomen etiam auditum tanquam omnis mali detestantur, Nunc etiam si quid cordis haberent, poterant reminiscendo considerare, quid acerbitate odij & contumacia peruiaciaq; aduersandi & clamoribus vesanis effectum sit. Quorum enim vulnera sanandi causa attrectantur, eos clamando & obnitendo sibi ipsis nocere constat. Possitq; his narrari Æsopica apud Aristophanem fabula:

*Æsopus à cæna redibat vesperi,
Hunc allatrabat impreba & petulans canis,
At ille ad hanc conuersus, o canis canis,
Hac si repressa, ait, lingua tua mala,
Panem cõmeres, cor tibi esse crederem.*

Et isti, si quanta inopia laborarent eorum, quibus religiosam pietatem abundare necesse est, reuocarent ad animum suum, siq; eis curæ esset, ut sibi ac alijs ea copia pararetur, quam requirit vitæ salutisq; conseruatio, saperent profecto & rebus communibus ac priuatis consulere rectius. Sed (incidit enim ætas nostra in fatalis cuiusdam conseruacionis quasi articulum, cum neque admoni-
tiones

tiones quicquam proficiant, & querelis inanibus dolor tantum augeatur) orationem nostram ab instituta narratione recedentem non sinemus excurrere longius. Et de his rebus silentes, vna cum cæteris euentus & ipsos fatales, vt mulierculæ apud Aeschylum se facturæ aiunt, perferemus. Martinus Luterus, quo tempore diximus, mortem obiit, præsentē infractoque animo & constante in sanctitate religiosæ pietatis, reliquitque & suis & alienis desiderium sui ingens, quâuis ætate graui decessisset (Nam annum omnino LXIII. viuendo eum confecisse compertum putatur) Qui lugentes & ita tunc exequias funeris cohonestandas curauerunt, vt his memoria nominis ipsius quam studiosissime & officiosissime celebraretur, & magnitudinem doloris sui gemitibus & lacrimis testati sunt. In quibus Philippi Melanchthonis studia atque officia eximie caritatis facile eminuerunt. Sunt autem ex res statim consecutæ, quibus aliquid quasi remedij ab illo inueniri potuisse credebatur, vt tam difficili tempore eum decessisse magis deplorandum esse existimaretur. Cum enim conuentus ad Danubium iam ageretur, & inchoatæ essent disputationes de controuersijs Ecclesiasticæ doctrinæ, inter eos qui de illis sedate & moderate colloqui iussi fue-

rant, præpositis etiam viris dignitate & sapientia præstantibus negotio illi, à quibus omnia audiendo cognoscerentur, & administrando ordinarentur, nescio quibus certaminibus exortis, etiam percussis vana, ut ferebatur, formidine quibusdam, cum essent reuocati Saxonici, cæteri quoque his adiuncti discesserunt, & ita colloctiones illæ abruptæ sunt, non sine aduersariorum criminatione & indignatione præsidum. Imperator autem imprimis factum hoc grauiter & iniquo animo tulit, & ad cætera putatur cogitando retulisse, quæ ad contemptum sui & maiestatem Imperatoris minuendam lædendamque pertinere arbitraretur. Instabant huic qui Ducem Brunsvicensem conquerebantur bello iniusto petitem, & paternis avitisque terrarum possessionibus deiectum, interque conatus recuperandi sua oppressum captumque in custodia vel carcere potius detineri, Nihil neque lenitate postulationis, neque iussorum seueritate proficiente. Huc accedebat demolitio castelli munitissimi, quod vicinum vrbi Brunonisvici tum demum inter actiones liberandi ducem placuerat dirui: Et non parvus cumulus, Iulij de Ecclesiastico folio Nauburgensis Ecclesiæ depulsio. Ad indictum quoque conuentum non venire ij Principes, quorum suspiciosa erat voluntas

tas in refragando sententiæ Imperatoris. Quibus omnibus irritatus ille induxisse putatur tandem in animum & constituisse secum, bello decernere & auctoritatem Imperij sui armis defendere, ad quæ sumenda nullius instigatio hæcenus eum adducere potuisset. Qui autem, ista occasione arrepta, Imperatoris iracundiam auxillis credantur, & auxilijs ad bellum policendis incitasse voluntatem, & dubitantem confirmasse, & cunctantem impulisse (cum & occultius omnia facta sint neq; diuulgari ista conueniat, vel etiam multis de causis oporteat) non profereatur expositione nostra parcente hominum personis, & refugiente consiliorum actionumq; illarum indignam & inamœnam mentionem, Res quoque illa tota quomodo commota, suscepta, gesta sit, à me non disferetur, hoc præsertim loco ad enarrandum minus idoneo, atq; adeo alieniore. Ad Philippum quidem Melanchthonem quæ durante adhuc colloquio agebantur, relata fuisse certum est, de cæteris alij in consilium adhibiti fuere. Afflixit tamen ista clades hunc grauissime, cum dolore Reipublicæ, tum plurimorum misericordia, quorum salutem & fortunas in periculum vocari ista horribili rerumperturbatione cernebat. Iudicij quoque ille & sententiæ contentione

quadam mirifice angi. Neglectam enim esse veram & debitam communium malorum curationem non erat obscurum. Quam multa fraudulente & violente tentata designataque essent recordabatur. Neque eos, quibus Imperator tantopere irascebatur, non habere causas non tam aduersandi ipsi quam recusandi quædam præ se ferentia maiestatis eius imperium, arbitrabatur. Tum animo voluere crudelitatem seuitiæ in excruciantibus necandisque plurimis innocentissimis & optimis ex omni ætate sexuque & conditione hominibus, Qui partim condemnati supplicij atrocissimis affecti, partim odio immani aduersariorum passim interfecti essent, nullius delicti rei, nisi quod non omnia, quæ huius sæculi approbatione gererentur, usurpare, quæque affirmarentur vulgo, ipsi assentiri ipsi vellent, ac quædam etiam reprehendere & culpæ auderent. Recens etiam tunc facinus patratum, animos plærorumque exulcerauerat, quod superans immanitatem communium scelerum animaduersionem meritam effugisse intolerabile videbatur. Omnium enim vna voce ferebatur, & Hispanum quendam familiæ Diasium nefario dolo ob diffensionem de Religione fratrem germanum obtruncandum curasse, se astante oculisque scelerato spectaculo satiante, & diligenti

gentia eorum, qui fugientem insecuti fuerant, depræhensum captumq; , nihilo minus euasisse neq; tam impiæ cædis pœnas dedisse. Iam sententia Romani Pontificis excludens Archiepiscopum Coloniensem communione Ecclesiastica, & functione muneris priuans, quo tenderet non erant coniecturæ dubiæ. Hæc & alia animo considerationeq; Philippi quasi luctantia & tristitia euentus, quemcunq; exitum res habuisset, nullam viro optimo & Reipub. amantissimo deq; Ecclesia maxime sollicito quietem concedebant. Bellum autem procedere videbat, neq; apparere auertendi illius rationem vllam, præsertim, qui pacificando & seduli & fortunati sæpe fuerant, è medio sublati duobus Illustribs. Principibus Alberto Moguntino & Ludouico Palatino. Nam quicquid hic aut ille vociferetur, hi profecto tanquam aggeres, ne bellorum veluti amnes Germaniam inundarent, obstiterunt. Ita vndiq; consilio opeq; Rempub. ad tranquillitatem retinendam destitui, perspicue cernebatur. Etsi autem talibus temporibus & rebus magis quomodo ferantur quæ acciderint cogitandum est, quam indulgendum mœrori, fieri tamen nequit, quin boni & prudentes cum causis tum tristitia euentorum magno pereperturbentur. Neq; enim ferrei sunt vt

non moueantur priuatis & publicis miserijs, & quo attentius omnia intuentur & animaduertunt certius, eo perturbari illos vehementius necesse est. Non modo autem quanta pericula ab externa potentia imminerent prudentium consideratione perpendebatur, sed in ipso apparatu belli maximi, quæ vel agebantur vel negligebantur, ea complures uereri cogeant, quid tandem futurum esset. In quibus non erat leuissimum inter Saxonicos Principes gentiles gratia paulo ante sic reconciliata, ut verbis quidem illi mutuam beneuolentiam declararent, consensio autem animorum firma non esset, & offensionum memoria causarumque suspicionum relinquerentur. Eos tum initio statim non quidem manifeste distrahi tanquam hostes, sed neutriusquam ut socios coniungi apparebat. Nunciata autem sunt hoc anno & alia, quorum tanta esset fœditas tantusque horror, ut eis rerum omnium turpis atque terribilis confusio ac peruersio portendi videretur. Ut Andreani in Scotia Cardinalis iugulati interitus. Ut Mechlinij miserabilis, pulueribus tormentorum ictu fulminis incensis vastatio. Nam quæ rumoribus vulgabantur ostenta atque monstrata, ea hac narratione recensenda non putauimus. Edidit libellum paulo ante hæc tempora Philippus Melanchthon, quo sane haud scio

scio an nullus extet alius ipsius tam simplice libertate orationis compositus. In eo de Ecclesiæ disputatur autoritate & libris, quos scripserunt doctores in Ecclesia, quasi censoriæ notæ apponi videntur. Id quod ab alijs aliter acceptum esse scio. Neque ego nunc de ijs dicam, qui, quoties minus clementer attinguntur eorum vlcera, vociferantur atque clamant immoderate: Cum quidem medicinæ leniori ipsi locum iam non esse intelligant, & secandi vrendique tamen cruciatus reformident. Hos igitur talibus disputationibus & isto libello offensos fuisse mirandum non est. Verum ego ex alijs quoque in quibus essent neque à causa alieni, & erga Philippum Melanchthonem affecti haud male, audiui, cum de eo libello sic loquerentur, ut illum aperte reprehenderent, tanquam audacius facientem iudicium & nimis fidenter pronunciantem de ijs rebus, quarum hominis priuati & vnius, quamuis sapientis atque docti, cognitio non esset. Ac memini ab vno præ cæteris notatum, tanquam prope modum temere ibi positum: Veterum quosdam aliqua minus diserte exposuisse, cum sentirent commodius: Quasi illi accusarentur ut infantes atque indocti. Verum enimvero, neque Philippus Melanchthon magis sententiam ferre pronunciareque illa tanquam

iudex

iudex videtur, quam indicare potius quasi monitor & hortator, vt in omnium libris legendis, quorum humana autoritas est, meminerit aliquis sibi versandum circumspecte & attente. Quod ad elocutionem vero attinet, Id tale scilicet est, vt si studium bene & proprie loquendi perpetuo tanquam castæ virginis pudicitia custodiretur, nihil opus esset istiusmodi admonitione. Nunc formam sermonis toties mutatam, & diuersis locis temporibusq; tam diuersum vsum illius videmus, vt sit omnino quid à legentibus quicq; scriptores intelligi voluerint, consideratio necessaria. Vt autem vita moresq; aliq; aliam orationem exprimunt, sic etiam orationis mutatio vitæ morumq; affert conuersionem.

De quibus, esset enim cum longum tum alienum, res in præsentia explicanda non est. Est autem hoc expectandum plane vniuersis, qui proponi sui cuiuscunq; modi operis quipiam in publicum voluerint, vt non eadem omnium de illo sententia feratur, cum ex conuiuiis ad vnas epulas inuitatis, *tres saltem dissentire* Poëta affirmet;

Poscentes vario multum diuersa palato:

Vt qui fortunam hac in parte subire nolint, & nimis illius quasi rotam pertimescant, eos optimum atq; consultissimum sit, nihil proferre neq; edere, ac, si quiescere omnino nequeant,

queant, quin aliquod artis suæ, quam didice-
re, opus elaborent, continere domi istud, &
secundum præceptum veteris tibicinis: sibi
canere & Musis. Id quod mihi quoque scri-
benti ista ante oculos inque animo fuit, qui
cernerem quanto cum periculo, ut commu-
nis omnium fieret lectio, hanc narrationem
emissurus essem. Itaque sæpius in hoc descri-
ptionis labore manus sublata est, & de ope-
re tandem absoluto consilium edendi adhæ-
sit. Venit autem mihi in mentem eius in-
primis, quod gravissimus autor Plato scri-
psit: Qui arcana naturæ, & ea quæ sola ani-
mi intelligentia compræhendi possunt (ipse
νοητά vocat) nequaquam mandanda literis
scriptisque peruvulganda censet, sed memoria
cogitationeque retinenda, & contemplando
apud se semper & disputando cum ijs qui
studio eodem teneantur, agitanda esse. At-
que ego non semel & de his similiter cogita-
ui, vel toto hoc scriptionis labore supersede-
re rectissimum, vel certe nonnulla, quæ in
nostro scripto enarrantur, reticuisse me &
pressisse silentio, melius esse, ut & nullum in
discrimen veniremus, & cum ijs tantum,
quos constaret veritatem, religionem, pie-
tatem, virtutem, doctrinam sapientiæ, in-
genuas artes, eruditionem literarum diligere
& magnificere, hæc differerentur, & recor-
dando

dando quasi ventilarentur. Sed vicit cupiditas mea proferendi in medium atq; lucem omnia, cum præsertim indies, eorum familiarium numerus, quibuscum istiusmodi sermones haberi commode possent, minueretur, & bona vel non mala saltem spes esset, compluribus non modo iucundam sed utilem quoq; fore lectionem scripti istius. Et ideo propter aliorum vel leuitatem vel etiam improbitatem, hos aut voluptate aut fructu cognitionis huius fraudandos esse non putauimus. Atq; vt verum fatear, confirmato animo contra repræhensores & maleuolos, opinionem mihi valde arridentem libenter amplexus sum, vt arbitrarer mihiq; persuaderem: Bonis omnibus communicatione horum me rem gratam facturum esse, utq; ab illis bonæ existimationis de me & studijs meis quasi præmium, videretur neutiquam esse desperandum. Cum quidem tam hebes non esset acies mentis meæ, quin præuiderem, pro sua quenq; affectione & sententiâ, hæc aut illa probaturum improbatumue esse, neq; de fore, qui de alijs aliquid criminis inferrent, de alijs suspiciones concipiendo me accusationibus occultis verberarent. Quæ cuncta permittens Deo æterno, diligenter & fideliter expositionem istam perscriptam confidenter neq; periculum pertimescens

mescens vllum edidi, profuturam, vt existimabam, vel posteris, si ad hos, ita Deo æterno volente, peruenisset. His annis ex Franconicis ordinibus nobilitatis antiquæ & valde celebris generosus Comes Berthamensis Michaelus Georgij F. Michaeli N. vna cum auunculo suo, familiæ Limpergicæ & ipsius perantiquæ & nobilis generoso Barone Christophoro, Vuittenbergam venit, & inde huc ad nos sese contulit. Quorum nomina vt huic narrationi insererem (cum & Illustriss. Principum & eorum qui Generosi Comites, &, nescio vnde, Barones appellantur, max. numerus tum Vuittenbergæ longiore aut breuiore tempore degendum putarit) ea me mouerunt quæ mox dicentur. Sane Comitum Imperatoriorum esse eam dignitatem dubium non est. Nomenq; istud Græci quoque retinuerunt. Barones autem suspicari fortasse liceat, appellatos olim fuisse eos, qui apud Imperatores & Reges præ cæteris liberaliter & bene instituti parî quadam existimatione & honore censerentur, ob virtutis studia atq; actiones. Cuiusmodi in regno olim Persico fuisse eos accepimus qui *ἐμὸν* & *ἐμῶν* appellarentur. Nisi alterius forte linguæ istud nomen est. Germanicus quidem hos sermo ingenuos seu liberos Dominos vocat. Sed de hoc vnusquisq; licet com.

comminiscatur atque teneat quod libuerit. Comit^{is} sane Michaeli & Baronis Christo-
phori in pueritia adhuc valde tenera & pri-
mis annis, ea indoles animaduvertebatur, qua
nulla esse posset melior. Modestia erat sum-
ma. Ad Deum & homines pietatis studium,
non ita vt ab institutione in cæteris pueris
interdum eminet, sed suapte incitatione ad-
mirabile. Veneratio & charitas præstan-
tum sapientia virtuteq; & doctrina virorum
singularis, inprimis eius quo Magistro vte-
bantur, cuius nutus etiam obseruabant, &
quem immitiorem quoque ac durior^{em} non
modo non auersari illi, id quod fieri plerum-
que scimus, neq; ab eius usu consuetudineq;
refugere, sed cum requirere absentem, tum
præsentem habere in oculis, atque colere
non secus ac patrem. Quod certissimum si-
gnum notabatur naturæ in ipsis optimæ, &
animi humani atq; mansueti. Itaq; omnes
præclaram de eis spem concipere: Fore vt
vna cum ætate virtutis in illis eximia pulcri-
tudo, & splendor ingens conspiceretur &
eluceret. Nemo non illos admirari atq; lau-
dare, ac de eis omnes vno ore omnia bona
dicere, gaudere aspectu ipsorum, conuictu
lætari. Ingenium autem in Berthamen-
si Comite erat suauius & ad studia literarum
atque ingenuas artes videbatur esse aptius.

Vtēba

Vtebatur apud nos hic doctore Dialectices
& excercitationum dicendi, instituto Mag-
gistrī sui, Iohanne Cratone Vratislaviensi,
Iuvene & ingenioso & docto atq; erudito.
Qui postea in Italiam profectus, cum Medi-
cinæ arti perdiscendæ operam daret, hoc
consecutus est, vt à præstantibus ea facultate
viris & Professoribus artis præcipuis non
modo fauorem & caritatem, sed admiratio-
nem quoque & laudem adipisceretur. Inpri-
mis Montani diligentem assiduūq; audie-
torem atq; discipulum se præbuit. Cuius ce-
leberimum nomen edendis dictatis præcla-
ris illius, reddidit ipse illustrius. Sed doctri-
na virtuteq; eius indies magis eminente, cum
ab alijs multis expeteretur coniunctio &
vſus huius, primum suæ patriæ inseruien-
dum esse honestissīma sententia censuit. Vn-
de postea abstractus alio, dignitate & hono-
ribus auctus amplificatusq; est. Habuit au-
tem gloria, vt fit, comitem inuidiam, quæ
secundum Poëtam summa petit, perhibe-
turq; cæca, quod obtrectando virtuti, & cor-
rumpendo honores atq; præmia ipsius, sibi
illa quidem aliquid commoditatis quærat,
sed plærumq; peius noceat quam alijs. Est
enim ea hæc bestia, quæ seipsam arrodendo
consumit, suppliciumq; vt ait Poëta, suum
est. Verum de Cratone & multas alias ob

causas, & quod de nostratibus hominibus, qui adhuc viuerent, statuerim meas prædicationes minus effusas atq; verbosas esse debere, plura modo dicenda non putavi, cum plurima commemorari potuissent, quibus merita laude celebrarentur, cum aliæ virtutes ipsius, tum experientia, studium, industria, & eruditæ doctrinæ copia. Ut igitur paulisper ad Berthamensis Comitis mentionem redeam. Huius quoque gratia Philippus Melanchthon interdum huc ad nos veniebat: Erat enim eius erga illum affectio amoris præcipua, & expectatio summa futuræ gubernationis, quæ in ipsum vnicum hæredem illustris generis & nominis vna cum possessione terræ Berthamensis, incumbebat. Quapropter immatura mors ipsius (quam obiit coniunx quidem ille, sed neque relicta sobole quæ ipsi succederet, & ætate adhuc admodum iuuenili) à nobis omnibus deplorata est, & sunt ei iusta facta doloris acerbi, Reipublicæ potissimum respectu, cui illud præsidium vel certe subsidium tam difficilibus rebus & dubio statu, de improviso esset ereptum. Verum iam post hanc quoque digressionem, reducaturn tandem ad institutum argumentum oratio, & prioribus reliqua adiungantur. Bellum igitur illud, de quo verba facere cœperamus calamitosum
& in-

& infelix, instar tempestatis maximo impetu
coortum incitari, & scriptis quibusdam edi-
tis odia alienationesq; fieri maiores. Qui mos
nequaquam bonus iam vsu erat confirmatus.
Nam ubi aliqui se iniuria lacepsitos arbitra-
bantur, mox prodibant libelli & ince-
ptum caussamq; defensitantes, & aliorum au-
daciā atq; vim accusantes, quibus non mo-
do probra contumeliose, sed insectationes
quoq; minaciter ingerebantur. Idq; quod
exemplo fieret, iure iam fieri putabatur, &
hoc modo cauere suæ quisq; existimationi
bonæ & honestati nominis censebat. Ego
vero ex viro nostræ ætatis prudente & ver-
sato in grauissimarum rerum tractatibus, id
audiui commemorante patris sui sermones,
quod scriptum est eadem prorsus sententiā
in Plutarchi Timoleonte, hoc ferme modo :
Plæriq; eo sunt ingenio vt maledictis graui-
us quam malefactis offendantur. Iniquiore
enim animo contumeliam ferunt quam dama-
na. Seq; manu defendere in bello concedi-
tur, vt necessarium, conuiciorum autem pe-
tulantia de superuacanea & nimia improbi-
tate & odio existere putatur. Sed, quod pa-
ce dicatur patriæ, haud scio an non cum hac
in parte tum alijs plurimis, externi mores
inuecti constantiam & grauitatem veterem
gentis dissoluta vita & corruptis moribus,

quasi eneruarint. Nam cum suas virtutes minus iam admirarentur, propriæq; bona tuerentur nostri homines negligentius, placeretq; eis fucata magis quam naturalis species, non dubitarunt sese alieno nitore quasi oblinere, vitiaq; sua tanquam morbum, indulgendo cupiditatibus, fouere, donec sanitatem pene perdiderunt, & ab integritate præstantiaq; maiorum suorum prorsus recesserunt. Non modo cladibus sane ingentibus, sed impetus scuitia quadam, & tristitia administrationis, deniq; rebus modisq; omnibus bellum hoc horribile fuit. De quo postea cogitantibus nonnullis scio in mentem venisse & fuisse in ore versum oraculi, cuius sententia est: Plorare victos, perire victores. Dissipatis copijs quæ contra Carolum Imperatorem Rom. fuerant contractæ & educæ in expeditionem, quædam illarum pars in has regiones retracta nouum bellum inchoauit, quam veluti incendiij flammam inopinatam, qui restinguere noluerunt cum possent, aut furorem illius aluerunt etiam, ijs quæ gratia debeatur à nobis dici non est opus. Non defuere sane Principes aliquot, inq; ijs Princ. Elect. Ioachimus Marchio Brandepurgicus, qui pacificationi studiose operam darent. Hanc etsi primum odio & iracundia flagrantibus animis simpliciter respucrunt,

spuerunt, Postea tamen eo peruentum assidue-
uitate est, ut non multum abesset, quin re-
conciliata gratia inter dissidentes, efficere-
tur, ne tam lacrimabiles casus & euentus in-
digni sequerentur, neue eo res euaderet, ut
nullus iam locus esset vel consilio vel auxilio.
Helsiaci quoque legati statim initio tenta-
runt possetne intercedendo belli impetus
auerti, & cum laborantibus rebus succurri-
tum malis, quæ impendere non esset dubium,
miserijsq; futuris occurri. Memini com-
municatis his cum Philippo Melanchthone
& quibusdam scriptis, quibus conditiones
quædam pacificationis quasi informarentur,
ei ostensis, petatum esse, ut suam sententiam
& ipse indicaret: Eumq; respondisse: Ca-
put sibi videri omnium, ut Imperator place-
tur. Ad quam spem ante cuncta necessarium
esse se arbitrari, ut Principes aduersarij Cæ-
sari fiant supplices. Tunc, inquit, petetur
scilicet, ut fœdus inter ipsos & ciuitates
ictum dissoluatur. Hoc aliqui donec pote-
runt fortasse impediunt. Sperare quidem se
aiebat, deprecatione aliquorum Principum
à Cæsare pacem impetrari posse, si debita re-
uerentia omnium res agatur. Erat in con-
ditionibus quarum paulo ante mentionem
fecimus: Ne doctrina contraria & explosa
deinceps damnaretur aut exagitaretur, ante

cognitionem legitimam. Ad hoc obligari neque debere neque omnino posse censebat vltimos. At si expresse poneretur: Nullos Principes aut ordines turbare velle ditiones Episcoporum, aut aliquid eis adimere, aut nouo onere onerare, credo inquit, ita Cæsarem placatum iri. Erat & hoc in illis conditionibus: Discerni causas profanas & doctrinæ veritatem oportere: Id sapienter & recte cogitatum positumque esse dicebat. Nam inconcinne quædam permitta esse multos perhibere, & si profana explicarentur atque componerentur, vt verbi causa cum Duce Brunsvicensi controuersia, sperare se hoc plurimum momenti ad mitigandum Cæsaris animum habiturum. Sed hæc tunc frustra suscepta & tentata sunt. Oppugnata est Lipsia & defensa aduersus vim tormentorum, cuius neminem audiui qui similem ad urbem vltimam adhibitam cognouisse se diceret. Præsidio autem Vuittenbergæ imposito, iam plerique ordinis scholastici, tanquam parum opportuni incolæ illo tempore, abcesserant, errabantque passim in Saxonice fere regionibus, aliquibus perbenigne eos recipientibus, cum nonnullis parum gratus esset aduentus illorum. Paulo post, nam proximo anno Christi M. D. XLVII. hæc sunt gesta, & Rochlicij deiecto præsidio, cui Albertus Ca
simiri

simiri F. Marchio Brandepurgicus præerat, ipsoq; capto, Imperator inuitus, vt perhibebatur, accessit cum exercitu altero, & Iohannes Friderichus vel minus cautus nimisque securus in tam arduis negotijs atq; rebus, vel aliorum consilijs rationibusq; inductus, vel quocunq; tandem pacto, celeritate & vigilantia & feruore quodam aduersariorum, Mulbergi, quod est oppidum ad Albim fluvium, ultra quem traductis suis illic castra locauerat, oppressus victusq;, & ipse fuso, profligato, cæso exercitu, fortissime dimicans, neq; à suis recedens, vulnereq; aduerso grauitèr saucius, ita captus in potestatem Caroli Imperatoris venit. Auditum est postea Imperatoris Ferdinandi, qui tunc in exercitu, & deinde fratris Caroli v. successor fuit, honestissimum testimonium virtutis & constantiæ Principis huius, interq; alia & hoc: Si omnes, quos secum ille tunc habuit tam fortiter atq; ipse dimicare, & sustinere animo præsentè hostilem impressionem, & vim repellere voluissent, vix futurum fuisse, vt eo ille die superaretur atq; caperetur. Fuit eo die quo prælium istud commissum est, & ante illum pene tribus, solis tetra facies, impediènte lumen & eminentiam radiorum denso rubore, qui & in tectis ædificiorum & parietibus cum omnium intuentum stupore

quodam relucebat. Ego qui tum & ipſe vt
mei gregis pleriq; cum familia vagabar, illo
tempore Vuurcepurgi eram, quo me poſt
peregrinationem longam & iniucundam
contuleram ad Præſtantifs. dignitate, virtu-
te & ſapientia Danielum Stibarum, mei
amantiſſimum, cuius & tunc & alijs tempo-
ribus meis nobili viro dignam fidem, & erga
me benignitatem ſum expertus, & rebus cæ-
teris, & in hoſpitio domeſticoq; vſu ipſius,
cuius tum fructum cepi quamdiu mihi, non
illi libuit. Nam mirifice me retinere diſce-
dentem nitebatur. In hac mentione fui lon-
gior, (cum & D. Stibari meritas laudes alibi
extollere & coniunctionem amicitiaſ noſtræ
non ignorari ſtuduerim) quod noſtrum or-
dinem & genus ſcholæſticum à quibuſdam,
qui ſtantes coluiſſent, iacens & proiec-
tum non admodum fuiſſe ſubleuatum compere-
rim. Sed ita fieri ſolere ſcimus, vt diligan-
tur felices, miſeri deſerantur. Ego igitur
tum non optima valetudine vtente D. Sti-
baro in cubiculo ipſius prima nocte eandem
ſpeciem quaſi tinctam ſanguine conſpexi lu-
næ, iſſq; qui aderant demonſtraui, vna me-
cum admirantibus colorem illum in luna,
quæ quadrati in circulo lateris ſpacio pene à
ſole abeſſet, globo propemodum dimidiato,
quando illa inſigniter colorari non conſue-
uit.

uit. Hæc minus apta huic argumento videri, vt opinor non debent. Cum enim instituta sit de Philippo Melanchthone narratio, quid temporibus ipsius acciderit, quod & ab illo consideraretur notareturq; in primis, & cum afficeret atq; excerneret, indicandum esse sum arbitratus. Quibus narrationibus si in-
seruisssem interdum aliquid de me, neque hoc alienum aut absurdum visum iri speraui. Cum haud scio an nihil aliud ei curæ cordiq; vnquam, ex quo inter nos amicitia vsus cepit, discedenti illi quidem à domestica necessitudine, æque fuerit, atq; ego & res meæ. In quo tamen cum serualle nos modum intelligi confido, vt attingendo omnia hæc perstringerentur, non differerentur explanando. Philippus Melanchthon in hac quasi tempestate tectum subiit oppidi Zerbestani, quod est ditionis Ascaniæ. Cuius illustrissimæ domus clementissimam benignitatem, quæ & ipsa tum in discrimen non mediocre veniebat, perpetuo ille sensit. Atq; scimus non minori curæ fuisse Principibus illis salutem incolumitatemq; Philippi, quam suæ dignitatis fortunarumq; conseruationem. Cum in Saxonia debellatum, & res illæ ex Imperatoris Caroli sententia atq; voluntate, itemque Bohemica negotia pro Regis Ferdinandi arbitrio composita perfectaq; essent, Phi-
S 5 lippus

lippus Landgravius in Hassia, summa cupiditate ubiq; stabilis & certæ pacis, autoribus potissimum Princ. Elect. Brandepurgensi & Duce Mauricio genero suo, sese & ipsum deditione facta Imperatoris fidei permisit & ad Imperandum accersitus, in urbem Saxonicarum Salinarum, ibidem, (quod neque ipse tum metuebat, neque quisquam fuerat suspicatus ex ijs, qui pro illo deprecati persuaserant ipsi, ut clementiam potius Imperatoris semel, quam iterum vim & arma experiri vellet, quiq; sane cunctantem cum in tales angustias deduxerant) in custodiam datus & duriter habitus parumq; liberaliter humaniterq; tractatus est. Quæ sic instituta, conformata, acta esse, credibile est postea aliquos pœnituisse, qui vel suaserunt, vel administrarunt, vel etiam gesserunt. Verum de his & alijs, quæ tunc bello confecto consulta factaq; fuerunt, ne vel indicij causa, sicut de alijs, verba faciendo essem longior, per mihi multa obstiterunt, sed omnium maxime dolor & mœsticia animi in recordatione eorum, quæ cum non possem in veritatis commemoratione, ordine & recte esse facta perhibere, ne criminando tamen exagitarem, aut quamvis leniter repræhenderem, pudoris mei esse censui, & quid adeo vel mundi vel fructuosi habituræ essent narrationes istę
non

non sane videbam. In hoc motu ferebatur
tanquam nauis procellis ventorum optimus
vir Philippus Melanchthon & ea audiebat,
cognoscebat, cernebat habebatq; etiam in
manibus, quibus grauissimæ curæ maximæq;
anxietates & dolores summi cum ingentibus
laboribus ipsi imponebantur, aduenti inter
ea & vitæ pericula, & facultates consumen-
ti, quod sine vlla parsimonia & pene ratione
tribueret & largiretur, quicquid habebat ac
corradere potuisset, egentibus alijs. Ita ille
& in naufragijs rei familiaris & difficultatis
bus comitatus, & vario multipliceq; metu
non tam de se & suis quam alienis, qui se ad
eum applicuerant, tanquam fluctibus maris
iactabatur. Confecto bello in Misnia Im-
perator Carolus per Salinas Saxonicas &
Pabergam iter faciens cum omnibus co-
pijs Norimbergam peruenit. Atq; illac cum
traduceretur victor exercitus tota vrbs aræq;
& foci, utq; dicitur, diuina ac humana in
potestate Caroli fuere. Quosdam sane ex
ordine Ecclesiastico metu tum valde debili-
tatos fuisse constat, qui belli tempore liberi-
us se locutos, & scribendo literasq; mittendo
fuisse incautiores non ignorarent. Ii etiam
sermonibus quorundam magis exterreban-
tur, à quibus & pericula augeri verbis, &
admonitionis sollicitudine animis percussis
trepidat

trepidatio formidoq; maior incuti. Erat tum illa in vrbe habendis ad populum concionibus celebris Vitus Theodoricus ciuis ibidem. Hic à primis adoleſcentiæ annis magnam partem ætatis Vuittenbergæ in ſtudijs pijs ac liberalibus abſumſerat, perfeceratq; diligentia, obſeruantia atq; induſtria ſua, vt præcipui in illa Academia, & Eccleſiaſtica ſcholaſticaq; rei capita, cum expeterent vſum familiaritatis ipſius, tum valde eum diligenter. In patriam autem reuerſus & vxorem duxit, & concionum mandato munere ſic functus eſt, vt ad ipſum audiendum concuſſus fierent multitudinis tantæ, quantam omnino templum, vbi verba facere ſolebat, caperet. Affligere eum morbus celeriter cepit, in quo acerrimos cruciatus artuum perpeſſus eſt. Cumq; recuperandæ ſanitatıs cupiditate variam opem à medicina peteret, & tandem aquas natura ſua calidas placuiſſet experiri, ita paulo poſt mortem obiit. Sed illo tempore æger, pedibus adeo enervatis vt ingredi non poſſet, ſibi quoque ne quid accideret grauius, magnopere timebat. Conſirmatus tamen & ipſe à ſe, & amicorum oratione, quamdiu in illa vrbe Imperator manſit, neque conſpectum deinde vitauit vllius, neque aditu quenquam prohibuit, & fuit animo præſente atq; magno. Sed ab Impe-
ratore

ratore Carolo erga neminem vllius ordinis, loci, generis mortalem, consultum factumue est quicquam, quod non modo manifestæ acerbitalis dolorem, sed querelæ etiam occultæ deplorationem haberet. Quamuis, vt ferebatur, non deessent, qui Imperatorem, vehementer instigando, conarentur eo impellere, vt illa occasione vtens exemplum ederet in ciuitate præcipua iustæ iræ & congruentis tempori seueritatis. In quo quidem compertum est, non tam existimationi & rationibus Imperatoris prospectum consultumq; aliquos voluisse, quam suum emolumentum commoditatesq; priuatas quæsiuisse. Verum Imperator, quemadmodum diximus, neque ipse quicquam ægit aut statuit tristius in quenquam, neq; à suorum aliquo lædi, aut damno, iniuria, molestia affici vllum passus est, & ita transijt, vt nemo ne suspicari quidem posset, voluntatem esse ipsius ab illa ciuitate alieniorem. Ego tunc, cum à Stibaro discessissem, confederam Norimbergæ. Quæ ciuitas & erga me perquam benignam liberalemq; se præbuit, & obtulit hospitij copiam Philippo Melanch. munifice. Sed hic tandem & ipse redeundum sibi Vuittenbergam statuit, & vt eodem se reciperent, alijs quoq; non leuibus causis motus suator hortatorq; fuit. Et si enim Illustris.

Princi-

Principes Duces Saxoniae mandato patris, qui Imperatorem sequi cogeatur, in Durin-
gia congregabant dissipatas & vagas Mu-
sas, & sedem his Ienam ad Salam amnem
oppidum designauerant, & Philippus Me-
lanchthon lamentabilem casum Principis
pietate eximia erga Deum & patriam præ-
diti, utq; generis splendore sic omnis virtu-
tis claritate Illustrissimi largis lacrimis de-
plorabat, neq; venerari cessabat animo suo
profligatum, cui florenti seruiendo summa
diligentia ac fide præsto fuisset: Quid tamen
non sibi sed alijs compluribus esset profutu-
rum, & res atq; tempora, ipsorumq; adeo
Principum rationes ferrent, omnibus mo-
mentis suis ponderans quasiq; examinans,
suo sibi loco tanquam in turbine tempesta-
tis, secundum vetus nostræ gentis verbum,
permanendum consistendumq; esse duxit.
Verum illuc & tunc & postea eruditione
doctrinæ & ingenio optimarumq; discipli-
narum & artium scientia præstantes viri se
contulerunt. In quibus celebritate nominis
excellens fuit Iohannes Stigelius liberali co-
gnitione & virtute atq; sapientia & facultate
carminum non facile alteri vlli suæ ætatis ce-
dens, Vir animo excelso præditus, & patriæ
suorumq; in ea Principum ita amans atque
studiosus, ut illustre exemplum ipsius in hac
parte

parte pietatis eximiae proponi posse videatur. Confluxerunt tamen eodem & alij, qui vt temporibus filis admitti, sic aliquanto post multo libentius dimissi fuerunt. Quorum insolentia atq; peruersitas bonis & probis & vtilem operam dantibus multum negotij fecit, & malitia nonnihil creauit periculi, & cum animos quorundam moestitia & angoribus, tum fortunas ac corpora damnis & cruciatibus afflixit. Neq; abhorret à vero indignationis doloriq; perturbationem quem aliquot annis ceperat Iohannes Stigelius ex necessaria magis quam expetita coniunctione nonnullorum, percusso ci debilitatoq; celerioris mortis causam dedisse, quem cum adhuc in his conscribendis occuparemur lugebamus, virum & amicum summum, & plurimorum scriptis epitaphijs alijsq; mentionibus lugubribus dolenter deploratum. Eodem tempore exclusus dudum Ecclesiae communione decreto Pontificis Romani Reuerendissima canicie innumeralibusq; laudum nominibus Illustrissimus Princeps Hermannus Archiepiscopus Colonienfis, etiam gubernatione terrarum priuabatur mandato Imperatoris Caroli. Qui ne belli aut cladis aliquius repugnando nouam tempestatem excitaret, celsit volens, & eorum, quibus aeternae salutis & vitae co-

piam

piam studuisset conciliari, corpora fortunæque cruentis gladijs & sæuitiæ immani hostium obijci noluit. Quam moderationem atque pietatem etsi laude dignissimam ipsique adeo ad reliquæ vitæ optandam quietem opportunissimam esse Philippus Melanchthon videbat, non poterat tamen dissolutione eorum, quorum instituendorum ipse socius atque particeps fuisset, non vehementer perturbari. Augebatur ægritudo tristitia nuntiorum de amicis, quorum aliqui cecidi sedibus suis & dignitate fortunisque spoliati exulabant, aliqui capti in custodia tormentisque detinebantur. Quorum præcipui indicabantur Iohannes Brentius, qui concionibus sacris præfuerat in Salinis Sueuicis, quiq; Turingæ Erhardus Schneppius, & Ulmæ Frechthus, & Chembergi, oppidum hoc est vicinum Vuittenbergæ, præpositus Ecclesiæ venerabilis senex, Philippoq; singulari necessitudinis & familiaritatis usu deuinctus. Iam Mauricius Dux Saxon. periculo liberatus, atque modo dignitate septemuiratus auctus, de restituendis Academijs ambabus, & recolligendis ijs qui discesserant, & reparando ocio studijs, sedulo diligenterque cogitabat & ægerat, fueratq; Lipsiam accersitus Philippus Melanchthon ubi ad necessarias deliberationes ordines terræ subiectæ Ducis Mauricij

Mauricij potestati conuenerant. Neq̃ ille
Vuittenbergam sibi decessione sua relinquen-
dam, ac multorum potius rationibus atque
vtilitatibus consulendum, quam sibi peculi-
ari respectu videndum esse duxit. Cuius con-
siliij atque sententiæ à plurimis improbatæ at-
que repræhensæ nunquam eum poenituit.
Neq̃ illa prudenter cogitata casus ullus,
quod interdum fieri solet, deinde quasi infu-
scando contaminauit. Fieri autem aliter
non potuit, quam vt scissa studia hominum
rebus ita, quemadmodum strictim indicaui-
mus, gestis diuiderentur, & voluntates es-
sent diuersæ. Atq̃ inuidiosæ omnino actio-
nes quædam erant, eæq̃ ab æmulis, vt fit, a-
cerbis criminationibus infamabantur, ijs po-
tissimum quibus neq̃ exploratæ illæ essent,
& qui in eam partem vnum vituperando, lau-
dando alterum cupide prolaberentur, in
quam propendens affectio impellebat. Iam-
que Imperatore Carolo disceptationes de
Religione eo deducere contendente, quo
multis annis & magno labore conatus esset,
& Augustæ Vindelicorum iussis adesse Prin-
cipibus & ordinibus Imperij, cum ante con-
uentum se Vlmæ acturum edixisset: Augu-
stæ igitur Imperatore Carolo postulante, vt
vniuersi Synodi decretis se obtemperaturos
esse promitterent, maleuolorum sermoni-

T

bus

bus spargebatur, à Duce Mauricio hanc promissionem commoditate orationis obtinuisse Imperatorem, cuius fauorem, vel maxime liberandi focerì ille causa, retinere vellet. Idq; actum esse in priuatis colloquutionibus. Est autem genus quoddam hominum sane leue, qui de maxime occultis atq; abstrusis audacissime pronunciare & affirmare non dubitant.

*Hi simulant se scire omnia, nec quicquam sciunt,
Quod quisq; in animo habet aut habiturus est sci-
Id quod in aurem rex regina dixerit (unt.
Sciunt,* vt ait Senex Plautinus:

*Quæ neq; futura neq; facta sunt tamen ij sciunt.
Falsos an vero laudent, culpent, quem velint,
Non floccifaciunt, dum illud quod libeat, sciant.*

Atq; ijdem, ibidem dicitur, Nihil esse stultius neq; stolidius, neq; mendaciloquius neq; argutum magis. Atqui neq; tunc neq; vllis in tractationibus alijs compertum est, neq; plannum fieri potest: Ducem Mauricium vel pollicendo vel approbando vel assentiendo integritatem sinceræ Religionis labefactasse. Hinc tamen cum ad Philippum tum alios, qui ab illo non discedebant, aut ei non male dicebant, inuidia manare, ijq; quasi causam proderent seq; retexerent, & à veritatis assertionem deficerent, plane impietatis accusari. Id quod illo quidem tempore & recens
tibus

tibus belli stragibus timidius occultiusq̃, aliquid autem post audacius magisq̃ impudenter esse factum scimus. Atq̃ primum quidem hæc disceptationum de Religione, cuius paulo ante meminimus, difficultas expedita fuit ab ijs, qui in Synodo congregati decreta facere ceperant. Nam tanto bello occupato Imperatore Carolo, quod ad defendendam & tuendam Synodum geri prædicabatur, Tridento Bononiam subito est discessum. Quam migrationem Imperator iniquissimo animo tulit, & interpretans Synodi dissolutionem, autoribus adiutoribusq̃ huius vehementissime succensuit. Misitq̃ ea de re Legatos ad Pontificem Paulum, & ad eos qui Bononiam se contulerant, Nam Tridenti restiterant aliqui inprimis Germani. Sed ea responsa data sunt, quæ & Imperatoris expectationem frustrarentur, & unde liquido perspiceretur, pontificijs qualescunq̃ Synodi actiones procedere, atq̃ confirmari, in animo fuisse nunquam. Cum Philippus Melanch. se Vuittembergensem Academiam non deserturum esse statuisset, rursus cœpta est ibi doctrina publica instaurari & frequentari. Lipsiæ autem etsi restitutio omnium magis in procliu erat, desiderabatur tamen opera diligentia absentium adhuc quorundam, mortuo præsertim, cuius

antea quoque à me mentio facta est, Caspare Bornero Theologo. Qui cum præsentissimo fortissimoq; animo toto oppugnationis tempore in vrbe remanens scholasticas ædes pro virili sua tueri, & publicam priuatamq; aliquorum suppellectilem conseruare anniteretur, defatigatus nocturnis diurnisq; laboribus, & contagione læsus (nam lues inuaserat promiscuum vulgus quod sub vrbe tugurijs exustis aduentante exercitu oppugnaturum urbem, in spaciosis locis & fere vacuis ædium illarum raptim confederat) & vigilijs, & victus cultusq; negligentia, atque potissimum mœrore & indignatione debilitatus in morbum acquiescente iam aliquantulum animo, & metu periculi depulso, incidit, quo confectus obiit mortem cum bonorum omnium deploratione & ingente mœrore, Anno Christi M. D. XLVII. III. Non. Maij annis nondum grauis neque effœtus ætate. Neq; ego hoc viro cognoui neq; extitisse vspiam alterum existimo, dignitatis utilitatumq; suarum minus studiosum, dum rem scholasticam publice stabiliret, augeret, amplificaret, ornaret. Itaq; illius memoriam nulla dies delebit, quamdiu literæ eruditæ loquentur, quibus non modo huius viri doctrina, quæ fuit eximia in omni genere disciplinarum, sed integritas, amor veritatis, fides,

des, virtus, sapientia celebrabitur. Vetus & singularis cum hoc necessitudo fuerat Philippi Melanchthonis qui tunc non modo lugebat amici præcipui mortem, sed requirens rebus dubijs & negotijs impeditis vel ducem peritiss. vel comitem gratiss. consiliorum actionumq; omnium, societatem coniunctionemq; sibi talis illo tempore viri ereptam esse in maximæ tristitiæ sensu querebatur. Interea Carolo Imperatore omnibus viribus annitente vt Synodus inchoata Tridenti ibidem perficeretur, & Pontifice atq; ijs qui Bononiam transierant refragantibus, proq; sua autoritate & iure, respondendo postulatiss. Imperatorij acriter propugnantibus: Imperator reputans neque se dignum, intermitteri illarum rerum tractationem, quarum maxime caussa tam periculosum & graue bellum suscepisse ipsum gessissetq; assereretur, neq; suis multiplicibus promissis de controuersiarum Ecclesiasticarum cognitione consentaneum esse, relinqui tunc quoq; cum nemo voluntati ipsius aduersari posset, incerta, dubia, litigiosa omnia, pontificij tam manifeste tergiversantibus, cum quibusdam de liberata re, consilium cepit, excerpenti quædam ex ijs scriptis, quæ superioribus annis ad concordiam dissentientium de religione fuerant non tam absoluta atq; comprobata quã

instituta & proposita. Atq; ita rursus liber paucorum quorundam clandestina & tenebricosa opera congestus, &, ut vetere verbo utar, consutus fuit, quo præscribatur, quid interim, dum decreta Synodi prodirent, fieri seruariq; oporteret, ab ijs quidem, qui in doctrina Ecclesiæ & ritibus vsitatis aliquid innouassent. Vnde liber ille quasi tituli nomine est vocatus Interim. Et dedit facietis multa false dicendi occasionem. Cum quidem neutri parti placeret, & utriq; etsi non eodem modo atq; proposito, eum repudiarent. Suntq; postea multo maiores & deformiores dissipationes atque etiam ruinæ consecutæ. Conuenerat autem & eo consilio prolatus fuerat iste liber, ut ne à Pontificias quidem partes sequentibus improbaretur, utq; adeo Pontifex ipse vel concedendo indulgendoq; vel dissimulando & conniundo illum admitteret. Atq; mirabantur pleriq; à quibus vera consideratione res perpendebatur, Carolo Imperatori persuaderi potuisse, ut in eam sententiam rationemq; incumbendum putaret, Quam pro sagacissimi animi prudentia, & diuturna experientia, quod similia negotia quo euasissent non ignorare posset, videre intelligereq; deberet, neq; ipsa consistere ac valere, neq; temporibus congruere, magisq; ac citius nouas contentiones

tiones atque pugnas commoturam, quam certamina atque rixas priores sedaturam esse. Sed occæcantur nimirum animi maximorum quoque & sapientiss. virorum, quando infringi suam vim fata non volunt. Sane constat vrgendo minime clementer, ac admodum potius imperiose, iussa de recipiendo libro illo & præscripta in eo exequendo ad omnes ordines delata, & tanquam de his consensissent vniuersi, neque recusationem neque preces, denique nihil quod contradiceretur, admissum esse. Neque defuere qui insidiosè etiam quædam tentata factaque fuisse perhibere non dubitarent. Tum quidam & ij potissimum quos supra nominaui & cæteri, qui ijs nollent assentiri, quæ esse contraria veritati haberent persuasum, afflicti atque vexati fuere, cum & aduersus Philippum Melanchthonem Caroli Imperatoris ira iam esset suscitata, cui tunc succensendi vehementius, ille etiam stimulus fuisse credebatur, quod tales compositiones ipsi displicere, ad Imperatorem odiose deferri, cum inimicam de præteritis quam præsentibus oratione, animaduerneretur. Atque tunc eorum, qui Philippum Melanchthonem oderant, machinationibus vita eius est petita, eademque protecta ab amantibus illum, & quibus viri innocentia atque probitas nota erat. Neque

defuere qui suspicarentur talia diuulgari
perterrendi Philippum Melanchthonem
caussa, ne consilijs actionibusq; recentis con-
ciliationis reclamando officeret. Sed inco-
lunitas ipsius rebus communibus tunc con-
seruata fuit. Hoc anno ad grauiss. Philip-
pi Melanchthonis curas de rebus comuni-
bus & rei domesticæ labes, & ingentem tri-
stitiam propter Ecclesiæ vulnera, nouus do-
lor accessit nunciata morte filiæ Annæ, quam
& carissimam patri & à marito Georgio
Sabino in Prussiam abductam fuisse accer-
sito à Principe Alberto, supra diximus.
Eum tamen casum tulit ille moderate, vt an-
tea quoque indicauimus, & magis toleranter
quam amici laturum esse sperare potuerant,
qui scirent quanta amoris paterni erga illam
fuisset affectio. Sed meditatione euentus &
quodam prioribus ægritudinibus veluti
concoquendis vsu, hebetiorem tunc sensum
habuisse cum credibile est, cum quasi occal-
lisset animus dolendo, metuendo, perpeti-
endo. Veri quoque simile est, publica ma-
la immensa & multiplicia & varia, quibusq;
tunc laborabatur, & quorum timebatur ac-
cessio, morsus priuatorum retudisse. Quem-
admodum in morbis, qui intensi magis sunt,
ij non patiuntur plane sentiri remissiones, &
hos quasi obscurant. Non facile autem
possunt

possunt scribendo explicari illa quæ bonorum tunc neque leuium & patriæ inprimis amantum animos & dolore præsentē & metu in posterum excruciarint ac sollicitauerint, non solum illa numero infinita & magnitudine immensa & pondere intolerabilia, sed varietate quoque & dissimilitudine & mutabilitate formidanda atque terribilia. Edebantur externorum hominum scripta, & picturæ diuulgabantur quibus Germanicæ nationi in calamitate insultabatur, & tanquam ex dolore victæ triumphus ageretur, captivæ illius vincula catenæq; ostentabantur. Quæ sane multorum animos acriter pungebant. Alij de dignitate fortunisque suis minus anxij, hoc orabant obsecrabantq; tantum, ne imperio humano obœdire & terrenam laudem quærere cogerentur faucibus conscientia sua, & æterni Dei iussis edictisque aduersando, & cœlestis gloriæ spem labefactando. Sed qui induxerant Carolum in eam rationem, quam ille secuturum se esse iam demonstraerat, iidem annitebantur, ne inde recedendo, aut aliquibus indulgendo, non tam inconstans quam timidus haberetur, id quod isto tempore rerumq; statu minime conducere, vel maxime potius nocere posset. Quæ neque temporibus opportune, neque rebus ipsis apte, neque omnino vera

ratione geri, & intelligebant ij, quorum iudicia amore odious erga aliquos non deprauabantur, & iustissimis querelis Philippus Melanchthon deplorabat, cuius sermones in tristitia atque indignatione vehementiores delati ad Cæsarianos, & ab inimicis inuidiose & obtreptatorie expositi, nonnihil crearunt, quemadmodum paulo ante significatum est, periculi ipsi, non modo alienato sed etiam irritato Imperatore, & plane infesto, ut cui inculcaretur consilijs actionibusque ipsius impedimento esse Philippum Melanchthonem præ cæteris, quod plurimi illius auctoritate moti & exemplo confirmati, resistere iam atque repugnare auderent. Etsi autem hic, cum, quid institueretur, cerneret, non dissimulabat metum suum, quod exitum talium inceptorum nullum videret, ac ne progressiones quidem faciles, vel non potius admodum difficiles & ubique incursuras prospiceret, atque eos à quibus talia nasci profectique credebatur, non dubitabat aperte reprehendere & accusare: In eo tamen constantissime perseverauit, ut puram sinceramque doctrinam retinens, in parum necessarijs & externis quibusdam ritibus non impiarum observationum, moderationem, nequaquam, id quod quidam faciebant, damnaret. Sed de his paulo post plura dicenda erunt. Istud
modo

modo breuiter indicandum putauī, contra Imperatoris Caroli inhumanis quorundam & iniquis sermonibus instigati mandata non modo seuera sed plane scæua, vt Philip. Melanch. sibi traderetur, defensum, protectum, conseruatum tum fuisse eum studiij diligentiaꝝ patrociniū atque præsidio illustrissimi cum alijs laudibus tum pietate & virtute Principis Mauricij, rebus omnibus dubijs & admodum difficilibus. Quod quale sit nequaquam intelligi perspicique potest ab ijs, qui quasi fluctuantes alienos in mari de terra spectant ociosi, sine sensu periculi & proprii exitij metu. Quin tamen ista in Philippo Melanchthone tuendo D. Mauricij constantia gloriam cumulet illustrissimi nominis ipsius, nemo profecto nisi furiose in odio & inuidia improbus inficiari poterit. De his igitur hæc tenus. Non autem omittendum putauī, id quod in Italia tunc accidit. Nam in oppido quodam ditionis Venetæ, quidam, quod contra conscientiam ad negandum quædam prius asserta, & retractandum confitendo disputata de dogmatibus Ecclesiasticis, cogi se passus esset, adeo perturbatus fuit, vt ex dolore animi corporis morbo contracto, ita per extremam desperationem, nullius consolationem admittens, interiret. Huius casus narrationes diuulgabantur, & qua oratione,

qui

qui affuissent, conati essent mederi afflicto, & prolapsum erigere, explicabatur. Quam quidem commodiorem magisq; appositam haberi potuisse Philippus Melanchthon censabat, demonstrantem & vrgentem inprimis hanc sententiam: venisse filium Dei in hunc mundum, vt peccatoribus salutis autor largitorq; existeret, & eas, quæ cum hac congruere viderentur. Sed ille tunc ita decessit, sane miserabiliter, vt traditur. Anno M. D. XLVIII. inter alia turbulente & audacter tentata atq; gesta, vrbs Constantia (quã habuisse priscis temporibus nomen quidam putant Nantuatium, quidam Harudum, quidam etiam Vitoduræ perhibent) sita ad lacum per quem fluuius Rhenus amœno tractu quasi spatando manans deinde suo alueo defertur, aggressione occulta Hispanicarum copiarum pene capta fuit, securiore tunc ciuitate inter tractatus pacis, de qua legatum tunc ad Imperatorem abfuisse accepimus, vna cum alijs quibusdam primarijs viris, Thomam Blarerum. Hunc habuit Philippus Melanchthon inprimis familiarem eo tempore, quo ego Vuittenbergam veni. Erat autem ille in sua ciuitate præcipuo loco natus, & generis splendorem auxerat bonitas ingenij virtutisq; ac sapientiæ & inprimis religiosæ pietatis studium. Ea vero grauitas
& con

& constantia eminebat in adolescente quoqꝫ,
vt à plerisqꝫ tum adeo ille obseruaretur, cum
humanitas quidem ipsius & amabiles mores
incredibilem commendationem haberent ad
omnes. Hic, etsi non successerant insidiæ
factæ patriæ, & oppugnationis etiam vi pro-
pulsata à ciuibus fortissime dimicantibus, re-
uersus domum, quod fieri tamen status pri-
oris mutationem animaduerneret, neqꝫ pos-
sent pauci resistere multorum vel formidini
vel etiam cupiditati, ita ipse in agros suos
concessit, & alijs administrationem publico-
rum deinceps munerum in patriâ suâ reli-
quit, quod veritatis æternæ ac cœlestis pro-
fessionem liberam retineri pluris faceret,
quam amplissimorum honorum functiones.
paratas volenti sese & rationes suas tempo-
ribus accommodare, quibus seruire pru-
dentia humana inprimis consuevit. Eodem
hoc anno in complurib. conuentibus, qui in-
dicebantur de capitib. libri Cæsariani, Phi-
lippus Melanch. vehementer est iactatus.
Quæ res tractationesqꝫ ab alijs sunt vere &
accurate expositæ. Interqꝫ tales colloutio-
nes, disputationes, consultationes annus hic
effluxit. Venit ea tempestate in Belgicum
Imperator Carolus, ad quem ex Hispania
Rex Philippus filius illius accessit ad solen-
nem illarum regionum possessionem traden-
te pa

te patre accitus. Eumq; tunc & locutum
 quædam præclare, & in conspectu omnium
 amantissime filium esse complexum accepimus,
 cum quidem filius exquisite esset humil-
 ligestu veneratus patrem: Decretum au-
 tem Augustanum in Germania turbas da-
 bat, Quod vt Imperator ratum esse volebat,
 ita indies magis conuiuere cum animadu-
 rebatur in quibusdam non prorsus illud ex-
 equentibus, modo non detraheretur aliquid
 de ipsius maiestate, neq; contemni imperium
 videretur. Versabantur etiam in Germania
 Legati Pontificij tres, cum mandatis conce-
 dendi autoritate Pontificis quædam, de qui-
 busdam transigendi, quæ cum iamdudum
 vsurparentur & recte fieri statuerentur, non
 multum curare pleriq; quid ab his permitte-
 retur prohiberetur. Sed cum metus Im-
 peratoris tum cupiditas publicæ tranquill-
 tatis, tum vero officij cura, in morem ge-
 rendo aut recusando aliquid multum habere
 momenti. In Gallia tunc nominatim Phi-
 lippi Melanchthonis nomen pronuciari au-
 ditum, inter eorum quibus nota inurebatur
 grauissimi criminis, quod rem Ecclesiasti-
 cam turbarent. Et sunt supplicia atrocía
 sumta de compluribus, tanquam desertori-
 bus Religionis publicæ, Qui Luterani ad
 vulgus execranda appellatione nominaban-
 tur.

tur. Fuisseq; magis probrosum & turpe, atq; adeo perniciosum alicui ac capitale, sic vocari, compertum est, quam parricidam aut prædonem. Cum neque res neq; caussa exploraretur aut cognosceretur, sed sufficeret ad condemnationem nominis infamia. Neq; minoris sæuitiæ animaduersiones in Belgio huius generis animaduertebantur. In Germania autem fieri discordiæ indices maiores, cum audacius reclamantibus, si qua displicerent, plurimis suis cupiditatibus indulgendo effrenatis, tum diffidentia & alienatione augeſcente Principum quidem maxime, sed & aliorum, vt quicq; huc aut illuc animis inclinabantur. Magdeburgum vrbs est ad fluuium Albim supra Oceanum, quæ aliquot annorum operibus munita, quantumuis magnam vim oppugnationis facile sustinere posse credebatur. Eius ciues Caroli Imperatoris edicto hostes appellati fuere, vt esset ciuitas in extremo discrimine. Sed eam & defensionem edere, & de implacabili Imperatoris ira conqueri, & quosdam sibi propter constantiam in sanctitate Religionis inſensos accusare. Et nullum esse peccatum delictumq; suum, neq; aliam oppugnationis causſam affirmare, quam quod puram doctrinam veritatis cœlestis retineri, neq; eam corruptelis vllis deformari, aut calliditate

tate inflecti studerent. Equidem quanquā de controuersijs Ecclesiasticis quid sentirem, nunquam vel dissimulando texti, vel negando inficiatus sum, & cum quibus me coniunctum intelligi vellem, aperte tuli semper: Non tamen etiam mihi necesse esse existimaui, neque nunc existimo, vel aliqua singulatim disputare subtilius atque limatius, vel in hos accusatorie inuehi, illorum quasi patrociniū suscipere, sed quæ iudicarem vera, ea professus à certaminibus & rixis, quæ commoueri partium studiis solent, abstinere, & meæ personæ conuenientius, & ad futuros casus prouidentius esse semper credidi. Neque hæc ostentatio prudentiæ & quasi sagacitatis existimanda est, qua neque præditum me esse fateor, & cuius calliditatem in diuinis negociis cum futilem tum perniciosam quoque esse scimus; sed tenuitatis nostræ confessio, & veræ, atque simplicis expositionis confirmatio haberi debet. Migrauerat secedendo Magdepurgum Illyricæ gentis homo, qui sibi Flacij nomen imposuerat. Fuisse enim familiare aliud ferebatur. Hic adolescens ad optimum & doctissimum virum Matthiam Garbiciū aliquando se contulerat, quem ab integritate & memoria beneficiorum in se externum collatorum, inprimis laudare possum. Neque ego hanc laudem parua, ac
potius

potius in maximis duco hoc præsertim tam ingrato sæculo. Erat idem honestatis vitæ studiosiss. & ad hanc docendo assuefaciendoq; adolescentiam non maiore cura atq; seueritate institui & adduci ægreferebat, cum intelligeret, quam disciplinæ custodia & Deo grata res & in hac vita utilis esset. Hæc sententia verissima atq; præclarissima non caruit obreftatione quorundam, quasi superflitione implicaretur. Quid enim disputando probaretur, magis iam spectabatur, quam qualis degeretur vita, & libertatis oblitterata doctrina sic reuocabatur, vt ad licentiæ infinitæ vsurpationem efferretur. Est autem profecto disputatio omnis tum demum egregia atq; illustris, ea præsertim quæ de Religionē, pietate, officio, virtute habetur, cum non modo verbis aliquid scite concluditur, sed actionibus consentaneis etiam exprimitur. Quis enim non habeat pro nugatore & sui ipsius derisore eum, qui, quæ oratione constituat, ea euertat viuendo? Sed redeat ad Garbiciū narratio. Ad hunc igitur profitemem doctrinam Græcarum literarum in Academia Tubingensi, popularem suum se tunc Flacius contulit, cum eodem ante biennium & ego venissem. Vsusq; est hospitio Garbicij pro facultatibus ipsius non illiberali, & expertus meam quoq; & aliorum beneuolentiam

neuolentiam ac studium. Inde discedens
Vuittenbergam est profectus. Eumq; hu-
manitate aliquanto maiore complexus est
Philippus Melanchthon quod à nobis adue-
nisset. Itaq; omnibus rebus cum adiuuit au-
gens & ornans hominem, suis etiam faculta-
tibus sustentans. Id quod ab ipso in promptu
erat cunctis. Non solum enim docebat dis-
cere volentes vniuersos, sed pascebat etiam
esurientes, & nudos vestiebat, bonitate qua-
dam naturæ benefaciendi cupida sine discri-
mine omnibus. Flacius qui mediocrem ser-
monis Græci scientiam teneret, in cogno-
scendam linguam Hebraicam tunc totus in-
cubuit. Magistri ibi bonarum artium titu-
lum atq; insignia assecutus est & data ei vxor,
& publicæ doctrinæ munus assignatum. Hic
siue ingenij turbulenti ferocia & ambitione,
seu malitia inscruiente voluntati alienæ:
nam de homine simulatore mirifico, in quo
nihil simplex & apertum cognosceretur, va-
riæ suspiciones fuisse: Sed quacunq; sane re
aut spe impellente, tunc Flacius sciscitari cu-
riose quid ageretur & esset in manibus, &
clanculum scripta fictis nominibus spargere,
notantia omnia quæ carerent audacia aduer-
sandi quietis consilijs. Hanc enim aiebant
esse & veritatis desertionem & corroborata-
tionem falsitatis. Quæ erat illis temporibus
& isto

& isto rerum statu admodum plausibilis & grata vulgo oratio. Sed initio astute tegere Flacius ea quæ animo agitabat, & alienationem atq; odium dissimulare. Relicta eodem tempore statione sua ad Danubium, venit Vuittenbergam Nicolaus Gallus, fugiens periculum imminens in illarum regionum ciuitatibus ijs, qui reclamarent Augustæ decretis. Cum quo Flacius statim familiarissime se coniunxit, & discedentem sic, vt nihil præ se ferret inimicitiarum aut simultatum, paulo post clandestino abitu secutus est. Et confederunt ambo Magdeburgi, exitiosæ peruiaciæ adiutores & incitatores strenui & vehementes. De huius vrbis consilijs acti-
onibusq; etiam fortuna, nihil modo dicam. Quæ obsidionem excitato bello tamdiu tulit, quamdiu illa in penuria ad extremum rerum necessariarum pene omnium & summis difficultatibus sustineri potuit. Sed qui bello huic gerendo fuerant præfecti, ijs si Magdeburgici maturius fidem habere voluissent, futurum fuisse existimatur, vt citius ijs malis liberarentur, quibus tandem fracti, deditio-
nem facere sunt coacti. In regionibus Mis-
nicis res erant per se illæ quidem tolerabiles, vel satis etiam bonæ, si non calumniosa infe-
statione vexarentur. Ipse quidem Philippus
ex illis perturbationibus & quasi tempesta-

tibus tantum doloris cœpit quantum alijs nemo. Sed cum aliorum vel improbitate vel leuitate caussam occasionemq; eis datam esse, & culpa se vacare sciret, faciundum sibi statuit idem, quod medici fideles solent, qui & misericordia ægrotantum afficiuntur, & morbum, si possint, sanant, si nequeant, non tamen augent, & neq; ope sua destituunt depositos, neq; non necessaria acerbitate affligunt. Nam qui temere remedia adhibent, quibus vita interemta tollitur morbus, illis ea gratia debetur scilicet quæ siccarijs. Considerabat Philippus Melanchthon conuersionem vna cum rebus mutatis animorum. Videbat quàm multa contra opinionem omnium accidissent, & posse alia accidere similiter intelligebat. Erat hoc igitur rectissimum & tutissimum: Salua & integra & incorrupta doctrina cœlestis veritatis, cui labem iniuri aut aspergi maculam ferendum non esset, de cæteris quæ temporibus & locis diuersa semper fuisse constaret, ita conueniri, vt vel mutatis vel nouatis aliquibus tranquillitati consuleretur. Etsi in eo ipso falli aliquos eum non fugiebat prouidentem vna parte pacatis rebus, nihilominus alijs turbas excitatum iri. In his igitur quasi procellis & ista tempestate, non currendum huc illuc putauit, neq; excedendum, ijs locis, in quibus
sine

sine impietate ad Deum & culpa ad homines non improbos neque iniquos, consistere liceret, & transeundum eo, ubi neque extra periculum & maximis itidem in curis molestis atque angoribus futurus esset. Hominum autem praesidia vel urbium munimenta, quibus protegeretur quaerere, clamoribusque importunis tumultuari, & quasi tribunitio furore maledictisque vesanis in quoslibet debaccari omnino noluit. Quodque semper fecerat, ut frena laxari cupiditatibus hominum & auram popularem atque plausus captari oportere non censeret, id multo magis tunc praestandum esse statuit, neque ut de aliquo veluti editiore loco ad arma infeliciter paulo ante sumpta aliquos denuo vocaret, vel se decere, vel placere Deo, vel ad ullam spem bonam conducere est arbitratus. Itaque in hoc immotus perstitit, quicquid Flaciana factio diceret ac moliretur. In Flacio perfecta cognitio linguae Germanicae nunquam fuit, sic, loquendi scribendique diserte ut facultatem adipisceretur. Sed libelli ipsius nomen praefidentes passim prodibant, quos pro suis ille agnoscebat. Erat autem eadem cantilena omnium, de iis qui apud Principem Mauricium illis temporibus remanerent & Ecclesijs scholisque conservandis navarent operam, In quibusdam etiam conniuentes

dum disiecta recolligerentur & ordinarentur confusa, & res essent in regionibus illis mediocri in statu tranquillæ. Cum autem quæreretur de ijs, quæ quasi indifferentia seruari aut omitti impium esse non videretur, Philippus Melanchthon edito scripto luculenta hoc breuitate explicauit, & definiendo solerter & exemplis illustrando. Sed nihil proficiebatur ad eos, qui neq; audire quæ dicebantur, neq; ad ea quæ demonstrabantur, aspicere volebant. Qui & verbositate indiferta, & nominum mirabili ignotaq; specie fucum faciebant & imponebant multitudini imperitæ, Interemistas & Adiaphoristas eos per ignominiam appellantes, à quibus secesserant. Quorum omnia dicta & facta in deteriorem partem interpretando rapiebant, pronunciantes etiam audacissime de cogitationis. Petebatur tunc conuicijs impudentibus non Philippus modo & alij, sed Reuerendiss. etiam & Illustriss. Princeps Georgius Pr. Anhaltinus, cui ne mortuo quidem scelerata petulantia pepercit. Nec non improbissimorum partim mendacia, partim simulatio cuiusdam ardoris in veritate asserenda, partim etiam alia, quæ talium temporum miserijs compræhenduntur, tantum efficere potuerunt, vt docti & pij nonnulli inq; his nobiles atq; Principes viri, aliquid ab eis dici initio

initio crederent & ipsorum fauerent conatibus. Sed tum capita huius factionis Flacius & Gallus Magdepurgi declamabant & libellos atq; picturas diuulgabant contumeliosas in personas & rationes eorum, qui ipsorum temerariam vel certe præposteram vehementiam improbabant, & abhorrebant à turbulenta peruersitate. Inde cum vrbs defendi amplius non posset, digressi, in alijs deinde locis tanquam turbo vastitatem & strages dederunt, admissio Flacio Ienæ qui Theologiam doceret, & reuerso Gallo in priorem nidum ad Danubium. Cum his quasi conspirauerant & alij contra Philippum Melanchthonem & eos, qui in Academijs & Ecclesijs Misnicis docebant. Aliquoties autem iubente & volente Principe Mauricio conuentus diuersis locis acti sunt. In quibus illi clamatores corrumpi doctrinam puram atq; sinceram odiosissimis criminatibus disseminabant, adeo vt non paucis vbiq; suspecta redderentur omnia, quæ tum in Misnicis regionibus suscipiebantur & fiebant. In quibus tantis tempestatibus periculo se iactari Philippus Melanchthon & ad durissimos offensionum scopulos allidi, cum nihilominus cursum directum ad veritatem æternam teneret, neq; immutaret velificationem quantumvis reslantibus ventis, in diui-

næ gubernationis certa fiducia. Versute autem cauillari isti noui Magistri pene syllabas in omnibus quæ à Misnîcis proferebantur. Neq̃ pudebat falsa & ficta ingerere & secundum hæc perfricta fronte pronunciare, & optima scripta vituperare, & homines innocentissimos condemnare. Cum ipsi nihil vtilitatis in commune docendo afferrent, omne studium in maledicendo, obtrectando, insectando, criminando ponentes. Dicat enim, qui potest, quid nam obscuri ab his illustratum, quid ambigui definitum, Quod dubium amotum, deniq̃ quod lumen doctrinæ Ecclesiasticæ illatum sit? At liquet turbas ab his perniciosas esse datas, datas causas occasionescq̃ dissensionum & alienationum, data damna inimicitiarum, affectos tristitia bonos, conciliata gaudia malis, ereptum vsum fructumq̃ suauitatis & caritatis mutux, impeditos congressus salutare, quibus veritatis cœlestis doctrina & confirmaretur & illustraretur. Hæc facere se illi tanquam ardore quodam mentis religiosæ aiebant. Cum interea distraherent & violarent nefarie societatem fraternæ conjunctionis, & à ciuibus recederent, non fu-gerent hostes. Visiq̃ mihi hi idem facere sunt, ac si quis exquisitè confectas subductasq̃ ab aliquo rationes reijcere & confun-
dere

dere audeat, vt ipse edat & subiiciat nouas. Nam quid agere aliud? quam quod disposita & collocata apte & splendide, diligentius atq; studio inprimis Philippi Melanchthonis conuellere dissipareq; sunt aggressi. Sed caritæ istorum volaticæ ac scurriles & euanuere magna iam ex parte, & penitus aliquando euanescent, manentibus ac mansuris grauibus atq; solidæ doctrinæ refertis scriptis Philippi Melanchthonis, dum studium non intercidet cognoscendi & sequendi incorruptam veritatem. Proponebantur in Misnia capita libri Augustani, deq; illis iuebantur Theologi sententias dicere. Non enim Princ. Mauricius sine exceptione assensus fuerat decreto, quo liber ille quasi omnium ordinum iudicio approbatur, sed promissa Imperatoris de Religione vrgens, & quid ipse suis esset pollicitus commemorans, ostenderat sibi necessitatem imponi, vt ad suos ea de re referret. Id non negligi vt constaret, diuulgata capita quædam fuerunt, de quibus quæsitum Lipsiæ fuerat, perscripta illa quidem moderatione ea, vt à constantia in veritatis cœlestis sincera doctrina ne transuersum quidem, vt dicitur, vnguem recederetur, sed quibus tamen tempus rerumq; mutatio obtrectandi daret occasionem. Quam improbitas maleuolorum & turbulentorum

tunc cupide arripuit, & ea prolixè vsa est. Anno autem Christi M. D. XLV. prius omnino quam somnare aliquis posset Augustani libri compositionem & editionem, volente Principe Mauricio R. & Illustrissimus Princeps Georgius Princeps Anhaladinus conuocauerat Lipsiam præcipuos Theologos & Misnicarum Ecclesiarum præfides, eos fere, quibus cura illarum commissæ esset viuentè adhuc Princ. Henricho Princ. Mauricij patre, ætate plærosq; senes, spectatæ dignitatis & vitæ honestate celebres omnes, vbi de communi concordanteq; omnium sententiâ, administrationis ordo descriptus, & ratio tam doctrinæ, quam rituum informata fuit. In quo libro omnia ea ad eundem modum continebantur, quo tunc capitula illa, de quibus diximus, promulgauerunt. Atq; licet ex his etiam perspicere quantum sit situm in temporibus. Tunc enim certe cum ista tractata & conscripta sunt, si ederentur, nemo repræhenderet, ac laudarent potius omnes. Iam vero prolata eadem tam contumeliose respuerunt isti, qui ipsi soli fulcire Ecclesiam & huius ruinas prohibere se, credi postulabant. Et si tragædiæ istæ quas excitarunt, commenta tantum suspicionum, & falsæ coniecturæ argumenta, & suæ acerbitalis odijq; interpretationem & tempo

temporis occasionem continebant. Quæ ad vulgus imperitum momenti habebant plurimum. Diligentiores autem celeriter, quoniam tenderent, depræhenderunt. Philippus Melanchthon quo ista suadente non instiguebantur, quicquid præ se ferret potius ab omnibus talibus illo tempore consilijs actionibusque voluntatem alienam, Non tamen studium operæ suæ rebus communibus voluit denegare. Atque veritatem doctrinæ religionisque sinceram integritatem retinere constantissime perseveravit, De cæteris non existimavit vel opus esse, vel omnino expedire ut dimicaretur. Neque ego ab illis dissentio, qui de isto libro decretum maximorum malorum causam fuisse censent. Et hinc enim quæ incommoda distractionum extiterint, patet, & quid denique futurum sit magnopere metuendum est. At enim quorum hæc culpa sit, reperiendum, & eos insectandos arbitror, non furioso latratu & indignis convicijs appetendos quoslibet. Sed cum amantibus rixas & qui pascuntur contentionibus, frustra disputatur, præsertim ad omnia tanquam clipeum Religionis sanctissimum non obijcientibus. Horum itaque tanquam rabiosicanis impetum, quoad conceditur, declinando vitantes, conficere curriculum illos suum sinamus, & attexamus reliqua.

Eadem

23

Eadem tempestate cum nescio quo pacto de laudabilium piarumque actionum, quæ operum bonorum nomen habent in Ecclesiastico sermone, necessitate, renouatæ essent disputationes, quidam tumultuosissime refellere non dubitarunt & veras neque ambiguas aut incommodas de illa sententias, cum plurimorum grauis. offensione. Idque crimen statim in Philippum Melanchthonem quoque tanquam telum intendi, & iam illius alijs quoque in partibus scripta lacerari atque capi, inque primis refutari tradita de hominis voluntate, de conuersione ad Deum mentis humanæ, De Euangelij proprietate & natura, eoque res progredi, ut consultatum sit in istorum conuenticulis de prohibenda lectione certorum librorum Philippi Melanchthonis. Sed huic conatui prudentia pietatis obstitit & eum repressit. Ut autem apud Homerum Ageleos monens procos, ne temere quasi effundant simul iacula omnia, sed coniungant aliquot certo numero ac ordine petentes Vlystem,

*Iuppiter aspiret nobis (inquit) si forte fauorem
Ut nostris manibus cadat interfectus Vlysses,
Et nostrum victrix hæc Martem fama sequatur,
Namque alios, vno hoc occiso, nil moror omnes:
Sic varijs diuersisque calumniarum obtrectationumque quasi venenatis sagittis nomen & existit*

existimatio bona Philippi Melanchthonis
 proposita erat vna ad configendum, quod
 ipsius autoritate veluti confossa atq; extin-
 cta, cæteros omnes non admodum formi-
 dandos esse ducerent. Sed haud scio an ali-
 quanto patientius tulerit iniurias istas Phi-
 lippus Melanchthon, quam oportuerit, atq;
 tolerando quam repugnando fuerit fortior.
 Verum de hoc ipso fortasse postea plura di-
 cemus suo loco. Venerat Norimbergam
 ex Bauaris ante multos sane annos Andreas
 qui familiæ suæ nomen penè ridiculum mu-
 tauerat in Osiandri, vnde sonus non longis-
 sime recederet. Is, quod Hebraicarum lite-
 rarum cognitionem profiteretur, in Augu-
 stiniano cenobio doctrinæ suæ primum mer-
 cedes quasdam accipiebat, carus ob ingenij
 acrimoniam & studium industriamq; erudi-
 tis, præcipue Bilibaldo Pircamero dignita-
 te honoribusq; & sapientia doctrinaq; Præ-
 stanti viro, quos tamen deinde rusticitate
 morum & præfracta animi elatione ab se
 plerosq; alienauit. Commendatus autem
 primoribus ciuitatis facundia sua potissi-
 mum, concionibus in æde Laurentiana ha-
 bendis est præfectus. Consecutus fuerat au-
 toritatem primis contentionibus de religio-
 ne, cum monachis iam corruentes supersti-
 tionēs retinere cupientibus vehementer re-
 stitisset,

stitisset, & coram Antistite Pabepergensi de illis controuersijs copiose cum plurimorum admiratione & applausu disputasset. Iam autem promulgatione libri Augustani vel rogatione potius illa in Germania passim motus periculosos miscente, arripuit occasionem relinquendi eam urbem, in qua dignitatem & aliquid facultatum fuerat adeptus, contulitq; sese in Prussiam, vbi & ipsius audacia & quorundam aduersantum illi importunitate, eæ contentiones sunt excitatæ, quæ totam fere Germaniam pertraserunt, ingentiumq; odiorum, turbarum, iurgiorum fuerunt causæ. Cum & nouitate disputationum Osiandricarum animaduersiones atq; notationes plane censoriæ aliorum excitarentur, & in refragando quisq; maxime fortis atq; acer videri cuperet. Osiandrum sane, qui ingenio naturaq; esset eccellente, & doctrina variâ ac multiplice, & facultate præclara in pronunciando quæ cogitasset præditus atq; instructus, Non cauisse apparet ne oppugnando alios, & suspectam formam doctrinæ callide introducendo, nouas quasi secures impingeret Rei Ecclesiasticæ. Estq; ab hoc Philippus Melancthon & ipse spurcissimi scripti atrocibus contumelijs appetitus. Neq; possum in animum inducere vt credam ipsum autorem
tam

tam vecordem fuisse, quin illius cum quoque
recognoscentem forte puduerit. Tulit et-
iam hoc æquissimo animo Philippus Me-
lanchthon, & in simplice, vera, puraq; do-
ctrina excercenda perrexit, quæ ipsa esset
responsio grauissima & firmissima defensio
ad omnia. Atq; ego scio Philippum Me-
lanchthonem tam inhumaniter acceptum ab
Osiandro, postea tamen sæpe honorifice eius
meminisse, recordantem veteris consuetu-
dinis necessitudinem, camq; illi laudem tri-
buisse quam deberi fatebatur, scientiæ multa-
rum cognitione dignarum rerum præclaræ.
Atq; nos in hac narratione studuimus, id
quod ante oculos versaretur, neque dubium
aut controuersum esset, de quocunq; nomi-
natim aliquid recensuimus, commemoran-
do exponi: Quæ sunt nimirum vel dicta ali-
cuius vel facta, vel his, vt ita loquar cogna-
ta atq; inhærentia. Non enim is ego sum
qui de aliorum consilijs & proposito atq;
sententiâ pronuntiare soleam. Hæc enim
occulta sunt, quæ suspicando detorqueri
maleuolentiæ est & odij, extollere vero al-
tius ab integritate alienum. In quo vtro-
que, priore tamen magis, sibi licentia seculi
huius nimium indulget. Enimuero vbi di-
ctum factumue & manifestum neque ambi-
guum extat, licet, vel oportet, vt opinor, id
de eo

deco commemorari, quod congruit veritati. Sed alia sunt aliorum cum ingenia tum voluntates, tum studia quoque. Prauitatem sane vel procreatione insitam vel usu contractam tolli emendando, non corroborari excercendo conuenit, cui quid prætendi possit quærere, extrema est peruersitas. Scripsitque hoc præclare Iustinus Martyr, Naturam uiuendo sequi esse eius, qui nondum peruenerit ad Fidem, At æmulationem Inuidiæ, longe adhuc à veritate abhorrentis ac remoti. Quapropter ne quis seipsum decipiat, neque specie simulationeque fallatur. Nam reperiuntur qui iracundiæ in repræhendendo & insectando quoslibet audaciæ, atque etiam conuiciorum acerbitatem scripturæ sacræ & sanctorum hominum autoritate exemplisque defendant. Quorum si vires cupiditatis responderent, iamdudum iacerent demissa orco aduersarij. Quantum tamen in ipsis est & damnando & supplicia decernendo, & maledictis insuper ingerendis satisfaciunt acerbitati suæ. Quantum enim vidit ætas nostra scriptorum, quantum dictorum audiuit de suspicionibus & opinionum coniecturis? Quoties concurrentes aliqui clandestinis operis, modo doctrinæ neque necessarios neque opportunos tractatus, modo disputationes superuacaneas & verborum magis

magis strepitu quam rerum pondere niten-
tes atq̃ fultas, modo etiam sauas & contu-
meliosas in alios accusationes instituerunt,
composuerunt, ediderunt? Quibus nihil ni-
si præliorum & belli causæ darentur. Cum
autores inter quasdam veluti scenicas exul-
tationes personis prodirent alienis tanquam
veteres heroes cum cothurnis atque sceptro,
vehementiam & libertatem orationis iactan-
tes, & volentes esse superiores vbiq̃, idq̃
valere tantum quod ipsi statuissent, & affe-
ctando oris liberi copiam fucum facientes
imperitis, specieq̃ ista libertatis grauissime
fauciantes bonam aliorum existimationem,
& quietis diuinum donum perturbantes.
Huiusmodi autem hominum profecto animi
contentio & propositum sententiæ periculi
plenum est, dumq̃ cedere nunquam volunt,
sed victores esse aliorum omnium, sit fere,
vt ea victoria potiantur, quæ est tristis. &
prouerbio Græcorum Cadmea perhibetur.
Atq̃ ista in hac narratione reticenda, & ta-
lia vitia silentio, quin notarentur, prætereun-
da non fuerunt. Vt autem ad rem redea-
mus, Multas amaras tunc quasi potiones vt
dicitur, hausit Philippus Melanchthon &
concoxit tacendo atq̃ tolerando. De quibus
omnia sunt in medio, neq̃ suspicando à no-
bis fingitur, aut argumentando exquiritur

fere quicquam. Iam vero ne mortuo quidem parcitur sed dissentientum quoque, ut diximus, proteruitas in illo infamando insolentiaque concordat. Si inuidia impellente, quanta sit generis istius improbitas ex eo apparet, quod nouam ac inusitatam illud viam ingreditur, cum Inuidia tanquam ignis materia deficiente, extingui & delabi in cineres obliuionis post alicuius mortem soleat. Sin odio incitante: cum oderint eum quem boni omnes amarunt viuum, & mortuum singularis beneuolentiae memoria cohonestant, quales ipsi perhiberi possint, si sciperent, poterant cogitare. Sed nominis scilicet aliqui celebritate offenduntur, & ea oppressa fore ut ipsi emineant, confidunt. Ita sane se res habet, ut omnibus temporibus vera atque solida virtus rara, nunc rarissima sit, cumque perpauci sua virtute excellere & quasi in altiore locum peruenire valeant, plerique alterum criminando & contumeliarum insidijs appetendo, aut etiam impudenter insectando, ut conspiciantur, ascendere nituntur. Hoc quale sit patet. Non certe praestantiam & amplitudinem promittens, sed afferens sceleris amentiaeque ignominiam, ut illud agentes & stultitiae & prauitatis coargui posse videantur. Sed quod aggresso hoc expositionis opus inuito necessitas imposuit

fuit vt non omitterem , in eo neq; longior
 neq; diligentior sum futurus. Vt igitur ad
 Osiandri mentionem reducatur oratio , Fuit
 is & ingenio acri præditus & haud vulgari
 doctrina instructus , sed animo & elato &
 admodum confidente & moribus nequa-
 quam moderatis atq; suauibus. Hæc na-
 turæ interdum vitia educatione liberali &
 disciplinæ diligentia corriguntur, Quæ Osi-
 andro defuisse constat. Sed confectio ille cur-
 riculo vitæ suæ in Prussia mortuus, & splen-
 dido funere elatus atq; honorifice est sepul-
 tus, Anno Christi M. D. LII. XVI. Cal. VII
 br. apud Regiummontem. Redeundum
 autem est ad superiora tempora , vt narratio
 ordine procedat, Quæ quidem perquam tur-
 bulenta fuerunt & non modo curis & anxie-
 tatibus animi, sed corporis quoq; laboribus
 atq; defatigatione Philippum Melanchtho-
 nem grauiter afflixerunt. Anno Iesu Chri-
 sti M. D. XLIX. incipiente mortuus est cum
 ingente Philippi Melanchthonis dolore &
 tristissimo desiderio amici carissimi, Caspar
 Cruciger diuturno languore confictatus &
 grauissimis, ob ea quæ tum gerebantur, per-
 turbationibus debilitatus. Ita autem obiit
 mortem, vt ardentiss. precibus opem diui-
 nam sibi & propter religiosæ pietatis studi-
 um periclitantibus cunctis imploraret, &

vitam suam traderet in manus Iesu Christi
authoris salutis vnici, cui seruierant fideliter
studia ipsius, & quem sanctissime coluerat.
Hunc condiscipulum non multum ætate in-
feriorem habui in puerili institutione Lipsiæ,
cum vno & Præceptore atq; Magistro Ge-
orgio Helto, & Doctore literarum Græca-
rum familiariter vteremur Ricardo Croco
Britanno. Erat autem in eo puero tanta sta-
tim ingenij vis, vt quæ cæteri nos magno la-
bore vix perdiscebamus, ea ille sic celeriter
cōprehēderet animo, vt ludere & iocari vide-
retur, nobis admodum serio omnes, vt aiunt,
neruos contendentibus. Perpetuam autem
consuetudinem hanc seruabat, vt in dissimu-
lando scientiam, quæ erat in eo multiplex
variarum rerum, perseueraret. Nihil in eo
ostentationem habebat, nulla gloriæ aut no-
minis præstantiæue cupiditas animaduerte-
batur. Studiij labores suscipiebantur perfe-
rebanturq; incredibiles, sed tam occulte &
quasi furtim, vt familiarissimi etiam de ijs ce-
larentur. Morum vitæq; maxima erat in illo
honestas atq; probitas, & in quotidiano qui-
dem conuictu suauitas perquam amabilis,
ergaq; omnes summa humanitas, In negotijs
autem gerendis & fides & grauitas spectata.
In loquendo admodum parcus. Ad omnes
vero iuuandum consilio opeq; promissus.

mus. Cogitationes ipsius sapientes, oratio
circumspecta, insignis taciturnitas, Fides
certa. Quibus eximiam autoritatem ille
consequabatur, & dignitate excellebat. Ne-
que inueniebat facile apud se alium Philip-
pus Melanchthon cui sua consilia confiden-
tius crederet, aut cum quo liberius commu-
nicaret sententiam rationesq; suas, aut cuius
iudicio plus tribueret, quam Casparem Cru-
cigerum. Quem cum tanti fecisset & tam
vehementer dilexisset, morte ipsius non po-
tuit non in luctu mœroreque ingente versari,
ea præsertim quæ ante tempus illi accidisse
videri posset. Excessit enim è vita hac con-
fecto anno ætatis suæ quadragesimo quinto.
Iam & obsidio vrbis Magdeburgensis mul-
tarum variarumque difficultatum causas da-
bat, Et Imperatoris Caroli in exequendis ijs
quæ ordinando edicendoque instituerat, stu-
dium paulo ante remissius visum, rursus
intendi, neque de seueritate demonstrata
multum remitti. Non paucis igitur in locis
religionis causa aut tumultus excitabantur,
aut mutationes fiebant non periculosa mo-
do, sed perniciose etiam. Et publicata iam
erant hoc tempore Anni M. D. LII. literæ
quibus Synodus Oecumenica à Pontifice
Romano Iulio III. qui ante legatus præse-
derat in Tridentina & Bononiensi, rursus

indicebatur, & Tridentum denuo omnes qui adesse deberent & à Pontifice Paulo III. vocati prius fuissent, se conferre iubebantur. Hoc Imperator Carolus, ægre & vehementer vrgendo Pontificem, tandem obtinuerat. Præfiniebatur autem dies Calend. Maij conuentui, & exordio actionum, quibus Paulina illa Synodus continuaretur. Carolum Imperatorem magnopere studere rem ad legitimam cognitionem deduci apparebat, quam sciret Synodi Oecumenicæ esse propriam. Sed ita & fuerant ante Synodi indictæ, & ex literæ de hac scribebantur, vt non deessent qui suspicarentur, à Pontificijs nihil peius metui, quam ne procederent instituta negotia. Ipsum etiam Imperatorem tales literas non probasse existimabatur. Sed sunt illæ recitatæ in confesso Principum Augustæ, vbi tum conuentus ordinum Imperij agebatur. Qui ita solutus est, vt Imperator, ad Synodum celebrandam & frequentandam, cunctos accurate & vehementer hortaretur & admoneret, seq̃ propius accessurum & propugnatorem omnium defensorumq̃ actionum fore policeretur. Non etiam intermittebat vrgere vniuersos, vt ea, de quibus Interim seruandis, dum Synodus Oecumenica aliud decernet, liber editus fuerat, exequerentur perficiendo. Et ideo
cum

cum alijs locis magnopere trepidatum fuit, tum Argentoratum varîe & multipliciter vexatum. Estq; mortuus in Britania Martinus Bucerus, cum quo Philippo Melanchthoni magnus fuerat familiaritatis vsus, Itaq; morte eius non paruum dolorem eum accepisse intelligebatur. Non putauî alieum hoc loco de Bucero pauca vltra superiorem mentionem commemorare, cuius nomen apud quosdam mirifice inuidiosum fuisse constat, cum illius neque studium prauum neq; operæ peruersæ, multo minus improbitas aut malitiâ depræhensa sit. Patriam hic habuit Vucissenpurgum oppidum ad Rhenum situm. In pueritiâ autem id quod multis accidit, literis & aliâ doctrina sic fuit institutus, vt finis proponeretur in re Ecclesiastica muneris alicuius functio. Vnde postea factum est, vt se daret in familiam seu sodalitatem Dominicanam, spe, vt videtur, vitæ melioris atq; sanctioris. Verum offensus, vt alijs quoque, superstitionum impietate (quæ iam ne specie quidem aliqua religiosæ pietatis occultarentur, sed cum doctrinæ falsitate, tum rituum pene iocularium vsurpatione manifesto depræhenderentur, quos vulgo etiam deridere pleriq; inciperent, accedente præsertim vitæ atq; morum dissolutione) deseruit illam congregatio-

nem, & euoluit se erroribus quibus temere fuerat implicatus. Versatus deinde fuit aliquantisper apud Franciscum Sickingensem, qui in graui motu suscepti belli difficilis, quod periculosam seditionem excitaturum esse nobilitatis concursu multi metuebant, in sua arce Landestallo oppressus mortem obiit Anno Christi M. D. XXIII. Postea Argentoratum Bucerus se contulit. Vbi studio & diligentia magna concionando populum docuit, & multa opera scribendo edidit, quæ comperio doctis & veritatem amantibus præclara & vtilia videri. Inprimis operam dedit vt controuersia, quæ tunc quædam Ecclesiarum consentientum pacem tranquillitatemque turbabant, dirimerentur & restitueretur concordia. In quo nihil laboris aut defatigationis recusauit, vel non potius cupidissime suscepit atque pertulit. Quod crederetur autem esse ingenio placido ac miti, adhibitus deinde quoque fuit ad consilia actionesque consensionum, & tollendorum dissidiorum. In quibus tractatibus moderatione sua cauit, ne nimis offenderentur aduersarij, neue omnem concordiaæ spem abicerent. Itaque opinione de eo satis bona accersitus fuit Augustam, cum liber ille concinnaretur sententiam Imperatoris pronuncians, De his quæ, Interim dum Synodus co-

gere

geretur, fieri seruariq; oporteret, de quo supra dictum est. Sed frustratus est expectatio nem plarorumq; & conceptam opinionem fefellit, improbando aperte scriptum illud, & demonstrando insidias atque corruptelas. Quod igitur tum Imperatoris potestate tam late patente, vt aliorum quorumuis ditioni subiecta loca complecteretur, neque Argentorati neque vsquam in Germania tutus videretur fore, ita accersitus perquam honorifice in Britanniam se contulit, vbi, vt diximus, obiit hoc anno mortem. Orto autem bello Parmensi, Synodo, quam Imperator Carolus non modo procedere sed maturari maximopere cupiebat, impedimenti non nihil & moræ illatum fuit. Quo tempore obsidione Parmam & Mirandulam Cæsareanæ Pontificiæq; copiæ cinxerunt. Sed Imperator nihilominus rem apud omnes vrgere, missisq; literis instare vt ad Synodum vndiq; conueniretur, & metum periculî, ne qui illum prætereundum iure possent modis omnibus adimere, ac tuto cunctos & venturos ad Synodum, & ibi futuros indeq; decessuros esse policeri, deniq; securitatem quocunque pacto posset addere. Magnopere fuerant omnes conturbati rebus atq; negotiis post victoriam Imperatoris Saxoniam susceptis atq; gestis. Et quoniam conuentus

nominationem criminationem complectebatur, eorum tantum de quibus controuersia iam dudum erat explicationem continens, non visum tamen est cum alijs ipsum communicare, nonnullis Principibus viris & ciuitatibus hoc magnopere expetentibus. Et aduenire ea de re Legati quidam Theologi Vuirtenbergenfes & Argentoratenses, Et attulerunt librum ad eundem vsum conscriptum à Iohanne Brentio, Qui apud Vuirtenbergensem Ducem Illustrissimum Principem Christophorum Vlrichi F. postquam ex Sueuicis Salinis discesserat, erat in singulari precio & existimatione, in maximo honore, quamuis occultius aliquanto, habitus, cum Hispanica præsidia adhuc detinerent præcipua in illis terris loca, quæ hoc anno tandem fuerunt educta, restituta libera Principi suorum possessione, post ingentia damna data regioni Vuirtenbergenfi, non modo direptione facultatum & detrimentis fortunarum, sed morum simplicis & probæ gentis corruptela, & integrioris vitæ dissolutione. Quam cladem vastitate agrorum & pecuniarum rapinis boni omnes grauiorem fœdioremque duxerunt. Cum Iohanne Brentio antiqua necessitudo intercedebat Philippo Melancthonî, & hunc Princeps Vuirtenbergenfis paulo post eximio fauore complexus & dignitate

gnitate & opibus auxit. Sed id scriptum
quod à Philippo Melanchthone compositum
fuisse diximus, congregatis in Synodo obse-
rendum, cum ijs, qui illarum rerum causa
in Misniam venerant, tandem communica-
tum, & postea conuentu Vuittenbergæ acto
ab alijs compluribus coram quibus recita-
tum fuerat, approbatum, & tandem editione
quoque repetitæ Confessionis Augustanæ
titulo, diuulgatum est. Interea autem dum
hæc cura atq; sollicitudo excercet Philippum
Melanchthonem oritur aliud malum, & ex-
citur tempestas, quæ mirifice perculit om-
nium bonorum animos, & eripuit spem fe-
licis euentus, quod ad tractatus quidem de
Religione pertineret, vniuersum. Cunctis
enim sperantibus fore, vt congregatis iam
ijs, qui de controuersijs Ecclesiasticis cogno-
scerent, res essent vbiq; interea quietiores,
cum præsertim existimarentur in illa Syno-
do affuturi causamq; dicturi, ij qui defectio-
nis insimulabantur: Et, hi quo tutius veni-
re ad Synodum ibiq; liberius versari, & om-
ni metu adempto negotium gerere possent,
D. Mauricius perfecerat, vt non modo Im-
peratorio diplomate ea fides daretur, sed
autoritate etiam Synodica confirmaretur:
Hac igitur in spe atq; expectatione homi-
num, noui terroris & magnarum perturba-
tionum

tionum occasio data est. Nam de improviso Augustæ decem curantes docentesq; in Ecclesia, cum quibusdam in ludis literarum Magistris, coram Antonio Granuelano Præsule Atrebatensi maximæ apud Carolum autoritatis, iussi fuerunt apparere. Is sibi adiunctis præcipuis Imperatoris consiliarijs, in ipsorum doctrinam inquirere, & vehemente oratione eos increpare, & ne à contumelijs quidem abstinere, deniq; inhumanissime & durissime acceptos ita dimisit, vt tyrannico edicto vrbe eijceret. Eandem acerbissimam & aliæ ciuitates Sueviæ tunc expertæ fuerunt. Quod factum tam sæuum sermones querelasq; varias commouit, & animos bonorum mœsticia compleuit. In quibus Philippi Melanchthonis cogitationes erant imprimis tristes, & oratio audiebatur cum seuera, tum miseriam infelicitatemq; nostræ ætatis deplorans. Commemorabantur autem tum à nonnullis ea incommoda atq; mala, quæ alios præstantes ingenio & vsu maximarum rerum considerare oportuisse existimabatur: Eos præsertim qui potuissent auertere, cum ipsis nihil nisi in mœrore & anxietate lacrimæ concederentur. Hæc erant istiusmodi fere: Dissensiones de Religione non esse similes aliarum, ac tales potius, quibus potentia moderari, quasue coercere ac reprimere

reprimere vis vlla nequeat. Sed esse de his cognitione & iudicio opus, propterea quod animi impediuntur metu, ne quid impietatis concipiant. Quod si ita affectos cogere velis, apud fortiores nihil sis profecturus. Viam enim hi amittent potius, quam mutant sententiam. Immo hanc aliqui laudem affectabunt, vt in confessione veritatis afflictii esse dicantur. Alios reddideris improbos ac malos, qui iam dicere facereque non dubitent quiduis, quique commutare dominos per occasionem libenter velint, denique infidi hi erunt & leues. Si enim in rebus humanis, cum id proditur, quod verum rectumque esse aliquis decreuit, ex eo vitio proditores amicitiarum & Rerumpublicarum nasci comperitur: Qui a persuasionem veritatis diuinæ metu aut spe depellitur, & de illis rebus contra animi sententiam iam loqui sustinet, eumne quis vlli mortalium fidelem fore putabit? Dicit aliquis, redire hos in viam, neque eam esse veritatis desertionem, sed erroris. Id tum demum fortasse dici posset, si rebus disputatis & explicatis, sublataque dubitatione, abessent minæ, terrores, violentia, illecebræ obsequij, & spes emolumentorum. Itaque de quodam Arianae sectæ legimus, quod, cum intellexisset vnum orthodoxum ex amicis præcipuis, amplecti illam doctrinam, sibi grati-

gratificantem, indignatus animo iusserit caput ipsius ceruicibus abscindi, cum quidem increpans eum dixisset: Terte ego posthac mihi fidelem fore confidam? qui hominis causa fidem fregisti, datam Deo. Sed contra Imperatoris decreta hoc aut illud commissum omissumue esse aiunt. Iis scilicet in rebus, de quibus semper hoc in promptu est: Magis Deo quam hominibus. Constantinus Magnus cum de religione orta controuersia statuæ ipsius à concitata multitudine euerse fuissent, quæstionem ea de re haberi noluit, ne religionis negotia cum profanis permiscuisset perhiberetur. Quæ vota quam longo tempore fuerunt bonorum etiam sic satis bonorum, ut de religione suscipi fierique cognitionem potius priusque studerent, quam qui deberent ac possent, quam aliquid edicendo constitueretur, quod neque duraturum, & in aliorum dicta, in aliorum manifestas reprehensiones reclamationesque incursum esset. Quam multi sunt anni, quibus expetitur, ut necessaria maxime omnium, legitima cognitio de controuersijs Ecclesiasticis? Hæc res cum tandem magno labore perfecta putaretur, & cognitio illa esset inchoata, talibus actionibus eam interturbari non oportuisse plerique censebant. Non hi quidem disputantes quomodo negotium illud cognitionis institutum

stitutum esset, aut quid eo quæri videretur, sed hoc perpendentes: si illi, qui nollent & negarent posse ea probare & admittere, quæ differendo notassent & essent infectati, Illi igitur, si cogerentur dubia & incerta iam amplecti, aut si renitentes exterminarentur, quænam Synodus illa futura esset, ad quam vel non integrum venire iam quasi deiectis de iure disceptandi, aut venire esset necesse debilitatos atq; fractos, cum liberæ tantarum rerum tractationes promitterentur, & plurimi esse tales iudicarent foreq; sperauissent. Dolebat quibusdam, non saltem respectum fuisse quendam habitum maleuolorum. Non enim possunt certe omnium voces & ora interminando occludi. Quid igitur maleuolium dicere possent non cogitatum, neq; circumspectius res istas fuisse gestas, moleste ferebant aliqui. Quod negari non posset, dissentaneum esse, in ipso articulo ostensæ cognitionis talia facta fieri, quibus iudicij omnis libertas adimi videretur. Cum tamdiu aliquos tulerint, quædam dissimularint, & vt pater adolescentis, quemadmodum ex nescio qua fabula vetere adducitur, Comici, quamuis ille oleret vnguenta, tamen odorari se negat: Sic isti quanquam essent in conspectu, quæ improbarent, tamen oculos auerterint, nunc vbi dies venit, quo decernatur de
ijs ipsis

ijs ipsis & rebus & hominibus, isti iubentur præiudicare id damnando, quod dijudicari debeat, aut si nolint extorres profugere coguntur. Quid hoc sit aliud? quam quod apud Poëtam de simili peruersitate dicitur:

Pacem orare manu, pretendere puppibus arma.

Id est ostendere liberam cognitionem, & interim alligare animos atq; deuincire velle, vt facere necesse sit, quicquid imperetur, siue probent aliqui seu improbent, nullis argumentis adducti, aut in refragando perseuerantes exulent, vel grauiore etiam pœnas persoluant. Atque scio fuisse quosdam suspicatos de sententia Caroli isto pacto rem administratam non esse. Et demiratos vnde extitissent hæc consilia. Optasseq; vt vulnari isti remedium inueniretur, ne mala malis exaggerarentur. Videbant enim fore, vt tunc multi terrerentur, afficerentur varie, grauius perturbarentur, deniq; ingentem ista paritura esse confusionem. Atq; competeri suasisse quosdam, qui non modo iusticiæ sed vtilitatis quoq; respectu mouerentur, mutandum decretum illud & reuocandos expulsos, & institutæ cognitioni cursum liberum relinquendum esse. Sed vicerunt scilicet fata sæculi nostri, & secuta mala cum initia atq; causas, tum incrementa impulsionesq; habere oportuit. Et in pertinaciâ tunc obtem

Y

peratum

peratum est iracundiæ, quæ cum nihil considerando prospiciat, exitus habere solet eiusmodi, ut si quem facti sui aliquando poeniteat, non mirum esse videatur. Atque exponuntur à me ea adhuc, quæ mediocriter prudentis hominis ac sani rationibus comprehendendi colligique possunt, cum in istiusmodi negotiis nihil prius neque antiquius sibi esse pati debeat quisquam, veritatis cœlestis, cuius doctor & explicator est Spiritus sanctus, perspicientia, qua relictæ aut negligentius exquisita, cultum & venerationem Dei æterni, & pietatem religiosam labare & concidere necesse est. Sed longe sane digressi, redeamus ad nostræ narrationis seriem. Et hæc ad istum modum Augustæ acta sollicitum habebant Philippum Melanchthonem & crebræ multiplicium quarundam etiam mirificarum literarum eo maxime tempore ei interpellationes obstrepebant, Et qui eiciebantur consilium ab ipso opemque inprimis petebant, & ad eius fidem misericordiamque confugiebant, & consultationes de Synodo, quæ inter Reipublicæ graues motus renouabantur, curas maximas afferebant. Et ea cernebantur quasi conseri vel ad herbam etiam perducì, quorum qui fructus futuri essent, nemo bonus sine anxietate singulari cogitare posset. Nam quod & Gallici regis qui Imperatoris

peratoris hostis vel certe inimicus esset, animus ita alienaretur à Pontifice Romano, vt in Synodo contra rationem illam & institutas actiones testatam esse videret sententiam suam, nec non mutuae inter Carolum & hunc regem criminationes, quae diuulgabantur, Et recepta occupataque vrbs Magdepurgica à Duce Maurício, & Imperatorem, qui ad Oenipontem desideret, frustra interpellari de Landgrafij liberatione, cuius promissae sponsor appellaretur gener D. Mauricius: Haec omnia inquam attentos, formidine futurorum carere non patiebantur. Et Philippus Melanchthon iam tertius ad Synodum Legatus cum literis Principis Mauricij in viam se dederat. Earum literarum talis erat sententia, quae subiiciebatur praescriptae salutis & compellationi honorificae, qua Reuerendis. Domini & Reuerendi patres ille conuentus nominabatur: Cum Caesarea Maiestas clementissime voluisset, vt ex Ecclesijs subiectis ditioni suae, aliqui ad Synodum mitterentur, noluisse D. Mauricium deesse voluntati illius, cum praesertim optaret & ipse veritatem illustrari ad gloriam Dei aeterni, & constitui piam ac perpetuam in Ecclesijs totius orbis terrarum concordiam. Quae duae res maxime essent expetendae omnibus mortalibus, praecipue vero ijs, quibus

gubernatio aliorum diuinitus sit commendata. Tum deinde indicabatur, qui mitterentur ad Synodum, ij quidem illi, quorum honestatem vitæ & pacis publicæq; concordiae studium, Princeps ipse prædicari intelligeret. Addebatur petitio: vt hi exponentes publice, quid de omnibus controuersijs docerent communi sententia Ecclesiæ in regione sua, audirentur. Et significabatur: Esse ipsis mandata data, vt pie placideq; & sine priuatis affectibus recitarent & declararent doctrinam, quam esse existimarent vniuersæ Ecclesiæ necessariam. Conclusio literarum complectebatur & admonitionem humanis. & vota plenius pietatis: Scire eos, qui conuenissent, pro sua eccellente sapientia, ipsorum confessus Deum iudicem intueri, & Ecclesiam vniuersam tam cœlestem quam terrenam, ab his postulare & expetere, primum vt gloria filij Dei vere illustretur, & farentur conscientiae fauciae, & vera his inuocatio monstretur, deinde vt talis concordia constitutur, qua non stabiliantur veteres abusus. Neq; enim Deo gratam, neq; diurnam tranquillitatem sine veritate esse posse. Negandum autem non esse omnino, manifestos errores quosdam & non leuia vitia in Ecclesiam irrepsisse, quæ disidijs horum temporum dederint occasionem. De quibus

bus tantis rebus, & audire eos Ecclesiarum querelas, & remedia salutaria quærere, sapientiae esse ipsorum. Atque orare se Filium Dei Dominum nostrum Iesum Christum, ut vulneribus Ecclesiae veteribus & recentibus medeatur ipse, sicut Samaritanum illum aiat fauocio viatori opem tulisse. Qua imagine cum sese exprimeret, ostendit scilicet affici se calamitatibus nostris, & velle nobis opitulari. His literis in vrbe Illustriss. aulae Dresdae datis, dies ascriptus erat Iduum Ianuarij, anni Iesu Christi M. D. LII. Et nomen Mauricij cum praecipuis titulis subscriptum. Hac Epistola accepta Philippus Melanchthon cum comitibus iter est ingressus. Dictum autem eis fuerat ut Augustae Vindelicorum subsisterent, donec vel ab ipso Principe vel Legatis ab hoc ad Synodum literas accepissent, quibus significaretur, quid facere deberent. Tota res erat magis comparata ad aliorum arbitrium, quam de consilio & sententia Philippi Melanchthonis instituta. Sed nihilo tamen minus ille, sine recusatione, ut consueuerat semper obtemperare iussis eorum quibus seruiebat opera ipsius, quo ad quidem bonae mentis conscientia pateretur, sic tunc paruit & muneri legationis illius ut praesset facile passus obtineri & cum comitibus iter ingressus fuit. Venerunt igitur

illi Norimbergam vbi pro singulari erga Philip. Melanch. amore, & studio purioris doctrinæ, accepti habitique fuerunt humanissime & benignissime. Publice eis ædes assignatæ, procuratæ res necessariæ, & omnia summæ beneuolentiæ præstita officia. Dum in vrbe illa commorantur, & ociose expectant, quidnam porro deinde agere iubeantur, interea rumores dissipantur de expeditione belli aduersus Imperatorem, & D. Mauricij Gallicis consultationibus. De quibus maximis & admirabilibus cum inceptis tum effectibus, neque argumentum hoc fert vt enarratio instituatur, neque mihi libet has res exponendo inculcare. D. Mauricius & constantiæ diuturnitate, & excelsi animi robore, & consiliorum prudentia, & rerum gestarum amplitudine, tum declarauit non esse prorsus oppressam neque captam Germaniam, ex qua scriptis picturisq; editis externi quidam triumphos iamdudum agerent. Neque vicit ille quidem tum Imperatorem inuictum, sed hoc tamen armatus obtinuit, quod inermi supplicando diu multumque hæcenus fuerat denegatum. Memini in harum rerum motu quid alij sperarint, alij metuerint. Atque audiui quendam festiuum, cum iam bellum fieret, quodam in cœtu sollicitis admodum ijs ex Mauricianis, quibus tota res erat
explo-

explorator, & qui omnia perpendebant diligentiùs cogitando, per iocum iubere eos esse bono animo, nam à Carolo vinci Mauriciùs non posse. Quærente vno, Quid esset cur tam audacter hoc ipse affirmaret, respondit iste, veteris diuinationis esse eam fiduciam, qua prædicta fuisse perhiberetur Achilli victoriâ superaturo Hectorem. Nam vt Achillis nomen numeris, qui literarum notis indicarentur, plenius esset quam Hectoris. Sic Mauricij statim initio nomen Caroli nomine esse numerosius. Sed hæc tum ioco dicta familiariter, cum eo exitu qui notus est omnibus congruerunt. Philippus autem Melanchthon qui Augustam pergere certis de causis noluiſſet, & satis, vt putabat, diu expectasset Norimbergæ literas, quibus quid deinceps agendum esset, ostenderetur, neq; tali tempore, & à disputatione verborum negotijs ad armorum vim traductis, apud externos desidendum diutius existimaret, dimissus ab illa ciuitate perquam amanter & publico munere vecturæ equestris instructus, in has regiones & ad suos tandem est reuersus. Non defuerunt qui deploraarent euentus istius infelicitatem, qua impeditiæ essent de maximis & maxime necessarijs rebus, non fortuitæ quædam neq; extraordinariæ, quales sæpe habitæ fuerant, sed le-

gitimæ atq; exquisitæ cognitiones. Animaduertebatur enim & existere indies maiores voluntatum alienationes, & dissidia crescere, & perturbari mentes pias, deniq; præparari in distractione extrema Reipub. interitum. Etsi autem ferebatur, aduentum eorum, qui iamdudum, quasi hostes iudicati essent, ad Synodum ideo tantum expectari, vt, vel simpliciter parerent atq; subiicerentur autoritati Synodicæ, neq; ad illius decreta omnino hiscere, vt dicitur, nedum respondere quicquam auderent, vel audirent vltimæ condemnationis tristissimam pronunciari sententiam, omnium tamen rerum negotiorumq; exitu incerto, erant, qui non malam spem conciperent ac fouerent: Si Philippus Melanchthon Tridentum accessisset, futurum fuisse, vt, audita enarratione, doctrinæ quidem inprimis, sed præterea quoq; causarum ex quibus tantæ tamq; insanabilium malorum difficultates ortæ essent, multorum animi ad considerationem salutarem & vera iudicia conuerterentur, qui in ignoratione rerum omnium præoccupati institutione puerili & sermonib. maleuolorum, non possent vel de doctrina vel de professoribus illius bene commodeq; sentire. Et erat Philippus Melanch. ita animatus, vt neq; itineris longi eum tæderet, neq; laborem vllum aut periculum
ipse

ipse vitandum fugiendumq; censeret, dummodo operæ studijq; aliquid nauaretur Rei Ecclesiasticæ tam conturbatæ & afflictæ. Sed ista scilicet ad hunc modum geri oportuit, neq; sæculi nostri improbitas remedia tam grauis & mortiferi morbi admisit. De qua miseria quamuis multa dici possent, cum frustra tamen à nobis dicerentur, tum inculcanda non fuerunt. Persequamur igitur reliqua. D. Mauricius ijs rebus confectis & ea consecutus, propter quæ expedita arma fuissent, pacem fieri facile libenterq; est passus. Atq; fuere qui inter tractatum compositionis & pacis tentarent & molirentur disturbationem bene præclareq; institutorum, & actionum salutarium euersionem, sollicitando animum D. Mauricij ad copiarum ipsius, dum illæ interea ociosæ essent, turbulentum vsum. Sed cum D. Mauricij virtus rectiq; & honesti propositi firmitas, tum eorum, quos eo tempore secum habuit fidele studium libere aduersando restitit postulationibus iniustis atque perniciosis. Imposuit autem D. Mauricius toti negotio cum finem, quo fama ipsius non modo moderationis sed pietatis quoq; celebraretur, abductis copijs suis in Pannoniam & suo aduentu territatis repressisq; hostibus, qui & occuparant iam quædam opportuna loca & pro-

gressuri vltcrius ingentemq; cladem videbantur toti Pannoniæ allaturi. Est autem in istis consultationibus D. Mauricius cum aliorum prudentia ac fide præstantium viro-
rum vsus opera, tum, vt antea sæpe, Christophori inprimis Carolouicij ex nobilitate Misnica equestris ordinis præcipui, & à puero opt. disciplinis ac artibus præclare instituti & egregie exculti, & in Reipub. max. grauissimisq; negotijs cum summa laude versati. Cuius ipsius quoque retinentis atq; vrgentis studium bonarum literarum ac humanitatis inter Reipub. curas constantissime, prædicari posset copiose in protegendo caput Philippi Melanchthonis, & ab hoc pericula, quæ ei, vt supra indicatum est, creabantur, propulsando, incredibilis non modo diligentia sed solertia quoq; & necessaria tunc calliditas, præstantis tempore difficili amicitia veræ officium, & persoluentis beneuolentiæ meritæ memoria animi grati debitum. Sed tunc pax est facta. Id quod gratum acceptumq; cunctis, quorum auxilio in eo bello D. Mauricius erat vsus, non fuit. Itaq; ipso suas copias in Pannoniam abducente aduersus Turcicos exercitus, recessit ab illo Albertus Marchio Brandepurgensis, & per vastitatem eorum locorum, qua iter erat, transijt in castra Gallica, quæ aduersus
Impe-

Imperatorem Carolum oppugnationem Metensem in manibus habentem mouebantur. Annus agebatur tunc Iesu Christi M. D. LII. Cuius primo die Calend. Ianuarij mortuus est Lipsiæ Bernhardus Ziglerus, de quo supra quoq; mentionem fecimus, Theologus, ex nobilitate Misnica ingenio doctrinaq; excellens, Hebraicarumq; literarum scientia ea instructus, vt in istius linguæ cognitione facile cuncti in his regionibus primas ei concederent. Quanquam autem vitam tempestiua hilaritate conditam, more gentis nostræ cum læticia colere non dubitabat, erat in eo tamen cum in vultu tristis quædam seueritas, tum in verbis libertas, tum etiam vocis asperitas, vt durus & acerbus aliquibus videretur. Ficta, simulata, commenticia, ostentationem vanitatemq; omnem mirifice oderat, & leuitatem atq; mobilitatem vehementer auersabatur. Idem supra modum officij memor inq; eo exequendo diligens. Vsq; adeo autem cupidus benefaciendi alijs & subleuandi egestatem tenuium, vt & suas nequaquam copiosas facultates in aliorum commoda impenderet, neq; puderet eum vndiq; quod pauperibus tribueretur corrogare etiam mendicando. A Philippo hic Melanchthone non raro impetrabat, vt operas ille doctrinæ suæ instrueret, & eam ob rem nonnun-

nonnunquam se Vuittenbergam conferebat. Neq; non facere interdum, vt fores con clauis obsideret, in quo sedentem aliquid eum conscribere sciebat, quod sibi tradere- tur, neq; admittere aduentantum quencquam, ne instituta opera interpellando impedirentur. Obstabat autem effectiōibus doctrī- næ, quod nullum manuum vsum haberet, quarum dextram casu de ædificio extrui cœ- pto in terram puer adhuc delatus fregerat, & gestabat de curatione mala eneruatam at- que inutilem. Itaq; cogitandī quoq; incita- tio minus erat ad elaborandum opus ali- quod doctrīnæ acris atq; vehemens, & men- tis vis quasi languescibat. Sæpe postea & iu- cundam consuetudinem ipsius Philippus Me lanchthon & accuratam considerationem at- que solertiam in multis sacrae scripturæ locis interpretandis requisit, & mortuum cre- bris gemitibus desiderare se testatus est. Sed de hoc & supra, quemadmodum diximus, est mentio facta, neq; plura nunc commemo- randa duximus. Pergat igitur instituta nar- ratio, & ea quæ restant exequatur. Huius anni bellicas clades in alijs locis, excepit in Saxonicijs & Misnicis terris pestilentia malum, Quo & Vuittenbergenses & Lip- senses congregationes scholasticæ dissolutæ fuerunt, alijs alio se conferentibus, quamuis initio

initio Dorgam Vuittenbergenſes complures, cumq; eis Philippus Melanchthon conſeſſent. Ego cum familia mea primum Neoftadium ad Orilam me contuleram, ubi cum hiematurum me eſſe conſtituiſſem, reſ ita tulit, vt in patriam pergens proficiſcerer. Interea improuiſa ac potius incredibilis plarique, tametſi quidam & præſenſiſſent & prædixiſſent, reconciliatio inter Imperatorem Carolum & Marchionem Albertum accidit, cuius fuit quaſi ſectus bellum Franconicum. Nam cum ſuperiore anno Marchio Albertus ciuitate Norimbergenſi grauiter afflicta, & ipſa vrbe oppugnata, Præſules duos vicinos in ſuas conditiones perduxiſſet rationibus non admodum æquis, quod Pabepergenſibus agri ſui eriperetur, à Vuurcepurgenſi ingens pecuniæ ſumma extorqueretur, cumq; Imperator edicto ſuo omnia ea eſſe irrita iuſſiſſet tanquam cum hoſte Imperij contracta negotia, ruruſum ferebantur eadem illa pacta conuenta autoritate eiufdem Imperatoris confirmata, & ſoluta obſidione Metenſi, Marchio Albertus parare ſe ad occupandum denuo recuperata ab Epifcopo Pabepergenſi, & auferendam à Vuurcepurgenſi ſummam pecuniæ quam poſtulauerat, & præ ſe ferre ſuum ſe ius armis perſecuturum eſſe, quibus cum inſtructior eſſet, nimirum cauſſa quoq;

quoq; se potiozem fore existimabat. Vnde sequens annus M. D. LIII. bellum attulit suum atq; crudele. Quo & patria mea Paberga in potestatem Marchionis Alberti tradita & atrociter vexata fuit, arcis castello vicino Aldepurgo dedito, & ipso statim & à Marchione inflammato, inexpugnabili aliquando credito, & capto olim tandem cum Dominus eius, qui & ipse nomen habuit Alberti, à Præsule Moguntino proditus fuisset fraudulente, & traditus in potestatem Ludouici Imperatoris. Sed istis nunc & his similibus narrationibus instituta expositio non est interrumpenda. Et alios tunc amicos & inter hos me non paruas curas attulisse Philippo Melanchthoni cognitum est. Cum ad metum periculaq; pestilentiae bellorum quoque calamitas adiungeretur. Ipse quidem ad mentionem luis morborum tunc passim vagantis dicere fere solebat: Se non campistem pertimescere, sed alias, quae & infestae essent Reipub. & perniciem interitumq; communem minari viderentur. Significabat autem cum dictorum tum factorum audaciam impudentem, quam augeri & conualescere ubiq; in maxima omnium rerum licentia cerneret, atq; simul alienationes Principum potentumq; & occulta odia, & facinorum nefariorum defensionem approbationemq;
& er-

& erga hos aut illos studia commota non rei negotiorumque æstimatione, sed inclinatione & proclivitate voluntatum ad personas. In quibus quamvis toleranda aliqua aut negligenda viderentur, exempli tamen & imitationis periculum magnopere esset pertimescendum. Commisissis autem duobus acerrimis bellatoribus D. Saxon. Mauricio & Alberto Marchione Brandepurgensi, & Mauricio victore, dum ipse ingentis animi nimia alacritate inuehitur in hostes, fortuito ictu machinae vulnerato, & post dies tres in castris mortuo, procul etiam tunc absente fratre Augusto in Dania apud Regem Socerum, rursus suspensi omnes expectatione futurorum & anxij fuisse. Atque est intellectum, verissimum esse quod veterum quidam scripsit: Qui in exercitu dux sit, eius consilia animique contentionem longe potius esse viribus effectibusque corporis. Neque tantum boni ab ullo copiarum ductore fortissime dimicando & profligando hostes manu propria conciliari, quantum damni malique detur morte ipsius. Sed ad hunc casum magnitudine animi & generosi impetus vehementia, & non viuendi sed vincendi cupiditate ardentis Principis Mauricij, fata scilicet abusa sunt. Atque erat in Duce Mauricio animosa virtus inprimis, neque ille viso hoste mo-
ueri

ueri periculo quod metum incuteret aut haberet cautionem, sed cogitatione cupiditateq; inuehendi & gerendi rem quasi calcatribus instigari, vt tanquam generosus catuslus temere etiam aliquando excurreret, & peteret aduersarios cum ferocius tum infidcratius. Et ideo in Pannonia quodam tempore in maximum capitis discrimen venit. Et militans quondam in Imperatoris Caroli castris bello Gallico, cum vrbs quædam oppugnante Carolo strenue tormentis globos illos ferreos cūcientibus defenderetur, neq; D. Mauricius tamen prouheretur circumspēctius aut timidius, conspēctus est Imperator Carolus accedens & eum seducens, quod diceret: Non scire omnes, quo pacto inter volitantes illos globos decurrendum versandumq; sit. Ego ante duos fere menses quam prœlium istud committeretur, Lipsiam redieram, cum Aegram transissem, vbi tunc Legati Cæsaris Ferdinandi & multorum Principum, nonnullarumq; ciuitatum consultabant de motibus bellorum, quibus tota fere Germania flagrabat. Non abstinebant autem urbani in illis tantis æumnis ioco, cum dicerent: Non boni ominis locum ad deliberationes cas fuisse delectum. Sane ita ægre res processit, vt inter non diuturnas tractationes enanescerent omnia: Cum Mar-
chio

chio Albertus interea in Franconia suo se ludendo oblectaret, & excitaret maiora indies bel-
lorum incendia, quæ tandem in Saxonicas
regiones peruaserunt, cum eo inprimis exi-
tioso euentu quo D. Mauricius excessit è vi-
ta, & quo multis præstantiss. viris interfe-
ctis, ita Marchionis Alberti fractæ vires fue-
runt, vt nunquam postea quantumuis suble-
uatus erigere sese & denuo confirmare po-
tuerit. Hoc anno per quam carus Philippo
Melanchthoni mathematicus doctiss. Eras-
mus Reinoldus est mortuus. Et in Britania
decessit Rex Eduardus adolescentulus opti-
mæ & præclarissimæ, vt ferebatur, indolis
atq; spei. Deq; eius interitu varij, & quorun-
dam non admodum clamentes sermones au-
diti. Dessauia autem migravit ex hac vita
terrena Illustrissimus Princeps Anhaltinus
Georgius, cum ego mense Iulio in Franconi-
am me recepissem. Principis istius monu-
mentum versibus ornauit Philippus Melan-
quem viuus ille & suorum consiliorum au-
torem & actionum adiutorem fidelissimum
atq; diligentissimum habuerat. Fuit autem
Georgius Princeps is, in quo excelsitas gene-
ris atq; conditionis cum singulari humanita-
te coniungeretur, cumq; sapientia atq; do-
ctrina excelleret, tanta tamen erat in eo mo-
destia, vt paruas etiam res non facile exque-
retur,

retur vllas, nisi prius diligenter deliberatas, & ad aliquos, de quorum sapientia atq; fide bene existimabat, relatas. Quem talem Principem, qui Saxonicarum rerum statum temporis illius nouit, cogetur fateri propitij Dei clementissimo concessu atq; munere his regionibus impertitum fuisse, cuius diligentia, uirtute, pietate, fide, sanctitate niteretur salus ipsarum. Sed de huius Principis Illustrissima excelitate, deq; maximis in Rempublicam & inprimis Ecclesiasticum statum atque ordinem meritis atq; beneficijs, quasi prætereundo verba supra quoq; fecimus, cum accuratiorem copiosioresq; expositionem illa desiderent, Deq; eo & nostræ & aliorum extent narrationes pleniores atq; copiosiores. Mortuus est cum omnium ingente mœnore xv. Calend. Nouembris. Et dolores Philippi Melanchthonis quos isto casu accubis, acceperat, mox cumulati fuere allato nuntio mortis Iacobi Sturmij Argentoratensis. Cum hoc viro ex nobilitate ciuitatis illius, principe Senatus, & præstante sapientia, uirtute, doctrina, experientia & usu rerum, facultate quoq; disertis sermonis ac copiosi præclara prædico, singularis necessitudo intercesserat multis annis Philippo Melanchthoni & plarisque in consultationibus de negotijs Religionis rationes sententiasq; suas

suas illi contulerant. Antecedebat autem Sturmīus Melanchthonem ætate, ferme annis septem, Qui solebat admirari in hoc summam prudentiæ considerationem, cum admirabili robore excelsi animi coniunctam, quæ diuersis temporibus laus in ipso emīnens, vel nullo vel raro certe exemplo, conspecta est. Mutatæ etiam res in Britania & significatione molestiam exhibebant, & curas afferebant cogitatione Philippo. Nam consobrina Imperatoris Caroli Maria (quam solam inter abortiones crebras viuam pepererat Catarina mater dimissa ab Henricho Rege, cum mox aliam post aliam ille duxisset) Regina facta, quæ deinde nupsit Philippo Caroli Imperatoris F. Hispaniarum Regi, Ecclesiarum statum, quem frater consanguineus ipsius paulo ante confirmatum reliquerat, prorsus conuertit, non etiam nullis antiquatis à patre Henricho sancitis. In quibus præcipua fuit subtracta obœdientia Pontifici Romano & vendicata Regi. Quæ omnia tum rescissa, & sub potestatem ditioris Pontificiam denuo subiectum regnum illud fuit, & horribili seuitia crudelitatemq; vexati sunt aduersarij & dissidentes, exilijsq; & direptionibus bonorum afflicti, & igne ac ferro necati, neq; pepercit tum ulli sexui, ætati, generi, conditioni immanitas

arripientum pro seditiosis atq; impijs quacumq; de re non assentientes rerum summa potentibus in cunctis quæ eis forte placuissent. Cum autem in Prussia res essent admodum perturbatæ, & contentiones indies crescerent, & dissidia augerentur, illiq; veluti igni materia ab externorum quoq; peruerso studio præberetur, in restringendo eo incendio diligentia atq; labor Philippi Melanchthonis parum proficere potuit. Atq; corripuit ea flamma generum quoq; ipsius Sabinum, qui impatiens quarundam, vt ipse putabat, iniuriarum, eo tempore ex Prussia discessit. Etsi autem erat ea hominis virtus & doctrina & experientia rerum, variæ denique & singulares ingenij dotes, vt à compluribus expeteretur opera ipsius, inq; his ab Augusto Principe Elect. Saxonum Duce, ad suæ tamen ille Patriæ Dominum clementissima benignitate accersentem & luculentam conditionem ferentem sese contulit. Inter quæ & curarum nonnihil & plurimum negotij exhibitum fuit Philippo, non tam respectu suorum, quam solitudine de Sabino, quem diligebat & quam ornatissimum esse cupiebat, quamuis ab eo non leuiter, id quod supra perstrinxi, aliquando offensus. Atq; Prusiaca negotia iam implicabant alios complures, apud quos eadem controuersia

sua

siæ disceptabantur non modo vehementer sed alicubi tumultuose etiam. Accusabanturq; à nonnullis Theologi Vuirtebergenſes, quasi neq; satis attente & caute ad quædam interrogata initio respondiſſent, & plus concessiſſent auctori illarum barbararum, quam viderentur debuiffe. Edebanturq; scripta à diuerſis cuiusmodi, quæ non tam ad rem explicandum, de qua litigabatur, quam alienationes animorum maiores faciendum momenti aliquid haberent. In Miſnicis etiam regionibus deliberationes de Ecclesijs ſcholiſq; conſtituendis excercebant Philippum Melanchthonem, quem & conſiliorum omnium Illuſtriſſima aula ſocium, & conſultorum adminiſtratorem volebat eſſe. Proponebantur autem capita de inſpectione Eccleſiarum, de iudicijs Eccleſiaſticis ordinandis, & quibuſdam ad rem ſcholasticam pertinentibus. In quibus ſi non omnibus vndiq; aliquid tamen alicubi operæ nauatum, & nonnulla vtiliter conformata aut correctæ, quædam vtilibus inſtitutis rationibuſq; ſuſtentata eſſe conſtat. Placuit anno Chriſti Ieſu M. D. LIIII. vt quidam, maxime propter Pruſſiacas rixas, conuenirent Naopurgi in Duriſſia. Eo acceſſit cum Philippo Melan. optimus vir & doctiſſimus Theologus Ioannes Forſterus Hebraicarum literarum in-

primis peritus, qui varia & duriore aliquando fortuna conflictatus, tandem Vuittenbergæ confederat, doctrina sua Academicam illam communitatem augens atq; ornans. Vbi & mortem placide obiit anno Christi Iesu post Milleſimum quingentefimum quinquageſimo ſexto. Acceſſerunt & alij & ex Academia Lipſenſi Alexander Aleſius patria Scotus, valde carus Philippo Melanchthoni rei Theologicæ intelligentiſſimus & artifex excellens congruentium diſputationum, & vir dignitate atq; doctrina exquiſita præſtans. Ex Heſſiacis affuere cum alij tum Adamus Craſtus, de quo alibi mentio à me facta eſt, magis vt à me fieri poſtuit honorifica, quam pietas, ſapientia, virtus ipſius mereretur. Argentorato autem Iohannes Sleidanus aduenerat, autor libri hiftoriarum paulo poſt editi, & ab alijs in aliam partem accepti, quod ipſum poſtea cura ſolicitudineq; varia affeciſſe, comperatum eſt. Vuirtenbergenſes qui in viam ſe dediſſent, & non abeſſent longiſſime, (Gotham enim, quod oppidum Duringiæ eſt, veniſſe eos nunciabatur) neſcio quam ob rem aut ſamam, non perrexerunt, neq; in illo conuentu affuerunt. Perſcripta ſunt quædam tunc de communi ſententiâ omnium, breuiter illa quidem, ſed id, de quo quærebatur,

batur, plane & luculente explicantia, & quæ non paucorum dubitationes sustulerunt. Atq; ita fere annus iste abiit, inter disputationes de doctrina & bellorum causis, atq; tractatæ conuentibus actis rationes fuere componendi res & sedandi commota. Sed frustra pleraq; omnia suscepta atq; tentata. Itaq; solennis Imperij Romani conuentus indictus & frequentes conuenire iussi sunt ordines Augustam Vindelicorum. Et in Germania turbulenti homines passim Ecclesiarum status turbare, & ruere Marchio Albertus, donec & ipse prorsus concidit, & causam dedit, vt in Franconia vrbs Imperij ad Mœnum vetus, quam occupatam præsidio copiarum suarum tenuerat, miserabiliter inflammaretur. Multa prodigia nuntiata tunc fuere. Visum in Silesia ardere cœlum, alicubi conspecta species exercituum quasi qui commissuri prælium essent. Teterriimum autem, quod multis in locis sanguine pluuisse constaret. In Franconia apparuisse narrabatur viri species cruorem effundentis in solem, & prope hunc conspectam esse aquilam conantem altius euolare, itemq; virum astantem equo. Non longe autem à Vuittenberga sol cruentus diuidi visus est, & partes dilabi, & exercitus confligentes, & quasi in excelso monte ceruus. Quibus animaduerteba-

tur valde commoueri Philippum Melanchthonem, sed ex omnibus vno maxime, cuius simile neq̃ audisse se neq̃ legisse aiebat, cum pro certo & explorato haberetur, in oppido Duringiæ cui Nebræ nomen, sobolem muliebri sexus modo natam interiisse flamma necatam, quæ erupisset ex vtero materno. Multa quoq̃ templa de cœlo tacta passim esse affirmabatur. Non putauî omittendam mentionem externorum quoq̃ hominum, cum quibus singularis vsus aliquis & eximia familiaritas Philippo Melanchthoni intercessisset. Voco autem externos eos, qui Germaniam nostram patriam non habent. Fuit igitur perquam carus illi gentis Pannonicæ adolescens nobili admodum genere natus è familia Iaxitia, quem mortuum Vuitenbergæ ita luxit Philippus Melanchthon vt quantopere eum dilexisset, & quam tristi desiderio afficeretur amissi, plane liquidoq̃ perspiceretur. Multum etiam & perquam familiariter vsus est Sigemundo Geloo, qui postea in sua patria admodum honoratus præcipuis muneribus functus est. Ex Italia adueniens Lælius Mariani Socini celeberrimi Iurisconsulti F. se, & patriam, & florentem opibus & dignitate domum, & spem amplissimæ fortunæ solius Philippi Melanchthonis videndi gratia reliquisse, præ se ferebat.

bat. Animaduvertebatur hunc ardere studio cognoscendi ijs de rebus, quæ tunc disceptabantur, certi firmiq; aliquid. Eumq; nunciabatur postea adhuc iuuenem ingenio summo & doctrina præclara excellentem mortem obiisse in Heluetijs. Ex Hispania habuit Philippus Melanchthon secum virum grauem admodum constantemq; & fortem in ijs asserendis defendendisque, quæ vera atque recta esse discendo comperisset. Eum nominabant Franciscum Dryandrum. Sed familiaræ, vt ferebant, apud suos inprimis nobilis appellatio alia erat voce gentili, quam Græcum illud nomen quodammodo interpretaretur. De Anglis supra aliquid dictum est. Gallicæ autem nationis Hubertus Langueus Heduus, (Burgundi nunc nominantur) multis annis vixit versatusq; est apud Philippum Melanchthonem cum Vuittenbergam venisset anno Christi M. D. XLIX. Neq; ab ipso discessit nisi interdum per interualla quædam peregrinationum, quibus mirifice delectabatur, donec Philippi Melanchthonis vita in terris durauit. Vt horum consuetudo annum attingat XII. Erat autem Philippo grata atq; iucunda multarum magnarumq; rerum, quas ille tenebat, commemoratio, & oratio de Regibus principibusq; gubernationum, & alijs sapientia, virtute,

doctrina præstantibus viris horum temporum. Neq̃ ego audiui vllum alterum, qui tam prudenter & certo, & plane, dilucide, diserte exponeret, quicquid narrare instituisset. Non ille in hominum nominibus falli, non indicijs temporum errare, non confundere rerum negotiorumq̃ seriem. Erat autē in eo singularis sagacitas in notandis naturis hominum, & consiēciendo, quo quisq̃ suopte ingenio deferretur, & quæ esset voluntatis inclinatio. Consiliorum etiam solertissimus æstimator, & euentuum futurorum prouisione admirabilis. Hunc lectio libri cuiusdam in Italia, vbi tunc ipse degeret, à Philippo Melanchthone compositi cupiditate incenderat videndi autorem illius, & ea stimulos perpetuo admouens perpulerat tandem, vt in Germaniam veniret & Vuittenbergam se conferret. Vbi more consuetudineq̃ sua accepit eum Philippus Melanchthon humanissime, & perspecta virtute integritateq̃ eius, secum esse libenter passus quoad vixit, Et obseruantiam fidemq̃ ipsius est expertus, summam beneuolentiam erga illum perpetuo retinens. Suntq̃ sæpe auditi sermones Philippi Melanchthonis prædicantes accurate Huberti probitatem & studium veritatis, & prudentiam, & explicatam cognitionem atq̃ scientiam earum rerum, quarum

periti

periti & sibi laudem & alijs vtilitatem acqui-
rere conciliareq; consueuerunt. Hubertus
vero eam grati animi significationem hono-
remq; Philippo viuo, & mortuo meritorum
recognitionem, pietatemq; præstari semper
studuit, vt perspicue declararetur animi ipsi-
us singularis erga illum affectio, quem omni-
bus officijs præsentem coluisset, & cuius ere-
pti nomen honore venerationeq; perpetua,
& memoriam desiderio ac lacrimis prose-
queretur. Sed hætenus in isto indicio con-
suetudinis cum externis hominibus Philippi
Melanchthonis moratam esse narrationem
nostram habeatur satis, cum alios innumera-
biles vndiq; locorum ac gentium ad ipsum
videndum, compellandum, audiendum ad-
uenisse non sit obscurum neque ignoretur.
Adiungantur ergo iam expositis reliqua.
Hoc Christi anno M. D. LIIII. Illustris. at-
que laudatiss. Principi Iohanni Fridericho
Saxon. Duci, post obitum Illustris. coniu-
gis rebus omnibus pacatis placide mortuo,
Philippus Melanchthon cum bonis vniuersis
memoria animi grati & veri doloris luctu
iusta fecit, cuius fortunam & casum sæpe de-
plorauerat, qui excessit è vita v. Non. Mar-
tij. Huius Principis virtutem, constantiam,
animi excelsi magnitudinem, & perferendis,
quæ necesse esset, patientiam, fidemq; ad
Deum

Deum & homines suspicientes admirati fuerunt & prædicarunt hostes quoq;. Quod si iste laudum tantus splendor leui forte macula aliqua aspersus putetur, ita scilicet intellectum est, hominem eum fuisse, quorum hæc est conditio, vt nemo omnium penitus labis expers sit. Atq; vt aliud alijs vitij est, secundum Comicum, sic accidit magnis & fortibus animis, vt interdum altius extollantur quam æquum esse videatur. Vnde fit vt ea suscipiantur moueanturq;, quæ, nisi processus habeant fortunatos & exitus felices, omnem omnium repræhensionem effugere nequeant. Quidam autem ita peruerfi sunt, vt neminem satis laudatum putent, nisi sermonibus suis aliquem in cælum ferant, & quemadmodum veteres locuti fuerunt, cum Deorum immortalium laude coniungant. Neq; vident hoc pacto non ornari sed deformari eum, quem celebrare instituerunt, cum de homine verba facientes non hominis effigiem exprimi studeant & perpoliri oratione sua. Sed & de his satis vel nimium potius. Anno Iesu Christi M. D. LV. Non. Febr. præsentæ Augustæ Vindelicorum Ferdinando Rege & Principibus non multis, proposita fuere capita deliberationum. Cumq; in mentione de re Ecclesiastica, quod Religionis negotium appellabatur, tres rationes

tiones indicarentur, quibus laboranti illi & dilapsæ consuli subueniriq; posse existimaretur, fuit vna ex his congressus doctorum hominum, qui rursus de Religionis negotio colloquerentur. Itaq; & Philippus Melanchthon iussus fuit parare se, & expectare literas, quibus quid agendum & iter illud quando ingrediendum esset, ei significaretur. Sed tum quidem molestia hac affectus non est, & reperta alia via ad incommoda ac mala illa non tam sananda quam mitiganda, & procurandum ne latius saltem serperent. Hoc quale sit, conijcere licet ex præcepto & sententia Peligni Poëtæ de eo, quod ipse vocat Immedicabile vulnus. Permissa tamen tunc, non paucis admirantibus, concessaq; fuit vsurpatio aliqua eius doctrinæ, cuius assensioniprius vltima supplicia & grauissimæ poenæ constitutæ fuissent, & adhuc alicubi essent. Sane quid suscipi tentariq; forte potuisset, incertum est, & erat expectatio omnium fere sollicita atq; anxia. Nam Rom. Pontifex Iulius III. Augustam ablegarat Iohannem Hieronymi F. Moronum Cardinalem, quem aiebant & prudentia & eloquentia esse instructum, & vias nosse quibus se in animos quorumcunq; insinuans, illorum voluntates gratiamq; sibi facile conciliaret, eosque perduceret in sententiam suam, Et h̄s artibus

tibus præditum præ cæteris, istoq; nomine in præcipua esse cum existimatione. Idem, cum Episcopus Mutinensis illo tempore nominaretur, legatus ad eum quoq; conuentum quem Ratibonæ agit Carolus Imperator anno Christi M. D. XLI. antequam ad bellum proficisceretur Africanum, existimationeque, de eius sapientia virtuteq; & facundia inprimis, perquam præclara fuit. Habuit hic patrem superiore ætate sapientiæ laude celebrem, cuius consilijs gubernatam rem Mediolanensem esse ferunt. Deq; eo, quod accepimus huic narrationi si inferuissem, neq; prorsus hoc alienum visum iri, neq; ingratum lectori futurum esse speraui. Quibus temporibus inter arma Cæsariana atq; Gallica Franciscus Dux Mediolani tanquam in maris commoti sæuissimis vndis iactabatur, aliquando postulatum ab ipso fuit, vt in castra vicina Cæsariana se conferret. De qua re cum accurate deliberaretur, non putarunt consiliarij faciendum esse, vt ipse Dux illo accederet, manifestum ac præsens periculum, quemadmodum conijciebatur, aditurus. Atque Principem consilij sui mitti illuc placuit Hieronymum Moronum. Credebatur hic de ijs, quæ fieri aut non fieri deberent, admoneri voce quadam, quæ, nemine nisi ipso exaudiente, emitteretur ex annu-

li cu

li cuiusdam conuersa ad aurem pala. Con-
sueuisse igitur ferebatur, quoties de euentu
aliquo certior fieri cuperet, quasi de propo-
sita re cogitaret, cubito nitentem manum &
ita annuli palam auri admouere, vt de quib-
us quærebat aliquid cognosceret, cumq; id
ipsum tunc quoq; fecisset, sermone Italico
pronunciata audijsse hæc verba: Ibis redibis
non eris captiuus. Quæ cum ipsius intelli-
gentia sic distinguerentur, vt significaretur
id quod optabat, profectus fuit in castra, at-
que ibi captus & duriter crudeliterq; tracta-
tus, Illorum verborum aliam sententiam fu-
isse & se disiungenda copulasse demum per-
spexit. Hunc Cardinalem in non paruum
discrimen paulo post venisse dicebatur poti-
ente rerum Iulio 1111. Sed tunc ille, nuntia-
ta morte Pontificis Rom. Iulij 1111. cum festi-
natione summa Romam, relictis omnibus,
recurrat. Atq; eo tempore, quemadmo-
dum narrari cœptum est, liberatus fuit Phi-
lippus Melanchthon solitudine & labore
scriptionum disputationumq; de Religionis
negotio. Amisimus hoc anno nos ambo
vsum summi amici Danieli gente Stiberi,
ordine equitis Franci, dignitate Canonici in
collegio primarij templi Vuurcepurg. Ami-
cos enim non dubitabat ille nos appellare, &
esse se amicum reipsa declarare non desiste-
bat.

bat. Cum me quidem propter societatem honestorum studiorum, qua coniuncti à prima aetate fuissetus, fratris nomine dignaret. De huius viri virtute, animo constante & magno, ingenua orationis libertate, beneficentia in suos, amore patriæ, liberalitate & humanitate erga omnes, tota denique vita digna generis sui nobilitate, & alibi vera narrauimus, & nunc in his exponendis morari minus opportunum videri possit. Quare prosequamur commemorando proposita, & id agamus, quod est in manibus. His igitur temporibus in Anglia ea patrabantur, quibus & Philippi Melanchthonis & aliorum animos ingente dolore affici necesse erat. Crudelissime enim interficiebantur ferro ignique innocentissimi & sanctissimi viri, in quibus venerandus Senex Latimerus nominabatur, & Cantuariensis Episcopus Thomas Crammerus. Sed hic quod esset dignitate ac loco summo atque primario, supplicium aliquanto sumtum est de eo posterius. In Latimero singulari olim Erasmi Roterdami amico, & religiosæ pietatis celestisque veritatis ardentissimum studium, & idem exquisita cognitione optimarum literarum atque artium, & facultate eruditæ doctrinæ celebris fuit. Qui ubi cum socio criminis pulcerrimi atque gloriosissimi: Quod Evangelium

gelium Iesu Christi Filij Dei profiterentur, Episcopo tunc Londinienſi, ad roguſ conſtitiffet, productum eodem de carcere, ferebatur, etiam Crammerum fuiſſe, ut mortis atrocitate & horrore ſpectaculi illius deteritus ſententiam mutaret. In qua cum nihilominus hic permaneret, atq; ſupplīce etiam geſtu oraret, cum ſanctiſſimis illis viris ut mortem ſibi communiter afferri decerneretur, falſi auctores conſilij huius ſua opinione, iſtos quidem viuos comburendos, hunc autem in carcerem reducendum curarunt. Vbi primum in ſqualore & mox ſpe quadam bona & commodis quorundam ſermonibus inductus, iraditur aliquantulum vacillaſſe, & nomen ſuum ſubſcripſiſſe, nescio quibus, aberrantibus à ſimplice veritate cœleſtis doctrinæ, quam ipſe eſſet profeſſus: Sed mox illuſtri confeſſione ſententiam priſtinam declarafſe, & manum etiam deteſtatam, quæ ſe nefario operi miniſtram præbuiſſet, atq; ita crematus fuiſſe. Similis ſæuitiæ in alios complures tam in Anglia quam Gallia incitatum odium rabioſe eſt debaccatum illo tempore, tanta importunitate, ut prior calamitas iam fuiſſe tolerabilis videretur, quæ fuiſſet maxima atq; acerbiffima. Verum hæc noſtra commemoratione enarranda hoc loco non ſunt, & hæcenus producta mentio ſufficere

poterit instituto nostro. Indicatum autem supra est, quid turbarum fuerit commotum importuna quadam nouitatis vsurpatione in doctrina Ecclesiastica ab Andrea Osiandro. Huius mortui etiam factio non quiescebat, & vt verum fatear, exulcerari negotium videbatur importunitate quorundam ambitio- se magis quam necessario quasi ventilantum dissidium illud, & non patientum flammis contentionum extingui. Exarseruntq; pas- sim certamina de illis rebus plane gladiato- ria. Quæ tanta extiterunt Norimbergæ, vt ferri in ciuitate pacata diutius non possent. Eo igitur ventum est, vt peteretur à Philip- po Melanchthone iam non consilium, quod ante dederat, sed auxilium quod perturbatæ Ecclesiæ ferret. Ita, impetrata hac venia ab Illustriss. Principe Elect. Augusto, Norim- bergam ille est profectus, adiuncto sibi hinc Alexandro Alesio, & tum forte hospite Ia- cobo Rungo Pomerano, quibus & ego me- co itinere comitem præbui. Atq; fuit præ- sentibus Norimbergæ præcipuis in Ecclesia docentibus ea controuersia ita disputata & sedata, vt ab hac deinde quieta fuerit om- nino ciuitas illa, complexusq; est dogma scripto Philippus Melanchthon breui illo quidem sed diserto & illustri, sine vllius re- præhensione aut insectatione veritatis sim- plice

plíce oratione exposita, qua assererentur probata, & refutarentur ea quæ damnabantur. Id quod optimi & sanctissimi veteres quoque fecisse animaduertuntur in Nicena Synodo, declarata sententia vera atque recta Ecclesiæ Catholicæ, & refutata contraria, inculcato nullius aduersantium nomine. Spes fuerat aduenturum esse eodem Iohannem Brentium, sed literis hic missis ostendit cur accedere eo tempore non licuisset, & differuit quædam de rebus illis quæ tractabantur. Duo qui quærere disceptareque amplius vellent, neque explicatione prolata contenti essent, tunc discesserunt dimissi benigne. Cæteri inter se concordantes tranquillitati in ista parte studiose operam dederunt. Reuersum autem mox domum Philippum Melancthonem exceperunt rursus aggressiones quorundam de disputationibus & turbis Flacianis. Sibi enim Flacius iam non modo vulgi studia, sed nonnullorum magnorum & principum virorum voluntates astute circumuentas adiunxerat. Frebanturque leges Philippi, quibus inter ipsos gratia reconciliari videretur posse, & tantus furor erat hominis, ut lenissime dicam, improbi, ut accedere tandem propius non dubitaret, & euocare ad colloquium Philippum. Hic vero cum de ea re scribebat respondens literis

quorundam, grauiter & plane, tum illa talium congressuum postulata præcidebat. Et quia prohibere quasi illuuiem illam insaniam non poterat, intra suam stationem resistens, & faciens, vt prius, officium, neq; ab hoc sinens abduci sese, iracundia, odio, cupiditate, spe, iniuriasq; omnes perferens & contemnens incitationes stolidæ vehementiæ, ita permittebat Deo æterno cætera. At hi illo ipso iritabantur, & libellos scriptorum turbulentorum emittebant in vulgus, & arripiebant ad lacerandum plurimos optimos & doctrina atq; pietate præstantes viros, quibus maledicendo acerbitati indulgebant animorum suorum, & odijs conceptis obsequebantur. Vera falsa, certa dubia, consentanea dissentanea, propria aliena, conuenientia absurda proferrentur in medium, non curabatur. Et satis erat crimen aliquod illatum esse. Nam adhærescebat in hac parte, quam Philippus Melanchthon deferendam sibi non putarat, statim quicquid esset tanquam telum accusationis & culpæ coniectum. Vt autem Magi ignotis & barbaris nominibus simplices infatuant, sic isti appellationibus mirificis & obscuris vulgi animos percellebant, & quasi inhians sibi circumducebant, Adiaphoristas, Synergistas, Maioristas, & nescio quæ alia vocabula nuncupando

pando comminiscendoq; offundentes. Fiebat autem vt confusa negotia publica ac priuata, & Ecclesiasticæ ciuilesc; res, materiam darent insimulandi inuidiaq; grauandi eos, à quibus aliquis alienior forte esset. Et Flaciana factio iactans ardorem quendam & flagrans studium rerum diuinarum, si qui illam vehementiam improbarent & moderatorem lenitatemq; aliquam adhiberent, statim desertores & proditores causæ eos esse vociferari, & ingerere conuicia, & disputatorum conflictus poscere, & veluti in arena exultare atq; prouocare aduersarios ad luctandum. Quæ omnia ad vulgus & imperitos & rerum negotiorumq; ignaros erant speciosa, & celebritatem nominis Flaciani augebant. Atq; inueniebantur quidam qui paria facerent, & veris contumelijs istos appetere neque sciente, & si resciuisset perquam grauitè & moleste ferente Philippo Melanchthone. Sed ij tantum proficiebant, quantum ad restringendam flammam infusum oleum. Ad vnum enim probum in promptu statim erant quæ obijcerentur decem. Diceret quispiam falsa de inanibus rumusculis collecta aut conficta ab ipsis spargi: Aliquam illi fabulam contra narrare & eludere crimen, & scurrarum more impudenter inde noui vitij infamiam detexere. Quæ

autem dicebantur ac docebantur verè & vtiliter, ea peruertendo & cauillando detorquere, & conquirere atq; venari vndiq; omnia, quibus de quietis & pacis cupidorum, & paulo modestiorum existimatione aliquid detraheretur & his inurerentur maculæ. Vetera ac noua, dictaq; & facta, atq; syllabæ pene calumniarum malitiâ ad ignominiam arripiebantur eorum, à quibus ista caterua discesserat, cum docendo magistros, beneficiendo pene parentes haberent plærosq; & propter ætatem certe & dignitatem atq; excellentiam plurimî ex his eos obseruare & colere deberent. Quemadmodum autem olim cum histrionum ars cognita atque probata fuit, pluris fieri cepisse actores fabularum quam scriptores traditur, sic accidit tunc prauitate hominum & vulgi leuitate, vt isti simul atq; alij, eorum, quibus præceptoribus vfi fuerant, dicta ac scripta diuersis gestibus ijsq; partim ineptis, partim turpibus agerent, & cum malitiose interdum corrumperent, ita applaudentes sibi inuenirent complures. Quia autem differebantur res arduæ & magnæ, ideo ista cohors tumultuari & vehementia declamitandi perturbare audientum animos, & assentari hominum cupiditatibus, & hoc pacto facile reperire assentientes scq; eis adiungentes, Grata erat plurimis repræhensio

hensio atq; notatio eorum, quibus licentia vitæ coherceretur, & maior prohiberetur dissolutio. Libenter igitur admittebatur, & fortēs isti perhibebantur tanquam libertatis defensores, erantq; in precio. Quid vero melius, rectius, salutaris omnium isti protulerunt, docuerunt, enarrarunt? quam ij quos tam hostiliter oppugnabant. Sed erant illa scilicet iam vsitata, ac nouitate delectabantur homines, quorum voluntati istud genus speciose inseruijt. Quemadmodum autem erga ciues plarumq; propter vsum consuetudinis affectio est remissior, ita vulgus, quantumuis bona & vtilia, iam familiaria atque consueta, minus curare solet, & aucupatur externa ac noua. Atq; isto quasi turbine multa honesta consilia, non paucae præclaræ actiones peruersæ sunt, spes tranquillæ cuiusdam quasi serenitatis debilitata atq; erepta, pietas & religio labefactata, cum interea fulcirentur superstitionum & errorum vitia. Quod nunc cœptum est ab ijs quoq; intelligi, qui istos aliquando vel fouerunt vel non certe excluderunt. Cum enim ista factio audacissime vel potius impudentissime, sine omni rerum, personarum, temporum consideratione effutiret & dissiparet, quicquid non in mentem, quam haberet nullam, sed in buccam, vt dicitur, venisset, In

hoc malo id inerat boni, quod fiebat, quem-
admodum Tragicus Poëta ait improbis &
vanis vsu venire: vt cogitationum volun-
tatumq;

Certum atq; verax indicium lingua faceret,
declarans illa ac profitens, nihil se esse petu-
lantius neque magis leue atq; futile, & pro-
ferens cum scelerate & nefarie conficta de
opt. & innocentiss. ac publice priuatimq;
bene meritis viris, & sese antesignanam du-
cemq; præbens ad Reipublicæ reliquam quie-
tem exturbandam, ad vastitatem inferendam
Ecclesijs, ad laxandam multitudinis promi-
scuæ licentiam, ad totius deniq; adhuc consi-
stentis honestate quadam nonnullocq; pudore
vitæ dissolutionem. Haud sane nesci-
mus huic importunitati prætendisse istos ex-
empla sanctæ antiquitatis, quo quidem non
minima ex parte eminebat vel furor vel certe
stulticia ipsorum, qui nullis consilijs aut acti-
onibus similibus & conferendis tanquam la-
trones aut hostes sub illorum exemplorum
quasi tecta subirent, ubi lateret impietatis
istius detestanda pernicies. Etsi autem ad-
huc reperiuntur hic aut illic nonnulli, qui
pertinaciter defendant quamuis perspicuam
peruerſitatem atq; vesaniam, & sit tamen in-
dies, etiam in satietate quadam, assensio in-
firmior, & aperiuntur plurium oculi, & con-
tracta

tracta damna intelliguntur, & dissensiones inde tum manifestæ tum occultæ existunt. Est autem profecto non leuissima causa miserie istius, sæculi nostri effrenata exultatio, & infinita licentia, & summa dictorum factorumq; impunitas, non modo declamitandi & concionandi pro eo ut cuiq; libet, & fert impetus animi commoti, sed proferendi quoq; & edendi mandata literis ea, quæ vnusquisq; somniasset aut vigilans fingere comminisciq; potuisset. Sed inprimis liberæ & crebræ tunc erant disputationum dimicationes & criminationes confutationesq; mutuae, & iurgiorum contumeliæ. Quiq; alterum insectando vehementissime exagitaret, & in eum inueheretur acerrime, & pro suis qualibuscunq; audacissime propugnaret, is fortissimus habebatur & laudabatur inprimis. Omnes itaq; librorum officinas, accusationibus, defensionibus, purgationibus, insimulationibus, & pugnacibus sæuisq; scriptis refertas cerneres. Hoc loco mihi venit in mentem, quod Legibus antiquis constitutum fuisse traditur, ut alterum in iudicio falso & temere accusantes eam poenam sustinerent, quam luere oportuisset reum si conuinceretur. Erat enim æquum valere idem in eos, qui contradicendo inscite & nugatorie & perperam refellere aliquem conaren-

tur. Quia vero actio datur illa quidem in iudicijs iniuriarum. Ficta autem atq; falsa crimina alicui inter altercandum inferri, & obtrectando maculas aspergi, modo prætendatur ardor asserendæ & defendendæ veritatis, non modo animaduersione caret, sed laudem etiam passim inuenit, ita scilicet fit, ut optimos & grauissimos viros leuissimi deterrimiq; insectentur & exagitent. Quanta autem nunc copia quoduis argumentum, sed præcipue aliquod sanctæ Religionis caput explicantium & de hac dimicantium librorum euolat? In Aegypto olim, quemadmodum fertur, quod quisq; in aliqua arte excogitasset, id in conuentu peritorum consideratum & diiudicatum sic demum, si approbatum esset, curabatur tanquam verum, in columnis perscribendum, quæ in sacris quibusdam locis seruabantur. Tales conuentus nunc quoq; agi erat optandum & expediret, ut de ijs scriptis, quæ proferenda aliquis in lucem & edenda existimasset, docti & sapientes consulerentur, deq; eorum sententia utilia ac bona publice reponerentur, mala atque perniciofa obliterarentur delendo. In quo melius esset, ne nomen quidem scriptoris conseruari, id quod in Aegypto quondam factum fuisse accepimus. Hoc sane pacto obuiam irectur cupiditati immodicæ ambitio

ambitiosorum & gloriæ appetitio reprimetur, & non complerentur animi hominum opinionum mirabilium absurdarumq; varietate. At nunc quoniam & scribendi facultas conceditur cunctis, & iudicandi potestas datur cuilibet, qui sunt audacissimi, ij vulgo in precio honoreq; habentur, & omnia ubiq; perniciosis & turbulentis contentionibus personant. Verum apponantur & ista ad miseriarum nostri temporis aceruum, & fatalium pœnarum gravitatem. Inter hæc dissidia & istas secessiones, qui adhuc supererant pauci illi sane ex vetere sodalitate & quasi grege eorum, qui initio ad veritatis cœlestis & optimarum disciplinarum doctrinam colendam sese coniunxerant, cum maximo dolore recordabantur præteritorum temporum, & tantam mutationem vitæ atq; morum deplorabant. Meminerant sua ætate inimicitias etiam inter aliquos manifestas non fuisse expertes humanitatis & moderationis, contententibus illis non hostiliter sed civiliter : In suscipiendis autem gerendisq; rebus quibuscunq; communicata consilia & collatas sententias rationesq; magno studio & opinione mutuæ benevolentiae singulari. Quæ tradere docendo alijs, quæ composita scribendo edere aliquis volebat, quæ negotia conficere agendo, ea tunc non temere sed delibe-

deliberata & recognita cum amicis ita ag-
gredi, si videretur, & proferre, aut, si non vi-
deretur, relinquere & premere. Hanc igitur
suauitatem illi superioris temporis partici-
pes adhuc reliqui in tantam acerbitatem, &
vitam ex congregabili atq; mansueta, tam
feram ac soliuagam euasisse, dolebant &
miserabantur prolapsionem ætatis suæ, &
nihil latè de futuris poterant ominari, acce-
dente etiam senectutis diffidentia atq; diffi-
cultate. Sed his temporibus in quibus ver-
satur ista pars narrationis nostræ, & dum ea,
quæ exposuimus ad hunc modum geruntur,
multi interea ex Boiemiâ fuere edictorum
sæuitia eiectioni, qui aliquid dicere aut facere
ausi fuissent prioribus & antiquis observa-
tionibus & ritibus contrarium. Exula-
bantq; complures coniuges præsertim sacer-
dotes perquam miserabili specie. Et amisit
Philippus Melanchthon amicum præcipuum
Iustum Ionam. Hic celeberr. Iurifcons. Hen-
ningo Gœdæ præposito rei Ecclesiasticæ
Vuittenbergæ successerat & hoc anno Chris-
sti Iesu M. D. LV. migrauit ex hac vita, vir
dignitate excellens & præstans doctrina,
cum Vuittenbergam prorsus reliquisset, in
superiorum annorum bellicis tumultibus, &
mutatione gubernationis. Etsi illinc abesse
ceperat & conciones habere antea quoq; in
Salinis

Salinis Saxonicis. Sed tunc his regionibus excessit, & aliquantisper in aula Ducum Saxoniae D. Iohannis Friderichi FF. commoratus, praefectus deinde Ecclesiae in oppido Eyssfeldo, ibi mortem obiit habens annos LXIII. Ad Danubium autem conuentus agebatur anno Iesu Christi M. D. LVI. Et de Religionis negotio iam conuenerat: ut delecti aliquot vtriusque partis congregarentur in Vangionibus Berbetomagi, deque controuersijs ortis inter se placide colloquerentur. Nominabantur autem iam alteri non magis protestantes, ut olim, sed addicti confessioni Augustanae, Alteri catholicorum & antiquae Religionis nomen obtinebant. Accesserunt illuc cum alij tum Philippus Melancthon ferius hic quidem, quod eo anno profectus in Cimbricam Chersonesum ad Regem Daniae affinem suum Dux Augustus, iussisset operiri illum mandata sua. Tandem vero aestate Anni M. D. LVII. est tamen iter & ipse ingressus deducente eum, qui ab Augusto Principe legabatur, generoso & nobili Comite Ludouico Neogardiensi. Ibidem affuerunt & à Saxoniae Ducibus D. Iohannis Friderichi FF. missi Theologi & carum rerum de quibus differendum esset periti, & spectati homines cum bonarum artium tum cæterarum doctrinarum, & viri non vulgari
auto

autoritate præditi. Sed à Flaciana, quæ tunc apud illos Principes in existimatione præclara erat & regnabat, factione, eas leges habebant latas præscriptasq; & constitutas conditiones, vt alienæ sententiæ actores non auctores suæ aduenirent. De quibus rebus hoc primum optarim, famam omnem perpetui silentij latebris occultari & æterna obliuione potuisse obrui. Sed quoniam illæ multorum sermonibus & quorundam scriptis quoque celebratæ sunt, pauca hoc loco à me dici, ad instituti operis rationem & meam diligentiam fidemq; pertinere duxi. Erant ad decretum colloquium de controuersis in doctrina Ecclesiastica capitibus, designati præfides, primum Spirensis Præsul, sed hic obire munus istud morbo impeditus non potuit. Suffectus igitur fuit in locum eius Iulius Præsul Naopurgensis. At Merssepurgensis, princeps erat sui gregis. Hunc Sidonium nominabant, quod in eorum numero, qui suffraganei vocantur, Moguntia aliquando titulum habuisset Episcopi Sidonis. Ita enim ludere in maximis rebus non est verita, posteaquam os perfricuit & omnem pudorem abiecit, superstitio, vt præesse iubetur aliquis prouinciæ, quæ vel nulla extaret omnino, vel nullo pacto certe obtineri geriq; posset. Adolescens ipse humili loco
natus

natus ex vicinis alpibus Tubingam studio-
rum causa venerat, ibi in contubernio pau-
perum (Martinianum vocant ab autore in-
stitutionis) educatus dum bonarum artium
Magister renunciaretur, literas deinde do-
cere cœpit, & Moguntia ludum aperuit, &
postea etiam ad Ecclesiasticas conciones ha-
bendas animum appulit. Ad quas maxima
frequentia cum concurreretur, ita est ei ista
curatio lata, vt sententia atq; voluntas arcti-
us deuinciretur, & ipse statum illum fulciret
studiosius, & magis enixe sustentaret. Atq;
hinc est ad illud honorum fastigium euectus,
rebus bello conturbatis, & discrepantibus
iudicijs, diuersisq; studijs collegij, producen-
te cum Imperatoria Maiestate, cui ita com-
mendatus fuerat, vt illius opera nihil non ef-
fici posse crederetur. Quæ eadem ferme eo-
dem modo supra à me commemorata cum,
his perscriptis, recordarer, non volui tamen
delere, neque iterum hoc loco legi, alienum
dixi. Sane erat ingenium in homine acu-
tum, industria haud vulgaris, facundia et-
iam & copia orationis egregia. Is igitur
tunc quasi primum ordinem duxit eorum,
cum quibus congregari deberent defensores
eius doctrinæ, quæ nomine confessionis Au-
gustianæ significabatur, eratq; veluti caput
horum Philippus Melanchthon. Cognitioni
autem

autem præesse loco D. Augusti Prin. Elect. legatus ipsius debebat, magnitudine animi, constantia, virtute, sapientia, humanitate etiam excellens, quod in adolescentia opt. literis præclare esset institutus, is quem supra nominauimus, Ludouicus Comes Neogardiensis. Habuerat hic aliquando Præceptorem Friderichum Straphylum, Quem iamdudum vel ambitionis impetus, vel nescio quæ cupiditatum quasi procellâ ablatum inter aduersarios constituerat, cuius ante quoq; facta mentio est, hominis, vt nihil dicam amplius, despicati & leuis, cum non esset ab eruditionis doctrina prorsus imparatus. Omnino ex ipsis iam illis, qui antiquæ religionis patroni perhibebantur, non plane dementes, fateri cogebantur, suas partes & doctrinæ & rituum & vitæ vitijs aliquibus laborare, & non immerito notatos esse errores quosdam. Atq; hi initio statim petierunt, vt disputationes non colloquendo sed scribendo haberentur. Id quod facile impetrarunt, quod non minus scribendo quam loquendo se valere confiderent defensores confessionis Augustanæ. Qui cum præclare starent, inter ipsos optatissimum aduersarijs dissidium extitit. Nam ab ijs qui accesserant cum Flaciano consulto, de illius sententiâ ante omnia postulare; vt damnati pronun-

pronunciarentur quidam, qui illis, quorum paulo ante meminimus, nominibus mirificis & fictis infamabantur. Nisi enim hoc fieret, non fore inter ipsos firmam consensionem. Nihil fere erat inter hos atq; cæteros istarum partium, controuersia aut litis de dogmate. Petebatur itaq; ab ipsis amanter, ne sine causa autores esse vellent perniciosi dissidij. Quin etiam damnationes promittebantur, sed suo loco & rebus explicatis. Dicebatur ideo esse conuentum, vt causa non controuersa ageretur, eam par esse vt ipsi concorditer tueantur. Alia quoq; commemorabantur, quibus posse eos a proposito illo abduci spes esset. Sed nihil horum ipsi admittere, & urgere postulas damnationes secundum præscriptam formulam. Ibi tandem eis dictum fuit, licere initio, & esse melius, discedere, quam impedire actiones bonas & salutares. Tum demum illi & assensi sunt, & promissere sese vno ore & animo defensuros doctrinam confessionis Augustanæ. Sane Philippus Melanchthon cupidus congressus, quiq; nihil impediti aut moræ inferri vellet susceptis actionibus, non repugnauerat contra postulata damnationum, atq; has adeo cœperat agitare. Sed socijs atq; collegis magnopere reclamantibus, ab hoc consilio destitit. Iam vero procedentibus disputa-

b

tationi

tationibus, cum res ageretur scriptis mutuis, rursus nescio qua noua causa aut cogitatione impellente, requiri flagitariq; damnationes, vociferationesq; existere, & perhiberi illis neglectis non posse coniunctionem esse stabilem atq; certam, idq; apud omnes, etiam aduersarios, testantum clamores audiri, & ita turbari inchoatae disputationes. De quo alij tum aliter. Atq; ita mirabiliter omnia miscebantur, ut nulli non suspicioni locus esset. Plurimq; tamen ad impotentiam animi & vetera partium odia illum discessum referebant, quem placuerat testatum esse forensi etiam quadam cautione. Erat autem additus Theologis istis quidam ex scriba Ludimagister, ex Ludimagistro factus Iuriconsultus, tanquam vel custos vel emissarius, quem animaduersum est, & loquendo & scribendo quasi flabello seditionis Flacianas conspirationes ventilare atq; insuper conflare, & furiae instar volitantem ubiq; odia atque discordias excitare:

cui tristia bella

Ira insidiag, & crimina noxia cordi,

Mille nocendi artes: secundum poetam. Atque rumusculi de tota re sparsi fuerunt varij, non etiam nulli inanes & falsi. Verum hoc cum alijs dissidentibus delectationi fuit, & doctrinae, quae Evangelica perhiberetur, obrecta-

obtrectauit, quod ista daretur occasio tam execrationibus, quam ridiculis quibusdam dictis, tum accidit contrariarum tunc partium defensoribus peropportunum, qui iamdudum animaduernerent, certamen illud iniquius esse comparatum. Nam se neque doctrina neque usu exercitationeque ijs, quibus opponerentur, pares esse sentiebant. Bonis autem pietatisque religiosae ex animo studiosis illa tam intempestiua defectio ingentem attulit dolorem, quod pene parua victoria pro veritate se pugnare affirmantibus e manibus eripi videretur. Sed urgebatur sic quoque progressio inceptae disputationis, ab ijs qui remanserant. At praeses Iulius vir prudens atque doctus, quod pro altero praesideret, ostendit, necesse se habere, rem perscribere Regiae Maestati. Dum mittuntur autem literae & responsum expectatur, omnia fuere interim quiescentia, & profundum Berbetomagi ocium. Inque hac actionum dilatione, accersitus Philippus Melanchthon ab Illustrissimo Principe Palatino Princ. Elect. Othone Henricho Eytelpergam, ut de Academia constitutione, eo praesente deliberaretur, est profectus. Erat ibi Iacobus Micyllus, cultor & Antistes, ut ait Poeta, rectorum & liberalium studiorum. Quo adiuncto, itemque alijs quoque doctrina & prudentia singulari

præditis viris, administratio tota illa ordinata, rationeq; conueniente ac laudabili, Philippi Melanchthonis consilio & autoritate, constituta est. Neq; post hæc Micyllus integrum annum deinde vixit, qui natus Argentorati cum ingenio & bono & acri esset, Musis id est optimis disciplinis atq; artibus se totum addixit, & cum veterum scripta explicando, tum componendo noua, & nauauit operam imprimis & nomen celebre est consecutus. Commilitonem primum hunc habui Erphordiae in Duringia, vbi de quadam actione scenica dialogi Lucianici, in quo personæ vnius hoc nomen esset, ita appellare est coëptus, neq; nomen postea ei mutare visum. Maximum damnum literæ & erudita doctrina huius viri morte fecit. Et Philippus Melanchthon nosq; cæteri quibus notus ille fuerat, quicq; tum apud ipsum accepti amantissime & supra modum hilare, cum maxima iucunditate fueramus, summo dolore sumus affecti. Nam ego quoq; illuc veneram, exoratus ab amicis communibus, vt relictis rebus, quas tunc plane necessarias in manibus habebam, & posthabitis negotijs, quæ sane erant eiusmodi, vt celeriter expediri mea referret plurimum, ad Philippum Melanchthonem me quamprimum conferrem, vt nuntio accepto domestici luctus, ex
mea

mea præsentia, cuius consuetudinem & vsum ei iucundissimum esse scirent, aliquid illi con-
tingeret alleuationis. Nam cum discedens
filium vnicum Philippi ipsum quoq; nomen
habentem reliquisset periculose ægrotantem,
conualuit hic quidem paulo post, sed vxor-
em Philippi Melanchthonis mox sustulit
improvisa tunc quidem mors, inter sæuos
cruciatus commotarum in toto corpore flu-
xionum mirificarum. Laborauerat autem
& illa grauius eo quo vir ipsius morbo, cuius
nomen Græcum diximus esse λιθιάσην, la-
tini, quoniam tunc concreescunt in corpore
quasi calculi, ita etiam illum morbum ap-
pellarunt. Sed concurrerunt tunc aliæ etiam
difficultates, fortasse minus animaduersæ.
Atq; obiit illa quidem diem supremum suum
non aliena ætate, quod annum sexagesimum
omnino tunc habuerit, verum quæ & po-
tuisset tamen per illam, si ita Deo æterno vi-
deretur, viuere diutius, & fuisset hoc marito
opportunum atq; vtile. Cum autem Ey-
telpergam ad ipsum venissem, reperi ibidem
& fratrem eius Georgium. Gener vero Ca-
spar Peucerus secutus illum fuerat domo ab-
euntem, neque ab ipsis latere vspiam disce-
debat. Meo aduentu mirifice eum gaudere
est intellectum. Nam ita acquieuit in com-
plexu colloquioq; meo, vt nulla de re publi-

ca aut priuata quicquam perconſtaretur, ſed tempus omne consumeret conſuetis nobis ſermonibus. Indiciū igitur caſus domeſtici placuit pauliſper differre. Sed veriti ne ex alijs ille hunc cognosceret, & ſuccenſeret nobis, qui celafſemus, ita poſtero die, quid eueniſſet, ei oſtendimus. Non dedit ſignificationem vllam vehementis perturbationis, cum ingente dolore affici ipſum nemo dubitaret. Atq; nominatim vxori mortuæ valeſcens, hoc modo addidit, ſeſe eam breui ſecuturum eſſe. Et mecum ſeducto ad camerarum vitium, nam in principis hortos tunc forte conceſſeramus, multa locutus eſt grauiter & pietatis atque prudentiæ plena conſideratione, de Republica & aſperitatibus ac conſuſione rerum pene vbiq; omnium, & deplo-
rauit de ijs, quæ fierent, veriſſimas querelas, & multorum triſtiſſimorum euentuum cauſas commemorando, quæ etiam deinceps conſecuta ſunt, nimis vere nonnulla prædixit. Atq; doloribus ob Rempub. omnino opprimi, inq; eo minus ſentiri ipſius proprium quamuis recentem atque acerbum appar-
ebat. Quibus tamen implicatis triſticiam augeri necelle fuit, quia corpore etiam languefcente grauiffime tunc laborauit ſuo illo malo morbi ſupra indicati, & maximis cruciatibus non ſine periculo eſt affectus, cal-
culis

culis grandiusculis in vrinæ vijs hærentibus diutius, quod fractis debilitatisq; viribus minus strenue ea præsertim ætate eijcerentur. Sed ad Berbetomageneses actiones narratio reuocanda est. Regis Ferdinandi illuc responso tandem allato, quo iubebatur: Ante omnia, si fieri posset, instaurari ita disputatio, vt tolleretur omne vndiq; impedimentum illius, vtq; in eorum, si necesse esset, qui discessissent, locum surrogarentur alij, & ita negotium continuaretur: Id quod cum decreto Ratisbonensi congruere videbatur: Tunc igitur ij, qui antiquæ Religionis causam defendere se gloriabantur, sane perculsi, negare hoc sibi faciendum, neq; aduersarijs dissidentibus, disputationem producendam. Quid enim hoc profecturum? aut quæ ratio omnino ineunda esse videatur? cum ignoretur ad quas sententias respicere debeant. Concordarent igitur prius aduersarij, vt sciri posset, quid ab ipsis constanter retineretur & assereretur. Atq; etiam hi tunc de damnationibus quibusdam, imitantes eos qui discesserant, postulationes inculcaverunt. Sed fuit diserte responsum: Totam rem decreto Ratisbonæ facto, & regijs literis esse explicatam, & Augustanæ confessionis defensores præsto esse, neque defugere aut recusare vllos legitimos congressus, &

testari, si abrumperetur disputatio, sua id culpa nequaquam fieri. Nonnihil molestiæ sollicitudinisq; tunc præsidi oblatum, sed altera illa parte nullo modo prosequi volente institutas disputationes, ita tandem iste conuentus dissolutus fuit. Quiq; ibi remanserant ex defensoribus Augustanæ confessionis, Præsidis quoq; testimonio laudati sunt. Et ipsi inter se cum priore necessitudine confirmata, tum noua societate inita, domum suam quisq; reuersi fuerunt. Friderichus deinde Staphylus, qui se in aulam Regis Ferdinandi insinuasset, & augeret numerum eorum qui refellere deberent defensores Confessionis Augustanæ, scriptum edidit, tam futile vt contemni, tam vero improbum & malum, vt animaduersionem non effugere debuisse videatur. Cuiusmodi & alia illius fuere vniuersa, quæ postquam prodita causa desciiuit ab amplectentibus doctrinam expositam capitibus Augustanæ confessionis, diuulgauit. Atq; mirabantur prudentiores tantum licentiæ concedi leuitatis furori, neque intelligi, quæ stabiliri isti vellent, ea vehementius eosdem labefactare, præsertim cum similis vesanix & ab hac infeliciū euentuum exempla essent in medio. Quidam Auius etiam nescio quid tunc effutiuit scribendo. Philippus autem Melanchthon
breuiter

breuiter ille quidem & strictim ambobus, sed grauiter atq; luculente respondit. Atque hæc fere sunt tunc gesta, quibus Philippus Melanch. & interfuit & præfuit. Hoc eodem anno post quasdam coram principib. disputationes cessit maleuolentiæ & odio Flaciæ factionis, Iustus Menius, & Lipsiam se contulit, vbi humaniter & benigne acceptus diutius anno integro vno, Ecclesiasticas conciones habuit, cum audientum fructu & admiratione, mortuus placide III. Id. sextil. Anno Christi M. D. LVIII. Commendatus fuerat Senatui illius vrbis à Philippo Melanchthone, neque alibi defuturus ipsi locus fuisset, sed Lipsiæ contigit opportunus atq; commodus. Varia atq; multiplex fuit huius viri fortuna. Quicumq; nostra ætate eruditionis & doctrinæ fama celebres fuere, cum ijs vniuersis ipsi noticia necessitudoq; & vsus intercessit, & hi illum carum habuerunt & magnificerunt. Multis annis fidelem & vtilem operam dedit in regionibus Durin- gicis, & tandem ingrauescente ætate insolentia & clamoribus acerbitatis turbulentæ exagitatus, quietiorem sedem quæsiuit, & inuenit reliquæ ætati suæ non longæ, vt diximus. Mortuus fuerat ante hunc Vuittenbergæ Iohannes Bugenhagius Pomeranus pastor Ecclesiæ illius, vir dignitate præstans

& in rebus maximis cum summa laude versatus, contentus quidem ea conditione & illo loco in quo primum fuisset constitutus, cum ad amplissimos honores potentiamque & opes eximias perueniendi præclaræ occasionibus ipsi darentur: Ad quas non ille quidem contenderet, sed inuitaretur penèq; attraheretur. Spectatissima hic cum fide & assiduitate mirabili officio suo annis xxxiiii. functus est, & curationi latæ præfuit studiose ac solícite, & patiens & nequam fugiens laborum. Excessit ex hac vita annos natus lxxiii. cum quidem aliquot annis fuisset perquam imbecillis, superiore fere tempore integris & firmis viribus usus. Quamuis autem immatura ea mors videri non posset, neque ætati ipsius aliena, neque decedenti grauis accidisset, diuturnæ tamen vitæ communiter in rerum præcipuarum societate peractæ memoria, & usus illius desiderium magno dolore affecit Philippum Melanchthonem & alios, moerentes ob veterem & singularem amicum laborumque omnium & curarum participem amissum. Hic cum sensim viribus tam animi quam corporis deficeretur, & non morbi gravitate sed diuturnæ debilitatis langore velut evanesceret, animaduvertebatur quasi simulacrum prioris viri in omnibus rebus agendis alacris & prom-

& prompti intuentem Philippum non leuiter perturbari. Auditaq; sunt voces ipsius deprecantis, ne sibi talis senectus contingeret. Id quod secundum optatum ipsius accidit. Nam ne morbus quidem quo confectus obijt, vel impediuit præclarissimas cogitationes pietatis & sapientiæ ipsius, vel obstitit memorabilibus & eruditis sermonibus, vel reprimere potuit laborum, quibus consueuerat, defatigationes, vt decesserit non admodum de statu vitæ traductæ recedens. His temporibus neq; Respub. quieta fuit, & in Ecclesia varie turbatum. Atq; rursus de conflanda Synodo verba fieri, & quibusdam tumultuantibus sine fine, & modo hoc modo illud arripientibus ad exagitandum, iamque inter se, ijs qui assertores defensoresq; veræ & sanæ atq; salutaris doctrinæ videri volebant, fœde dimicantibus, & contumeliosa scripta edentibus, multorum animi grauiter perturbari. Sed hoc magna pars nihil curare. Quasi Religionis caput esset, acerbitas dissensionum ac contentionum. Et si, vt ingenia atq; naturæ & institutio, sic consilia, voluntatesq; & actiones dissimiles animaduertebantur. Neq; probabantur adeo omnibus omnia, quæ à suis quoq; fiebant. Sed Berbetomagi acta valde repræhendi à Flacianis; Et dari opera vt ijs, qui suarum
partium

partium essent, congregatis decreta de illis fierent. Alij quoque cupidi tranquillitatis atq; concordia, iudicare conuentu acto partis vtriusque laborantibus rebus consuli posse. Sed prudentiores statuebant contrarium de exemplis antiquis & recentibus. Itaq; non nihil quidem negotij factum laborisq; & molestia inter tales consultationes exhibitum fuit Philippo Melanchthoni. Sed vltra deliberationes & conatus atq; studia tunc non est processum. Incidentibus praesertim & alijs grauioribus negotijs. Nam & Imperator Carolus omne gubernationis Ius & Imperij maiestatem tradidit in manus Principum septemuirum creandis Imperatoribus Rom. Et est idem paulo post mortuus in Hispania. Consilium hoc cepisse eum etiam ante annos xxx. affirmabatur, sed tunc & exhaustis viribus & aduersis euentis fractus, desperatione quadam rerum omnium & amissione nonnullarum opportunitatum, id executus est, quod ratione quadam olim se facturum esse constituisset. Audiui, cum aliqui ab ea sententia abducere ipsum vellent Carolum dixisse: Impendisse se quae habuisset omnia & quidem in fulciendum tuendumq; maxime Ecclesiasticum statum: Pecuniam, quae quidem reparari idq; damnum sarciri forte posset, sed amissam quoq; esse existima-

existimationem nominis, & valetudinem bonam, & studia hominum, quæ recuperaturus esset nunquam. Annis duobus antecedentibus mortem Philippi Melanchthonis hospitem hinc ad ipsum misimus senem Capadocem Cæsariensem, qui habebat literas Patriarchæ Constantinopolis; Græcè scriptas, quibus itineris ipsius causa indicabatur & commendabatur nomini Christiano. Pro filijs hic suis numerare certam summam pecuniæ debebat, qui interea in potestate Turcarum haberentur. Non depræhendebatur fraus vlla, eo magis animi omnium misericordia ipsius commouebantur, & renouabatur memoria Philippo Melanchthoni Basilij Episcopi, quem ciuem huius solebat appellare. Venit postea ad illum Demetrius quidam gente Mysus, qui in Græcorum Ecclesia Constantinopoli Diaconus fuerat, sermonis Græci peritus, Isq; satis diu in his regionibus commoratus est. Et Sabini duas filias elocauit Philippus, & nobiscum luxit obitum filiae atq; neptis meæ, & alijs domesticis incommodis communiter dolore est affectus. Sed neq; curarum quies erat, quas afferebant & conuentus ordinum Imperij qui Augustæ habebatur, & scripta quædam de Ecclesiastica doctrina singularia atq; mirifica, nec non edicta seuera, Et alijs item ca-

-fus,

fus, conatus, molitiones, quæ multiplices & mirabiles hæc tempora quasi inundarunt. Anno Christi Iesu M. D. LX. mense Ianuario obiit mortem valde senex & iamdudum decrepitus Argentorati Nicolaus Gerbelius vir optimus atq; integerrimus, & humanitate, suauitate morum, doctrina, omni genere solidæ laudis excellens. Hic Iurisconsultus diu dederat operam collegio in illa vrbe sacerdotum primario, & aliquando Viennæ Austriacæ cum Iohanne Cuspiniano & illius ætatis opt. disciplinarum atq; artium fama celebribus vixerat familiariter. De quo accidit quod nullo modo reticendum putavi. Cum enim is esset vir ille, quem diximus, & probitate innocentiaq; ac studio religiosæ pietatis commendaretur in primis, quæ erant laudes in ipso decoræ & illustres, & prædicabantur ab omnibus: Quidam in libello Rhetoricorum præceptorum suo exponens exemplum actionis capitalis, hunc tanquam Sacrilegij reum nominatim introduxit, & ab accusatore peragi fecit. Quod factum, vt autor affirmabat, inconsiderate & temere (etsi non est ista in professore Rhetorices bella defensio) & opt. atque innocentissimus vir Gerbelius, & amici ipsius grauius, quemadmodum par erat, & perquam iniurie tulerunt. Deq; ea iniuria tam

tam atroce querelas suas ad Philippum Melanchthonem detulerunt, cui illius libelli scriptor notus esset, & significarunt, se constituisse, quibus modis possent pro fama & dignitate nominis Gerbeliani propugnatu-
ros, & eam contumeliam ab ipso propulsatu-
ros vindicatu-rosque esse. Ea res cum & Philippo Melanchthoni & nobis omnibus magnum
dolorem afferret, videreturque magnopere
vel exempli causa animaduertenda, & esset
tamen autor libri is, in cuius persona etiam
aliorum respectus verteretur, Philippi autem
Melanchthonis animus, ut semper, sic tunc
quoque ad pacem atque concordiam inclinaretur,
ita ab hoc est negotium illud his fere
conditionibus transactum: ut criminis infamia
ante omnia remoueretur, & nomina
temeraria, ut affirmabatur, incuria falso in-
culcata statim inducerentur, & ipse autor
peculiari scripto fateretur iniuriam, eamque à
læso deprecaretur. Est autem omnibus no-
bis facinus illud visum perquam indignum
& malum, siue cogitatum seu per impruden-
tiam commissum. Quæ enim, si proposito
& consilio factum esset poena autori irro-
gari deberet, constabat. Quis autem à tali
culpa fraudem malam abesse possit dicere?
Sed in scribendi edendique scripta infinita li-
centia, & leuitate ambitionis, & famam do-
ctrinæ

ctrinæ affectantium insanis cupiditatibus, & hæc & huiusmodi alia praua atq; peruersa accidere necesse est, Quibus profecto plus damni datur moribus & vitæ, quam vllarum rerum demonstratione aut explicatione bonæ vtilitatis conferatur. Atq; tum & maiora quoq; & cætera omnia fere sic gerebantur, vt & in præsentia admodum turbulentæ res essent, & in posterum nihil spei bonæ sese ostenderet. Sed Philippus Melanchthon abducente cum propitio Deo & eripiente flammæ inuidiæ odijq; maioris, & liberante grauioribus malis miserisq; vel æumnis potius, euentus istos vitauit, & ex periculis laboribusq; & angoribus, deniq; tristitia aduersisque omnibus euasit ea morte, quam illum obijisse iam diximus, & de qua extant narrationes copiosæ aliorum. Cuius diei anniuerfariam memoriam celebrat nunc quoq; perquam studiose Academia Vuittenbergensis XIII. Calend. Martij. Cum vixisset annos LXIII. & totidem pene dies. Elatus est cum funere specioso totius ciuitatis frequentia, ordinis scholastici inprimis, & prosequentibus exequias illius externis quoq; in quibus & ego fui. Monumentum positum est ad sepulcrum in templo ad arcem, opere præclarum cum versibus epitaphijs & effigie ipsius. Festinaueram autem ego, vt viuentem ad-

tem adhuc reperirem, significatum enim fuerat rem esse in præsentē discrimine, cum ante dies paucos ab eo discessissem, non mala in spe, illo ipsum morbo non interiturum. Nam & tunc quinta tentatio (λήψις Græcis sunt & παροξυσμοὶ) sperabatur vel nulla vel minor accessura, & ipse cupidum me remanendi diutius reuerti domum ad meos iusserat vultu hilari & lætis verbis, quod diceret, proximo mercatu, qui iam appropinquabat, se ad nos venturum. Addens quidem hoc: vel vna perpetuo futuros aliquando esse in æterna vita. Sed septima incurſio morbi finem fecit vitæ in terris ipsius, idque ego in itinere cognoueram. Cætera ab alijs studioſe commemorata à me omitti recte potuiſſe exiſtimaui. Febri illum diſcedentem à nobis Lipſia, tempore parum opportuno, cepiſſe laborare animaduerſum eſt. Quæ neglecta ab ipſo, etiā ingraueſcens, in periculoſum inprimis genus putabatur euaiſſe, quod Medici ἡμικριταῖον vocant. Sed, vt aiebam, hæc accurate & copioſe enarrata ab alijs me repetere non eſt neceſſe, vel non etiā oportet. Vt luxerunt autem hunc mortuum boni vniuerſi, ſic nonnulli petulantes & improbi infectati fuerunt, controuerſiæque Eccleſiaſticae cæpere fieri atrociores. Renouantibus quibuſdam quicquid poſſent contentionum

acerbissimarum & plane capitalium, & commouentibus maxima & exitiosa mala, quædam non pessime etiam sita, denique molientibus omnibus viribus distractionem, qua quod adhuc utcumque cohereret & esset coniunctum, id penitus discerptum dilaceraretur. Erupit autem tunc odium & inimica atque plane hostilis alienatio, eo diuerticulo quod iamdudum quæsiuerat, cum aggressiones apertæ minus fuissent efficaces, vel ita futiles & infirmæ, ut primo conatu statim languescerent & frangerentur. Arripueruntque nomini Philippi Melanchthonis infesti disputationes quasdam, quæ erant ad vulgus commouendum inprimis idoneæ, de sacratissima actione in Ecclesia, qua instituto Iesu Christi conuenitur ad communionem corporis & sanguinis ipsius, participantibus ijs, qui sine controuersia sunt in cœtu Ecclesiastico, ut ritu religioso celebretur conuiuium dominicum, quemadmodum veterum quidam appellauit. Quæ res cum sit eximia & inter illa quæ arcana habet & peculiaria congregatio Christianorum, casta etiam oratione de ea utendum esse semper Philippus Melanch. statuit, & non potuit dissimulare interdum dolorem, quem caperet ex quorundam temerarijs & absurdis declamationibus, cum præsertim in certamen ventum esset, & acer-

rime

rime pugnaretur tanquam praelio commisso, non de veritate doctrinæ, sed sua cuiusq; opinione & verborum locutionisq; præscripto vsu. Prodierat quoddam de ea quaestione scriptum Philippi Melanchthonis quo consilio quauē occasione aut omnino caussa, non habeo dicere, sed prodierat, tale quidem, vt hoc, qui ex animo religiosæ pietatis studiosus & vir bonus esset, offenderetur nemo, diligenter etiam & attente considerantes multa vtiliter subiici admoneriq; animaduertent: Non ita tamen quasi limatum neque perpolitum, quemadmodum in isto genere sunt ea quæ edi diuulgariq; ipse voluit, & continens mentiones de quibusdam liberiores. Quibus irritatum istud genus hominum ferox atq; intractatum, excurrit immoderate, & eo est prouectum, vt neq; pietatis ad Deum, neq; officij ad homines, neq; estimationis propriæ respectus vllus curaue eos attingeret. Equidem non dubito quin apud aliquos ea vel suspicionem vel crimen subitura sint, quæ de his negotijs atq; hominibus ad talem modum à me exponuntur, tam affectionis cuiusdam priuatæ atq; singularis, quam iudicij & sententiæ peculiaris ac fortasse parum prudentis. Verum enimvero ob huius illiusue estimationem de me & hac narratione sermones, cum & initio & in-

ter scribendum cogitarim atq; præuiderim
euentus fortunam, non putauí quicquam
omnium omittendum, quæ & vera esse sci-
rem, & prodita arbitrarer à bonis libenter
lectum iri, & nonnihil quoq; momenti alla-
tura esse, ad curam diligentiamq; excitan-
dam tractationis & considerationis earum
rerum, quarum adhuc reliquas tanquam
morbi afflictiones & tabem metuisse semper
magna animi perturbatione Philippum Me-
lanchthonem scimus, & sæpe audiuimus di-
centem: In hoc extremum periculum & sum-
mum discrimen causam esse venturam. Cum
autem istas res & hæc negotia post mortem
Philippi Melanchthonis tres inprimis exa-
gitare & illis insolentia verborum ciendis,
quasi camerinam, vt dicitur, commouere
ceperint, ad institutum fortasse argumentum
de his & contra illorum impudentem per-
uersitatem aliquid à me differi, pertinere vi-
deatur. Sed mihi ne nomina quidem istorum
exprimere scribendo libet, & supra prauitas
malitiæ eorum est à me notata. Etsi au-
tem dolendum est occasionem eam tandem
nactos esse, quam diu quæsiuerunt, impro-
bos ac malos, vt postquam è medio abijt Phi-
lippus Melanchthon & in hunc cæterosq;
declamitare eis audacius liceat, & liberior sit
potestas quasi curriculum furoris sui confi-
ciendi

ciendi, In dolore tamen propter miseras nostras & augescentes dissipationes, erupisse tandem omnem acerbitatem odij & malevolentiae impetus, gaudio videtur esse dignum. Nam neque quid amplius isti, tanquam de penu turbulentae malitiae proferant, restat, neque iam praeterea habent quicquam, quod ad Philippi Melanchthonis auctoritatem diminuendam & nomen infamandum inculcari possit. Petebatur ante annos ille aliquot primum obscurius, mox deinde aperte accusationibus & reprehensionibus quorundam quieti & ocio inimicorum. Assentari potentibus insimulabatur, & errores stabilire, & fulcire manifestae impietatis ruinas. Quod rebus perturbatis non esset autor desertionis & fugae, quodque veluti de naufragio tabulas colligi studeret, & perferenda arbitraretur omnia, quae bona conscientia & sine scelere tolerari possent, neque nova vulnera infligenda esse censeret rebus communibus. De his quas telas gravissimorum criminum, & quam saevas accusationes detexuerit ingrata quorundam improbitas, non est fere cuiquam ignotum. Quibus iam in vehementia & insolentia evanescere incipientibus, Ecce altera ad vulgus, cuius fere arbitrium spectatur, plausibilior causa offertur, & huius actores iam exultant, & urgent reum, mortuum

tuum illum quidem & fruente[m] requiete sem-
piterna. Quemq[ue] tales clamores & insecta-
tiones non amplius attingunt: Cum concu-
care tamen immanitas odij iacentem gessiat,
& huius nomen cupidissime arripiat, ad ip-
sius quidem, vt putant ignominiam imprimis,
cui infensi sunt, & pro maximis beneficijs
eam referunt gratiam, vt memoriam eius
omnibus probris aspergere conentur: sed
hoc tamen interea agitur, ne vsq[ue] ad Rei-
publicæ salutem & dignitatem consentiatur,
vtq[ue] noua quædam impedimenta obijciantur
concordiæ speratæ. Veritatem autem per-
uestigari, & futes atq[ue] nugatorias fabulas,
& declamationes populares cohiberi, non
esset vtile omnibus. Quod multi, qui in ista
confusione opinionum & licentia vitæ & ho-
minum leuitate magni sunt ac conspiciuntur,
rebus negotijsq[ue] explicatis & constitutis, con-
temnerentur & laterent. Quinetiam non
paucis tunc pericula impenderent & caussa
dicenda esset cum factorum tum dictorum.
Turbulenta igitur esse tempora eis prodest,
vt captantibus anguillas, secundum Græ-
cum Comicum, aquam turbidam. Atq[ue] vnus
ex ista cohorte, id quod antea quoq[ue] indi-
gnantes attigimus, procurrens non modo
vivos, sed mortuum etiam Philippum Me-
lanchthonem prouocat, & optat superesse
eum

eum in hac vita, vt suas vires congregando cum ipso ostendere possit. Nos vero multo magis & verius, adhuc viuere in terris, si ita Deo aeterno videretur, vellemus Philip-pum Melanchthonem non tam explorata spe facile istam temerariam audaciam ab ipso re-sutatum iri, quam certa sententia, non solum multorum vociferationes reprimi, sed tran-quillitatem & pacem Reipub. & doctrinae celestis puram integritatem optimarumq; di-sciplinarum & artium honesta studia huius viri respectu, cura, diligentia, industria, pie-tate, fide, potuisse conseruari. In quibus quæ labes fieri cœptæ sint, nimis est euident, & quid calamitatis immineat, audacissima vel potius impudentissima istorum scripta indi-cio esse possunt. Nam si hoc concedatur & liceat vesanix: in quosuis arbitrio suo in-uehi & quodcunq; libuerit ex ore inuerecun-do, conceptum animo proteruo emittere, & cartis temere illitum ita in vulgus spargere, vt aniculæ etiam legere & cognoscere pos-sint, neq; doctrina veritatis cœlestis sincera retinebitur, & hic furor statum adhuc qua-lemcunq; rerum, & studiorum piorum for-tunam conuellet, contemptumq; pariet ho-rum, & reddet inuisa plerisq; tribuentibus hanc culpam hominum ipsis studijs. Ac osten-tare sane videntur isti & prouocator ille glo-

riofissime, eruditionis literatæ copiam. Quâ
cur aliquis eis inuideat caussa non est. Inse-
rant sane græca aliquot verba, & excerpta
de commentariolis & libellis Grammaticis
quædam agglutinent, & affectent nitorem
orationis. Nemo vt admirabitur, ita fortas-
se hoc repræhendet. Sed id pene est horribile,
quod Dialecticam subtilitatem & complexi-
onum solertiam eam adhibent, qua sua qui-
dem opinione, vincunt atq; prosternunt vni-
uersos. Eius tamen profectio facultatis nisi
viam rationemq; demonstrasset Philippus
Melanchthon quæ illa esset, genus omnino
istud ignoraret. Et si male didicerunt hi, si
quid tamen didicerunt, & tanquam Simij id,
quod illum facere viderunt, peruerse imitan-
tes, doctis sunt ridiculi, cum grauiores ad-
modum ipsis etiam irascantur, quos maximis
in rebus non pudeat ineptire & prodere in-
scitiam suam, vel ludere etiam scientes. Quod
tamen haud scio an non faciant, cum tanto
supercilio rationes fuitiles atq; dissentaneas
colligant ac concludant. Quemadmodum
autem Simiarum (nam huius animantis simi-
litudinem isti nationi imprimis conuenit) conan-
tium gestus humanos exprimere, prauitas
eminet, si vna cum hominibus illæ mouean-
tur aut saltent: ita istorum futilitas fit mani-
festior, quando suas nugas doctrinæ appli-
cant,

cant, & contra ea, quæ sunt ab alijs vtiliter
 & præclare scripta, suas ineptias proferunt.
 Atq; videri possit alicui non aliena etiam his
 Platonica fabri calui & pusilli imago. Vt hic
 enim pecuniam nactus, iam lautus & orna-
 tus filiam Domini ducit coniugio abhorren-
 te, sic ipsi temere irruentes in professionem
 omnium præstantissimam, populari applau-
 su quasi ditati, & præceptoris sui rapientes
 eruditionis atq; doctrinæ opinionem, infeli-
 ce & præpostero vsu veluti progignunt com-
 menta vanitatis atq; dementiæ ad fallendum
 & turbas dandum apta atq; nata, & accom-
 modata ad accelerandam ruinam Reipub.
 quasi mœreant, nimis tarde eam concidere.
 Itaq; omnem moram ægre ferunt. Nihil pla-
 cet exquiri aut considerari. Sed tanquam equi
 habenis ruptis insano cursu efferuntur, quæ
 ipsi arripuerunt ea retinentes, & impetum te-
 merarium facientes in omnes. Interea quid
 cui congruat atq; consonet, non curant.
 Tanta scilicet acrimonia tamq; eccellente vi
 ingenij præditi, vt, quamuis cuncta misce-
 ant, confundant, inuoluant, perturbent, ipsi
 tamen placere sibi & cæteros præ se contem-
 nere valeant. Quod si aduersantes sibi nullo
 alio argumento refellere potestas detur, tum
 in promptu est aut interrogatio mirabilis &
 infesta, nullam attentionis & diligentiae re-

sponsionem admittens, aut petulans irrisio, qua eludantur si qua contradicuntur, aut conuicium maledicum aduersarios proterens. Postremo omnibus alijs artibus & viribus consumtis ad zeli iactationem & ostentationem Fidei deferuntur. Non cogitantes peruersum aliquem solere & improbum zelum expertem necessariae cognitionis, & omnem Fidei sanctae doctrinam esse consentaneam oportere, ne analogia illius conturbetur. Hanc silentio praetereundam non putauimus vel malitiae improbitatem vel dementiam superbiae, vel odij etiam caecitatem. Quae cuncta modo non magis insidiantur neque fraudem parant nomini Philippi Melanchthonis sed manifestam faciunt impressionem, & quasi machinis admotis illud oppugnant. Ut Homericum scilicet de eo fama ad posteritatem relinquatur Zoylorum & Daphidarum. Qui non statuat pietate & doctrina praestantiss. viri, sed multo illustriora monumenta scriptorum ipsius, flagellis nefariorum conuiciorum verberasse perhibeantur. Si quid autem est profecto vnquam editum, neque argumento concinnum, neque verbis elegans, neque aptum sententijs, neque oratione compositum, sed dissolutum, inane, vulgare, arripit, ut dicitur, e triuijs, id prorsus est, quod rabies istorum effutit. Tollat enim aliquis importu-

importunitatem arrogantiae, leuitatem scurrilem insectationum, petulantiae exultationem, in summa, inducantur inepta, friuola, proterua, nugatoria, falsa, futilia, partium quoque iudicio indecora & mala, perparum relinquatur atque supererit in istis infelicibus cartis, ut admodum pauca aliena, & qui interdum, secundum Poëtam:

Purpureus late qui splendeat unus & alter

Assuitur pannus.

Cur vero, pugnaces isti inquirunt, non refutantur nostra? Cur nemo respondere nobis audet? Quia enim sunt illa talia qualia diximus, & qui sapiunt cum insanis insanire nolunt, neque existimant ea tractanda esse, quorum qualicumque contactu, inquinari ipsos necesse esset. Maluntque expectare tempus, quo illa, quasi araneolarum telae, sua sponte euanescent, quam committere, ut sua veluti propagatione diutius durare possint. Maxime autem omnium demiror, Quid in animo vni ex istis fuerit, cum Philippum Melanthonem veteratorem nominandum putauit. Si tamen quid insanis in animo sit, aut quid hi putent, aut omnino quid ab ipsis fiat, mirandum est. Hoc quidem nomine qui recte sunt vsi, ij significare voluerunt malitiosam improbitatem & fraudes calliditatis & perplexas astutias. At enim constat omnibus,
neque

neq; isti qui crimen hoc infert, ignotum est:
Fuisse Philippum Melanchthonem alienissimum in tota vita sua ab omnibus fraudulentis consilijs & subdolis actionibus fugientem ambigua, & perspicua sequentem, Inimicum fucatis & tectis & confusis rationibus, & ei quam Sophisticen ille solebat vocare. Quæ tamen minus iam vsurpatur, cum pleriq; non versutem rem inuoluere conentur, sed aperte falsa atq; ficta asserere non dubitent. Quemadmodum seruus Comicus se non tam furacem esse ait, quam antea fuisset, quod rapiat propalam. Dat autem hanc eis licentiam cum vitæ dissolutio, tum migratio Philippi Melanchthonis. Non faciem enim, quemadmodum de se ait apud Homerum Achilles:

Cassidis ipsius contrariag, ora tuentur,

Neq; est vero tanta acrimonia ingenij in isto manipulo, neq; patientia laboris in discendo, vt fallaciæ conclusionum (quæ sunt Sophismata) callidæ saltem & speciem aliquam habentes ab ipsis vel expectandæ, vel magnopere pertimescendæ esse videantur. Cur vero hi defatigarentur cogitando, comminiscendo, fingendo, quid vel sententijs implicaretur, vel exornaretur verbis, cum admittat leuitas huius ætatis mendacia manifesta, & impune dicatur atq; fiat, quicquid audet
verè

verecundiæ expers animus. Sed redeo ad veteratoris crimen vanitatis iocularis. Arrestum hoc est de illa quæstione, quam commouit non Philippi profecto Melanchthonis attentæ atq; religiosa pietas, sed importuna quorundam vehementia, & superba confidentia, & audacia turbulenta cum perniciæ publica & mœsticia bonorum omnium incredibili. De qua quidem nos disputare nunc non volumus, neq; hoc vlcus intempestiua manu tangere, neq; adeo rixandi, quæ à multis quæritur, occasionem suppeditare. Ex his autem vnus, quem nescio quo pacto vt supra nominarem rei indignitas expressit, cum turpiter desciuisset à causa essetq; iam aduersarius manifestus, qui se cum infamata detestandaq; nuper terra exorta tanquam Gigantea, & sanctissimum solumq; salutare Iesu nomen infamante familia coniunxerat, quamuis vt in agris conlitis sues, multos scrobes foderet, & passim huc atq; illuc rueret, seq; in compluribus veluti herbis salutaris & puræ doctrinæ euellendis defatigaret, in vnam tamen maxime partem incubuit vehementia iracundiæ suæ, vt obtruncando Philippi Melanchthonis nomini cæterorum omnium cupiditatem atq; conatus vinceret, cum ijs à quibus alijs in partibus dissentiebat, oppugnando Philippi Melanchthonis dignitatem

tem pietatemq; & doctrinam concurrens atque conspirans (odij inuidiaq; & communium simultatum acerbitate eos alienissimos tanquam aspides Ichneumonesq; & Crocodilos contra naturam ipsorum conciliante) vt sanctiss. manes simul insectentur, & religiosissimum sepulcrum Philippi Melanchthonis perfodiendo violare conentur. Atq; isti cum inter se inimicitias alijs de rebus ingentes gerere & vehementer dissidere videntur, specie quidem differunt, sed genere prauitatis extremæ similes sunt atq; germani. Vtriq; enim ij sunt, quos ipsorum de se præconia non minus quam aliorum delectent, vel qui illa quoq; verbosc facere consueuerint, cum ab alijs aut non omnino, aut admodum parce fiant. Videri igitur aliud quid esse apud certos homines, quibus sese venditant, & eminere existimatione cupiunt: Verum neq; res eadem sunt, neq; ijdem homines vtriusq; contingunt. Ita iam forma tantum diuersa est, genus improbitatis vnum. Et congruit nunc istud maxime, quod eandem materiam artifices isti sumserunt, de qua criminationes & probra in Philippum Melanchthonem mortuum exculperent, illud inquam scriptum, cuius paulo ante facta est mentio. Primum autem quis non videt de illo litigare cum Philippo Melanchthone neq;

neq; integri sensus neq; sanæ mentis esse, cum ille viuis non ediderit. Tota enim res hæc ad eos iam pertinet, qui istud diuulgandum curauerunt, magnis & grauibus de causis, consilioq; prudente, & ratione, quemadmodum nos credere par est, vera. Hi igitur accusantur cum alijs quibusdam hoc in negotio socijs, inq; hos iste improvidus impetus sese infert. Sed quid est tandem in quo scriptum illud tam male de istis mirificis hominibus meritum videri possit? Nisi quod cupidissime arrepta occasio est, non tam insectandi Philippum Melanchthonem quam præstigijs quibusdam illudendum legentibus & ad excandas imperitorum mentes istam offundendam caliginem. Quæ sita est inuidia Philippo Melanchthoni non ab eorum, quæ scripsit vitio, verum ab alienæ calumniæ interpretatione vel, verius vt dicam, cauillatione. Etiam de alijs viri illius monumentis idem fieri comperitur. Et cernimus pene indies aliquid tanquam personæ nouæ in scena prodire huius non librorum modo sed epistolarum & dictorum. Quæ fiunt nunc impune omnia & audacter, sublato eo, cuius grauissimis verbis & verorum scriptorum autoritate facile refutarentur, quæ cum læderent vniuersa. Non quod ipse pro se aduersus aliquos dicturus scripturusue fuerit quicquam, qui
nunquam

nunquam suæ famæ aut dignitatis tam studiosus fuit, vt se defendendo & à se impetum atq; vim aliorum propulsando, vehementer aut turbulente diceret aliquid aut scriberet, quemadmodum in contentionibus fieri solere scimus: Sed rem euoluendo & edisserendo, ambigua remouendo, propria atq; certa stabiliendo, falsa confutando, vera asserendo, futilia ac nugatoria reiiciendo, id perficeret profecto, vt stolidæ aut peruersæ leuitatis & impudentiæ furiosa temeritas cideret atq; reprimeretur, vna Philippi Melanchthonis plana & simplice vel explicatione vel assertionem. Est autem in his attendentibus imprimis molestum atq; odiosum, Quod mentio sit earum rerum, quas culpan-tes vel ipsi non interfuerunt, vel non curarunt admodum cognoscere, vel demonstratas malitiose inuoluendo obscurant. Inculcantur odiose nomina quædam, & dogmata exponuntur verbis illa quidem asperius & sententijs iniquius, & his aduersatus Philippus Melanchthon aliquando fuisse & restituisse fortiter, & causam postea prodidisse insinuat. Sic autem ista agitur Tragoedia, vt quælibet dissensiones statim mirifico quodam zelo capitales fiant, quicq; aliquibus non applaudunt ipsi statim hostes ab ipsis iudicantur. Non libenter verba his de rebus facio,

cio, non quod vllorum criminationes perti-
mescam, qui omnes paulo moderatiores, &
non similiter petulantes atq; ipsi sunt, per
contumeliam neutrales aut transfugas etiam
appellant, sed ad alia respiciens, quæ nunc
referri necesse non est, timidius ista attingo.
Cum autem insultantes mortuo Philippo
Melanchthoni cum alijs colligendis decla-
matores, vt sibi videntur, sint acres & vehe-
mentes, tum in scripti istius, cuius mentio
supra facta est, crimine equitant ferociter,
omnibus contumelijs appetentes famam &
nomen optimi & sanctissimi viri. Impro-
basse aiunt aliquando eum quædam. Ille ve-
ro semper improbavit neq; necessarias & mi-
rificas quæstiones, & multo maxime disce-
ptationes perniciosas, & rixarum causas.
Cum autem cerneret à quibus, quæ res, quam
alieno tempore proferrentur, neq; ita, quem-
admodum oporteret, eas tractari existima-
ret, nunquam dissimulauit sibi inexplicatam
nouitatem magnopere displicere. Itaq; ali-
quorum promulgatores & disseminatores,
quæ vel de industria elate vel ingeniorum
asperitate dici horride videbantur, nequa-
quam collaudauit. Opposuitq; adeo suas et-
iam tum admonitiones quorundam procli-
uitati ad inaudita atq; noua, vt inconsidera-
ta leuitas coherceretur, quod omnia vbiq;
d pericu-

periculis cerneret esse plenissima. Hæc circumspectio & sollicitudines istæ, non modo hac in parte sed multis alijs notatæ & repræhensæ fuerunt. Alijs timorem, alijs prudentiæ humanæ rationes criminantibus, non etiam nullis Philosophiæ eruditionem hac occasione exprobrantibus. De quo plura dici nihil attinet, cum præsertim antea quoque non nihil sit commemoratum. Vt autem fortitudo & robur animi, & fiducia virium, & prompta libertas orationis, suam laudem habet, sic, quemadmodum opinor, non est vituperanda in magnis grauibusque rebus attentio & cura & prudentia. Quod si (nam humanum est errare) dictum vel minus cogitanter, vel nimis vehementer corrigendum putasset Philippus Melanchthon, ideo ne tam atrociter fuit ille insectandus? O miseram conditionem omnium, qui scribendo operam quacunque in doctrina nauant, si sunt errata statim scelera existimanda, & mutatio sententiæ habenda perfidia, vbi igitur hoc? Discipulus est prioris posterior dies? Quam multa sæpe nuntiantur negligenter, male, falso? Quoties sibi persuadet aliquis id, in quo decipitur? Quantum etiam momenti in temporibus est situm? Quibus qui mouetur, is statim sapientibus istis levis est atque inconstans, vel etiã veterator & versutus. Immo cothurnus est,

est, quicquid ad ipsorum pedis distortissimum prauissimumque exemplum non quadrat, secundum quod ea calceamenta suta videmus, in quibus iamdudum turpissime, qui illa inducunt, gradientes claudicant, aut certe misere & deformiter oberrant. Iam sublato studio enarrandi aliquid planius, disertius, rectius, illustrius, non parum fructus decesserit de doctrinae tractatione vniuersa. Horum istud genus nihil intelligit neque considerat. Quod acceptum est, id sicut claudus pilam, quomodo aiunt, retinere, & in sententia perseverare, neque si quid in ea absurdi reperiatur putare corrigendum, neque enitendum, ut commodius aliquid dicatur: Quasi hoc sit discedere à veritate & prodere causam. Cum quibus de his ne disputandum quidem est ab omnis humanitatis sensu nedum prudentiae consideratione alienis. Est autem illis ad huiusmodi omnia ad imperitam multitudinem perquam plausibile in promptu hoc: Rationis ista esse commenta & argumenta sapientiae humanae. Cum ipsi quidem de praecipuis & maximis rebus argumentari & ratiocinari inprimis conentur. Minime illi quidem ratione & via atque ordine, ad explicandum tamen id quod volunt & suas maxime cogitationes quaeque comminisci & extruere & conglutinare non dubitant.

tes, modo diuidentes dissipando, modo definiendo magis ambiguum reddentes id de quo agitur, modo complectendo distrahentes & soluentes. Neq; enim distinguere hos dissimilia, neq; diuersa separare, neq; notiones rerum certa descriptione demonstrare videas, & sumere vel falsa, vel dubia atq; dissentanea, & inferre inducereq; abhorrentia, vt solum hoc eos moliri putes: Disturbare bene collocata, & firma conuellere, & ordinata confundere, deniq; cum ratione quadam insanire. Hoc vero vitant atq; cauent, ne in ipsorum scriptis notari reprahendiq; fere quicquam possit, quod nullus in his tanquam formoso corpore næuus conspiciatur, sed tota illa futilia atq; distorta ac fœda sint. Verum reducatur oratio ad propositum. Non modo iam molesta est istorum hac in parte hostilis oppugnatio, sed cum alia proferuntur, tum, vt vereor, proferentur deinceps illi ex ore forte elapsa, prolata sine cogitatione accurata, etiam surrepta, supposititia, commentitiaq; de quib. & disputari in vtramq; partem, & crimina facile confingi in Philippum Melanchthonem poterunt, rebus, temporibus, hominum etiam voluntatibus atq; studijs diuersis. Philippus Mel. nunquam fuit vel auctori vel actori negotij neq; necessarij & impediti atq; turbulenti:

Nun-

Nunquam probauit aut adiuuit, vel potius, quantum potuit, repressit aduersando in-
tempestiuas vel etiam temerarias excursio-
nes. Fuitq; ei curæ semper, vt & ipse consi-
derando inquirendoq; verum compræhen-
deret, & veterum sententiâs proferendo, ali-
orum quoq; cogitationes incitatas decertan-
do & excurrentes longius conuerteret, & ad
rei ipsius contemplationem diligentiorẽ
reuocaret, ne fugerent, vt dicitur, præter ca-
sam. Quantum profecerit modo non di-
cam, cum palam sit, non paucorum vagas &
temere effusas cogitationes, quasi in girum
reductas fuisse moderatione Philippi Me-
lanchthonis, & hoc perfectum, vt iudicia
essent attentiora & seueriora, certe nemo,
præter insanos istos, nocuisse hoc factõ ip-
sum perhibebit. Ea profecto de quibus vo-
ciferatur ista in caput Philippi Melanchtho-
nis coniurata cohors, talibus clamoribus
non explicabuntur. Quorum sunt tam in-
epta atq; ridicula scripta, vt contemni ab om-
nibus sanis credibile sit, sed eadem etiam
adeo sunt rabiosa ac venenata, vt animad-
uersionem perquam diligentem commouere
debeant. Quam quidem ijs, quibus conuenit,
curæ esse æquum est. Quantum sane creden-
dum his sit, si nondum vel ijs constitutum
est, in quorum illi fauorem se insinuant, at

hinc par fuerit æstimare : Quod nunc tam exquisitis conuicijs furenter inuehantur in eos, à quibus & benigne admissi & amanter tractati, & multiplicibus beneficijs aucti & ornati fuere, quosq; laudibus aliquando maximis extulerunt, & quorum actiones singulari studio defenderunt, cum eis sese per omnia assentiri profiterentur. Potestne autem ab his constantem sibi voluntatem policeri, aut eis fretus esse aliquis, qui vel existimationis honorumq; spe, vel emolumentum mercede, à priore sententia & animi inclinatione illos desciiisse, & amicos cum inimicis commutasse sciet atq; perpendet. Nam commutatio istud : Dei respectum & veritatis esse præferendum vniuersis, quantum valere in leuium & infidelium sermone debeat, quis non perspicit? Ad Iudæos, ad Sarracenos, ad quamcunq; sectam transirent isti, idem dicerent. Spectetur igitur hoc potius, quæ causæ istius tantæ mutationis fuerint, quid hi secuti sint, in quæ iam vnde desiliant. Quam nihil grauitatis honestatis, religionis, nihil humanitatis ac moderationis conspiciatur in consilijs, dictis, scriptis, actionibus ipsorum, atq; hinc fiat iudicium, quantum eis tribuendum, quid habendum fidei, quo dignitatis gradu collocandi esse videantur. Quid autem commisit aut deliquit obsecro his

his in rebus Philippus Melanchthon? Nam hoc ad veritatem narrationis istius vt exquisitur, pertinet. De quorundam audacia est locutus minus clémenter. Insanas extructi-
ones damnauit, quibus non cessarent aliqui hyperbolis alias hyperbolas imponere, id est mirabilia dicta mirabilibus exaggerare, & secundum prouerbium, arcem ædificare ex arena. Vidit illum acervum & hanc molem non posse consistere. Vidit ita declinari fumum, vt incideretur in flammam. Monuit, hortatus est quos potuit. Increpando etiam quosdam corripuit sane molli, vt aiunt, brachio obiurgans. Quod sicubi hic errasset, si lapsus esset, si deliquisset, Erat profecto istorum tueri illum mortuum præsertim, peccatum culpamq; quæ in eum conferretur, remouere & tegere, defendere, quantum concederetur, amicum, fautorem, beneficum, Magistrum, Præceptorem, quod nomen istis morte tristius est. At ipsi quid faciunt? rimantur quod nusquam est, eruunt omnia, ficta atq; falsa ostentant. Tanquam obscenæ aues ad sepulcrum eius aduolant, aut vt canes cadauera, sic famam nomenq; lacerant. Nam quod ad errores, quos confutare isti se profitentur, attinet, ita sese res profecto habet, vt istæ confutationes multo quam ea, quæ ad confutandum sumuntur, plures

dent errandi occasiones, præterquam quod sunt vanissimæ, & si quis conuicia, probra, maledicta, criminationes eximat, nihil futurum illis sit inanius. Quinetiam si quid forte esset in ijs, quod dici putaretur recte aut cognitionem haberet cum vtilitate coniunctam, Non ab istis tamen talibus oporteret audiri. Ac potius, quemadmodum quondam Spartiatis visum esse accepimus, vt vtilia atq; bona dicerentur, non ab ignauo, futili, impuro, quamuis esset audax & loquax, ita si quid notari in Philippi Melanchthonis scriptis oportere existimaretur, æquum fuerat, non hoc ab istis fieri, sed à constantibus, doctis, pijs, religiosis, amantibus patriæ. Quæcunq; Philippo Melanch. explicare placuit, & ad quæ edisserenda tempus ociumq; ei concessum fuit, ea haud scio an melius, dilucidius, verius, fidelius, religiosius expositum iri à nullo nostræ ætatis atq; gentis existimandum sit. Quæ reliquit inchoata, aut noluit, aut non potuit impeditus negotijs, tandemq; morte ereptus perficere: De ijs cateruam istam silere melius erat, neque hoc sibi sumere, vt illa destruere & alia nescio quæ exædificare auderent. Verum de hominum istorum improbitate & scriptorum impudente vanitate, ad id quod propositum est satis, pro negotij magnitudine parum

rum diximus. De caussa atq; re ipsa vt neq;
 institutum fuit neq; mihi fortasse congruat
 disputare, ita liceat, nisi fallor, monere hor-
 tariq; omnes veritatis cœlestis patefactæ in-
 terprete Filio Dei æterni Deo æterno ama-
 tores, & fideles Iesu Christo auctori salutis
 atq; vitæ, honestos deniq; & bonos: Ne te-
 mere hac in parte prolabantur atq; ruant.
 Tam amplum, arduum, impeditum nego-
 tium non conficietur vesanis clamoribus ne-
 que tam intempestiuo stridore, neque istis
 conuiciorum plaustris. In Christiana reli-
 gione cum vniuersæ virtutis cultus necessa-
 rius sit, decus quoddam certe illius atq; pul-
 critudo eminens temperantiæ modestiæq;
 non poterit neq; debet omitti atq; negligi.
 Hippocratis veteris Medici hoc est: Reme-
 dium esse interdum bonum, si nullum adhi-
 beatur remedium, tam ad aures quam alia
 multa, Quod idem elegantibus versibus his
 Naso exprefsit:

Curando fieri quadam maiora videmus

Vulnera, quæ melius non tetigisse fuit.

Et vetus verbum strepitus nocturnos vento-
 rum non durare diu affirmat, secundum
 hanc Græci versus sententiam:

Nunquam aquilonem lux nocturnum tertia vidit.

Patietur pietatis moderatio dicere istos quæ
 volunt, neq; ægre ferat lenitatem ab eis leui-

tatis, & cautionem timoris nomine infamari. Non curetur ignominiae falsae macula, quae istorum petulantia aspergitur quietis & sanis. Non obstat mentio legum veterum (nam, ut acuti videantur, aliqui eas tanquam in iudicio quo reus peragatur Philippus Melanchthon recitant) facta ab ijs, qui si scirent aut cogitarent quid omnino lex esset, non tam secure omnes diuinas atque humanas leges contemnerent, & adeo insolenter perumperent. Cum ipsorum talia scripta sint, ut, si quod vnquam capitale prodijt, & quod in plurimarum legum quasi plagas incideret, istiusmodi centones hos videri, nonnullis eorum quoque qui causae, quae oppugnatur, non fauent, arbitrer.

28 Legibus vnus ex isto grege, qui se esse in quadam scholastica congregatione *νομιφύλακα* gloriatur, Imperatorijs teneri Philippum Melanchthonem scripsit: De Mathematicis & maleficis, quod studia ille Mathematicum magnificerit & commendarit. Huicne respondendum quicquam aliquis putet? Alter

29 Solonis etiam antiquam legem recitat: ut orta seditione neutri se parti adiungere, capitale sit. O hominem bellum, applicantem & interpretantem Atticam sapientiam, sapientiae humanae inipicum. Quod si Atticis legibus nugator iste delectatur, cur optimam

mam atq; præclarissimam legem scelerate violat? Quia maledicta in mortuos omnia capite fanciuntur. Talibus igitur scriptis an opponere suorum aliquid iam quisquam volet? qui quidem sapiet, neq; pariter atque illi delirabit. At clamant isti, & refellat nos aliquis, inquiunt. Nam sicut præsidentes pugiles aut iritæ mulierculæ hoc postulant, iocantes etiam insultando ridiculis, & falsa dicta inculcantes ab omni vrbanitate atque adeo humanitate natio aliena. Decedatur potius eis tanquam lutulento porcorum gregi semita. Et concedatur eis ista gloria quod inuicti sint. Sunt enim profecto ijs armis, quibus ipsi decertant, impudentiæ, dementiæ, clamorum, cæci impetus ruentis in omnia agitatae feræ instar. Hoc igitur restat, abire paulisper & abscondere se, dum trans eat furoris incitatio. Non est pietatis religiosæ cumulare rixas rixis, neque Deo æterno grata acceptaq; vel veritatis talis tractatio. Non adiuuant aut subleuant talia, aut augent, multo minus ornant Ecclesiam Christi. Itaque alia medicina quærenda, vel ad hanc faciendam, præparatione opus est: Nimirum, vt quasi cauis quibusdam includatur & sepiatur immanis hominum feritas. Nam ita, quorum hæ partes sunt, ij tuto & sua proponere, & vim aliorum sustinere, & ordine

dine atq; ratione quærere de dubijs, explicare obscura, manifesta asserere, falsa refutare poterunt. Quibus omnibus iamdudum obstat & aduersatur vulgaris ista importunitas & turbulenta ambitio, & impiæ secessiones, & species præstigiæ, quibus non modo multitudinis animi, sed quorundam etiam præcipuorum decepti fuere. Ne liceat igitur neq; potestas sit vlli, suam opinionem suo arbitrio diuulgare, & condemnare sententiam alterius. Non declamitare ad populum temere concionando, non scriptis impuris dissentientium nomen atq; famam contumeliose insectari, ante cognitionem controuersiæ, & sua cuiusq; sponte ac libidine. Cui ignota autem est huius sæculi licentia dicendi scribendiq; & imperita plurimorum audacia, & indocta doctrina & incredibilis cum arrogantia tum pertinacia? Hoc quam breuiter nunc dicitur, tam necessarium illud quidem existimandum est ad spem veritatem & inueniendi & retinendi. Sed si istud obtineri nequeat. Et nisi ita administretur negotium idq; perficiatur, vt & summa diligentia cura adhibeatur, neq; labori vlli atq; sumptibus parcatur, neq; respectus admittatur ad commoda sua cuiusq;, ac solius Dei æterni gloriæ seruiatur, melius fuerit scilicet, rerum istarum quasi habenas relinqui, vt ferantur

rantur omnia sicut hactenus, regente hominum nemine. Studium omnino religiosæ pietatis facile docebit vnumquemque, quod sit officium & munus ipsius. Hoc autem deferentes prætermittendo, aut violantes seruiendo cupiditatibus prauis, Quicumque tandem ii sint, horum peruiacem impietatem, breue longumue fiat, non patietur Deus æternus esse impunitam, cuius misericordiæ & benignitati atque clementiæ immensæ permittantur cætera. Quorum quidem acerbitas odij in mortuum Philippum Melanchthonem nunc incitatur, quam nihil non exquirunt atque scrutantur quia lædi fama nomenque ipsius posse videatur? Si illum se cedere, si sacrilegio, si perfidia contaminasse vel mentiri auderent, quanta alacritate & læticia facerent? Sed non habent scelerati discipuli, quod optimi innocentissimique & integerrimi Præceptoris vitæ ac moribus probrosum crimen inferant, Et doctrina Philippi Melanchthonis non modo contra istorum maleuolentiæ impressionem, sed aduersus omnem omnium oppugnationem satis est munita, sequitur ipsa atque defendit. Boni quidem certe & pii venerantesque Deum æternum, & honesta studia amantes, quibus inuisa est non modo superstitio sed etiam barbaria, Qui amant veritatem & mendacia oderunt

oderunt: Hi igitur nihilominus vel studiosius quoque colent memoriam & celebrabunt laudibus Philippi Melanchthonis nomen: Detestantes, tanquam furiarum instinctus, latratus istorum, de quibus nunc potissimum loquimur, & his similes aliorum. Neque sane illius causa grauius molesteque ferent male dicta, quae in ipsum conijcere isti non cessant, sed hoc dolebit: Tantum licere improbitati inuidiae & odij acerbitati, ut praeterea hic aut ille veritatis coelestis patrocini-um, tam grauius vulnera prohibente nemine infligat Ecclesiae Christi, adeo hostiliter in nomen Philippi Melanchthonis inuehendo. Quem profecto quorum furor ad insectandum arripit, in eo, ut arietes cornua statuae aereae inferentes, sic ipsi sese incurrendo comminuunt atque frangunt. Neque ab his iam mali quippiam Philippo Melanchthoni accidit, sed ipsi plane stimulum, quod dici solet, calcibus feriunt. Cum illo vero & est actum & agitur optime. Omnia quae ad praeclearissimam existimationem & summam laudem pertinentia optari ab homine fas est, ei contigerunt. Puer infantiae opinionem atque spem, pueritiae adolescens, adolescentiae vir superauit admiratione omnium, quam ipsam vicit senescentis aetatis quasi viriditas mirabiliter operosa, neque industriae expers
neque

neq; fugiens laboris, & nullo in munere exequendo languida, & in occupationibus consuetis perseverans. Nunquam ille affectavit titulos neq; ambiit honores, & summos atque amplissimos iudicio consentiente, & vno omnium ore est adeptus. Qui confusa atque disiecta in doctrina tam cætera quam Ecclesiæ collocando atq; disponendo, & implicata quasi enucleando, & expediendo hærentia, & confirmando dubia, & indiserta explanando, non modo plurima, in quibus priores errauerant, correxit, & perfecit ut nostra ætate esset doctrina spectata atq; illustis, sed ea reliquit elaborata opera studij & industrię suę, ut si non auerti prorsus ruina sinceræ atq; puræ doctrinæ, vrgentibus nobis fata nostra, certe differri posse videatur. Fuerit in ipso vitij aliquid. Quædam nescierit. Lapsus deceptusq; alicubi sit. Fuit enim homo, & solius Dei esse scimus, ut omni laquei ignorantie & macula turpitudinis careat: confirmare tamen hoc ut opinor liceat; inter nostros homines sanctitate religionis, ingenij excellentia, sapientiæ virtutisq; splendore, pietate, humanitate, beneficentia, omnis officij munere, ea quidem conditione qua ille fuit & tali loco, parem ei hac ætate fuisse neminem. Futurus ne aliquis sit posthac, incertum est. Cui vero non est perspecta atq;
adeo

adeo experiendo cognita Philippi Melanchthonis facilitas in moribus, bonitas erga suos, comitas liberalitasque in omnes? Si quid autem fecit perperam, eo fecisse profecto perhibere liceat, quod auxit ornavitque indignissimos, quosque etiam Reipub. nocituros esse interdum suspicaretur. Tanta autem erat in ipso consulendi rationibus & prouehendis commodis aliorum & benefaciendi quamplurimis cupiditas, ut neque petentibus denegare sciret quicquam, & ultro deferre quibusuis operam, consilium, facultates suas impertireque soleret. Istud igitur sit peccatum ipsius, quod aluit & fouit improbos, & serpentes, secundum prouerbum, in sinu. Accidit hoc semper optimis atque probatissimis. Quorum tanta scilicet est & tam absoluta atque simplex bonitas ut nihil in animum suum penetrare patiantur, quod benignitatem impediat aut obstat humanitati. Atque ijs quae dicta sunt, hoc saltem effici confido, ut omnium iudicio statuatur: Melius honestiusque sentiendum esse, de Philippo Melanchthone mortuo, quam inter viuos nunc quoque obuersantibus inuidis maleuolisque & obrectatoribus ipsius. Qui quid hominum sint, non dicam, neque eam iniuriam viro optimo & sanctissimo faciam, ut cum istis illum comparare voluisse videar. Quid igitur

igitur est ? vt tandem nostra narratio conclusatur. Optimus & sanctissimus vir Philippus Melanchthon cum ita vixisset, quemadmodum vere commemorasse me, etiam inimici fateri cogentur, pie & religiose morte obita, tot commoditatum autor, tot bonorum conciliator, cuius omnibus pietatis virtutisq; amatoribus memoria veneranda, & ad posteritatem etiam gloriosior futura est: Hic igitur talis & tantus vir mortuus conuicijs laceratur & ignominijs impiorum probrorum appetitur. Quem doctiores quoque & saniores ex aduersarijs, cum vix diligere possent, propter constantiam tamen & fidem & admirabiles virtutes plurimas odisse non vellent. Quo quidem ille animo, consilio, proposito, studio ad cognitionem professionemq; ac doctrinam sacrarum literarum accesserit, scit Deus æternus, & est ingenio hoc ipsum laboribusq; eius & operum bonitate, omnibus mortalibus non malevolentia atq; odio cæcis, declaratum. Atq; idem Deus istorum quoque arrorentium nomen & probrum sanctitati, labemq; integritati Philippi Melanchthonis inferre conantium, siue in calcaria seu carbonaria, vt dicitur, obscurorum opificum, pectora voluntatemq; perspicit. Quæ quidem ab eis prodita inq; lucem prolata sunt, eiusmodi specimen dant, vt

quid cogitent velintq; agendo demonstratur. Ex quibus hoc non est postremum: Quod, cum inter viuos inuidia soleat vigere, mortuos autem inimici quoque odisse desinant, tanta istorum non inhumanitas est, sed immanitas, vt in Philippum Melanchthonem mortuum suos demum stringant gladios & tela intendant. Qui, quoad vixit, & negotijs maximis grauissimisq; Reipub. & Ecclesiæ Christi est adhibitus propolita, cunctis in medio, quasi palma, studio salutis & incolumitatis publicæ cum conseruata veritate coniunctæ, vicit omnes & religione pietatis, & industria atque studio ac laborum defatigatione, & constantia atque fide, & tempestiua moderatione. (Quamuis hanc culpæ aliqui audeant, non modo nomini Philippi Melanchthonis sed paci & quieti inimici.) Neque quisquam est repertus, qui se ei præponere non dubitaret. Atque hæc sunt ignota nemini. Vt autem luctus funeris Philippi Melanchthonis caritatem bonorum, ita quorundam læticia odium etiam maiorum indicauit. Quorum vtrumq; famam existimationemq; hominum meliorem reddere consuevit. Vitam autem talem, qualis expositione nostra indicata est, post grauissimos & maxime vtiles labores, post operam publice priuatimq; nauatam, post stabilitam

litam illustratamq; doctrinam veritatis cœlestis & bonarum artium, post subleuatos, adiutos, auctos, ornatosq; innumeros sine discrimine, omnis ocij quietisq; expertem ille placidissimo & optatissimo sine clausit, ea ætate sua, & eo tempore Reip. vt quem admodum vtens verbis Pauli Apostoli aiebat, decedere hinc & migrare ad Christum cupientem permulta impellerent. Cum eo igitur, vt diximus, optime præclarissimeq; est actum. Nostra caussa viuere ei licuisse diutius, optandum, & stare quasi in acie, non modo aduersus manifestos hostes, sed qualescunq; tranquillitatis turbatores, qui gloriosa temeritate optantes hunc viuere, conspectum omnino & faciem illius ferre sustinereq; non possent, fugientesq; eo viso & arma abiicerent, & alas dmitterent, quantumuis modo ferociter ac superbe procurrant atque euolent. Non sane læditur omnino Philippus Melanchthon ab istis tanquam viperarum sibilis, aut hyænarum bubonumue diris funestisq; cantibus ac sonis. Quo ista licentia pertinere euadereq; possit, quorum maxime interest, ij scilicet considerabunt, & cum sibi tum alijs in hoc periculo prospicient. Quoties existet, quod alicuius ambitioni impedimento sit, quod cupiditati obstet, quod opinioni refragetur, toties arripietur

occafio vel constituta difijciendi, vel exulcerata amplius lacerandi, vel excitato incendio vires addendi suggerendo materiam. Quando igitur concordabitur? quando de vlla controuersia decidetur? quod negotium aut quæ res transigetur vnquam? Nos, vt qui è longinquo prælium spectant, mouentur illi quidem alterius vtrius partis fortuna, & optant, sperant, metuunt, opitulari neutris valent: Sicquid facere possumus aliud? quam perturbari ista cernentes animo, & precari veluti in Tragœdia chorus:

Vt redeat miseris, abeat fortuna superbis.

Id est vt ista elata atq; contumax & insolens petulantia in viuos atq; mortuos, & turbatrix in præsentia quietis, & spem tranquillitatis, in posterum præcidens, & incutiens metum seuissimarum procellarum & horribilium tempestatum, reprimatur ac coherceatur ab ijs, à quibus & potest & debet. Non autem necesse est exempla vestigare euentuum, qui istiusmodi concessos dissimulatosue conatus sunt consecuti.

Ante oculos interq; manus sunt omnia nostras. secundum poëtam. Vigilent igitur & attendant ij quorum maxime res agitur, quorumq; est proprium ac peculiare munus, & præstandi officium patriæ, & sibi quoque ac suis prouidendi. Nos cæteri, animæ vi-

les,

Ies, vt idem Poëta ait, poterimus silere confirmati vtruncq; ad ea ferenda, quæ acciderint. Absoluimus id opus quod suscepimus ad elaborandum, id est veram de Philippo Melanchthone narrationem, & officium persoluimus debitum non solum amicitiae nostræ, sed omnino meritis ipsius. Neq; me fugit legentibus hæc eorundem repetitionem iniucundam esse & inde fastidium posse existere. Tota enim, vt ita vocem, farrago huius libri, quid aliud complectitur? quam curas, labores, sollicitudines, dolores, deniq; miseras Philippi Melanchthonis. In quorum expositione eadem sententiæ ipsdem sæpe verbis iterum atque iterum recensentur. Sed dabitur venia mihi, vt spero, à non iniquis lectoribus, qui ea sum persecutus, quæ in re ipsa inesse animaduertissem, vt & verum iudiciū nostrum, & simplex narratio testimoniij loco haberi debeat. In alijs siue quis minus quam oportuerit omittendo, seu inculcando plus quam decuerit, esse dictum, seu notandum in verbis compositioneue alijs quid forte putauerit, etiam eum ignoscere velim non tam festinationi meæ (non parum enim temporis in his conscribendis absumpsimus) quam lapsibus, qui sunt etiam acutissimorum, sapientissimorumq; & doctissimorum. Narrationes sane has verbosiores

& totam expositionem pleniorē efficere, adiiciendo commemorata ab alijs, atq; adeo nostra edifferendo prolixius, & quasi dilatando, fuisset in proclui. Ego vero & in meis seruandum mihi modum putauī, ne euagarentur illa longius, quam viderentur debere, & quæ aliunde peti facile possent, ea nostris inferere nolui, quod esse rectius arbitrarer, vnumquemq; illa per se cognoscere, aut recordari ipsum. Sunt autem plurima & ab ipso Philippo Melanchthone & ab alijs conscripta de plerisq; negotijs tractatibusq; & disputationibus religionis causā habitis, agitatīs, susceptis, quorum neque intercidit memoria, & quæ sunt articulate edita in vulgus, vt, si quis forte requirat, in promptu sit assumere, & eis hæc nostra quasi accumulare. Fortasse autem non breuitatem aliqui in his accusabunt, sed mentione de quibusdam nimis verbosa offendentur. At mihi, si præterire silentio quædam voluissē, quæ notari aut repræhendi quoq; possent tanquam alieniora, aut minus aliquibus iucunda, aut non etiam nullis odiosa: ne vel diligentia studiij, vel cura veritatis desideraretur, verendum fuit. Exposui igitur hæc simplice narratione & quasi iuratus verbis conceptis, & ex animi sententia, sic, bonorum vt his grauatum iri confidam neminem.

De

De alijs neq; magnopere sollicitus sum, & displicere nostra illis quam grata acceptaq; esse malim. Vt ista autem proferrem atque ederem, id quod vere cum Poëta affirmare possum:

non gloria nobis

Causa, sed utilitas officiumq; fuit.

Vt enim de Philippo Melanchthone qui vix alio familiarius quam me esset vsus, commemorare comperta mihi atque explorata, ad officium meum pertinere, sic cognitionem istorum aliquam legentibus vtilitatem allaturam esse duxi. De quo tamen statuat quisque quod volet, (& esse enim diuersa iudicia diuersorum scimus, neque postulamus, vt contra sententiam animi sui de his

aliquis decernat) Et euentus, qui

Deo visus fuerit, & hic no-

stræ expositionis finis esto.



EPITAPHIVM PHILIPPI MELANCHTHONIS

INITIO CONSCRIPTVM,
LAMINAE ENIM AEREAЕ SPACIVM QVAEDAM NON ADMISIT.

PHILIPPO MELANCHTHONI
SACRARVM LITERARVM SOLERTISS.

ET FIDELISS. EXPLICATORI, VERITATIS COELESTIS PATRONO ET PROPV-

GNATORI INPRIMIS STRENUO, OPT. DISCIPLINARVM ET ARTIVM CVM INSTAV-

RATORI TVM CONSERVATORI: QVI OMNEM DOCTRINAM QVASI VAGAM AC

DISSIPATAM COLLEGIT ET AD CERTAM RATIONEM REVOCAVIT: VIRO PIE-

TATE, STUDIO PVRAE CASTAEQVE RELIGIONIS, SAPIENTIA, VIRTUTE, HV-

MANITATE, BENIGNITATE ERGA OMNES PRAESTANTI, FELICITER ET SANCTE

IN TERRIS MORTVO XIII. CAL. MAII, C. V. AN. LXIII. M. II. D. II. H. L. ACA-

DEM. VVITTEBERG. CUI ILLE TOTIS

ANN. XLII. OPERAM NAVAS-

SET H. M. P. C.

Vitam fortunamq; suas studiumq; laboris
 Quig; opera sanctam consiliig; fidem
 Impendit diuina tuis, Ecclesia, rebus,
 Teg; pius varia inuit & auxit ope :
 Hac in parte sibi post mortem structa Melanchthon
 Communi in lectu busta Philippus habet,
 Quae templi foribus magni vicina Luteri
 E regione solum quod tegit ossa, videt.
 Bretta hunc vitales natum produxit in oras,
 Bretta Palatini limes amœnus agri.
 Vnde propinqua petens adiit bonitate suorum
 Diuerso Aonidum templa sacrata loco.
 Ludus enim puerum accepit Phorcexidos urbis,
 Eytelpergiaci mox schola gymnasi.
 Doctrina hinc fecit iuuenem alma Tubirga Magi-
 Eximium laudis gessit ubi ille decus. (strum
 Inde triumphator Monachorum Capnio iussit
 Albidus hunc ripam visere Saxonici.
 Tunc noua Dux Friderichus ubi collegia Musis
 Romani fundans ensifer imperij
 Vndiq; conductis praestanti laude parabat
 Artis & ingenij reddere clara viris.
 Hic & coniugium gentis sortitus honeste,
 Factus & est sexus mox utriusq; pater:
 Et socio ipso annis viginti octog; Luteri
 Vuittenbergiaca Res fuit ampla schola.
 Quam septem bis adhuc prouexit deinde gubernans
 Fluctinagam ut vastum per mare nauta ratem.
 Heu tempestates quas hic perpeffus, & ad quam
 Sauros


Sauros hæc scopulos acta carina fuit ?
 Quantum externi odij, quantum inuidiæq, suorum,
 Ingratorum hominum quæ maledicta tulit ?
 Ipse tamen quamuis resstantibus undiq, ventis,
 Directum est, retinens vera, secutus iter.
 Fortia nec clamor latrantis pectora turba,
 Nec vulgus strepitu mouit inane suo.
 Summa petit liuor. nemo hunc superare nisi ipse
 Posset, si studijs oia suppetere.
 Ista sub obliquo norunt quoq, sole locati,
 Quig, sub opposito forsitan axe iacent.
 Scripta sed illius memorabilia inter & acta
 Plurima, quæ solida nomina laudis habent,
 Vnum opus eximium est : Fidei confessio sancta,
 Ante tuos Casar Carole lecta pedes.
 Extat enim illius assiduo hæc descripta labore
 Vera reconcinnans dogmata sparsa prius.
 Languida qua Christi iamdudum Ecclesia nitens
 Rursum oculos audet tollere lata suos.
 Concurrant inimici omnes licet undiq, hic vnus
 Confutare potest improba dicta liber.
 Ac tua nunc terris floret bona fama Philippe,
 Viuit & æternum spiritus ante Deum.
 Corpus at exanimum tumulo hæc requiescit humatū
 Condecorant grate quem monumenta schola:
 Quod tandem expletis, senio curisq, grauatum
 Sexaginta annis, exuis atq, tribus.
 Sic morbo vt paucis nisi debilitante diebus
 Muneris officium feceris omne tui.

Atq,

Atq; olim atherias venies renocatus in auras
Integer, & mortis liber abinde metu.
Sancte vir & salve pater optime. Nos tua semper
Te sboles merita relligione colet.
Doctrina nobis vera tu doctor & autor,
Hæc, tua, clara atas munera laudis habet.
Salve iterum atq; iterum. Tua nos immota manebis
Semper apud memores gloria, nomen, honos.

Joachimus Camerarius Pabe-
perg. Am. S. S. F.







TYP O G R A P H V S

Lectori.

S Ignificare ijs, qui istud scriptum,
quod modo est expressum opera
mea, cognoscendum putassint, visum
est, idq, de sententia autoris: Scire de-
bere omnes: Quod priuilegij nostri
defensio prohibeat non modo eandem
huius libelli, sed qualemcunque etiam
alteram editionem, ut conuersi in ali-
um sermonem, inprimis Germanicū
ignorante autore & contra volunta-
tem ipsius. In quo hoc potissimum
consideratur, quod comperitur vul-
garibus istis interpretationibus, &
scripta saepenumero corrumpi, & au-
tores non laudibus sed ignominijs ce-
lebrari. Cum autem scriptum istud
accurate etiam elaborari, & compo-
ni oratione exquisita autorem stu-
duisse

duisse non indocti facile sint animad-
uersuri, minus scilicet expedita atq;
in promptu futura est in alium ser-
monem translatio. Quam tamen, si
videbitur, ipse autor elaborandam
suscipiet. Hanc igitur ob rem ista
quoque in parte beneficio privilegiij
nostri nos vsuros esse meminerint uni-
uersi, & cum non aduersentur ra-
tionibus nostris, tum sibi etiam consu-
lant. Est quidem à me opera data
quam maxime assidua dari potuit,
ut ad exemplum ab autore nobis tra-
ditum liber iste exprimeretur. Sed
quia officinarum nostrarum operæ
nunquam possunt ab ullo satis serua-
ri, quamuis Argus sit, qui oculus to-
tus fuit, ut ait Plautus, ideo contuli-
mus absolutum opus relegendo cum
archetypo, & quæcunq; ab hoc reces-
sisse animaduertissemus, ea vel minu-
tissima

tissima notari & hoc loco subijci studuimus. Cumq; etiam in margine quaedam paucis in locis memoria scilicet aut considerationis causa, ascripta vidissemus, putauimus & ipsa indicata lectori studioso grata fore, itaque ista quoque appendicula non aduersante autore, cumulauius editionem nostram. Quæ omnia in optimam partem accipi & diligentiam meam curam boni consuli opto, & futurum hoc à bonis esse habeo persuasum, neque quid ceteri faciant curamus.

Charta 6. versu 10. vbi legitur clucebat suauitas, in archetypo nota erat appolita & ascriptum: elucere suauit.

Char. 28. V. à fine 5. In margine ascriptum hoc erat: Tetzeliàna. fuit autem nomen Tetzeli indultuarij in his regionibus primarij illis temporibus.

Char. 62. V. 5. legendum est, eum quicquam fal.

Char. 91. Vbi fit mentio P. Mosell. ascriptum
f ptum

ptum erat in archetypo. M. O. An. M. D.
XXIIII. XIII. Cal. Maij.

Char. 93. V. à fine 7. L. Immodice cup.

Char. 95. V. 16. ascriptum. Ludi Sagitarum.

Char. 102. ad mentionem de Iacobo Furxio ascriptum. De hoc viro ἔλεγκτον ἐν παρῳ ἐργῳ, καὶ γένειτ' αὐτὸ καὶρὸς διηγήσεως περὶ πύσης ἔτε-
ρῳ.

Char. 105. V. 10. ascriptum Al. Dur. vt de Alberto quoq; Durero pictore mentio hoc loco faciēda auctori fuisse videatur.

Cha. 120. V. 1. l. calumnijs & mendac.

Ch. 167. V. 5. l. instituerunt.

Char. 170. V. 10. l. Libero & Herc.

Char. 188. V. à fin. 3. ascr. Berbetomagenfia.

Char. 196. V. 12. l. Melanchthone vid.

Char. 206. V. 6. l. profutura fusc.

Char. 234. V. 6. lege: Quod superstitite adhuc Mart. Lutero, neq; suscepta fuissent neq; ges.

Ch. 259. V. 2. ascr. ἐκὼν ἀέκων? γε θυμῷ.

Char. 276. V. 5. ascr. paulisper etiam tunc latuit τὴ πολλῶν ἀγνοήτων ὅπου εἴη.

Char. 281. V. 10. ascr. κακοῖς τὸ κέρδ' τῆς δίκης ὑπερτερον.

Char. 286. V. à fi. 10. ascr. ἀσυλλόγιστον ἐστὶν ἡ πονηρία. Et, ἀπλᾶς εἶναι προσωπῶν πονηρὸς λῷ.

Ch. 287. V. à f. 3. l. calumniarum infect.

Chart.

Char. 291. V. à fin. 12. ascr. De his extat
copiosa enarratio edita Vuittembergæ. Dor-
gæ autem Θερυβοποιῶς κεραιγάσµασι cuiusdam
bene procedens res impedita fuit. Cogebat
autem necessitas rem ad istum modum tra-
ctare, id quod ignorantes vehementissime
tumultuati tunc fuerunt.

Char. 306. V. à f. 2. l. decerneret,

Char. 313. V. 12. ascr. εἰς τὴν πῆλσον λαμπὰς
ὁψείλαι Θεοῦ. &: Si te secundo lumine hic of-
fendero.

Char. 330. V. 12. asc. Imp. Ludouici IIII,

Char. 331. V. 9. ascr. De istis negotijs non
fit itidem vt in Comœdijs, omnia omnes vbi
resciscunt.

Ch. eadem V. à f. 10. as. στρατηγεῦ γὰρ γνώμη
πλεον ἰσχυεῖράτης.

Char. 355. V. 15. ascr. τεράτων ἀγορά.

Char. 358. V. 2. l. iniuriarum:

Char. eadem versu vltimo L. immodice
amb.

Charta 373. V. à f. 10. ascr. περὶ τῶν ἡμε-
τέρας πάντων ὁ λόγος.

PLacuit subijcere exempla Epistola-
rum duarum, de quibus fit men-
tio in hoc libello, ubi sententia illa-
rum summatim exponitur. Quibus
alias quasdam Philippi Melanch-
thonis adiunximus complectentes ne-
gotia non indigna cognitu, & per-
scriptas verbis sententijsq; bonis at-
que præclaris. Quam ipsam
quoque operam nostram
non improbatum iri
confidimus.

Francis-

FRANCISCVS DEI

GRATIA FRANCORVM

Rex, dilecto nostro Philippo

Melanchthoni,

S.

Singulare tuum ad sedandas eas, quæ in doctrinam Ecclesiasticam inuectæ sunt, altercationes studium intellexeram antea quidem ex Gulielmo Bellaio Langæo cubiculario atq; consiliario nostro, quo ego præcipue sum usus ad eam rem administro & interprete. Nunc vero ex literis ad eum tuis, & sermone redeuntis à te Barnabæ Vorei Fossæ intellexi etiam, te hoc laboris perlubenti animo suscepturum, uti ad nos primo quoque tempore te conferas, deq; vnione doctrinarum cum selectis aliquot nostratibus Doctoribus hic apud nos coram differas, atq; rationes ineas, quo refarciri possit pulcerrima illa Ecclesiasticæ politiz harmonia, qua vna etiam quum ego mihi nihil vquam vnquam maiore cura, studio, sollicitudine animi amplexandum esse duxerim, committere nolui: Quin hunc statim Vorem Fossam ad te dimitterem, cum his veluti publicæ fidei obsidibus literis, obtestarer etiam, abduci te vllius persuasione ut ne sinas ab hoc pio, sanctoq; instituto. Venies omnino mihi gratissimus, seu priuato tuo, seu publico vestrarium nomine adueneris, meq; re ipsa experieris & priuatim Germaniæ vestræ dignitatis & publicæ in vniuersum quietis ante omnia esse (atq; adhuc semper fui) studiosissimum. Vale, ex oppido Gnyse die 28. mensis Iunij, Anno dñi. Millesimo, quingentesimo, tricesimo quinto.

Francoys

Bayard sst.

EPISTOLA AD IOHAN-
NEM BELLAIVM LANGAIVM

Episcopum Parisiensem, scripta anno
Christi M. D. XXXV.

S. D.

ET si multorum literis & prædicatione cognovi
te & rectis studijs magnopere favere & cupere
Ecclesiæ tranquillitati vera ratione consulere, ta-
men certo consilio nihil ad te literarum dedi hæste
nus. Nunc autem in tanto communi periculo non
solum Galliæ sed vniuersæ Ecclesiæ totius orbis ter-
rarum non potui me continere diutius quin apud
te, si nihil aliud, tamen deplorarem Ecclesiæ cala-
mitates. Nam cum regnum Gallicum longe flo-
rentiss. sit, et si licet dicere caput Christiani orbis
magnam vim habet exemplum præstantiss. natio-
nis. Si igitur semel apud vos decretum fuerit, non
solum fanaticos spiritus aut seditiosos cohercere,
sed prorsus nullam admittere emendationem do-
ctrinæ Ecclesiasticæ, & præsentia vitia Ecclesiæ
summa vi defendere, magna de spe boni viri vbiq;
gentium deiciuntur, qui quanta sit autoritas Gal-
liæ non ignorant. Sequentur enim exemplum Gal-
liæ cæteræ nationes. Quæ ex re quantum pericu-
lum Ecclesiæ, quæ cædes secuturæ sint, quæ doctri-
næ dissipatio, quæ confusio rerum, nihil opus est
apud te virum sapientiss. disputare. Itaq; te pro-
pter gloriam Christi rogo, vt, quod facis, mitigare
animos principum studeas, & hortator sis, vt ra-
tionem ineant, qua sanari Ecclesia possit, non
magis magisq; lacerari. Iudico & ipse cohercen-
dos esse & fanaticos spiritus, qui perniciosas opi-
niones habent, & homines seditiosos, sed quoni-
am ab-

am abusus quidam repræhensi sunt, multi pij & docti viri quærunt purum doctrinæ genus, non cupiditate vlla sed studio veræ pietatis. Ac præferim Gallica natio eximium habet pietatis studium. Scio fatum esse Ecclesiæ, vt in tales sauiant indocti & impij, sed tamen prudentes viri mitigare hos impetus debent. Vides de maximis rebus exortas esse controuersias, quæ vix poterunt armis opprimi. Ac mihi neq; ad tranquillitatem Ecclesiæ neq; ad autoritatem eorum qui præsunt, utilis videtur iniusta seuitia. Cumq; maxime sit optandum, vt Episcoporum autoritas magna sit, non alia ratione id effici posse videtur, quam si dent operam vt genus doctrinæ extet certum, quod sanet ambigentes animos. Ita poterunt obsistere fanaticis spiritibus, si studia bonorum & doctorum retineant ipsi. In quam sententiam plura dicerem, nisi scirem te hæc omnia, pro tua sapientia, longe melius perspicere, quam à me dici queant. Tantum orandum te duxi, vt complectare animo Ecclesiam, quandoquidem in ea vrbe gubernas Ecclesiam, quæ principem scholâ habet totius Christianæ Reipub. Nec dubito quin in tanto doctiss. hominum cœtu permulti sint, qui & opt. consultum velint Ecclesiæ Christi, & intelligant quib. rationibus concordia recte constitui possit. Horum omnium oculi atq; animi in te non solum tacitis votis intuentur, sed etiam lacrimis petunt, vt autoritate tua horteris principes viros, ne iniusta crudelitate laceretur Ecclesia, ne opprimantur vera studia, ne obruatur gloria Christi, ne dissipentur Resp. Nec vero tantum Gallia hoc te orat, sed etiam omnes boni & docti in vniuersa Germania, qui & autoritatem tui muneris intelligunt, & norunt te propter excellentem doctrinam & pietatem maxime

dignum esse, cui in illa celeberr. vrbe Ecclesiæ gubernatio commendata sit. Ego quidem & mollire controuersias semper conatus sum, idemq; adhuc ago, meamq; sententiam semper cum Ecclesiæ, hoc est doctorum & bonorum ac tui similiū, iudicio coniungam. Vale.

AD IOHANNEM STUR-
MIVM MISSA LVETIAM

Ann. Chri. M. D. XXXV.

Mens. April. S. D.

CVM de Gallicis rebus vndiq; ad me literæ mitterentur multis de causis ingentem animo dolore accepi. Videbam enim quantum vulnus acciperet causa nostra, quæ certe ad Ecclesiam pertinet, præiudicio tanti Regis. Dolebam eum temeritate hominum imprudentum irritatum esse, cogitabam sine modo grassaturam esse iracundiam, postquam indoctis semel oblata esset occasio, quam cupidiss. expectarunt. In his curis mihi crede, mi Sturmi, valde de tua salute etiam sollicitus fui. Quem etsi scio max. abhorreere ab omnibus absurdis opinionibus & seditiosis consilijs, tamen in cōmuni odio nostrarum literarum, tibi quoq; nonnihil periculi esse verebar. Itaq; cum Bucero egi, daret operam vt Augustam aut Tubingam accerseris. Nunc autem hoc nomine mirabiliter me recrearunt literæ tuæ, quod & declarant te saluum esse, & spem quandam ostendunt fore mitiorem Regis animum. Quod vero me grauiss. oratione hortaris ad iter, de quo scribis, suscipiendum, nulla mihi vnquam in vita incidit difficilior deliberatio. Ac nolim existimes me retineri domesticis vincu-

vinculis, aut pericula defugere. Nulla mihi res humana proponi tanta potest, cui non anteferam gloriam Christi, salutem tot piorum, tranquillitatem Ecclesiæ. Sed vna cura me non tantum excercet, sed plane excruciat. Dubito enim aliquid proficere possim. Hæc me vel dubitatio vel desperatio deterret, quam si mihi eximere potestis, libenter istuc statim aduolabo, nec me terrores vlli, nec vlla vincula remorabuntur. Et quoniam scribo ad amicum & de re max. agam aperte vt decet & causa postulat, teq; rogo vt cum amicis ipse etiam deliberes, non quid mihi expediat, sed quid Galliæ, quid Ecclesiæ profit. Hoc caput est deliberationis: Existimo magnam passim varietatem opinionum, & multos esse fanaticos spiritus qui ferunt absurdas & perniciosas opiniones. Nam hinc quoque nuper expulimus aduenam istinc quendam, qui de diuinitate Christi scelerate disputabat. Sunt & alij seditiosi, qui stolide tumultuantur, vbi nihil opus est, vtrosq; & ipse iudico seuerè coercendos esse, & facile est de his dare consilium. Sed sunt alij quidam, qui neq; impias opiniones habent, neq; seditiosi sunt, sed, dicam enim plane, qui modeste probant ea, quæ à nostris pie patefacta sunt. Iam si id agatur, vt etiam si leuiore quidam articuli nobis donentur, tamen reliqui grauiore obruantur & deleantur, ego neq; causæ publicæ neq; Ecclesiæ profuero. Quid quod ea consilia non reddent tranquillam Galliam? fac me impetrasse, vt nemo afficiatur supplicio, qui exiit cucullum. Quid fiet in cæteris durioribus articulis? Num iubebo interfici eos, qui non probant manifestos abusos τῆς λειτουργίας, aut cultus Diuorum? & hæc res quantas excitent tragædias non ignoras. Iam in his vbi nihil impetrauerò, tamen plectentur boni, & ego

videbor suffragator & approbator talium suppliciorum, dicent me commodius sentire, fuisse me contentum illo leuiorum articulorum quasi munusculo, in reliquis omnibus cum ipsis esse *ὁμολογῶν*. Quod si quædam hic pro tempore largiar, id præiudicium afferent in synodum. Nam huiusmodi multa sæpe iam mihi acciderunt. Habes argumentum meæ deliberationis, quod præcipue me deterret ab itinere. Iam cogita itlas Phalangas monachorum & scis quam sint *καταρτοφάγοι*, et quibus artificijs teneant fascinos nobilium animos, sed hæc me non valde mouent. Illud vnum, quod dixi, deterret me, quod vereor, vt impetrari ea possint quæ ad gloriam Christi, ad tranquillitatem Ecclesiæ, & Galliæ necessaria esse duco. Ac plane venio in eam sententiam: Regem si quidem velit consulere & gloriæ Christi & tranquillitati Ecclesiæ, summo studio adhortandum esse, vt curet maturari synodum, vbi communiter poterit iniri ratio constituendæ Ecclesiæ. Cætera consilia vel inutilia, vel etiam periculosa mihi videntur. Hæc ita simplici animo ad te scribo, non tergiuersandi causâ, sed vt vos, quibus Gallia nota est, cogitetis: An expediat me suscipere iter. Quod si ita existimabitis, libenter parebo consilio & voluntati vestræ. Necesse tamen erit rem me ad principem meum referre, quem in re tanta non defuturum esse spero publicæ vtilitati. Disputabitis hoc quoque, an etiam si non possint obtineri ea quæ volumus, proficit iam meo congressu quasi præmolliri animum ad cognitionem in synodo. Tantum est enim odium nominis nostri apud aduersarios, vt nisi aliqua Regum studia habuerimus, ne cognitio quidem speranda sit. Sed totam rem tuæ fidei & prudentiæ commendo.

Episto-

EPISTOLA SCRIPTA
PRO QVIBVSDAM VERSANTI-
bus in periculo Metensibus ciuibus,
quam composuit Philippus
Melanchthon,

S. D.

Illustrissime Princeps consanguineæ dilectæ. Et si non ignoramus, apud exteras nationes interdum de nobis iudicari durius, propterea quod ijs, qui Ecclesiasticos abusus, pio studio & veris rationibus taxarunt, non aduersati sumus: Tamen cum sciamus Caritatem vestram singulari prudentia & grauitate præditam esse, arbitramur eam de nobis quidem iudicium adhuc suspendere, donec hæc con trouersia, aliquando legitima ratione audiantur & cognoscantur, præsertim cum manifestum sit, multos esse veteres morbos Ecclesiæ, de quibus necesse est tandem pios gubernatores populi Chritiani deliberare. Vere enim hoc affirmare possumus, nos ex animo semper optasse, vt piè cognitis rebus, gloria Dei illustraretur, salutem hominum consuleretur, & communis concordia & Ecclesiæ pax conseruaretur. Nam cum hæc professio nobis ingentia pericula, labores, sumtus afferat, non est existimandum nos priuata cupiditate, huic negotio fauere. Non enim ob alias causas abusus corrigi permisimus, nisi propter gloriam Dei & Ecclesiæ salutem. Quare cum cognitionem Ecclesiæ semper flagitauerimus, nequaquam accusari possumus tanquam seiuncti ab Ecclesia. Et omnes sapientes principes ubiq; oramus, ne quid de nobis secus statuatur, sine cognitione, quæ decet Ecclesiam Dei. Hæc petitio cum sit æquissima, impetret à
Carit.

Carit. V. ne grauatim has nostras literas accipiat, quas de tranquillitate ciuitatis Metensis scribendas esse duximus. Cum enim nuper eò legatos nostros misissemus nullius priuatæ utilitatis causa, sed tantum vt ciues ad concordiam hortaremur, & viam ostenderemus piam & salutarem, intelleximus quosdam inimicos ijs, qui doctrinam puriorem expetunt moliri, vt ad sua odia adiungant Carit. V. & auxilio Car. V. perterrefaciant aut opprimant honestos homines nobiles & plebeios, qui & sunt tranquilli & fideles, in omnibus ciuilibus officijs præstandis, nec aliud petunt, nisi vt habeant in aliquibus Ecclesijs doctrinam puram & vsum sacramentorum sincerum. Scimus autem Car. V. naturæ bonitate & voluntate ab iniusta asperitate abhorrere. Sed tamen calumniosis delationibus, interdum optimi ac mitissimi gubernatores incenduntur, vt non suæ moderationi sed alienis affectibus morem gerant. Promittunt ciues Metenses pro quibus scribimus, se in omnibus ciuilibus officijs omnia obedienter facturos esse, se nulla in re paci communi defuturos. Tantum Ecclesias suas recte constitui volunt. Id si impediatur primum gloria Dei leditur, deinde multa animarum & ciuitatis pericula sequuntur. Postquam sparsa est lux aliqua Euangelij, multos abusus iam intelligit populus, Hos si cogitur obseruare contra conscientiam, excutitur eis vera inuocatio Dei. Nam cum hæret metus in conscientia qui deponi non potest, fugit mens, non inuocat Deum. Quid est autem tristiùs & detestabilius quam impedire veram inuocationem Dei? Accidit etiam interdum vt in tali perturbatione animorum concipiantur, vel ab erronibus audiantur falsæ opiniones, vbi desunt boni concionatores qui publice doceant,

doceant. Nocent autem prauæ opinionēs & animabus & paci publicæ. Eccontra vero pia & salutaris doctrina etiam pacem ciuitatum munit. Constat enim doctrinam de omnibus ciuilibus officijs, in hac ipsa luce Euangelij magis illustratam esse, quam antea vnquam. Et quanquam optandum est omnes vera inuocatione & pijs moribus Deum colere, tamen hi qui doctrinam puriorem expectunt, non sunt impedituri ceremonias cæterorum qui secus sentiunt. Vicissim æquum est non labe- factari conscientias horum, qui abusus intelligunt & vitare cupiunt. Rogamus igitur Carit. V. & amanter & diligenter, ne se incitari sinat contra partem ciuitatis, quæ Ecclesias recte constitui cupit, nec adiuuet eorum iracundiam, qui ciuilem sanguinem haurire cupiunt. Nam hæc causa qualiscunq; videtur, certe nec potest nec debet promiscuis & multis ciuium cedibus diiudicari. Nec vero dubitamus quin Carit. V. pro sua virtute digna bono principe, maxime detestetur ciuilem crudelitatem, & velit vicinam ciuitatem tranquillam esse. Sic autem retineri tranquillitas potest, Si neutra pars alteram vi impediat. Hæc mutua moderatio, maximeq; ciuilis multis Germaniæ ciuitatibus salutaris fuit. In quibus paulatim veritate clarius illucescente, & dissensio mitigata est, & sanatæ sunt voluntates. In his locis si violenta consilia initio tentata essent, omnia funditus periissent. Semper in ciuium dissensionibus, magis salutaria fuerunt mitia consilia, quam violenta. Quare Car. V. pro sua bonitate & sapientia annitatur, vt tali moderatione consulatur saluti ciuitatis Metensis. Hæc vt scriberemus ad Car. V. non priuato affectu, sed honestissimis & publicis causis adducti sumus, vt honesti & innoctentes homines quorum multi pro-
pter

pter virtutem & facultates, patriæ magno præsidio atq; ornamento sunt, Et vero timore Dei mouentur ad quærendam de Christo saluatore puram doctrinam, sint in tuto. Tales principum beneuolentia tuendi sunt. Ideo rogamus vt has nostras literas Car. V. in optimam partem accipiat. Nosq; nostra officia caritati vestræ summa cum beneuolentia deferimus. Bene & fœliciter valeat Car. V. Datum 7. Nouemb. 1542.

REVERENDISSIMIS
DOMINIS, EE REVERENDIS
Patribus, Cardinalibus & Episcopis in Syn-
odo Tridentina congrega-
tis, S. D.

Reuerendissimi Domini, & Reuerendi Patres.
Cùm Cæsarea Maiestas, Dominus noster Clementissimus, voluerit, vt ex Ecclesijs nostræ ditionis aliqui ad synodum mitterentur, nolimus eius voluntati deesse, præsertim cum & nos optemus veritatem illustrari propter gloriam Dei, & piam ac perpetuam in Ecclesijs totius orbis terrarum concordiam constitui, quæ duæ res omnibus hominibus maxime expetendæ sunt, præcipue vero ijs, quibus Deus gubernationem commendauit. Misimus igitur ad synodum hos tres viros, Erasmus Sacercium, Valentinum Pacæum, & Philip-pum Melanchthonem, quorum & mores honestos esse, & studium pacis & publicæ concordia prædicari intelligimus. Hos vt benigne audiat publicè exponentes, quid de omnibus controuersijs communi consensu Ecclesiæ nostræ doceant, petimus. Ipsis etiam mandata dedimus, vt pie, placide, &

de, & sine priuatis affectibus recitent & declarent
doctrinam, quam existimant vniuersæ Ecclesiæ ne-
cessariam. Scitis autem pro vestra excellenti sa-
pientia, hos vestros confessus intueri Deum iudi-
cem, & vniuersam Ecclesiam in cœlo & in terra ex-
petere: primum vt gloria filij Dei vere illustretur,
& sauciæ conscientiæ sanentur, & vera eis inuoca-
tio monstretur: Deinde, vt talis concordia con-
stituatur, in qua non stabiliantur veteres abusus.
Neq; enim grata Deo, neq; durabilis esse tranquil-
litas sine veritate potest. Negari autem non po-
test, manifestos quosdam errores & non leuia vi-
cia in Ecclesiam irrepsisse, quæ disidijs huius tem-
poris occasionem præbuerunt. De his tantis re-
bus & audire vos Ecclesiarum querelas & remedia
salutaria quærere, sapientia vestra dignum est.
Oramus autem filium Dei dominum nostrum Ie-
sum Christum, vt vulneribus Ecclesiæ veteribus &
recentibus medeatur ipse, sicut Samaritanum il-
lum ait saucio viatori opem tulisse, qua imagine
cum sese exprimeret, ostendit se affici nostris cala-
mitatibus, & velle se nobis opitulari. Bene

valete. Datæ Dresdæ Idib. Ian.

Anno M. D. LII.

Mauricius Dei Gratia Dux Saxoniæ,
Electoꝝ, Landgrafius Turingiæ,
Marchio Mysniæ, &c.

L I P S I A E

Excudebat Ernestus Vœgelin
Constantiensis.

ANNO 1566.



